


Библия пэ влахицко
романи шыб



Eastern Vlakh Romani

**Библия пэ влахицко романи шыб
Eastern Vlakh Romani**

copyright © 2021 Pioneer Bible Translators

Language: Romani

Dialect: Vlakh

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 22 Feb 2024 from source files dated 15 Apr 2023

ab46a001-b22a-5879-ae4a-27ace52a2042

Contents

Руфъ	1
Иона	6
Лукастар	9
Рындоря	53

О лил палай Руфь

О Элимелехо и лэско иири пэрэладэн андо Моаво

1 Андэ кола деса, кала хулаинас э сындомаря, андэ кодыя пхув тердяпэ бок. Ех мануш анда Вифлеемо, кай андэ Иудея, пэрэжыля андэ Моавицко пхув екхтанэ ла ромняса тай дуе шавэнца. **2** Кадылэ манушэс акхарэнас Элимелехо, лэстеря ромня — Наоми, ай лэстерэ дуе шавэн — Махлоно тай Килионо. Вонэ саслэ аракхадэ андо Эфрато — анда Вифлеемо, кай исын андэ Иудея. Вонэ авилэ андэ Моавицко пхув, кай тэ пожувэн котэ.

3 О Элимелехо, о ром ла Наомияко, муля, ивой ашыляпэ екхжэни лэ дуе шавэнца. **4** Вонэ линэ пэсти ромнян моавитянкэн — екха акхарэнас Орпа, ай авря Руфь. Кала прожылэ паша э дэш бэрша, **5** о Махлоно тай о Килионо кадя жэ мулинэ, э Наоми ашыляпэ би ромэсти и би шавэнди.

Э Наоми рисайвэл андо Вифлеемо

6 Кала пэ Моавицки маля э Наоми угангия, со о РАЙ сгындосардя пала Пэсти мануша тай дя лэнди хамос, вой закамля тэ рисайвэл андай Моавицко пхув черэ. Ласа жылэ и лати дуй боря. **7** Э Наоми мэкляпэ андо дром, и лати боря жылэ ласа. Па дром андэ Иудея **8** э Наоми пхэндя пэстерэ дуен борянди:

— Рисайвэн черэ каринг тумарэ чяче йиря! Мэк о РАЙ авэл тынгуно каринг тумэндэ, сар и тумэ саслэ лашэ важ тумарэ рома, савэ мулинэ, и важ мандэ. **9** Мэк о РАЙ дэл зор кожнонати тумэндар тэ аракхэл бах андо чер аврэ ромэско.

Вой чюмидэлас лэн, сар ля тэ жалтар, ай вонэ заголосусардэ, заровлэ **10** и пхэндэ лати:

— Амэ рисайвэса туса каринг терэ мануша.

11 Э Наоми пхэндя:

— Щеялэ, рисайвэн черэ. Пала со тумэ тэ жан манца? Мэ со, анава инке шавэн, савэ авэна тумэнди ромэнца? **12** Рисайвэн черэ, мэрнэ щея, мэ сым пхури, кай тэ жав пала ром. Кала мэ и гындоя, со мандэ инке исын надежда, — сар кай андэ кадыя рят мэ тэ совав ромэса, ай тунче тэ анав шавэн, — **13** сар тумэнди трэбуй тэ аштэрэн, кала вонэ вибарёна? Трэбуй ли тумэнди тэ ашэнпэ ся кадыя время би ромэнди?! Най, мэрнэ щея. Мэрни грижа фартэ пхари важ тумэндэ, о РАЙ шутя пэр мандэ Пэсти холи.

14 Вонэ упалэ заголосусардэ и заровлэ. Э Орпа чюмидя ла сасуя, сар ля тэ жалтар, ай э Руфь отпхэндяпэ тэ жалтар.

15 Э Наоми пхэндя:

— Дикх, тери ятровка рисайвэл каринг пэстерэ мануша тай каринг пэсти дэвэла.

Жа и ту ласа.

16 Ай э Руфь пхэндя:

— На манг ман тэ ашавав тут и тэ рисайвав. Мэ жава инчя, каринг жаса ту, и ашавапэ котэ, кай ту ашэсэпэ, терэ мануша авэна мэрнэ мануша, теро Дэл авэла мэрно Дэвэл. **17** Кай ту мэрэса, котэ и мэ мэрава, тай котэ мэк ман и прахона. Мэк кадя тай кадя тэ марэл ман о РАЙ, кати ех о мэrimos розашавэла амэн туса!

18 Э Наоми поля, кай э Руфь састэс приля андо ди тэ жал ласа, и парашыля тэ отбишалэл ла. **19** Вонэ жанас дужэнэ жы каринг о Вифлеемо. Кала вонэ авилэ андо Вифлеемо, андо форо тердяпэ бари дума.

— Када э Наоми?! — пушэнас э жувля. **20** Ай э Наоми пхэндя лэнди:

— На акхарэн ман Наоми, ай пхэнэн Mara*, пала кода со о Майзорало тердя мэрно жувимос кэрко! **21** Кала мэ жылэмстар, мандэ сас ся, ай о РАЙ андя ман

* **1:20** 1.20 Пхуррано еврейско алар «Наоми» исын «драго», ай алар «Мара» исын «кэрки».

палпалэ ни соза. Пала со ж тумэ акхарэн ман Наоми? О РАЙ сындосардя ман, о Майзорало бишалдя манди грижа.

²² Кадя рисайля э Наоми, и ласа андай Моавицко пхув авиля лати бори, э Руфь моавитянка. Вонэ авиле андо Вифлеемо, кала авиля время тэ стидэн о ячмэн.

2

Э Руфь дикхэллэ лэ Боазоса

¹ Кай о ром ла Наомияко сас родо, савэс акхарэнас о Боазо. Вов сас мануш ашундо, андай кодыя жэ порода, сар и о Элимелехо. ² Э Руфь моавитянка пхэндяла Наомияти:

— Мэк ман, мэ жава андэ маля тэ подтидав э колосуря пала колэс манушэс, андэ кастерэ якха аракхава тынгимос.

Э Наоми пхэндя:

— Жа, мэрни щей.

³ Э Руфь жыля и ля тэ подтидэл палай жнецууря э колосуря, савэ пэрэнас пэ мал. Тердяпэ кадя, кай кодыя мал сас лэ Боазости, саво сас анда порода лэ Элимелехости.

⁴ Андэ кодыва жэ дес екхжэно о Боазо авиля инчя анда Вифлеемо.

— Тэ авэл о РАЙ тумэнца! — пхэндя вов лэ жнецонэнди.

— Бахтало ту сан лэ РАЕСТАР! — пхэндэ вонэ лэсти.

⁵ О Боазо пушля кай о бутярно, саво сас барэдэр пэ жнецууря:

— Кастери када щей, кодыя тэрни жувли?

⁶ О бутярно, саво сас барэдэр пэ жнецууря, пхэндя:

— Када моавитянка, сави авиля ла Наомияса андай Моавицко пхув. ⁷ Вой пхэндя: «Мэк ман, мэ лава тэ подтидав палай жнецууря э колосуря машкарай снопуря». Вой авиля тэсара и ашыляпэ катэ жы кала времятэ; кати найбут отчиеля андэ вушал.

⁸ Тунче о Боазо пхэндя ла Руфяти:

— Щей мэрни, ашун ман. На жа тэ подтидэс э колосуря пэ авэр мал, на жатар катар, ай ашпэ мэрнэ бутярняса. ⁹ Дикх, кай терэн бути э жнецууря, и жа палай бутярнэ. Мэ припхэндэм мэрнэ манушэнди, тэ на цыпин пэр тутэ. Сар закамэса тэ пэс, поджа и пи андай кхорэ, савэ пхэрдэ мэрнэ бутярнэ.

¹⁰ Вой пэля тэлэ, тэлия лэсти жы ла пхуятэ и пхэндя:

— Пала со мэ аракхлем тынгимос андэ терэ якха, состар ту терэс кацаво лашымос манди, мэ жэ авря пхуятар?

¹¹ О Боазо пхэндя лати:

— Манди роспхэндэ пала ся, со ту тердян важ тери сасуи, кала муля теро ром: сар ту ашадян ла да и лэ дадэс, ашадян о тхан, кай аракхадилян, и авилян каринг э мануша, савэн ту на ганэсас данглал. ¹² Мэк о РАЙ дэл тути бах пала кода, со ту стердян, и мэк пхэрдо дэл тути о РАЙ, О Дэл лэ Израилеско, каринг Саво ту авилян тэ гарадёс тала Лэсти пхака.

¹³ Вой пхэндя:

— Тэ авав мэ и майанглэ тэ аракхав тынгимос англа терэ якха, мэрно рай. Ту улян ман, теря копэльница, пхэндян манди лашэ алова, хоть мэ жэ и най терэ копэльницэндар.

¹⁴ Кала авиля э время тэ хан, о Боазо пхэндя ла Руфяти:

— Поджа кардэ, бол о котор марно теро андо шукло чехыри и ха.

Кала вой бэшля пашай э жнецууря, вов дя лати прыжымэ ворзо. Вой халия, чалилия, и латэ инке ашыляпэ. ¹⁵ Тунче э Руфь жыля тэ подтидэл э колосуря, ай о Боазо припхэндя пэстэрэ манушэнди:

— Мэк вой тидэл и машкарай снопуря, на цыпин пэр латэ. ¹⁶ Ай инке отшон важ латэ э колосуря андай снопуря тай ашавэн лати, мэк подтидэл, ай тумэ на дошалярэн ла.

17 Жы каринг о вэчero э Руфь подтидэлас э колосуря пэ мал. Кала жэвой обмардя э колосуря, стидяпэ каринг йипаш гоно^{*} о ячмэнo. **18** Вой ля лэс, андя андо форо, и лати сасуи додикхля, сар бутвой стида. Тунче вой дорэсля кода, со ашыляяпэ латэ лэ хамастар, и отдяла Наомияти.

19 Э сасуи пушля латар:

— Кай жэ ту тидэсас? Кай ту тердян бути адес? Тэ авэл бахтало кодыва мануш, саво шутя тут сама.

Э Руфь роспхэндяла сасуяти, кастэ пэ малвой тердя бути.

— Лэ манушэс, пэ мал кастэ мэ адес тердэм бути, акхарэн Боазо, — пхэндявой.

20 — Мэк РАЙ дэла лэсти бахт! — пхэндя э Наоми пэстя боряти. — Вов на ашадя би тынгимаско ни лэ жундэн, ни лэ мулэн!

Ай тунче инке пхэндя:

— Кадыва мануш — амаро пашэ родо, во екх амарэ фиримарэндар.

21 Э Руфь моавитянка пхэндя:

— Вов жэ пхэндя манди: «Ашпэ екхтанэ мэрнэ бутярнэнца, жы кай вонэ на злена ся мэрно ворзо».

22 Э Наоми пхэндяла Руфяти, пэстерья боряти:

— Мэрни щей, драго, сар кай ту авэса лэстэрэ бутярнянца. Тунче нико на цыпия пэр тутэ пэ авэр мал.

23 Э Руфь ритярдёлас екхэтанэ лэ Боазостерэ бутярнянца и подтидэлас э колосуря, жы кола времятэ, кала ся постидэ о ячмэно тай э див. Ай жувэласвой тунче ла сасуяса.

3

Э Руфь и о Боазо по гумэно

1 Э Наоми пхэндя пэстерья боряти:

— Мэрни щей, мэ камав тэ подродав тути лашо састо тхан. **2** Гэн акэ, амаро родо о Боазо, савэстэ лэ бутярнянца ту санас андэ мал, адес увэчери лэла тэ вужарэл о ячмэно по гумэно. **3** Ту халадю, макпэ, вурядю и жа по гумэно, ай лэ Боазости на сыкадю, жы покэ вов хала и пэла. **4** Роздикх, кай вов пэрэла тэ совэл, тунче поджа, розушарав лэстэ катар э пэрнэ о дияло и пэр. Вов пхэнэла тути, со тэ терэс майянглэ.

5 Э Руфь пхэндя:

— Мэ стерава ся, сар ту пхэндян.

6 Вой жыля по гумэно и стердя ся, сар припхэндя лати э сасуи.

7 О Боазо халя тай пиля, и пэля тэ совэл катар э кучалэ ворзоса. Э Руфь полокорэ поджыля, розушарадя лэстэ катар э пэрнэ о дияло и пэла. **8** Андэ машкар рят вовля тэ мишкпэ, обрисайля и додикхля, со катар лэсти пэрнэ пашлёт жувли.

9 — Ко ту? — пушля вов.

Вой пхэндя:

— Мэ э Руфь, тери копэльница, — пхэндявой. — Лэ ман пала пэстэ^{*}, ту амаро фириими.

10 Вов пхэндя лати:

— Тэ дэл о РАЙ тути бахт, мэрни щей! Ту иксхатар терэс майбаро лашымос колэстар, саво сас данглал: на лян тэ родэс тути тэрнэс — ни чёрэс, ни барвалэс.

11 На дара, мэрни щей, мэ стерава ся, пала со ту ман мангэс. Андэ кадыва форо саворэ ганэн, кай ту лашы жувли. **12** Када чячес, мэ тумаро родо, но исын инке родо, майпашэ мандар. **13** Ашпэ пэ рят катэ, ай тэся, сар вов закамэла тэ авэл тумаро фириими — драго, мэк авэл. Ай сар вов на закамэла, тунче, солахав лэ РАЕСА, када терава мэ. Сов катэ жы каринг э тэсара.

* **2:17** 2.17 Пэ пхуррано еврейско шыб «екх эфа». Екх эфа — пашай 22 литра. * **3:9** 3.9 Пэ пхуррано еврейско шыб алана: «Ваздэ тери э пхак пэ тери копэльница».

14 Вой сутя катар лэсти пэрнэ жы каринг э тэсара, и ушия жы колэстэ, сар екх мануш тэ додикхэл аврэс. О Боазо гындояс: «Мэк нико на ганэн, кай жувли авилясас по гумэн». **15** Вов пхэндя лати:

— Дэ теро косно и подритяр лэс.

Э Руфь ростэлисардя о косно, и о Боазо шутя андо косно баро гоно[†] о ячмэно. Вов тходя лати пэ пхикэ о ячмэно и жылятар андо форо.

16 Кала э Руфь авиля каринг э сасуи, э Наоми пушля латар:

— Сар ту, мэрни щей?

Э Руфь роспхэндя пала кода ся, со тердя лати о Боазо. **17** И инке пхэндя:

— Вов дя манди баро гоно ячмэно и пхэндя: «На рисав каринг тери сасуи шушэ вастэнца».

18 Э Наоми пхэндя:

— Акан, мэрни щей, подаштэр, йито уганэса, соза э дила стерэлапэ. Кадыва мануш на улэлапэ, покэ адес жэ на стерэла сяй дила.

4

О Боазо лэл ла Руфь пала пэстэ

1 Ай о Боазо жыля и бэшля катар лэ форости будара. И дикхэл: жал кодыва родо, пала касть вов пхэнэлас. О Боазо акхардя лэс и пхэндя:

— Поджа кардэ, амал. Прибэш.

Кодыва поджыля и бэшля.

2 Андэ форо о Боазо акхардя дэшэ барэдэра манушэн и пхэндя лэнди:

— Бэшэн катэ.

Вонэ бэшлэ. **3** О Боазо пхэндя колэ родости:

— Дума жал палай мал лэ Элимелехости, амарэ родости. Э Наоми рисайля андай Моавицко пхув и битинэл э мал. **4** Мэ погиндосадэм, кай трэбуй тэ пхэнав тути пала када. Ту трэбуй тэ витинэс кадыя мал англа саворэ, ко бэшэл, и англа э барэдэра амарэн манушэн. Камэс, витин, ай на камэс, пхэн манди, кай мэ тэ ганав. О чячё витинимос ашэллэ пала тутэ, ту англуюно, ай мэ тунче пала тутэ.

— Мэ витинава, — пхэндя кодыва.

5 О Боазо пхэндя:

— Сар кай ту тинэса э мал кай э Наоми, ту кадя жэ трэбуй тэ лэс пала тутэ ла Руфя моавитянка, ла пхивля, соб латерэ бэяцэ тэ авэн хуляя пэ лэско хаббэ.

6 Тунче кодыва пхэндя:

— Най, мэ на витинав кадыя мал. Мэ дарав, со кадя римосарава мэрно хаббэ. Витин фэдэр ту, мэ на витинав.

7 (Андэ пхураны время кай э израильянуря сас обычай, кала пэрэдэнас по чячё витинимос, соб тэ састьярэн о допхэнимос, о мануш излэлас пар пэстэ э сандали и отдэлас аврэсти. Кадя э израильянуря састьярнаас о допхэнимос.)

8 — Тин ту, — пхэндя о родо лэ Боазости и изля о сандали.

9 О Боазо пхэндя лэ барэдэрэнди тай саворэнди, ко бэшэлас:

— Адес тумэ дикхэн и шунэн, икхатар мэ тинав кай э Наоми ся, со сас кай о Элимелехо, Килионо и кай о Махлоно. **10** Кадя жэ и ла Руфя моавитянка, ла пхивля лэ Махлоностеря, мэ лав пала мандэ, кай э бэяцэ лэ Махлоности тэ авэн хуляя пэ лэско хаббэ, и кай тэ на пэрэшындэл лэско родо анда амаро форо. Адес тумэ екхжэнэ дикхэн и шунэн када!

11 Тунче саворэ, ко сас катар э будара тай э барэдэра пхэндэ:

— Кадя амэ дикхас и шунас! Мэк о РАЙ дэла кала жувляти, сави зажал андэ торо чер, бут бэяцэн. Сар Вов дя бут бэяцэн ла Рахиляти тай ла Лияти, савэндар аракхадилэ ся э израильски мануша! Зорало ав андо Эфрато тай гангло андо

[†] **3:15** 3.15 Андо пхурано еврейско лил тердён алава: «шов (паясля) ячмэно».

Вифлеемо! ¹² Мэк черэз э терэ бэяцэн, савэн о РАЙ дэла тути кала тэрня жувлятар, тери порода авэла, сар э порода кай о Парэцо, савэс э Тамар аракхадя лэ Иудасти!

Э порода лэ тхагарэсти лэ Давидости

¹³ О Боазо ля пала пэстэ ла Руфя. Вов сутя ласа, ай о РАЙ дя лати тэ авэл пхари, и вой андя шаворэс.

¹⁴ Э жувля пхэнэнас ла Наомияти:

— Бахтало о РАЙ, Саво дя тути фиримарес! Тэ ашарэлпэ вов машкара израильянуря! ¹⁵ Вов рисарэла тути э лош тай подритярэла тут андэ пхуранэ бэрша! Э бори тери, сави камэл тут, андя лэс! Вой важ тутэ фэдэр ефта шавэндар.

¹⁶ Э Наоми пхиравэлас лэ бэяtos пэ васт и дикхэлас пала лэстэ. ¹⁷ Ай э жувля, савэ жувэненас котэ, пхэнэнас:

— Шаворо аракхадиляпэ кай э Наоми.

Вонэ динэ лэсти о алэв Овидо. Вов ашыля дад лэ Иесеёско, саво сас о дад лэ Давидоско.

¹⁸ Акэ э порода лэ Фарецости: о Фарецо ашыля дадэса лэ Хецроноско, ¹⁹ о Хецроно ашыля дадэса лэ Рамоско, о Рамо ашыля дадэса лэ Аминадавоско, ²⁰ о Аминадаво ашыля дадэса лэ Нахшоноско, о Нахшоно ашыля дадэса лэ Салмоноско, ²¹ о Салмоно ашыля дадэса лэ Боазоско, о Боазо ашыля дадэса лэ Овидоско, ²² о Овидо ашыля дадэса лэ Иесеёско, о Иесеё ашыля дадэса лэ Давидоско.

Лил лэ Ионастар

О Иона нашэл Дэвлэстар

1 Кариk о Иона, лэ Амитаёско шаво, сас о алав лэ РАЕСТАР:

2 — Ущи, жа андо баро форо Ниневия тай роспхэн котэ о алав. Мандэ дожыля дума пала лэндерэ холятерэ дилэ.

3 Ай о Иона тидяпэ тэ нашэлтар лэ РАЕСТАР андо Таршишо. Вов авиля андэ Яфа, тай аракхля э барка, сави жаластар андо Таршишо. Вов потиндя важ о дром, вазгяяпэ пэ барка и лаглятар лэнца па паи, соп тэ нашэлтар лэ РАЕСТАР андо Таршишо.

4 Тунчэ о РАЙ бишалдя холяти балвал по баро паи. Вагляпэ кацаво зорало штормо, со э барка сас гата тэ розмардёллэ. **5** Саворэ морякуря пэрэдарайлэ, vonэ линэ тэ мангэнпэ кожно пэстерэ дэвлэсти. Vonэ пошутэ пай барка ся о паримос андо баро паи, соп тэ авэл майвушэро.

Ай англа када о Иона упрант змэкляяпэ тэлэ, пэля и састье засутя. **6** О барэдэр ла баркако авиля каринг о Иона и пхэндя:

— Со ж ту совэс? Ущи, акхар терэ Дэвлэс! Сар Вов шола пэр амэндэ само тай на дэла амэнди тэ хасайвас.

7 Тунчэ э морякуря пхэндэ екх екхэсти:

— Шам э врэжа, кай тэ ганас, пала кастэ пар амэндэ авиля кадыя бида. Vonэ шутэ э врэжа, ивой пэля по Иона.

8 Тунчэ э морякуря пхэндэ лэсти:

— Пхэн, пала кастэ пар амэндэ авиля кадыя бида? Соза залэспэ? Катар ту авилян? Савя пхувятар? Тай савэ манушэндар?

9 О Иона пхэндя:

— Мэ сым евреё, тэлював лэ РАЕСТИ, о Дэл лэ нэбоско, Саво стердя о баро паи тай э пхув.

10 О Иона роспхэндя лэнди, кай вов нашэлтар лэ РАЕСТАР. Калэ алавэндар vonэ фартэ пэрэдарайлэ и пхэндэ лэсти:

— Со ж ту када тердян?

11 Ай о баро паи ся ваздэласпэ майфартэ и майфартэ. Тунчэ vonэ пушлэ лэстар:

— Со амэ тэ терас туса, кай о баро паи тэ улэллэ?

Вов пхэндя лэнди:

12 — Ваздэн ман и шон андо баро паи, тунчэ вов улэлапэ. Мэ ганав, со када баро штормо авиля пэр тумэндэ черэз мандэ.

13 Э морякуря линэ анда ся зор тэ примардён каринг э риг ла пхувяти. Ай пэ када на хутилэлэс лэндэ зор, пала кода со о штормо фартэ ваздэласпэ. **14** Тунчэ vonэ линэ тэ мангэнпэ лэ РАЕСТИ:

— РАЙ, на мар амэн пала кода, со амэ умараса калэ манушэс. На стов пар амэндэ э дош, кай умарас найдошалэ манушэс. Ту РАЙ, тай Ту терэс кода, со Ту камэс.

15 Vonэ линэ тай шон лэ Ионас пай барка, и о холяко баро паи уляпэ. **16** Бари дар авиля лэндэ англа РАЙ, vonэ андэ жэртва и динэ РАЕСТИ алав.

2

О Иона мангэллэ Дэвлэс

1 О РАЙ бишалдя барэ машес, тэ накавэл лэ Ионас. О Иона сас трин дес и трин ратя андо йило лэ машеско. **2** Анда йило лэ машестар о Иона ля тэ мангэллэ лэ РАЕСТИ, пэстерэ Дэвлэсти. **3** О Иона пхэндя:

— Пала мэрни бида акхаравас мэ лэ РАЕС,
и Вов ашундя ман.
Анда машкар лэ мулэнго тхагаримос цыпияс,

- и Ту ашундян мэрно гласо.
- 4** Шувидян ман Ту само тэлэ,
андо ди лэ барэ паеско.
- О паи заболдя ман,
понадэ мандэ прожылэ саворэ Терэ волнэ.
- 5** Гындояспэ манди:
«Витрадян ман Терэ якхэндар.
Но най, мэ саекх дикхава Теро свынто Храмо».
- 6** О паи ушарадя ман,
дур сым андэ барэ пая,
тай э чяр лэ паести заболдя манди о шэро.
- 7** Само тэлэ, катар барён э плая, ужылэмтар мэ,
о засовуяра пхувяти запхандадилэ пала мандэ пэ ся времяя.
- Ай Ту РАЙ, мэрно Дэл,
вилян ман жундэс андай могыла!
- 8** Кала мэрно жувимос мудардёлас андэр мандэ,
мэ гындояс пала РАЙ,
тай мэрно мангимос дожыля каринг Тутэ,
андэ Теро свынто Храмо.
- 9** Кола, ко патял лэ хохавнэ дэвлэнди,
хасардэ о тынгимос, саво саслэ тэ лэн.
- 10** Ай мэрни жэртва Тути — мэрнэ дилия,
савэнца ашарав тут.
- Мэ ся стерава, андэ со солахаем.
О РАЙ анэл фиримос!
- 11** И прихэндя о РАЙ лэ машести, тэ вишункардэл андар пэстэ лэ Ионас пэ пхув.

3

О Иона пхэнэл о алав лэ Дэвлэско андэ Ниневия

- 1** И сас о алав лэ РАЕСТАР каринг о Иона до дуйто:
- 2** — Ущи, жа андо баро форо Ниневия тай роспхэн котэ о алав, саво Мэ дэм тути.
- 3** О Иона жыля па дром андэ Ниневия кадя, сар прихэндя лэсти о РАЙ. Э Ниневия сас баро форо кай о Дэл, соп тэ пэрэжал лэс анда екх риг андэ авэр, сас трэбуй пэ када трин дес. **4** О Иона зажыля андо форо и ся о дес пхирэлас и роспхэнэлас лэ манушэнди:
- «Черэз э саранда деса о форо Ниневия авэла росшту».
- 5** Э мануша андэ Ниневия патяе лэ Дэвлэстерэ алавэнди. И саворэ вонэ, лэ цыкнэндар жы каринг э барэ, линэ нисо тэ на хан и тэ пэн, тай саворэ линэ пэр пэстэ лэ гонэстери йида.
- 6** Кала дожыля о алав каринг о тхагар ла Ниневияко, вов ушиля па пэско троно, изля пар пэстэ э тхагарицко йида, ля пэр пэстэ лэ гонэстери йида тай бэшля по прахо. **7** Тунче о тхагар искрисардя лил и розбишалдя лэс па ся форо Ниневия.
- «Прихэнэн о тхагар и лэстэрэ барэдэра:
- Мэк э мануша нисо на хан и на пэн. Кадя жэ и гуруня, бакрэ тай э бузнэ, тэ на пхирэн пай маля, тэ на хан и тэ на пэн. **8** Саворэ мануша тай сако хулаимос трэбуй тэ лэн пэр пэстэ лэ гонэстери йида. Мэк кажно анда ся зор мангэл лэ Дэвлэс. Мэк кажно обринпэ пэстэрэ найлашэ дромэндар тай тэ на терэн холятерэ дила. **9** Ко ганэн? Можэ, о Дэл улэла Пэсти холи, тай потынгоя амэн, тай на домэкэла тэ похасайвас.
- 10** Сар о Дэл дикхля, кай вонэ парудилэ тай отжылэ пай пэсти бэзэхалэ дрома, тунче тынгосардя лэн и на бишалдя кодыя бида, сави пхэндя тэ бишалэл.

4

О Дэл сытряэл лэ Ионас

1 Ай о Иона холяйля, и лэсти када фартэ на чялия. **2** Вов ля тэ мангэлпэ лэ РАЕСТИ:

— О РАЙ, най пала када ли мэ пхэнавас, кала сымас инке черэ? Важ када мэ и нашлэмастар андо Таршышо. Мэ ганав, кай Ту Дэл тынгуно и лашо, Ту бут тэрпис, най йито холяйвэс и барвало сан по камлимос тай на камэс тэ бишалэл э бида.

3 РАЙ, ай акана залэ мандар мэрно жувимос. Фэдэр мэ тэ мэрав, сар тэ жував.

4 О РАЙ пхэндя лэсти:

— Трэбуй ли тути кадя тэ холяйвэс?

5 О Иона вижыля анда форо и бэшля каринг о востоко лэ форостар. Вов стердя пэсти катуна, бэшля андэ вушал и ля таштряэл, со терлапэ лэ фороса. **6** О РАЙ Дэл стердя кадя, кай вибариля бари чяр, сави взгляпэ понадэ Иона, соп э вушал понадэ лэско шэро тэ улэл лэсти холи. Вов сас фартэ лошало кала чяряти. **7** Ай каринг э тэсара пэ авэр дес о Дэл бишалдя лэ чермэс. О чермо потхаля э бари чяр, ивой зашутия. **8** Кала ушия о кхам, о Дэл бишалдя пхабарди восточно балвал, тай о кхам ля тэ пхабарэл о шэро лэ Ионаско кадя, со вов замэгнисайля. Вов закамля тэ мэрэл и пхэндя:

— Фэдэр мэ тэ мэрав, сар тэ жував.

9 Ай о Дэл пхэндя лэ Ионасти:

— Трэбуй ли тути кадя тэ холяйвэс палай бари чяр?

— Трэбуй, — пхэндя о Иона, — най кати тэ холяйвав, ай и тэ мэрав.

10 О РАЙ пхэндя:

— Тути тынг э чяр, пала сави ту ни на дикхлян, ни на барядян. Вой важ екх рят вибариля, тай важ екх рят и хасайля. **11** Манди ли тэ на тынгой о боро форо Ниневия, кай бут ското тай майбут, сар шэл биш пхангля мануша, савэ на полэн, кай о лашымос, ай кай о вырыто?

Радосаво Лав Лукастар

1-3 Пативало Феофило, бут мануша линэ тэ стидэн и тэ запистросарэн роспхэнимос пала кода, со сас. Када роспхэндэ амэнди мануша, савэ майанглал дикхэнас вся пэстирэ якхэнца тай ашыле бутярнэ Лавэстирэ. Важ кода мэ тховдэм андо води мишто вся тэ ужанав, со сас майанглал, и ех пала авэр тэ запистросарав тути. **4** Тунчи ту полэса: кода, со ту ашундян, исин чячимос.

Ангело пхэнэл Захариясти, со бэяндёла лэстэ шаво

5 Андэ деса, кала андэ Иудея сас тхагараса Иродо, сас мануш, савэс акхарэнас Захария, андай рашая Авиястирэ стидимастар, и лэстэ сас ромни андав родо Аароноско, акхарэнас ла Елизавета. **6** Онэ лэдүй сас жужэ англав Дэл, жувэнас пав всаворо запхэнимос Раеско бидошако. **7** Лэндэ на сас бэяцэн, колэстар со Елизавета сас бибэяцэндири, и онэ лэдүй сас андэ бэрша пхурэ.

8 Ехвар авиля връяма рашаенди лэстирэ стидимастар тэ терэл бути англав Дэл. **9** Сар сас прилито машкар рашая, онэ шутэ жребиё, и прижыляпэ Захариясти тэ зажал андо храмо лэ Раеско тэ пхабарэл ладано. **10** Андэ кодья ж връяма, кала вов пхабарэлас ладано, всаворэ мануша мангэнаспэ Дэвлэс аври. **11** Тунчи вов удикхля ангелос Раестирэс, саво тэрдёлас пай право риг лэ жэртвеникоско, кай пхаболас о ладано. **12** Захария сар удикхля лэс, бари дар авиля пэр лэстэ, и вов на жангля, со тэ терэл. **13** Ангело пхэндя лэсти:

— На дара, Захария! Ашундя о Дэл мангимос тиро. И ромни тири, Елизавета, бэянэла тути шаворэс, и акхарэса лэс Иоано. **14** Авэла тути баро радомос, и бут мануша авэна тэ радонпэ, кай вов бэяндия. **15** Вов авэла баро англав Рай, на авэла тэ пэл ни мол, ни матимаско пимо и пхэрдёла Свэнто Духоса майанглал, сар вов бэяндёла. **16** Бутэн Израилёстирэ шавэн вов рисарэла палпалэ кав лэнго Рай о Дэл **17** и авэла тэ жал англав Лэстэ андо духо и зор Илиястири, кай тэ рисарэл и водя лэ дадэндирэ кай лэнди бэяцэ, и найкандунэн кав гындо чячимастирэн манушэн, кай тэ гытосарэ манушэн, кала авэла о Рай Дэл.

18 Захария пхэндя ангелости:

— Сар мэ ужанава када? Мэ пхуро, тай ромни мэрни найтэрни.

19 Ангело пхэндя лэсти:

— Мэ Гавриило, саво тэрдював англав Дэл, бишалдо тэ дав дума туса и тэ пхэнав тути кадва радосаво лав. **20** Акэ, ту авэса муту и на дэса дума кай кодва дес, кала када вся авэла, важ кода со ту на патяйлян мэрнэ лавэнди, савэ терэнапэ андэ пэсти връяма.

21 Андэ кодья връяма мануша ажутярэнас Захарияс и дивонаспэ, состар вов бут връяма на выжалас андав храмо. **22** Кала Захария выжыля котар, вов на дэлас дума, и мануша полинэ, со вов андо храмо варисо дикхля. Вов сикавэлас вастэнца лэнди и ашэласпэ муту.

23 А сар прожыле кола деса, кала вов терэлас рашаендири бути, тунчи рисайля пэстэ черэ. **24** Прожыля връяма, Елизавета, и ромни лэстири, ашыля пхари. Панч шон вой гарадёлас манушэндэр и пхэнэлас:

25 — Акэ, со стердя манди Рай Дэл андэ кадэла деса, кала Вов обрисардя мандэ пэстирэ якха, кай тэ злэл пар мандэ о лажавимос мэрно англай мануша!

Лав, со бэяндёла Иоано

26 Кала Елизавета сас шов шон пхари, о Дэл бишалдя ангелос Гавриилос андо форо галилейско, саво акхарэлпэ Назарето, **27** кай щиёры, савя акхарэнас Мария. Вой дя лав тэ жал палав ром палав Иосифо, саво сас андав родо лэ Давидоско.

28 Ангело авиля латэ и пхэндя:

— Тэ авэс бахтали! Тути дяпэ мищимос! О Рай Дэл туса!

29 Мария на жангля, со тэ пхэнэл, и гындолас, важ со вов кади пхэндя. **30** Ангело пхэндя:

— На дара, Мария! Ту аракхлян мищимос кав Дэл! **31** Акэ, ту авэса пхари, и бэянэса Шавэс, и акхарэса Лэс Иисусо. **32** Вов авэла баро, и Лэс акхарэна Шаво Майбарэско. Рай Дэл дэла Лэсти троно Давидоско, лэ прапапос Лэстирэс. **33** Вов по вако авэла Тхагараса англав родо Иаковоско, и тхагаримос Лэско никала на пэрэашэла тэ авэл.

34 Мария пхэндя ангелости:

— Сар када авэла? Мэ инке на сымас палав ром!

35 Ангело пхэндя лати:

— Свэнто Духо сжала пэр тутэ, и зор Майбарэско ушарэла тут, и свэнто Бэято, Саво тутэ бэяндёла, акхарэлапэ Шаво Дэвлэско. **36** Акэ Елизавета андав родо тиро, палай сави пхэнэнас, со латэ на авэна бэяцэ, подикх, вой шовто шон пхари. Андо пхуримос лако бэяндёла латэ шаво. **37** О Дэл терэла вся, со Вов закамэла.

38 Пхэндя Мария:

— Мэ бутярни Рае Дэвлэстири. Мэк авэла манди, сар ту пхэндян.
И ангело отжыля латар.

Мария авиля кай Елизавета

39 Андэ кадэла деса Мария вшиля и сыго жыля андо форо, саво сас андо плаенго тхан Иудеяко. **40** Вой зажыля андо чер кав Захария и пхэндя ла Елизаветати:

— Тэ авэс бахтали!

41 Кала Елизавета ашундя лава Мариятирэ, подхукля о бэято андэ Елизавета, и пхэрдиля вой Свэнто Духоса. **42** Вой зацыписайля фартэ гласоса и пхэндя:

— Тут авэна тэ лашарэн майбут аврэ жувляндар! И лашарэна тирэ Бэято, Савэс ту пхиравэс! **43** Сости манди када, со мандэ авиля дэй мэрнэ Рае Дэвлэстири?

44 Кала мэ ашундэм, сар ту пхэндян манди, тэ авав бахтали, подхукля андэр мандэ о бэято радомостар. **45** Бахтали кодья, сави патяйля, со терэлапэ кода, со пхэндя лати Рай Дэл!

46 И пхэндя Мария:

— Лашарэл о води мэрно лэ Рае Дэвлэс.

47 И радосайля о духо мэрно палав Дэл,
Фэрисаримари мэрно.

48 Вов удикхля, со мэ цэкни бутярни Лэстири.

Акала врятатар всаворэ родоря
авэна тэ акхарэн ман бахталяса.

49 Со зорало Дэл тердя манди баро рындо,
и свэнто алав Лэско!

50 Тангимос Лэско андэ всаворэ родоря,
ко пативаса дарал Лэс.

51 Вов тердя барэ рындоря Пэстирэ зоралэ вастэса,
рострадя колэн, савэ пхутярдэ годяса и водеса,

52 Сшута раен пай лэндирэ троноря
и вазгяя упрэ цэнэн машкар мануша.

53 Бокхалэн пхэрдярдя мищимаса
и барвалэн отмекля нисоса.

54-55 Вов сэрэсардя, со пхэнэлас лэ дадэнди,
лэ Авраамости и лэстирэ бэяцэнди,
тэ авэл тангимаско по вако,
и подритярдя Израилёс, Пэстирэс бутярнэс.

56 Мария сас лэ Елизаветаса варикай трин шон и рисайля андо пэско чер.

Сар бэяндила Иоано

57 Кала авиля вряма, Елизавета бэяндя шаворэс. **58** Ашундэ мануша, савэ жувэнас паша лэндэ, и о родо лако, со дя Рай Дэл о тангимос Пэско лати, и

радонааспэ ласа. ⁵⁹ По охто дес онэ авиле тэ обшынэн лэ бэятос и камле тэ акхарэн лэс, сар акхарэн лэсти дадэс — Захария, ⁶⁰ а лэстири дэй пхэндя:

— Нэт, акхараса лэс Иоаноса.

⁶¹ И пхэндэ лати:

— Никас на сас андо родо тиро, савэс акхарэнас кадя.

⁶² И пушэнас, сикавэнас лэ вастэнца кав лэско дад, сар вов камэл тэ акхарэл лэ бэятос. ⁶³ Захария мангля каштуни сандёры и пистросардя лэнди: «Алав лэско — Иоано». Всаворэ дивосайле.

⁶⁴ Андэ кодья ж връяма отпхэрнэпэ лэстирэ ушта, и вов ля тэ дэл дума и тэ лашарэл Дэвлэс. ⁶⁵ И сас дар пэ всаворэ, ко жувэлас паша лэндэ, и роспхэнэнас пала када пав всаворэ плаендирэ тхана Иудеятирэ. ⁶⁶ Всаворэ, ко ашундя када, тховдэ андо води пэско и пхэнэнас:

— Каса авэла када бэято?

И о васт лэ Рае Дэвлэско сас лэса.

Захария пхэнэл лав Дэвлэстар

⁶⁷ О Захария, дад лэско, пхэрдиля Свэнто Духоса и пхэндя лав Дэвлэстар:

⁶⁸ — Бахтало исин Рай, Дэл Израилэско,
со авиля кай пэстирэ мануша и вытиндя лэн.

⁶⁹ Бишалдя амэнди зоралэс Фэрисаримарес
андав чер и родо Давидоско, бутярнэс Пэстирэс,

⁷⁰ сар бут бэрша палпалэ пхэндя
уштэнца свэнтонэ пророкэнца Пэстирэнца,

⁷¹ со фэрисарэла амэн лэ вражымарендар амарэндар
и вастэндар кодэлэндар, савэ амэн на камэн.

⁷² Вов тангосардя амарэ дадэн
и сэрэсардя Пэско свэнто завето,

⁷³ сар Вов солахадя амарэ дадэсти Авраамости,
⁷⁴ со Вов фэрисарэла амэн лэ вастэндар амарэ вражымарендар,
кай амэ бидараю тэ терас бути Лэсти,
⁷⁵ тэ жувас англав Лэстэ свэнто и жужо всаворо пэско жувимос.

⁷⁶ И тут, бэято, акхарэна пророкоса Майбарэстирэса,
колэсти со ту авэса тэ жас англав Рай Дэл,
кай тэ гытос о дром Лэсти,

⁷⁷ тэ роспхэнэ Пэстирэ манушэнди,
со фэрисаримос дэлпэ,
кала авэна эртисардэ лэндирэ бэзэха.

⁷⁸ Амаро Дэл камэл и тангол,
и Вов бишалэла амэнди дэнзорутно удууд упран.

⁷⁹ Вов дэла удууд колэнди, савэ жувэн андэ калимос,
и миринос пхирэл паша лэндэ,

и тэ тховэл пэрнэ амарэ по дром кав миро!

⁸⁰ Бэято барёлас и терэласпэ майзор духоса, и жувэлас андэ мал жы кола връяматэ, кала сикавэла пэс манушэнди Израилёстирэнди.

2

Сар бэяндя Иусос

¹ Андэ кодья връяма выжыля припхэнимос императоростар Августостар тэ пэрэбинэн и тэ запистросарэн манушэн пай всавори римско пхув. ² Када сас англуну запистросаримос манушэн, кала андэ Сирия сас рай Квириниё.

³ И всаворэ жыле тэ запистросарэнпэ андэ пэстирэ фороря. ⁴ Иосифо жыля андай Галилея, андав форо Назарето тэ запистросарэллэ андэ Иудея, андо форо Давидоско Вифлеемо, колэсти со вов сас андав чер и родо лэ Давидоско. ⁵ Вов жыля тэ запистроллэ екхэтанэ ла Марияса, сави дя лав тэ жал палав ром палав

Иосифо. Андэ кодья връяма вой сас пхари и дожутярэлас лэ Бэятос. **6** Кала онэ сас андо Вифлеемо, авиля и връяма тэ бэяндёл о Бэято. **7** Вой бэяндя пэстирэс англатунэс Шавэс и андэ пхарнэ тховдя Лэс андэ пусын, колэстар со на сас лэнди тхан андо чер.

Ангелоря пхэнэн пасымаренди Радосаво Лав

8 Надур котар андэ мал сас пасымаря, савэ дикхэнас и рят палай баэрэ. **9** Акэ, лэндэ авиля ангело Рае Дэвлэско, и баро удууд сар слава Рае Дэвлэстар авиля пэр лэндэ. Онэ фартэ дарайле. **10** Нэ ангело пхэндя лэнди:

— На даран! Мэ андэм тумэнди радосаво лав, савэ авэла всаворэ манушэнди. **11** Адес андо форо Давидоско бэяндиля тумаро Фэрисаримари, Саво исин Христосо Рай. **12** И акэ тумэнди шпэра: тумэ аракхэна лэ Бэятос андэ пхарнэ, савэ пашлёла андэ пусын.

13 Акэ авиile лэ ангелоса фартэ бут ангелоря пав болыбэн, савэ лашарэнас лэ Дэвлэс:

14 — Слава лэ Дэвлэсти упрэ по болыбэн! И пэ пхув миро манушэнди, савэн Вов тангосардя!

15 Кала ангелоря ужыле лэндар по болыбэн, пасымаря пхэндэ екх екхэсти:

— Авэн андо Вифлеемо, дикхаса, со тэрдиля котэ, пала со амэнди пхэндя о Рай Дэл.

16 Сыго жыле и аракхле лэ Иосифос лэ Марияса и лэ Бэятоса, савэ пашлёлас андэ пусын. **17** Кала онэ удикхле Лэс, тунчи роспхэндэ лэнди вся, со ашундэ палав кадва Бэято. **18** Всаворэ, ко ашундя, дивосайле колэсти, со роспхэндэ лэнди пасымаря. **19** А Мария гаравэлас кала лава андо пэско води и гындолос пала лэндэ.

20 Пасымаря рисайле, лашарэнас и фалисарэнас лэ Дэвлэс пала кода, со дикхле и со лэнди сас пхэндо.

Исусос андярдэ андо Храмо

21 По охто дес, кала авиля връяма тэ обшины лэ Бэятос, акхардэ Лэс «Исусо», алавэса, савэ ангело дя Лэсти, инке сар Мария на сас пхари. **22** Кала прожыля връяма жужарэмости пав Законо Моисеёско, Мария и Иосифо андэ Лэс андо Иерусалимо, кай тэ свэнтон Лэс лэ Рае Дэвлэсти. **23** Колэстар со запистросардо андо Законо лэ Рае Дэвлэско, кай англуну бэяндо бэято муршоро трэбуй сас тэ свэнтолпэ лэ Рае Дэвлэсти. **24** Лэнди трэбуй сас тэ анэ жэртва пав Законо лэ Рае Дэвлэско, дуен баэрэн или дуен цэknорэн голубонэн.

Симеоно и Анна пхэнэн лав Дэвлэстар

25 Андо Иерусалимо андэ кадья връяма сас мануш, савэс акхарэнас Симеоно. Вов сас жужко дэвлэкуно мануш, ажуутярэлас, кала о Дэл поможысарэла Израилёсти, и Свэнто Духо сас пэр лэстэ. **26** Свэнто Духо пхэндя лэсти, со вов на удикхэла миримос, жы кала на дикхэла лэ Христос Раес Дэвлэстирэс. **27** Духо андярдя Симеонос андо храмо. Кала дад и дэй андэ Бэятос Исусос тэ терэ пэр Лэстэ кода, со трэбуй сас пав Законо, **28** Симеоно ля Лэс пэ васт, лашардя Дэвлэс и пхэндя:

29 — Иххатар отмэкэс Ту, Хулаё Дэвла,
пэстирэ бутярнэс лэ мироса, пав лав Тиро.

30 Колэсти со мэрнэ якха дикхле фэрисаримос Тиро,

31 саво Ту гытосардян англай якха всаворэ манушэндирэ.

32 Вов — удууд важ всаворэ мануш
и слава народости Тирэсти Израилёсти!

33 О дад и дэй дивосайле, со сас пхэндо пала Лэстэ. **34** И бахталисардя лавэса лэн Симеоно, пхэндя Марияти, дати Лэстирияти:

— Акэ пашлёт Кодва, пала Саво бут мануша андо Израилё пэрэна и бут ваздёна. Вов авэла шпэрраса, сави бут мануша на прилэна. **35** Тунчи отпхэрнавэлапэ кода, со онэ гындонас андэ водя. И тути ежэяти прожала шури андо води.

36 Котэ сас пхури манушни, савяти сас охтодэш тай штар бэрш, и сави пхэнэлас лав Дэвлэстар. Ла акхарэнас Анна, щей Фануилостири андав родо Асиростиро. Вой выжыля палав ром тэрноря щиёраса и прожудя пэсти ромэса эхта бэрш, **37** нэ тунчи ашыля пхивли и прожудя ежэй. Дес и рятвой терэлас бути важ о Дэл, сас андо посто и мангимос, и на отжалас лэ храмостар. **38** Вой андэ кодья връяма пашыля колэндэ, ко андя лэ Бэято, ашыля тэ лашарэл лэ Дэвлэс и роспхэнэлас пала Бэято всаворэнди, ко ажутярэлас фэрисаримос важ Иерусалимо.

39 Кала онэ вся тердэ пав Законо Рае Дэвлэско, онэ рисайле андэ Галилея, андо форо пэско, Назарето. **40** Бэято барёлас зораса тай годяса, и мищимос лэ Дэвлэско сас пэр Лэстэ.

Исусо андо храмо, сар Лэсти сас дэшудуй бэрш

41 Кажно бэрш, по свэнко Патрадятиро, о дад и дэй лэ Исусостириэ пхирэнас андо Иерусалимо. **42** Кала Лэсти сас дэшудуй бэрш, онэ, сар сас прилито, жыле по свэнко. **43** Кала прожыле деса свэнкостириэ, онэ жыле черэ, ай шаворо Исусо ашыляягэ андо Иерусалимо. О дад и дэй када на жанэнас, **44** онэ гындонаас, со Вов жал аврэнца пав дром. Сар прожыле дес, онэ линэ тэ родэ Лэс машкар пэско родо и машкар кола, савэн онэ жанэнас. **45** Кала на аракхле Лэс, жыле палпалэ андо Иерусалимо тэ родэн Лэс. **46** Прожыля трин дес. Аракхле Исусос андо храмо. Вов бэшэлас машкар сытрямаря, ашунэлас и пушэлас лэндар. **47** Всаворэ, савэ ашунэнас Лэс, дивосайле Лэстирия годяти и лавэнди. **48** Кала дад и дэй дикхле Лэс, онэ кадя ж дивосайле. И дэй пхэндя Лэсти:

— Бэято! Со ту тердян амэнца? Акэ, дад Тиро и мэ грыжаса родасас Тут.

49 Вов пхэндя лэнди:

— Пэр со тумэнди тэ родэ Ман? Сар тумэ на жанэнас, со Манди трэбуй тэ авав котэ, со исин Мэрнэ Дадэско?

50 Но онэ на полинэ, со Вов пхэндя лэнди. **51** Вов жыля лэнца, рисайля андо Назарето и кандэлас лэн. Лэстири дэй гаравэлас всаворэ кадэла лава андо пэско води.

52 Исусо барёлас, терэласпэ майгодявэр, и барёлас лэстэ мищимос Дэвлэско и манушэндиро.

3

Иоано Болдэмарё гытол о дром важо Исусо

1 Кала Тибериё дэшупанч бэрш сас императороса, Понтиё Пилато сас баро рай андэ Иудея, Иродо сас рай тетрархо андэ Галилея, о Филипо, пхрал лэско, — рай тетрархо андэ Итурея и Трахонитско пхув, а Лисаниё — рай тетрархо андэ Авилиния. **2** Андэ кодья връяма сас барэ рашаенца Анас и Каиафа. Сас лав Дэвлэстар кав Иоано, шаво лэ Захарияско, андэ мал. **3** Иоано прожалас пай всавори пхув пашав Иордано и акхарэлас манушэн тэ каисавэн и тэ болэнпэ, кай о Дэл тэ эртисарэл лэндирэ бэзэха. **4** Сар запистрасордо андо лил пророкоско Исаяско: «Гласо цыписавэл андэ мал:

Гытон о дром Раести,

вортага терэн дрома важ Лэсти!

5 Всаворэ оврагоря пхэрдёна,
всаворэ барэ и цэкнэ плая тэлёна,
бангэ дрома тернапэ вортага,
нагладосавэ дрома гладосавэна,

6 и всаворэ мануша дикхэна фэрисаримос Дэвлэско».

7 Иоано пхэнэлас манушэнди, савэ авэнас тэ болэнпэ:

— Родо сапано! Ко пхэндя тумэнди тэ нашэн холятар, сави жал пэр тумэндэ?

8 Сиқавэнрындонэнца, со тумэ каисайле, и на гындон: «Дад амаро исин Авраамо». Пхэнав тумэнди, со Дэл ваздэла андай кадэла бара шаворэн Авраамости. **9** Акэ,

товэр пашав корнё дрэвоско пашлёт: всаворэ дрэворя, савэ на анэн лашо плодо, пхагэн товэрэса и шон андэ яг.

10 Пушэнас лэстар и мануша:

— Со амэнди тэ терас?

11 Вов пхэндя лэнди:

— Кастэ исин дуй гада, мэк отдэл екх кодлэсти, кастэ нинай, кастэ исин хамос, мэк дэл епаш кодлэсти, кастэ нинай.

12 Авиле лэстэ тэ болэнпэ стидэмара налогонэндирэ и пушэнас лэстар:

— Сытряимари! Со амэнди тэ терас?

13 Вов пхэндя лэнди:

— На лэн лэ манушэндар майбут колэстар, со трэбуй тумэнди тэ лэн.

14 Пушэнас лэс и халавдэ:

— Со амэнди тэ терас?

Вов пхэндя лэнди:

— На залэн манушэндар зораса. На хохавэн лэ манушэн, жувэн пэ кола ловэ, савэ тумэнди потинэн.

15 Всаворэ мануша ажутярэнас и гындонас андэ пэсти водя пала Иоано, чи на вов о Христосо. **16** Иоано пхэндя всаворэнди:

— Мэ болав тумэн паеса, нэ авэла Кодва, Ко майзорало мандар. Мэ на ашав тэ роспхандав Лэсти тэраха. Вов болэла тумэн Свэントонэ Духоса и ягаса. **17** И андэ Лэстирэ васт ганавди, вов жужарэла пэско токо и стидэла ворзо Пэско андэ пусын, ай шэлуха спхабарэла андэ яг, сави на пэрэашэла тэ пхабол.

18 Кала и авэр будэр лава пхэнэлас лэнди Иоано, кала пхэнэлас лэнди Радосаво Лав. **19** Иоано ля тэ ужылисарэл раес тетрархос Иродос, важ кода со вов ля палав ром Иродиада, ромня пэстирэ пхралэстия, и колэсти со вов терэлас найлашэрындэрия. **20** Тунчи Иродо тердя инке екх вырито рындо — пхандадя лэ Иоанос андо баруно.

Иоано болдэл Исусос

21 Кала всаворэ мануша болдэпэ, кадя ж сас болдо и Исусо. Тунчи Вов мангляпэ Дэвлэс, и отпхэрнадяпэ болыбэн. **22** И Свэнто Духо, сар голубо, сжыля по Исусо. Сас гласо упран, саво пхэнэлас:

— Ту Шаво Мэрно, савэс Мэ камав! Ту — Мэрно радомос!

Родо лэ Исусоско

23 Кала Исусо ля тэ терэл и бути важ о Дэл, Лэсти сас варикай трянда бэрш. Вов сас, сар гындонас, шаво Иосифоско. Андо лэско родо сас: Илиё, **24** Матфато, Левиё, Мелхиё, Ианаё, Иосифо, **25** Матафиё, Амосо, Наумо, Еслиё, Нагеё, **26** Маафо, Матафиё, Шымьё, Иосифо, Иодаё, **27** Иоханано, Риса, Зоровавелё, Шэалтиило, Нириё, **28** Мелхиё, Адиё, Косамо, Элмадамо, Иро, **29** Иосиё, Элиезеро, Иоримо, Матфато, Левиё, **30** Симеоно, Иуда, Иосифо, Ионамо, Элиакимо, **31** Мелеа, Мена, Матафа, Нафано, Давидо, **32** Иесеё, Овидо, Боазо, Сала, Нахшоно, **33** Аминадаво, Админо, Арииё, Хецроно, Фарецо, Иуда, **34** Иаково, Исаако, Авраамо, Терахо, Нахоро, **35** Серуго, Рейо, Пелего, Еверо, Шэлахо, **36** Каинано, Арпахшадо, Симо, Ноё, Ламехо, **37** Мафусало, Енохо, Иаредо, Мелелеило, Каинано, **38** Еносо, Сифо, Адамо, о Дэл.

4

Бэнг камэл тэ зумавэл Исусос андэ мал

1 Исусо, пхэрдярдо Свэントонэ Духоса, авиля лэ Иорданостар и андярдо сас лэ Духоса андэ мал. **2** Котэ Лэс саранда дес зумавэлас Бэнг. Всавори кадья врязма Исусо нисо на халас. И сар прожыле кала деса, Лэсти фартэ закамляпэ тэ хал.

3 Бэнг пхэндя Лэсти:

— Сар ту Дэвлэско Шаво, пхэн калэ барэсти тэ терэлпэ марнэса.

4 Иисусо пхэндя лэсти:

— Пистросардо, со на екхэ марнэса авэла тэ жувэл мануш.

5 Тунчи Бэнг вазгля Лэс по баро плай и сыго сикадя Лэсти всаворэ тхагарима пхувьядирэ. **6** И пхэндя Лэсти:

— Мэ пэрэдава Тути всаворо баримос и слава калэ тхагаримастирэ. Када вся отдино манди, и касти закамава, колэсти и дава лэн. **7** Сар Ту тэлёса манди, тунчи када вся авэла тиро.

8 Иисусо пхэндя лэсти:

— Запистросардо: «Тэллюв Рае, Дэвлэсти тирэсти, качи Лэсти ав бутярнэса».

9 Тунчи Бэнг андярда лэ Иисусос андо Иерусалимо, тховдя пэ майучё тхан храмоско и пхэндя:

— Сар ту Шаво Дэвлэско, хук катар тэлэ. **10** Важ кода со пистросардо: «Пэстирэ ангелонэнди пала тутэ припхэнэла, кай онэ тэ дикхэн пала Тутэ. **11** Пэ васт андярэна тут, кай тэ на арэсэспэ тирэ пэрнэса андо бар».

12 Иисусо пхэндя лэсти:

— Кадя пхэндо: «На зумав лэ Рае Дэвлэс пэстирэс».

13 Тунчи Бэнг пэрэашыля тэ зумавэл Иисусос и отжыля Лэстар пэ врязма.

Иисусо лэл тэ терэ Пэстири бути важ о Дэл

14 Иисусо рисайля андэ Галилея, пхэрдо зораса Духостиряса. Дума пала Лэстэ разжыляпэ пав всавори кодья пхув. **15** Вов ситярэлас андэ синагоги, и всаворэ лашарэнас Лэс.

Назарето на прилэл Иисусос

16 Иисусо авиля андо Назарето, кай выбариля, и андэ субота, сар Вов всавори врязма терэлас, зажыля андэ синагога и вшиля тэ бинэл. **17** Лэсти подинэ лил, саво запистросардя пророко Исаю. Вов отпхэрнадя лил и аракхля тхан, кай сас запистросардо:

18 «Духо лэ Рае Дэвлэско пэр Мандэ,
важ кода со Вов помакхля Ман
тэ россхэнав Радосаво Лав чёрорэнди.

Вов бишалдя Ман тэ россхэнав спханглэнди,
со онэ авэна россханглэ,
корэнди, со онэ авэна тэ дикхэн,
тэ отмэкав колэн, савэ грыжонпэ, пэ воля,

19 тэ россхэнав, кай авиля врязма лащи Рае Дэвлэстири».

20 Иисусо запхандадя лил, отдя бутярнэсти и бэшля. Всаворэ андэ синагога дикхэнас пэр Лэстэ. **21** И Вов ля тэ пхэнэл лэнди:

— Адес, тердэпэ кола запистросардэ лава, савэ тумэ икхатар ашундэ.

22 Всаворэ лашарэнас Лэс, дивосавэнас Лэстирэ лашэ лавэнди и пушэнас:

— Дикхэнтэ, на Иосифоско када шаво?

23 Вов пхэндя лэнди:

— Акэ, тумэ пхэнэна манди дума: «Врачё! Састьяр ежэно пэс». И пхэнэна манди: «Амэ ашундэ, со Ту тердян андо Капернаумо. Стер кадя ж и катэ, кай Ту барилян».

24 Пхэнав тумэнди чячимаса: нисавэ пророкос на прилэн котэ, кай вов бариля.

25 Чячимаса пхэнав тумэнди: андэ врязма, кала сас о Илия, сар на сас трин бэрш епащэса брышынд пай всавори кодья пхув, и сас баро бокхалимос, андо Израилё сас бут пхивлэ жувля. **26** Но на екхатэ лэндар на сас бишалдо Илия, а качи кай пхивли андэ Сарепта Сидоноско. **27** Бут сас наасвалэ проказаса андо Израилё, кала сас пророко Елисёё, и ни екх лэндар на жужардиля, качи Неемано сирийцо.

28 Всаворэ андэ синагога фартэ холяйле, сар ашундэ када. **29** Онэ линэ и выцырдэ Лэс андав форо, и андярдэ по баро плай, кай сас тердо лэнго форо, кай тэ сшон котар Лэс тэлэ. **30** Но Вов прожыля машкар лэндэ тай ужыля.

Иисусо вытрайдэл найжүжэс духос

31 Исусо жыля андо галилейско форо Капернаумо и сыйярэлас андэ суботни деса. **32** И дивосавэнас Лэстирэ сыйяримасти, колэсти со андо лав Лэско сас бари зор. **33** Сас андэ синагога мануш, андэ лэстэ сас духо найжужэ бэнгэско, и вов зацыпсайля фартэ:

34 — Эй, со тути амэндар трэбуй, Исусо андав Назарето? Ту авилян тэ умарэс амэн? Мэ жанав, ко Ту! Ту Свэнто Дэвлэско!

35 — Ашмулком! — припхэндя лэсти Исусо. — Выжа андар лэстэ!

Бэнг шута манушэс машкар синагога и выжыля андар лэстэ. И на тердя лэсти ни сави бида. **36** Всаворэ дарайле и дэнаас дума машкар пэстэ:

— Со када кацаво? Вов баримаса и зораса припхэнэл найжужэ духонэнди, и онэ выжан!

37 Дума пала Лэстэ розжыляпэ пав всавори кодья пхув.

Исусо састярэл манушэн

38 Исусо выжыля андай синагога и зажыля андо чер Симоноско. Кай ромни Симоностири сас насвали дэй, всавори пхаболас, и мангэнас Лэс кай Вов варисо тэ терэл. **39** Вов поджыля латэ, запхэндя насвалимасти, и насвалимос ужыля. Вой андэ кодья вряза вшилия и ля тэ подэл пэ мэсали.

40 Кала бэшэлас кхам, всаворэ, касть сас насвалэ, линэ тэ андярэн лэн кав Иисусо. Вов тховэлас пэ кажно васт и састярэлас лэн. **41** Бэнга выжанас манушэндар и цыпинас:

— Ту — Шаво Дэвлэско!

А Вов запхэнэлас лэнди тэ пхэнэн, колэстар со онэ жанэнас, со Вов — Христосо.

Исусо пхэнэл лав андэ Иудея

42 Сар авиля дес, Вов выжыля андав форо и жыля андэ мал. Мануша линэ тэ родэн Лэс, и кала аракхле, мангэнас Лэс, соб Вов тэ ашэллэ лэнца. **43** Но Вов пхэндя лэнди:

— Манди трэбуй тэ роспхэнав Радосаво Лав палав Тхагаримос Дэвлэско и андэ авэр фороря. Пэ када Мэ бишалдо.

44 И Вов пхэнэлас лав андэ синагоги Иудеятирэ.

5

Сыйярнэ астарэн бут машё

1 Екхвар Исусо тэрдёлас пашай лэн Генисаретско, бут мануша стидэпэ и стасавэнас Лэс всаворэ ригэндэр тэ ашунэ Лав Дэвлэско. **2** Исусо удикхля пашав бэрэго дуй чёвноря и машярэн, савэ выжыле андай чёвноря и выхалавэнас пэстирэ сетки. **3** Вов зажыля андо чёвно лэ Симоноско, мангля лэс тэ отплывисарэл найдур бэрэгостар и бэшля, кай тэ сыйярэл манушэн пав чёвно.

4 Кала Исусо пэрэашыля тэ сыйярэл, пхэндя Симоности:

— Плывисар майдур, кай майбут пай, и шув сетки тумарэ, кай тэ астарэн машё.

5 Симоно пхэндя:

— Сыйяримири амаро! Амэ всавори рят бут терасас и нисо на астардэ. Но сар Ту пхэнэс, тунчи шава сетки.

6 Онэ стердэ кадя и астардэ фартэ бут машё, кай сетки линэ тэ шындён.

7 Акхардэ вастэнца аврэн машярэн, савэ сас андэ авэр чёвно, кай кола тэ поджан тай тэ поможысарэн лэнди. Онэ авиile и екхэтанэ стидэ машен андэ лэдуй чёвноря скачи, со чёвноря линэ тэ тасон. **8** Симоно Пётро дикхля када, пэля кай пэрнэ лэ Исусостириэ и пхэндя:

— Выжа мандар, Рай, колэстар со мэ мануш бэзэхало!

9 Важ кода со пэ лэстэ и пэ лэстирэ амала, авиля бари дар, сар дикхле, со кадя бут астардэ машё. **10** Кадя и пэ Иаково лэ Иоаноса, шавэн Зэведеёстириэн, савэ сас амала Симоностириэ пай бути. Исусо пхэндя Симоности:

— На дара! Кала врязматар авэса тэ астарэс манушэн.

11 Онэ выцырдэ чёвноря по бэрэго, ашадэ вся и жыле пала Лэстэ.

Исусо састьярэл насвалэс проказаса

12 Кала Иисусо сас андэ екх форо, авиля Лэстэ мануш всаворо андэ проказа*. Удикхля Иисусос, пэля кай Лэстирэ пэрнэ и фартэ мангля:

— Рай! Сар Ту камэс, Тутэ исин зор тэ жужарэс ман!

13 Иисусо процырдя васт, ляпэ калэ манушэстэ и пхэндя:

— Камав, ав жужо!

Проказа андэ кодья врязма ужыля манушэстар. **14** Иисусо припхэндя лэсти:

— Никасти на роспхэн пала қада, жа сикавпэ рашаести и ан жэртва пала пэско жужаримос, сар пхэндя Моисеё. Мэй онэ қада удикхэна.

15 Нэ инке майбут рожжаласпэ дума палав Иисусо, фартэ бут мануша авэнас Лэстэ тэ ашунэн и тэ састьярэнпэ насвалимастар. **16** Но Иисусо жалас андэ биманушэндирэ тхана и мангэласпэ Дэвлэс.

Исусо састьярэл манушэс, саво на пхирэлас пэрнэнца

17 Ехвар, кала Иисусо састьярэлас, котэ бэшэнас фарисеёря, састьяримаря Законостирэ, савэ авиле андай бут тхана андэ Галилея, Иудея и андав Иерусалимо. Зор Рае Дэвлэстири авэлас Иисусоса тэ састьярэл насвалэн. **18** Акэ, авиле мануша, савэ андярэнас насвалэс пэрнэнца по паринд, камэнас тэ заандярэн андо чер, кай тэ тховэн англав Иисусо. **19** Нащи сас тэ проандярэн лэс, колэстар со бут мануша сас котэ. Загульдэ по чер, розлинэ ушарди пав чер, змуkle по паринд насвалэс машкар о чер, англав Иисусо. **20** Иисусо дикхля лэнго патимос и пхэндя колэсти манушэсти:

— Эртисарэнпэ тути тирэ бэзэха!

21 Фарисеёря и састьяримаря Законостирэ гындонас пэсти: «Ко Кала Мануш, Саво дэл думэл бэзэхалэ лава? Со, на екх о Дэл эртисарэл бэзэха?

22 Иисусо поля, со онэ гындон, тай пхэндя лэнди:

— Со тумэ гындосарэн андэ тумарэ водя? **23** Со майлокхо: тэ пхэнэ: «Эртисарав тути тирэ бэзэха», — чи тэ пхэнэ: «Вщи и пхир»? **24** Кай тумэ тэ жанэн, со кав Шаво Манушыкано исин зор пэ пхув тэ эртисарэл бэзэха.

Тунчи пхэндя насвалэсти манушэсти:

— Пхэнав тути: вщи, лэ пэско паринд и жа черэ.

25 Андэ кодья ж врязма вов вщилия англай лэндэ, ля пэр со пашлёлас, тай жыля пэстэ черэ, лашарэлас лэ Дэвлэс. **26** И всаворэ дивосавэнас, лашарэнас лэ Дэвлэс и дараса пхэнэнас:

— Адес амэ дикхлям кода, со никала на сас.

Исусо хал лэ бэзэхалэ манушэнца андо чер кав Левиё

27 Сар выжыля андав чер, Иисусо удикхля стидэмарес налогонэндирэс, савэс акхарэнас Левиё. Вов бэшэлас по тхан, кай стидэнас налогоря.

— Жа пала Мандэ, — пхэндя лэсти Иисусо.

28 Вов вщилия, ашадя вся и жыля пала Лэстэ. **29** Тунчи Левиё тховдя пэстэ черэ бари мэсли хамаса важ о Иисусо. Котэ бут стидэмаря налогонэндирэ тай авэр мануша, сас палай мэсли лэ Иисусоса. **30** Фарисеёря и састьяримаря Законостирэ пушэнас найлашымаса Иисусостирэ састьярэндэр:

— Состар тумэ хан и пэн стидэмаренца налогонэндирэ и бэзэхалэ манушэнца?

31 Иисусо пхэндя лэнди:

— На састэ манушэнди трэбуй врачё, ай насвалэнди. **32** Мэ авилем тэ акхарав на жужэн манушэн, а бэзэхалэн, кай тэ каисавэн андэ пэстирэ бэзэха.

Пхурэдэра фарисеёнэндирэ пушэн палав посто

33 Тунчи онэ пхэндэ Лэсти:

* **5:12** 5.12 Насвалимос, саво терэлас манушэс найжүжэса. Лэсти нахи сас тэ зажал андо храмо тэ мангэл Дэвлэс.

— Иоаностиирэ и фарисеёнэндирэ сытъянрэ бут молоря терэн мангимос лэ постоса, а Тирэ сытъянрэ хан и пэн!

³⁴ Исусо пхэндя лэнди:

— Чи мишто тэ мангэ манушэн пэ бъяв тэ авэн андо посто кала тэрно паша лэндэ? ³⁵ Но авэна деса, кала залэлапэ лэндар тэрно. Тунчи андэ кола деса авэна тэ терэн посто.

³⁶ Вов роспхэндя лэнди кацави дума:

— Нико на отшынэл котор нэвя йидатар, важ кода, кай тэ присувэл кай пураи. Сар вов када терэла, то и нэви йида хасавэла, и кай пураи йида кодва котор на поджала. ³⁷ Нико на шол тэрни мол андэ пхуранэ морцянэ гонэ, колэстар со тэрни мол росшынэла лэн и вышолапэ, ай гонэ хасавэна. ³⁸ Най, тэрно мол шон андэ нэвэ морцянэ гонэ. ³⁹ И нико, ко пэл пхурано мол, на закамэла тэ пэл тэрно, колэстар со пхэнэла: «Пхурано мол фэдэр».

6

Сытъянрэ сшынэн о ворзо андэ субота

¹ Екхвар андэ субота, кала Исусо прожалас маляса, кай барёлас див, Лэстирэ сытъянрэ сшынэнас о ворзо, кхосэнас андэ васт и ханас. ² Варисавэ андай фарисеёра пхэндэ:

— Сости тумэ терэн кода, со нащи тэ терэ андэ субота?

³ Исусо пхэндя лэнди:

— Чи тумэ на бинэнас, со тердя Давидо, сар вов и лэстирэ мануша бокхайле?

⁴ Вов зажыля андо чер Дэвлэско, ля марно, саво тховэнэс англав Дэл и саво нащи сас тэ хал никасти, сар качи лэ рашаенди, халя ежено и дя тэ хал пэстирэ манушэнди.

⁵ Исусо пхэндя лэнди:

— Шаво Манушыкано исин Хулай ла суботнё!

Исусо састьярэл андэ субота манушэс шукэ вастэса

⁶ Андэ авэр субота Исусо зажыля андэ синагога и сытъярэлас. Котэ сас мануш шукэ правонэ вастэса. ⁷ Сытъяримаря Законостиирэ и фарисеёра дикхэнэс пала Лэстэ, на авэла ли Вов тэ састьярэл андэ субота, колэстар со родэнэс тэ ужылисарэн Лэс. ⁸ Нэ Исусо жангля, со онэ гындонас, и пхэнэл манушэсти шукэ вастэса:

— Вщи, выжа по машкар!

Мануш вшиля и выжыля англэ.

⁹ Исусо пхэндя лэнди:

— Мэ пушав тумэндар: со домукэлпэ тэ терэс андэ субота, лашымос чи выритимос? Тэ фэрисарэл жувимос чи тэ хасавэл?

¹⁰ Вов подикхля пэр лэндэ и пхэндя колэсти манушэсти:

— Процырдэ тиро васт.

Вов процырдя, и лэско васт ашыля састьярдо. ¹¹ Онэ жэ фартэ холяйле и дэнэс дума машкар пэстэ, со тэ терэн лэ Исусоса.

Исусо вытидэл дэшудуен апостолонэн

¹² Андэ кодья вряза Исусо жыля по плай тэ мангэлпэ Дэвлэс и всавори рят сас андо мангимос. ¹³ Сар авиля дес, Вов акхардя Пэстирэн сытъянэн и вытидя лэндар дэшудуй, савэн проакхардя апостолонэнца: ¹⁴ Симонос, савэс проакхардя Пэтро, пхралэс Симоностиирэс Андреёс, Иаковос и Иоанос, Филипос и Варфоломеёс,

¹⁵ Матфеёс и Фомас, шавэс Алфеёстиирэс Иаковос, Симонос, проакхардо Зилото,

¹⁶ шавэс Иаковостиирэс Иудас и Иудас Искариотос, саво прэдя лэ Исусос.

Бахталимос и бида

¹⁷ Исусо сжыля плаестар лэнца тэлэ и тэрдиля по биплаенго тхан. Котэ стидэпэ бут Лэстирэ сытъянрэ и фартэ бут мануша пай всавори Иудея и Иерусалимо,

а кадя ж андай фороря Тиро и Сидоно, савэ по брэгэ барэ 2044 E Best Ave, Coeur D Alene, ID 83814паеско. ¹⁸ Онэ авиле тэ ашунэн Иисусос и тэ састярэн насвалимастар. Мануша, савэ грыжонааспэ найжүжэндар духодндар, састярэнаспэ. ¹⁹ Всаворэ мануша камэнас тэ лэнпэ Иисусостэ, важ кода со Лэстар сжалас зор и састярэлас всаворэн.

²⁰ Вов вазгля якха пэ сытрянэ и ля тэ пхэнэл:
— Бахталэ тумэ, чёрэ!

Тумаро исин Тхагаримос Дэвлэско!

²¹ Бахталэ тумэ, ко бокхалэ икхатар!

Тумэ чялёна!

Бахталэ тумэ, ко икхатар ровэл!

Тумэ авэна тэ радонпэ!

²² Бахталэ тумэ, сар мануша тумэн фартэ на камэна, кала тумэн вытрадэна, акушэна и магрисарэна тумаро алэв палав Шаво Манушыкано. ²³ Челэн андэ кодва дес баря лошаса! Баро потинимос тумэнди по болыбэн! Кадя терэнас пророконэнца дада калэ манушэндирэ.

²⁴ Нэ бида тумэнди, барвалэ!
Тумэ ужэ линэ пэско путинимос.

²⁵ Бида тумэнди, ко чялэ икхатар!
Тумэ авэна бокхалэ.

Бида тумэнди, ко икхатар асалгэ!
Тумэ авэна тэ грыжонпэ и тэ ровэн.

²⁶ Бида тумэнди,
кала всаворэ дэн дума пала тумэндэ лашымос!
Кадя лэндирэ папоря лашарэнас хохавнэн пророконэн.

Иисусо сытрял тэ камэн пэстирэ вражымарен

²⁷ — Мэ пхэнав тумэнди, ко ашунэн Ман: камэн тумарэн вражымарен, терэн лашымос колэнди, ко на камэл тумэн. ²⁸ Бахталисарэн колэн, ко дэл амрая тумэн, и мангэн Дэвлэс палай кола, савэ терэн тумэнди наймишто. ²⁹ Колэсти, ко арэсэла тут пай чям, подтхов авэр. Колэсти, ко залэл тутар упраи йида, отдэ лэсти и пэско гад. ³⁰ Всаворэнди, ко тутэ мангэл, дэ; и сар ко залэла тиро, на манг палпалэ. ³¹ Терэн лэ манушэнди кода, со тумэ камэн, соб онэ тэ терэн тумэнди.

³² Сар тумэ камэн качи колэн, ко тумэн камэл, пала со тумэн тэ наисарэ? И бэзэхалэ мануша камэн колэн, ко лэн камэл. ³³ Сар тумэ терэн лашымос колэнди, ко терэл мишто тумэнди, пала со тумэнди тэ наисарэ? И бэзэхалэ мануша терэн кадя жэ. ³⁴ Сар тумэ дэн ловэ андо ужылимос качи колэнди, савэндар патян, со залэна палпалэ, пала со тумэнди тэ наисарэ? И бэзэхалэ мануша дэн андо ужылимос бэзэхалэнди и ажутярэн тэ залэн палпалэ вся, скачи динэ. ³⁵ Ай тумэ камэн тумарэн вражымарен, терэн лэнди лашымос и дэн андо вужылимос, на ажутярэн, кай онэ отдэна палпалэ. Тунчи тумаро потинимос авэла баро, тумэ авэна шавэнца Майбарэстирэнца. Колэстар со Вов тангосарэл и колэн, савэ на наисарэн, и холятирэ. ³⁶ Авэнтэ тангимасти, сар тангимаско Дад тумаро.

На сындосарэн никас

³⁷ На сындосарэн, и тумэ на авэна сындосардэ. На осындосарэн, и тумэ на авэна осындосардэ. Эртисарэн, и тумэ авэна эртисардэ. ³⁸ Дэнтэ, и тумэнди кадя ж дэлалэ. Пхэрдэ гонэса шона и инке притасавэна, дэна тумэнди андо брэк, со авэла тэ росшолдэл. Савя мераса тумэ бинэн, кадя бинэна и тумэнди.

³⁹ Иисусо роспхэндя лэнди кацави дума:

— Сар коро андярэла корэс? На пэрэна ли онэ лэдуй андэ ганади? ⁴⁰ Сытряно на майбаро пэстирэ сытрямарестар. Нэ сар высытёла, тунчи авэла, сар пэско съятирими. ⁴¹ Со дикхэс по кашторо андэ яхх пэстирэ пхралэстэ, ай андэ пэстири яхх на додикхэс баро кашт? ⁴² Сар ту пхэнэса пэстирэ пхралэсти:

«Пхрала, дэ, мэ вылава кашторо андай ях тири»? Сар ту на дикхэс баро кашт андэ пэстири ях? Ту, дуемуенго! Вылэ майанглал баро кашт андай ях тири, и тунчи дикхэса, сар тэ вылэ кашторо андай ях пэстирэ пхралэстар.

Палай лашэ и найлашэ плодоря

43 По лашо дрэво на барёл найлашо плодо, и вырито дрэво на анэн лашо плодо. **44** Кажно дрэво ужанэлпэ пай пэско плодо. На стидэн инжыро пав тэрно и виноградо пав пусаимаско кустарнико. **45** Андав води, пхэрдярдо лашымаса, лашо мануш выандярэл лашымос, а холяко мануш выандярэл холи андав пэско води, пхэрдярдо холяса. Со кав мануш андо води, кода лэстэ и пэ шыб.

Чер, саво тердо по бар

46 Со тумэ акхарэн Ман: «Рай! Рай!» — а на терэн кода, со Мэ пхэнав? **47** Мэ пхэнава тумэнди, пэр каастэ мэзимэ кодва, ко авэл Мандэ, ашунэн лава Мэрнэ и терэл кадя, сар Мэ пхэнав. **48** Вов мэзимэ по мануш, саво терэлас чер. Вов выганадя бари ганади и тховдя фундаменто по бар. Кала паи вазгляпэ и лэн выжыля андав брэго и жыля по чер,вой на схаладя лэс, колэстар со сас тердо мишто. **49** Ай кодва, ко ашунэл Мэрнэ лава и на терэл кадя, сар Мэ пхэнав, вов мэзимэ по мануш, саво тердя чер пэ пхув бифундаментоско. Сар качи лэн жыля по чер, вов андэ кодья вряза роспхагляпэ и роспэляпэ всаворо.

7

Сар патялас пхурэдэр шэлэ халавдэндар

1 Сар пэрэшияля тэ дэл дума кай мануша, Иисусо жыля андо Капернаумо. **2** Котэ, кав ех халавдо, пхурэдэр англай шэл халавдэ, сас бутярно, вов лэс фартэ танголас. Вов сас фартэ наасвало и мэрэлас. **3** Кала халавдо ашундя палав Иисусо, бишалдя Лэстэ иудеёндирэн пхурэдэрэн тэ мангэн Лэс, кай тэ авэл и тэ састьярэл лэстирэ бутярнэс. **4** Пхурэдэра авиле кав Иисусо и линэ тэ мангэн Лэс:

— Кадва мануш ашэл, кай Ту тэ терэс када важ лэсти. **5** Вов камэл амарэн манушэн и тердя амэнди синагога.

6 Иисусо жыля лэнца. Кала Вов поджалас кав чер, пхурэдэр шэлэнго бишалдя Лэстэ пэстирэ амалэн тэ пхэнэн:

— Рай, на лэ пэр пэстэ пхаримос. Мэ на ашав, кай ту тэ зажас талай ушарди мэрнэ черэстирэ. **7** Мэ ежено на ашав тэ авав Тутэ. Нэ пхэн качи лав, и мэрно бутярно састьёла. **8** Мэ ежено кандав, со припхэнэн манди мэрнэ пхурэдэра. И мандэ исин майцэкнэ мандар халавдэ, савэ кандэн ман. Мэ пхэнав екхэсти: «Жа!» — и жал, аврэсти: «Ав кардэ!» — и кодва авэл. Бутярнэсти пэстирэсти пхэнав: «Стер када!» — и вов терэл.

9 Иисусо шундя када, дивосайля, обрисайля кай мануша, савэ жанас пала Лэстэ, пхэндя:

— Пхэнав тумэнди, со и андэ Израилё Мэ на аракхлем кацаво патимос.

10 Кола, савэн бишалдэ, рисайле андо чер, аракхле бутярнэс састьярдэса.

Иисусо жундярэл шавэс лэ пхивлятирэс

11 На прожыля бут вряза, тунчи Иисусо жыля андо форо, саво акхарэлпэ Наино. Лэса жанас Лэстирэ састьярнэ и бут авэр мануша. **12** Кала Вов поджыля кай форости удар, котар выандярэнас мулэс. Вов сас ех шаво кай дэй, айвой сас пхивли. Екхэтанэ ласа андав форо выжанас бут мануша. **13** Кала Рай удикхля кала жувля, Вов тангосардя ла.

— На ров, — пхэндя Вов лати.

14 Тунчи Вов поджыля, ляпэ кав сикрио. Кола, ко андярэлас лэс, ашыле. Иисусо пхэндя:

— Шаворо, пхэнав тути: вщи!

15 Муло бэшля и ля тэ дэл дума. Иисусо отдя лэс лэстирэ дати. **16** Пэ всаворэ, ко сас котэ, авила бари дар, и мануша линэ тэ лашарэн Дэвлэс и тэ пхэнэн:

— Баро пророко авиля амэндэ! Дэл авиля кай Пэстирэ мануш!

¹⁷ Кацави дума розжыляя пала Лэстэ пай всавори Иудея и всавори пхув.

Исусо и сытрянэ Иоаностириэ

¹⁸ Сытрянэ Иоаностириэ роспхэндэ лэсти пала вся кода. Тунчи Иоано акхардя пэстэ дуен андар лэндэ. ¹⁹ И бишалдя лэн кав Рай тэ пушэн:

— Ту кодва, Ко трэбуй тэ авэл, или амэнди тэ ажуярас аврэс?

²⁰ Кала мурша авиле кав Иисусо и пхэндэ:

— Иоано Болдэмарё бишалдя амэн Тутэ тэ пушас: «Ту Кодва, Ко трэбуй тэ авэл, или амэнди тэ ажуярас аврэс?»

²¹ Андэ кодья връяма Иисусо састьярдя бутэн манушэн насвалимастар, дукхатар и холятирэ духондар, и бутэнди корэнди отпхэрнадя якха. ²² Иисусо пхэндя бишалдэнди:

— Жантэ, роспхэнэнтэ Иоаности, со тумэ дикхле и шундэ: корэ дикхэн, бангэ пхирэн, насвалэ проказаса жужарэнпэ латар, кашукэ ашунэн, мулэ жундён, и чёрэнди роспхэнэллэ Радосаво Лав. ²³ Бахтало кодва, ко на хасарэла патимо андэ Мандэ!

Иисусо роспхэнэл палав Иоано Болдэмарё

²⁴ Кала бишалдэ сытрянэ Иоаностириэ ужыле, Иисусо ля тэ дэл дума манушэнди палав Иоано:

— Со тумэ пхирдэ тэ дикхэн андэ мал? Чяр, сави тинолпэ балвалятар? ²⁵ Тунчи, со тумэ пхирдэ тэ дикхэн? Манушэс, урявдэс андэ барвали йида? Най! Кола, савэ урявдэ андэ ковли йида, жувэн барвалэс андэ тхагарэндирэ чера. ²⁶ Тунчи, со тумэ пхирдэ тэ дикхэн? Пророкос? Кадя, пхэнав тумэнди, со майбарэс, сар пророко.

²⁷ Вов кодва, пала кастэ пистросардо:

«Акэ, Мэ бишалав англав Тутэ Мэрнэс ангелос,
саво гытола англав Тутэ Тиро дром».

²⁸ Пхэнав тумэнди: колэндар, савэн бэяндэ жувля, нинай майбарэс пророкос, сар Иоано. Но майцэкно андэ Тхагаримос Дэвлэско — майбаро лэстар.

²⁹ Всаворэ мануша тай стидэмаря налогонэндирэ, ашундэ и прижангле Дэвлэско дром чячюно и прилиинэ болдимос Иоаноско. ³⁰ А фарисеёра и сытряримаря Законостириэ отпхэндэпэ тэ терэ, со пхэндя о Дэл, и на болдэпэ Иоаностар.

³¹ Иисусо пхэндя:

— Пэр кастэ тунчи шонпэ мануша кала родостар? Пэр кастэ онэ мэзимэ? ³² Онэ — сар бэяцэ, савэ бэшэн пэ тарго и цыписавэн ек екхэсти:

«Амэ дилабасас тумэнди пэ дудка,
и тумэ на цэлэнас.

Амэ дилабасас тумэнди ровиканэ дилия,
и тумэ на ровэнас».

³³ Акэ, авиля Иоано Болдэмарё, на хал марно и на пэл мол, и тумэ пхэнэн: «Андэр лэстэ бэнг». ³⁴ Авиля Шаво Манушыкано, хал и пэл, и тумэ пхэнэн: «Акэ мануш, саво обхалпэ, и матимири, амал стидэмаренго налогонэндиро и бэзэхалэ манушэнгэ». ³⁵ Нэ допхэнэллэ годирындонца всаворэ бэяцэнца.

Жувли макхэл Иисусос кучютнэнца духонэнца

³⁶ Ех андай фарисеёра акхардя Иисусос пэстэ черэ тэ хал. Иисусо авиля лэстэ черэ и бэшля палай мэсаля. ³⁷ Андэ кодья връяма ех жувли колэ форостар, савя жанэнас сар бэзэхаля, ужангия, кай Иисусо хал андо чер фарисеёско, андя кордэ кхоро андай алебастро лэ духонэнца. ³⁸ Жувли тэргиля палал паша пэрнэ кав Иисусо, фартэ ровэлас, и ясва прастэнас Лэсти пэ пэрнэ. Вой ля тэ выкхосэл Лэсти пэрнэ пэсти балэнца, чюминдэлас лэн и макхэлас духонэнца. ³⁹ Кала фарисеё, саво акхардя Иисусос, дикхля када, вов гындосардя: «Сар Кадва Мануш чячес тэ авэл пророкоса, то Вов жанэлас бы, со манушни, сави Лэстэ лэллэ, — бэзэхали».

40 Тунчи Иисусо пхэндя лэсти:

— Симоно, Мэ камав тути варисо тэ пхэнав.

Кодва пхэндя:

— Пхэн, Сытрямари.

41 — Дуй мануша сас ужылэ екхэ и колэсти манушэсти. Екх ужыло сас панч шэл динария, а авэр — пандэша. **42** И екхэсти, и аврэсти на сас, соса тэ рисарэн ужылинос. Колэстар вов эртисардя дуенди. Ко лэндар авэла майфартэ тэ камэл лэс?

43 Симоно пхэндя:

— Гындосарав, кодва, кости сас будэр ужылинос эртисардо.

— Ту чячес полэс, — пхэндя Иисусо. **44** Обрисайля кай жувли, пхэндя Симоности:

— Ту дикхэс акала жувля? Мэ авилем адо чер тиро. Ту паи манди на дян, кай тэ выхалавав пэрнэ, авой выхаладя Мэрнэ пэрнэ ясвэнца и выкхосля пэстирэ балэнца! **45** Ту на чюминдян Ман, сар авилем тутэ, а кадья жувли кола врятатар, сар Мэ зажылем тутэ, на пэрэашэл тэ чюминдэл Манди пэрнэ. **46** Ту на дян Манди оливково дзэто тэ макхав шэрэ, авой кучютнэ духонэнца помакхля Манди пэрнэ.

47 Важ кода Мэ пхэнав тути: лати эртисардэп бут бэзэха, пала кода вой покамля кадя бут. А кодва, кости цыра эртисардо, и камэл майцыра.

48 Тунчи Иисусо пхэндя жувляти:

— Тирэ бэзэха эртисардэ.

49 Нэ авэр мануша, савэ сас паша мэсали, гындонас: «Ко Вов кацаво, со и бэзэха эртисарэл?» **50** Иисусо пхэндя жувляти:

— Тиро патимос фэрисардя тут. Жа лэ мirosa.

8

Жувля жан лэ Иисусоса

1 Тунчи Иисусо жыля пай фороря и гава, пхэнэлас Радосаво Лав палав Тхагаримос лэ Дэвлэско. Лэса сас дэшудуй **2** и кадя ж сас жувля, савэн Вов састярдя холятирэ духонэндар и насвалимастар: Мария, проакхарди Магдалина, савятар выжыле эхта бэнга, **3** Иоана, ромни лэ Хузасири, саво сас пхурэдэр андо чер Иродоско, Сусана и бут авэр. Кала жувля поможысарэнас Иисусости и Лэстирэ сытрянэнди андай кода, со лэндэ сас.

Дума палай мануш, саво шол ворзо

4 Кав Иисусо авэнас мануша андай бут фороря. Сар стидиле бут мануша, Вов роспхэндя лэнди дума:

5 — Мануш выжыля тэ шол ворзо андэ пхув. Кала вов шолас, екх ворзо пэля пашав дром, и мануша пэрнэнца потасадэ, ай чириклия упралимастирэ похале лэс.

6 Авэр, со пэля пэ баруи пхув, подбариля тай зашутиля, колэстар со котэ на сас паи.

7 Трито пэля андэ чяр, и кадья розбариляпэ тай замардя лэс. **8** Авэр пэля пэ лаши пхув, бария и андя андэ шэл молоря майбут колэстар, со сас шуто.

Тунчи Иисусо вазглия гласо тай пхэндя:

— Касть иisin кана, кай тэ ашунэл, мэк ашунэл!

9 Лэстирэ сытрянэ пушле Лэстар:

— Сар тэ полэ кадья дума?

10 Иисусо пхэндя:

— Тумэнди дяпэ тэ жанэн гарадо пала Тхагаримос Дэвлэско, ай аврэнди вся ашэллэпэ гарадя думаса, кай онэ тэ дикхэн и тэ на удикхэн, тэ ашунэн и тэ на полэн.

11 Акэ, сар тэ полэ кадья дума: ворзо — када лав Дэвлэско. **12** Кодва, саво пэля пашав дром, иisin кола, савэ ашунэн лав, нэ тунчи авэл Бэнг и чёрэл лав андай лэнго води, соб онэ тэ на патян и тэ на фэрисарэнпэ. **13** Ворзо, саво пэля пэ баруи пхув, иisin кола, ко радомаса прилэл лав, кала ашунэл лэс. Нэ лэндэ нинай корнё. Савито врьма патян, нэ сар авэл зумавимос, онэ отпэрэн. **14** Ворзо, саво пэля андэ чяр, иisin кола мануша, савэ ашунэн лав. Нэ авэн жувимастирэрындоря, тай лэнди

камэлпэ тэ авэн барвалэнца и шукар тэ жувэн. Вся када на дэл тэ барёл лавэсти, и вов на анэл плодо. ¹⁵ Ворзо, саво пэля пэ лащи пхув, — када мануша, савэ ашунэн лав, ритярэн лэс андо лашо и жужо води и анэн плодо, тэрписаримаса андэ вся врьма.

Дума палав каганцо

¹⁶ Нико на запхабарэл каганцо и на тховэл лэс талай пири или талав пато, а тховэл лэс упрэ пэ вучё тхан. Тунчи, ко зажала, дикхэла удуд. ¹⁷ Нинай нисо чёрэхано, со на авэла удикхло, и гарадо, со на ужанэна и со на выжала аври. ¹⁸ Дикхэн, сар тумэ ашунэн. Касть исин, колэсти инке авэла дино, а касть нинай, колэстар отлэлапэ и кода, со, сар лэсти гындолпэ, лэстэ исин.

Исусо пхэнэл палав Пэско йири

¹⁹ Кав Иисусо авиле Лэстири дэй и пхрала, и на сас сар тэ поджан, колэстар со паша Лэстэ сас фартэ бут мануша. ²⁰ Иисусости роспхэндэ:

— Дэй Тири и пхрала Тирэ тэрдён аври, камэн тэ дикхэн Тут.

²¹ Иисусо пхэндя лэнди:

— Мэрни дэй и пхрала исин кола, ко ашунэл лав Дэвлэско и терэл кадя, сар вов пхэнэл.

Исусо тэрдярэл бари балвал

²² Екхвар Иисусо пхэндя Пэстири сыйярнэнди:

— Пэрэплывисараса пэ авэр риг.

Онэ бэшле андо чёвно, отплывисардэ. ²³ Сар онэ плывисарэнас, Иисусо засутя. Вазгялэ по паи бари балвал, и чёвно ля тэ зашол паеса кадя, со лэнди авэлас бида.

²⁴ Сыйярнэ поджыле кав Иисусо, вазгле Лэс и пхэндэ:

— Сыйяримари! Сыйяримари! Амэ хасавас!

Вов просутяяпэ и запхэндя балваляти и паести, саво ваздёллас. Вся пэрэашыля, и ашиялтых.

²⁵ — Кай патимос тумаро? — пхэндя Иисусо сыйярнэнди. Онэ ж пэрэдараилье тай дивосайле, и пушэнас екхэстар:

— Ко Вов, со и балваляти, и паести припхэнэл, и онэ кандэн Лэс?

Исусо вытрайдал бэнгэн андэ балэ

²⁶ Онэ приплывисардэ андэ пхув Гераса, сави сас англай Галилея. ²⁷ Кала Иисусо авила по бэрэго, Лэсти по дром выжыля мануш андав форо, андэр лэстэ сас бут бэнга. Пэр лэстэ дэлмут на сас йида, жувэлас на андо чер, а андэ склэпоря важ мулэ. ²⁸ Кала вов удикхля Иисусос, вов пэля кай Лэсти пэрнэ и фартэ зацыписайля:

— Со Ту мандар камэс, Иисусо, Шаво Барэ Дэвлэско? Мангав Тут, на хасар ман!

²⁹ Иисусо припхэндя найжужэ духости тэ выжал андав кадва мануш. Бэнг бут врьма хасарэлас лэс. Лэсти спхандэнас лэпунзэнца васт и пэрнэ, нэ вов росшынэлас лэн, и бэнг затрадэлас лэс андэ мал.

³⁰ Иисусо пушля лэс:

— Сар тут акхарэн?

— Легионо, — пхэндя кодва, колэстар со бут бэнга вжыле андэр лэстэ.

³¹ Онэ линэ тэ мангэнпэ Иисусостар тэ на бишалэл лэн андэ бездна. ³² Найдур котар по плай пасынаспэ бут балэ, и бэнга мангэнас Иисусос, кай онэ тэ вжан андэр лэндэ. Вов пхэндя лэнди: «Жан». ³³ Кала бэнга выжыле андав мануш и вжыле андэ балэ, и кола всаворэ шутэпэ пай кручя андо паи и тасиле. ³⁴ Пасымаря, савэ сас пашай балэ, дикхле, со тердяпэ, прастае и роспхэндэ вся андо форо и андэ гава.

³⁵ Сжылепэ мануша тэ дикхэн, со тердяпэ. Онэ поджыле кав Иисусо и удикхле, со кодва мануш, андэ савэстэ сас бэнга, бэшэл пашай пэрнэ кав Иисусо, урявдо и андэ пэсти годи, и авила пэр лэндэ дар. ³⁶ Кола, савэ вся дикхле, роспхэндэ лэнди, сар сас састьярдо мануш андэ савэстэ сас бэнга. ³⁷ Тунчи всаворэ мануша, савэ жувэнас андэ пхув Гераса, линэ тэ мангэн Иисусос тэ ужал лэндар, колэстар со онэ фартэ

здараиле. Исусо бэшля андэ чёвно и рисайля палпалэ. ³⁸ Мануш, савэстар выжыле бэнга, мангия Иисусос тэ лэл лэс Пэса. Но Иисусо отмэклия лэс и пхэндя:

³⁹ — Рисав пэстэ черэ и роспхэн, со тердя важ тути Дэл.

Кодва жыля, роспхэнэлас пав всаворо форо пала кода, со тердя важ лэсти Иисусо.

Иисусо састярэл жувли и жундярэл щиёра

⁴⁰ Кала Иисусо рисайля палпалэ, Лэс радомаса прилинэ бут мануша, колэстар со всаворэ ажутярэнас Лэс. ⁴¹ Тунчи Лэстэ поджыля мануш, савэс акхарэнас Иаиро, саво сас пхурэдэр андэ синагога, и пэля кай Иисусостириэ пэрнэ, ля тэ мангэл Лэс, кай тэ авэл лэстэ черэ. ⁴² Лэстэ сас екх щей, савяти сас дэшудуй бэрш, и вой мэрэлас. Иисусо жыля лэса, и Лэс всаворэ ригэндар стасавэнас мануша.

⁴³ Машкар лэндэ сас жувли, савятэ дэшудуй бэрш жалас рат. Вой отдя вся, со латэ сас, врачёнэнди, и никастэ на сас зор тэ састярэл ла. ⁴⁴ Вой поджыля палал кав Иисусо и ляпэ кай риг Лэстирия йидатэ. Рат андэ кодья ж врязма пэрэашыля тэ жал.

⁴⁵ — Ко Мандэ ляпэ? — пушля Иисусо. Нико на прижандёлас. Пэтро пхэндя:

— Сытрямари, паша Тутэ бут мануша и стасавэн всаворэ ригэндар!

⁴⁶ Иисусо пхэндя:

— Варико Мандэ ляпэ. Мэ полем, со Мандар выжыля зор.

⁴⁷ Тунчи кадья жувли поля, со вой на гарадёла, тиносайля, поджыля и пэля англав Иисусо. Англай всаворэ мануша роспхэндя, состар вой Лэстэ ляпэ, и сарвой састярдяпэ. ⁴⁸ Тунчи Иисусо пхэндя лати:

— Щей Мэрни! Тиро патимос фэрисардя тут. Жа лэ мироса.

⁴⁹ Кала Иисусо инкэ на допхэндя када, авиля мануш андав чер пхурэдэр синагогако.

— Щей тири муля, — пхэндя вов, — на залэ будэр Сытрямарес.

⁵⁰ Ашундя када, Иисусо пхэндя Иаирости:

— На дара, качи патя, и щей тири авэла фэрисарди.

⁵¹ Сар Вов зажыля андо чер, на дя никасти тэ зажан Лэса, качи о Пэтро, Иоано, Иаково, дад и дэй щиёратирэ. ⁵² Всаворэ ровэнас и грыжонаспэ пала щиёры.

— Пэрэашэн тэ ровэн, — пхэндя Иисусо. — Вой на муля, а совэл.

⁵³ Онэ линэ тэ асан Лэстар, колэстар со жанэнас: вой муля. ⁵⁴ Иисусо ля ла палав васт и пхэндя:

— Бэята, вщи!

⁵⁵ Духо щиёрако рисайля латэ, и андэ кодья врязма вой вшиля. Иисусо пхэндя тэ дэн лати тэ хас.

⁵⁶ О дад и дэй латирэ дивосайле. Иисусо пхэндя лэнди, никасти тэ на роспхэнэн пала када, со тердяпэ.

9

Иисусо бишалэл пэстирэн апостолонэн тэ роспхэнэн Радосаво Лав

¹ Иисусо стиля екхэтанэ дэшудуен апостолонэн и дя лэнди зор и баримос тэ вытградэн бэнгэн и тэ састярэн насвалимастар. ² И бишалдя лэн тэ роспхэнэн пала Дэвлэско Тхагаримос и тэ састярэн насвалэн. ³ Пхэндя лэнди:

— Нисо на лэнтэ пэса андо дром: ни дэсто, ни траста, ни марно, ни ловэ, ни авэр йида. ⁴ Андэ саво чер тумэ тэ зажан, котэ ашэнпэ и котар жан майдур. ⁵ Сар мануша тумэн на прилэна, тунчи, сар авэна тэ выжан колэ форостар, обмарэн поштумарэ пэрнэндар, мэк када авэла важ лэнди шпэра.

⁶ Дэшудуй жыле андо дром, пэрэжанас гав гавэстэ, роспхэнэнас Радосаво Лав, и андэ всаворэ тхана састярэнас насвалэн.

Иродо ашунэл палав Иисусо

⁷ Дума пала вся када дожыля кав рай тетрархо Иродо. Вов дивосайля, колэстар со екх пхэнэнас: када Иоано жундиял андай мулэ, ⁸ авэр — со када сикадяпэ Илия,

ай авэр — со када жундиля андай мулэ екх андай дэлмутно пророко. ⁹ Иродо пхэндя:

— Иоаности мэ отшындэм шэро. А ко тунчи Кадва Мануш, пала саво мэ ашунав? И вов родэлас тэ дикхэл Исусос.

Исусо чялярэл майбут, сар панч мии манушэн

¹⁰ Апостолоря рисайле и роспхэндэ Исусости пала вся, со онэ стердэ. Тунчи Вов ля лэн Пэса, и онэ жыле ежэнэ биманушэнго кав форо, саво акхарэллэ Вифсаида.

¹¹ Нэ бут мануша ужангле пала када и жыле палав Исусо. Вов мишто лэн приля, пхэнэлас лэнди палав Дэвлэско Тхагаримос и кадя ж састьярэлас колэн, касти када сас трэбуй. ¹² Врязма жалас кай рят, и дэшудуй поджыле кав Исусо и пхэндэ:

— Отмук манушэн, соб онэ тэ жан андэ пашэ тхана и гава тэ аракхэн, кай тэ ратярэн и тэ хан, колэстар со амэ катэ андэ биманушэнго тхан.

¹³ Исусо пхэндя лэнди:

— Тумэ дэнтэ лэнди тэ хан.

Сытрянэ дивосайле:

— Амэндэ качи панч марнэ и дуй маше. Со амэнди, тэ жас тэ тинас хамос важ всаворэ акала мануш?

¹⁴ Котэ сас екхэн муршэн варикай панч мии. Исусо пхэндя сытрянэнди:

— Розбэшлярэн манушэн по пандэша.

¹⁵ Сытрянэ кадя тердэ. Кала всаворэ бэшле, ¹⁶ Исусо ля панч марнэ и дуй маше, взагля якха по болыбэн и пхэндя наис палав хамос. Тунчи Вов ля тэ пхагэл марно и машё и тэ дэл Пэстирэ сытрянэнди, кай кола тэ роздэн манушэнди. ¹⁷ Всаворэ ханас и чалиле, и стидэ инке котора савэ ашылепэ, андэ дэшудуй барэ трасты.

Пэтро прижанэл Исусос Христоса

¹⁸ Екхварэс, кала Исусо мангэласпэ Дэвлэс ежэно, найдур Лэстар сас Лэстирэ сытрянэ. Вов пушля лэндар:

— Пала касти прилэн Ман мануша?

¹⁹ Онэ пхэндэ:

— Палав Иоано Болдэмарё, ай авэр — палав Илия, ай авэр пхэнэн, со екх андай дэлмутно пророко жундиля.

²⁰ — А тумэ важ касти прилэн Ман? — пушля лэн Исусо.

— Дэвлэско Христосо, — пхэндя Пэтро.

Исусо пхэнэл палав Пэско миринос и кай Вов жундёла

²¹ Нэ Исусо припхэндя лэнди, кай никасти тэ на роспхэнэн пала када. ²² Пхэндя:

— Шаво Манушыкано авэла андэ бари грыжа, и Лэс на прилэнна пхурэдэра, барэ rashaya и сытряимаря Законостирэ. Вов авэла умардо, ай по трито дес жундёла.

²³ Тунчи Исусо пхэндя лэнди:

— Сар ко камэл тэ жал пала Мандэ, мэк отпхэндёл ежэно пэстар, кажно дес лэл пэско трушул и жал пала Мандэ. ²⁴ Кодва, ко камэл тэ фэрисарэл пэско жувимос, хасарэла лэс, а ко хасарэла пэско жувимос важ Манди, кодва фэрисарэла лэс.

²⁵ Со за мищимос манушэсти, сар вов лэла всавори люма, а ежэно хасавэла и терэла грыжа пэсти? ²⁶ Ко лажала Мандар и Мэрнэ лавэндар, колэстар лажала и Шаво Манушыкано, кала авэла андэ Пэстири слава и андэ слава лэ Дадэстири, и свэнтонэнца ангелонэнца. ²⁷ Пхэнав тумэнди чячимос: исин машкар тумэндэ кола, савэ тэрдён катэ, онэ на мэрэна, сар удикхэна о Тхагаримос Дэвлэско.

Исусо дэл дума лэ Моисеёса и Илияса

²⁸ Кала прожыля варикай охта деса, сар Исусо пхэндя кала лава, Вов ля Пэтрос, Иоанос и Иаковос и взагляпэ по плай тэ мангэллэ Дэвлэс. ²⁹ Андэ кодья врязма, сар мангэласпэ, Лэско муй парудиля, Лэстири йида ашыля парни тай свэгэсавэлас.

³⁰ И акэ, авиле дуй мурш, савэ линэ тэ дэн дума Исусоса, — када сас Моисеё и Илия.

³¹ Онэ авиле андэ бари слава и пхэнэнас, со Лэсти трэбуй тэ жал андо Иерусалимо кай тэ ашавэл кадья люма. ³² Пэтро и ко сас лэса засутэ. Но сар просутэпэ, удикхле

слава Исусостири и дуен муршэн, савэ тэрдёнас паша Лэстэ. ³³ Кала мурша линэ тэ жантар, Пэтро пхэндя Исусости:

— Сытрямари! Амэнди катэ фартэ мишто! Амэ стераса трин катуны: екх Тути, екх Моисеёсти и екх Илиясти.

Ежэно на полэлас, со дэлас дума, авиля облако пэр лэндэ и онэ попэле талав лэстэ. Сар попэле андо облако, онэ фартэ пэрэдараилье.

³⁵ Андав облако пхэндя гласо:

— Када Мэрно Шаво, Мэрно вытидо. Лэс ашунэн!

³⁶ Сар гласо на ашыля, онэ удикхле екхэс Исусос. Онэ ашэнас мулком пала кода и андэ кодья врьяма никости на роспхэнэнас, со онэ дикхле.

Исусо састярэл шаворэс найжужэ духостар

³⁷ Пэ авэр дес, кала онэ змукэнаспэ пав плай, Исусос ажутярэнас фартэ бут мануша. ³⁸ И екх мануш андар лэндэ зацыписайля:

— Сытрямари! Мангав Тут, подикх по мэрно шаво, вов екх мандэ. ³⁹ Лэс схутилэл и тасавэл духо, и тунчи шаворо лэл тэ цыписавэл, тэ тиносавэл и тэ мукэл саля. Духо фартэ марэл лэс и тунчи цыра отжал лэстар. ⁴⁰ Мэ манглем Тирэн сытрянэн тэ вытрайдэн лэс, но онэ на вытрайдэ.

⁴¹ — Напатимаско и билажавардо родо, — пхэндя Исусо. — Скачи Манди тэ авав тумэнца и тэ тэрписарав тумэн? Ан тирэс шавэс кардэ.

⁴² Кала шаворо инке жалас, бэнг шутя лэс пэ пхув и ля тэ марэл лэс. Но Исусо запхэндя найжужэ духости, састярдя шаворэс и отдя лэстирэ дадэсти. ⁴³ Всаворэ дивосайле, саво баро Дэл.

Исусо упалэ пхэнэл палав Пэско миринос

Андэ кодья врьяма, сар всаворэ дивосавэнас колэсти, со тердя Исусо, Вов пхэндя Пэстирэ сытрянэнди:

⁴⁴ — Ашунэн мишто, со Мэ тумэнди икхатар пхэнава: Шаво Манушыкано сыго авэла отдино андэ васт манушэндирэ.

⁴⁵ Но онэ на полинэ, со Вов пхэндя. Лэнди када сас затердо, и онэ на полинэ, со сас пхэндо, а тэ пушэн Лэс пала када лав даранас.

Сытрянэ ханпэ, ко лэндар майбаро

⁴⁶ Машкар сытрянэ екхвар сас дума пала кода, ко лэндар майбаро. ⁴⁷ Исусо жангия, со онэ гындонас андэ водя, ля цэнхэс бэятос и тходя паша Пэстэ.

⁴⁸ — Ко важ Мэрно алав прилэл акацавэс бэятос, — пхэндя Исусо, — кодва и Ман прилэл, а ко прилэл Ман, кодва прилэл Колэс, ко Бишалдя Ман. Ко машкар тумэндэ майцэкно всаворэндар, кодва и майбаро.

⁴⁹ Иоано пхэндя Лэстий:

— Сытрямари! Амэ дикхле манушэс, саво Тирэ алавэса вытрайдэл бэнгэн. Амэ запхэндэ лэсти, колэстар со вов на пхирэл пала Тутэ екхэтанэ амэнца.

⁵⁰ — На запхэнэн, — пхэндя лэсти Исусо. — Ко на жал пэ тумэндэ, кодва пала тумэндэ.

Самаряноря на прилэн Исусос

⁵¹ Кала Исусости поджыля врьяма тэ ваздэлпэ по болыбэн, Вов ля андэ годи со трэбуй тэ жал андо Иерусалимо. ⁵² Англал Пэстэ Вов бишалдя пэстирэ манушэн, онэ жыле андо екх андай самариятире гава тэ пригытон вся. ⁵³ Нэ мануша, савэ жувэнас котэ, на прилинэ Лэс, колэстар со Вов жалас андо Иерусалимо. ⁵⁴ Лэстирэ сытрянэ, Иаково тай Иоано, дикхле када и пхэндэ:

— Рай! Камэс, амэ припхэнаса ягати тэ сжал пав болыбэн и всаворэн лэн тэ спхабарэл?

⁵⁵⁻⁵⁶ Исусо обрисайля, запхэндя лэнди.* И онэ жыле андэ авэр гав.

* **9:55-56** 9.55-56 Андэ коисавэ гречески манускрипторя инке исин кацавэ лава: «тай пхэндя: "Тумэ на жанэн, савэ тумэ духостар. Шаво Манушыкано авиля, тэ на хасарэл манушэндирэ водя, а тэ фэрисарэл лэн"».

Исусо пхэнэл, сави цымин, кай тэ жан пала Лэстэ

57 Сар онэ жанас пав дром, екх мануш пхэндя Иисусости:

— Мэ жава пала Тутэ андо всаворэ тхана, кай Ту жаса.

58 Иисусо пхэндя лэсти:

— Кай лисоря исин тхана, кай онэ жувэн, и кай чирикля болыбнастирэ — пэско тхан, а Шавэсти Манушыканэсти най кай шэрэ тэ тховэл.

59 Аврэсти манушэсти Иисусо пхэндя:

— Жа пала Мандэ.

Кодва пхэндя:

— Рай, дэ манди майанглал тэ жав и тэ гаравав пэстирэ дадэс.

60 — Мэ мулэ ежэнэ гаравэн пэстирэн мулэн, а ту жа и роспхэн пала Тхагаримос Дэвлэско, — пхэндя лэсти Иисусо.

61 Инке екх мануш пхэндя Лэсти:

— Рай, Мэ жава пала Тутэ! Нэ дэ манди майанглал тэ жав и тэ дикхав пэско йири.

62 Иисусо пхэндя:

— Ни екх мануш, саво тховэла васт пэско по плуго и обдикхэллэ палпалэ, на поджал важ Тхагаримос Дэвлэско.

10*Исусо бишалэл эхтадэш сыйярнэн*

1 Тунчи о Рай вытидя инке эхтадэш сыйярнэн и бишалдя по дуй англал Пэстэ андэ всаворэ фороря и тхана, каринг камэлас Ежэно тэ жал. **2** Вов пхэндя лэнди:

— Пэ мал вся выбариля, трэбуй тэ стидэ, а бутярнэн цыра. Мангэн Хулас, кай Вов тэ выбишалэл бутярнэн пэ мал тэ стидэ вся, со бариля.

3 Жантэ! Мэ бишалав тумэн, сар бакрорэн машкар рува. **4** На лэн пэса ни тышила, ни траста, ни пэрналэ, и никаса пав дром на ашэн тэ дэн дума. **5** Кала авэна тэ зажан андо чер, майанглал пхэнэн: «Тэ авэн бахталэ». **6** Сар андэ кодва чер жувэл шаво бахтатиро, тунчи авэла пэр лэстэ бахт тумари, а сар на прилэла, тунчи тумари бахт рисавэла тумэндэ. **7** Андо кодва чер ашэнпэ, на пэрэжан андав чер черэстэ, хантэ и пэнтэ кода, со лэндэ исин. Ко терэл бути, вов ашэл, кай лэсти тэ потинэн.

8 Сар тумэ зажана андо форо и тумэн котэ прилэна, хантэ вся, со тумэнди дэна,

9 састярэн лэндирэ насвалэн, савэ котэ исин, тай пхэнэнтэ лэнди: «Тхагаримос лэ Дэвлэско пашыля тумэндэ». **10** Сар тумэ зажана андо екх форо и тумэн котэ на прилэна, жан пай гасы калэ форостирэ и пхэнэн: **11** «И о прахо тумарэ форостар, саво приашыля кай амарэ пэрнэ, амэ обмарас пэр тумэндэ. Нэ жанэн: Тхагаримос Дэвлэско пашэ!» **12** Пхэнав тумэнди, со андо кодва дес Содомостирэ манушэнди авэла майлокхо, сар калэ форости.

13 Бида тути, форо Хоразино! Бида тути, форо Вифсаида! Сар андэ фороря Тиро и Сидоно тэ авэл тердо скачи диворя, сар тумэндэ, то дэлмут онэ урядэпэ андэ кали йида и бэшэнас андо пепло, каисавэнас. **14** Но Тирости и Сидоности авэла фэдэр по сындо, сар тумэнди. **15** И ту, Капернаумо, гындос, кай авэса вазгло кав болыбэн? Най, ту авэса сшуюто андо адо.

16 Тунчи Вов пхэндя сыйярнэнди:

— Ко ашунэл тумэн, ашунэл Ман, а ко отпхэндёл тумэндар, и Мандар отпхэндёл. А ко отпхэндёл Мандар, отпхэндёл Колэстар, ко бишалдя Ман.

Эхтадэш сыйярнэ рисавэн

17 Эхтадэш сыйярнэн рисайле кав Иисусо радомаса:

— Рай, — пхэнэнас онэ, — и бэнга кандэн амэн, кала амэ припхэнас лэнди Тирэ алавэса!

18 Иисусо пхэндя:

— Мэ дикхлем, сар о Сатана пэля пав болыбэн, сар молния! ¹⁹ Акэ, Мэ дав тумэнди баримос тэ тасавэн сапэн и скорпионон, тай всавори вражымостири зор, ай тумэнди нико на терла бида. ²⁰ Нэ радосавэн на колэсти, со духоря кандэн тумэн, ай радосавэн колэсти, со тumarэ алava запистросардэ по болыбэн.

²¹ Андэ кодья връма Исусо радосайля андо Свэнто Духо и пхэндя:

— Мэ лашарав Тут, Дадэ, Рай Дэл по болыбэн и пэ пхув, пала кода, со Ту гаравдян када годявэр и съярнэ манушэндар и отпхэрнадян када бэяцэнди. Кадя, Дадэ, када сас Тири лащи воля! ²² Дад отдя Манди вся. Нико на жанэл, ко исин Шаво, качи о Дад. И нико на жанэл, ко исин Дад, сар качи о Шаво и кодва, касти Шаво камэл тэ отпхэрнавэл Лэс.

²³ Тунчи Вов обрисайля кай Пэстирэ съярнэ, пхэндя кадя:

— Бахталэ якха, савэ дикхэн кода, со тумэ дикхэн! ²⁴ Мэ пхэнав тумэнди, со бут пророкоря и тхагара камэнас тэ дикхэн кода, со тумэ дикхэн, и на дикхле, и камэнас тэ шунэн кода, со тумэ ашунэн, и на ашундэ.

Дума палав лашэ водеско самарянино

²⁵ Катэ вшиля екх съяримари Законоско и пушля кав Исусо, камля тэ астарэл Лэс по лав.

— Съяримари, со манди тэ терав, кай мэ тэ лав жувимос вакоско?

²⁶ — А со пхэнэлпэ андо Законо? — пушля лэстар Исусо. — Со ту котэ бинэс?

²⁷ Вов пхэндя:

— Кам Раес, Дэвлэс тирэс, всаворэ водеса тирэса, и всаворэ жувимаса тирэса, и всаворя зораса тиряса, и годяса тиряса. И кам пашэс тирэс, сар ежэно пэс.

²⁸ — Чячес ту пхэндя, — пхэндя лэсти Исусо. — Тер кадя, и ту авэса тэ жувэс.

²⁹ Съяримари Законоско камля тэ допхэнэл, кай вов на ужыло, пхэндя Исусости:

— А ко мэрно пашо?

³⁰ Пэ када пхэндя Исусо:

— Екх мануш жалас андав Иерусалимо андо Иерихоно. Пав дром пэр лэстэ хукле прахаря, савэ злинэ пар лэстэ йида, мардэ фартэ и ужыле, ашадэ лэс тэ мэрэ. ³¹ Кадя прижылягэ, пав кода дром жалас рашай. Сар удикхля калэ манушэс, обжыля лэс пай авэр риг дром. ³² Кадя ж тердя и левито: дожыля кай кадва тхан, удикхля лэс и обжыля ригаса. ³³ Колэ дромэса прожалас и самарянино, удикхля лэс и тангосардя. ³⁴ Вов поджыля, прохаладя и помакхля оливково дзэтоса и молэса раноря, пэрэпханггя лэн. Тунчи тходя лэс пэ пэско осло, андя лэс андэ гостиница и котэ инке додикхэллас пала лэстэ. ³⁵ Пэ авэр дес, кала вов уладэллас, дя хуласти андай гостиница дуй динария и пхэндя: «Придикх пала лэстэ, ай сар мэ авава тэ рисавав, сар ту потинэса майбут, мэ роспотиндювава туса». ³⁶ Ко андай кала трин, пав тиро, сас майпашэ калэсти манушэсти, саво попэля кай прахаря?

³⁷ Съяримари Законоско пхэндя:

— Кодва, ко сикадя лэсти тангимос.

Тунчи Исусо пхэндя лэсти:

— Жа и ту тер кадя ж.

Марфа и Мария

³⁸ Пав дром Исусо лэ съярнэнца зажыля андэ екх гав. Котэ жувли, савя акхарэнас Марфа, акхардя Лэс андо пэско чер. ³⁹ Латэ сас пхэй, савя акхарэнас Мария. Вой бэшля пашай пэрнэ Раестирэ и шунэллас, со Вов пхэнэллас. ⁴⁰ Марфа прастэллас кордэ палпалэ, терэллас и подэллас о хамос пэ мэсали. Вой поджыля кав Исусо и пхэндя:

— Рай! Ту на дикхэс, кай мэрни пхэй екха ман ашадя тэ терав бути? Пхэн лати, кайвой тэ поможысарэл манди!

⁴¹ — Марфо, Марфо, — пхэндя Рай, — ту гындос и терэс бут со. ⁴² А трэбуй качи екх. Мария вытидя, со майфэдэр, и када латар на залэлапэ.

11

Исусо сытярэл сытярнэн тэ мангэн Дэвлэс

1 Ехварэс Иисусо андэ екх тхан мангэлас Дэвлэс, и сар Вов пэрэашыля, екх андай сытярнэ мангля Лэс:

— Рай! Сытяр амэн тэ мангас Дэвлэс, сар о Иоано сытярдя пэстирэ сытярнэн.

2 Вов пхэндя лэнди:

— Кала тумэ мангэн Дэвлэс, пхэнэн кадя:

Дадэ! Мэк всаворэ лашарэн Тиро свэнто алав!

Мэк авэл Тхагаримос Тиро!

3 Марно, саво трэбуй амэнди,
подэ амэнди пэ кадва дес.

4 И эртисар амэнди амарэ бэзэхэ,
колэсти со и амэ эртисарас всаворэнди,
ко амэнди ужыло.

И на домук тэ подаспэ кав бэзэх.

5 Тунчи Иисусо пхэндя лэнди:

— Сар варикастэ тумэндар исин амал, и тумэ авэна лэстэ андэ епаш рят и пхэнэна: «Амал, дэ манди андо ужылимос трин марнэ. **6** Мандэ дромэстар залагля амал мэрно, и манди нинай, со тэ дав лэсти». **7** А кодва андрал андав чер пхэнэла лэсти: «На замисар ман! Удар затердэ, и бэяцэ мэрнэ манца по пато. Най сар тэ вщав и тэ дав тути». **8** Пхэнав тумэнди, сар вов на вщела и на дэла колэсти, со вов исин лэско амал, пала кода со тумэ на пэрэашэн тэ мангэн, вов вщела и дэла, со тумэнди трэбуй, кай лэсти тэ на авэл лажаво.

9 Пхэнав тумэнди: мангэн — и о Дэл дэла тумэнди, родэн — и аракхэна, марэн андэ удар — и о Дэл отпхэрнавэла тумэнди. **10** Кодва, ко мангэл — лэл, ко родэл — аракхэл, и ко марэл андэ удар — колэсти отпхэрнавэн. **11** Иisin машкар тумэндэ кацаво дад, саво дэла пэстирэ шавэсти сапэс, сар вов мангэл машё? **12** Сар мангэла парноро, дэла лэсти скорпион? **13** Кала тумэ холятирэ, ай пэстирэ бэяцэнди дэн лашымос, майфартэ Дад тумаро болыбнаско дэла Свэнтонэс Духос колэнди, ко мангэл Лэстар.

Исусо вытрадэл бэнгэн Дэвлэстиря зораса

14 Ехвар Иисусо вытрайя бэнгэс, саво терэлас манушэс мутонэса. И кала бэнг выжыля, мануш, саво сас мuto, задя дума. Мануша дивосайле. **15** Коисавэ пхэнэнас:

— Вов вытрадэл бэнгэн зораса, сави дэл Веельзевуло, пхурэдэр бэнг.

16 Ай авэр камэнас тэ зумавэн лэ Иисусос, тай мангле, кай Вов тэ сикавэл шпэра пав болыбэн. **17** Иисусо жангия, со онэ гындон, пхэндя лэнди:

— Кажно тхагаримос, саво машкар пэстэ вражымари, авэла шушо, и чер, кай вражымаря машкар пэстэ, пэрэла. **18** Сар о Сатана вражымари ejэно пэсти, сар утэрдёла тхагаримос лэско? Тумэ пхэнэн, со Мэ зораса, сави дэл Веельзевуло вытрадав бэнгэн. **19** Сар Мэ вытрадав бэнгэн зораса, сави дэл Веельзевуло, тунчи савя зораса вытрадэн лэн тумарэ шавэ? Колэсти онэ авэна тумэнди сындомаренца. **20** А сар Мэ вытрадав бэнгэн Дэвлэстиря зораса, тунчи авиля тумэндэ Тхагаримос Дэвлэско. **21** Кала зорало мануш лэ мардянца мишто дикхэл пала пэско чер, тунчи лэско хулаимос нико на обчёрэла. **22** Кала майзор лэстар хукэла пэр лэстэ, тунчи помарэла лэс тай залэла лэстар мардя, савэнца вов гындолас тэ фэрисарэллэ, вся, со исин андо чер, залэла и роздэла.

23 Ко на еххэтанэ Манца, кодва жал пэр Мандэ; и ко на стидэл Манца, кодва росшол.

Сар рисавэл палпалэ найжужо духо

24 Кала найжужо духо выжал андав мануш, вов пхирэл пай бипаестирэ тхана, родэл, кай тэ отчиёл, и на аракхэл. Тунчи вов пхэнэл: «Рисавава мэ андо чер,

катар выжылем». ²⁵ Кала вов рисавэл, дикхэл, со чер лэско жужардо и притидо. ²⁶ Тунчи вов жал и лэл пэса эхта аврэн духон, майхолятирэн пэстар, и онэ зажан и жувэн котэ. И када важо мануш инке майвырито, сар сас майанглэ.

Чячюи бахт

²⁷ Сар Вов инке дэлас дума, тунчи екх жувли зацыписайля андай мануша, савэ стидэпэ котэ:

— Бахтали кодья дэй, сави бэяндя и выправардя Тут!

²⁸ Исусо пхэндя пэ када:

— Бахталэ кола, ко ашунэн Дэвлэско лав и терэн, сар Вов пхэнэл.

Шпэра Ионастири

²⁹ Сар манушэн стидяпэ майбут, Исусо ля тэ дэл дума:

— Кадва родо — холяко. Вов родэл шпэра, нэ лэсти на дэлапэ нисави шпэра, качи шпэра Ионастири. ³⁰ И сар Иона сас шпэра важ ниневитяноря, кадя Шаво Манушыкано авэла шпэра важ кадва родо. ³¹ Тхагарни пав юго ваздёла по сындо манушэнца калэ родостар и сындолосарэла лэн, колэсти со вой пай авэр риг пхув авэлас тэ пошунэл годяримос Соломоноско, и акэ, катэ майбаро Соломоностар.

³² Ниневитяноря ваздёна по сындо лэ манушэнца калэ родостар и сындолосарэна лэн, колэсти со онэ ашадэ бэзэх пэско лавэндар, савэ пхэндя Иона. И акэ, катэ майбаро Ионастар.

Исусо пхэнэл палав удууд, саво андрал

³³ Нико, ко запхабарэл каганцо, на тховэл лэс по тхан, кай лэс нико на дикхэла, или талай кхоро. Нэ тховэн лэс упрэ, кадя, кай, ко зажала, тэ дикхэл удууд. ³⁴ Тирэ якха — удууд важ тиро тило. Кала тирэ якха жужэ, тунчи и ту всаворо пхэрдо удуудэса. Ай сар тутэ найлашэ якха, тунчи тило тиро пхэрдо калимаса. ³⁵ Колэстар дикх, удууд, саво андэр тутэ, на калимос? ³⁶ Акэ, сар тиро тило пхэрдо удуудэса и андэр лэстэ нинай нисаво калимос, тунчи ту всаворо авэса пхэрдо удуудэса, сар молниятар шолппэ пэр тутэ лако удууд.

Исусо ужылисарэл фарисеёнэн и сытряимарен Законостирэн

³⁷ Кала Исусо када пхэнэлас, екх фарисеё акхарда Лэс пэстэ тэ хал. Исусо жыля тай бэшля палай мэсали. ³⁸ Фарисеё дивосайля, со Вов на халадя и васт, англал сар тэ бэшэл тэ хас. ³⁹ Рай пхэндя лэсти:

— Акэ тумэ, фарисеёря, жужарэн чярэ и тарелки упран, ай андрал тумэ исин скумпо и холятирэ. ⁴⁰ Бигодятирэ! Кодва, Ко тердя упран, на тердя ли и андрал?

⁴¹ Дэнтэ чёрорэнди, колэстар, со тумэндэ исин, и тунчи вся важ тумэнди авэла жужо.

⁴² Бида тумэнди, фарисеёря! Тумэ дэн дэшто котор пай мята, рута и пай всавори зэлэнь, ай чячимос и камлимос Дэвлэско забистарэн. И када трэбуй тэ терэн, и кода тэ на ашавэн.

⁴³ Бида тумэнди, фарисеёря! Тумэ камэн тэ залэн майлашэ тхана андэ синагоги и кай мануша тумэнди тэ пхэнэн пэ барэ грады: «Тэ авэн бахталэ».

⁴⁴ Бида тумэнди! Тумэ — сар склэпоря, савэ на душон, пай савэ мануша пхиран и на жанэн, кай онэ котэ исин.

⁴⁵ Екх андай сытряимаря Законостирэ пхэндя Лэсти:

— Сытряимари! Кала думаса и амэн обмукэс.

⁴⁶ Исусо пхэндя:

— Бида и тумэнди, сътряимаря Законостирэ! Тумэ тховэн пэ мануш траст, сави пхарэс тэ андярэ, ай ежэнэ и наеса кадэла трастатэ на лэнпэ.

⁴⁷ Бида тумэнди! Тумэ тховэн шукарнэ памятникоря пророконэнди, савэн умардэ тумарэ дада. ⁴⁸ Калэса тумэ подритярэн рындоря тумарэ дадэндирэ. Онэ умардэ пророкон, а тумэ терэн важ лэнди памятникоря. ⁴⁹ Колэсти годяримос Дэвлэско пхэндя: «Мэ бишалава лэндэ пророкон и апостолонэн, и онэ екхэн умарэна, ай аврэн вытрайдана». ⁵⁰ Колэстар кадва родо потинэла палав всаворо рат

пророкэндиро, саво сас прошуто кола врятатар, кала тердяпэ люма, ⁵¹ лэ ратэстар Авилистириэрстар кав рат Захарияско, саво сас умардо машкар жэртвенико и храмо. Кадя, пхэнав тумэнди, пушэлапэ калэ родостар.

⁵² Бида тумэнди, сыйяримаря Законостиирэ! Тумэ залинэ тии лэ джянглимастар, нэ ежэнэ на зажыле и затердэ дром колэнди, ко зажал.

⁵³ Кала Иисусо выжыля андав чер, сыйяримаря Законостиирэ и фарисеёра фартэ холяйле пэр Лэстэ, долэнас Лэс и бут пушэнас Лэстар. ⁵⁴ Онэ родэнас, сар тэ астарэн Лэс по лав.

12

Иисусо пхэнэл пала дуемуендиирэн

¹ Андэ кодья връяма стидэпэ бут мануша, кадя со тасавэнаспэ машкар пэстэ. Иисусо ля тэ пхэнэл майанглал Пэстири сыйярнэнди:

— Фэрисавэн фарисеёнэндиря закваскатор, кай тэ на авэн тумэ дуемуендиирэ.

² Нинай нисо гарадо, со на отпхэрнавэлапэ, и нисо чёрэхано, со на ужандёла. ³ Со тумэ пхэнэн чёрэханэс рятыса, кода ашундёла десэ; и со тумэ пхэнэнас тыхо андрэ андо чер, авэла тэ цыписавэллэ упран пай чера.

Даран качи екхэ Дэвлэс

⁴ Мэ пхэнав тумэнди, Мэрнэ амалэнди: на даран колэндар, ко умарэла тило и будэр нисо на терэла. ⁵ Мэ сикавава тумэнди, Кастьтар трэбуй тэ даран: даран Колэстар, Ко на качи умарэла, но исин Лэстэ баримос тэ шол андо геена. Чячес пхэнав тумэнди, Лэстар даран. ⁶ Най панч цэктэ чирекля битиндён пала дуй копийки? И ни пала екх лэндар о Дэл на бистардя. ⁷ А тумэндэ и бал по шэро всаворэ побиндэ! На даран — тумэ майкуч бутэ цэктэ чирекляндэр.

На лажан Иисусостар

⁸ Пхэнав тумэнди: всаворэ, ко прижанэна Ман англай мануша, и Шаво Манушыкано прижанэла колэс англай ангелоря Дэвлэстиирэ. ⁹ А ко отпхэндёла Мандар англай мануш, колэстар и Вов отпхэндёла англай ангелоря Дэвлэстиирэ.

¹⁰ Всаворэ, ко пхэнэла вырито лав по Шаво Манушыкано, эртисардёла лэсти, а ко пхэнэла вырито лав пэ Свэнто Духо, колэсти на эртисардёла.

¹¹ Кала тумэн андярэна андэ синагоги, кай пхурэдэра и барэ рага, на гындон пала кода, сар тэ фэрисарэн пэс и со тэ пхэнэн. ¹² Свэнто Духо сыйярэла тумэн, со андэ кодья връяма трэбуй тэ пхэнэн.

Дума палав бигодяко барвало

¹³ Варико андай мануш пхэндя Иисусости:

— Сыйяримари! Пхэн мэрнэ пхралэсти, кай вов тэ дэл котор андар хулаимос, саво ашыляпэ амэнди дадэстар.

¹⁴ Иисусо пхэндя:

— Мануш, ко тховдя Ман тэ сындоцарав тумэн и тэ роздав тумаро хулаимос машкар тумэндэ?

¹⁵ Вов пхэндя лэнди:

— Дикхэн, кай тэ на стидэн бут барвалимос. Вов тумаро жувимос бахталэса на терэла.

¹⁶ Тай Иисусо роспхэндя лэнди дума:

— Екхэ барвалэ манушэстэ бариялэ пэ мал бут ворзо. ¹⁷ Тай вов гындолас пэсти: «Со манди тэ терав? Най кай мандэ тэ тхав кода, со выбария». ¹⁸ Тунчи Вов пхэндя: «Акэ со мэ терава: пхагава пусына мэрнэ и терава авэр майбарэ, стидава тай тхава о ворзо и всаворо барвалимос мэрно кордэ. ¹⁹ Тунчи мэ пхэнава пэстириэ жувимости: "Ай, жувимос мэрно! Акана бут барвалимос пашлёт тутэ, пэ бут бэрша хутилэла. Отчиюв, ха, пи и радосав!"» ²⁰ О Дэл пхэндя лэсти: «Бигодяко! Адес андэ кадья рят залэна тутар жувимос тиро. Касти доросэлапэ када, со ту

гытосардян?» ²¹ Кадя авэла всаворэнца, ко стидэл барвалимос важ пэсти, а на стидэл барвалимос важ о Дэл.

Исусо пхэнэл, тэ на грыжон

²² Тунчи Иисусо пхэндя пэстирэ сыйянэнди:

— Важ кода Мэ пхэнав тумэнди: на пэрэжувэн пала тумаро жувимос, со тумэнди тэ ха, и пала тило, андэр со тумэнди тэ урядён. ²³ Жувимос майкуч хамастар, и тумаро тило майкуч йидатар. ²⁴ Подикхэн пэ вороноря: онэ на шон ворзо и на стидэн, нинай пэстирэ пусына и амбароря, но о Дэл праварэл лэн. Пэ скачи тумэ фэдэр чирикляндар! ²⁵ Ко ж тумэндар, грыжатар, терэла майлунго пэско жувимос пэ екх чясо? ²⁶ Сар тумэ на стерна када найбарорындо, состар грыжонпэ пала вся авэр?

²⁷ Подикхэн, сар барён лулудя. Онэ на терэн бути и на сувэн пэсти йида, нэ пхэнав тумэнди, со Соломоно андай всаворо пэско барвалимос и баримос на урявдяпэ кадя, сар екх лэндар. ²⁸ Сар о Дэл када урявэл чяр пэ мал, сави адес исин, а тэся шона ла андо бов, чи на урявэла Вов и тумэн, ко цыра патял? ²⁹ На родэн, со тумэнди тэ ха тай со тэ пэ, и на грыжавэн пала када. ³⁰ Всаворэ народоря кала люматирэ качи гындосарэн пала када. Ай тумаро Дад жанэл, со тумэнди трэбуй вся када. ³¹ Родэн фэдэр Лэско Тхагаримос, а када вся додэна тумэнди.

³² На даран, найбаро стадо! Дад тумаро камэл тэ дэл тумэнди Тхагаримос.

³³ Битинэн тумаро хабэ и дэн чёрорэнди. Терэн пэсти кацавэ тышылы, савэ на спхиравэнпэ, барвалимос по болыбэн, саво на цэknёл, каринг ни чёр на дожала, ни моль на схала. ³⁴ Кай тумаро барвалимос, котэ авэла и води тумаро.

Дума палай лашэ бутярнэ

³⁵ Авэнтэ гытомэ: йида пэр тумэндэ мэк авэла пэрэпхангли күщикаса, и мэк пхабон тумарэ каганцоря. ³⁶ Авэнтэ сар бутярнэ, савэ ажуярэн пэстирэс хулас пав ябъяв. Кала хулай авэла и марэла андэ удар, онэ андэ кодья врязма отпхэрнавэна лэсти. ³⁷ Бахталэ кола бутярнэ, савэн о хулай, сар рисавэла, аракхэла лэн, кай на совэн. Чячимаса пхэнав тумэнди, вов тунчи ежэно пэрэпхандёла күщикаса, бэшлярэла лэн палай мэсали и авэла тэ подэл важ лэнди. ³⁸ Бахталэ кола бутярнэ, савэн хулай аракхэла, кай онэ ажуярэн лэс андэ епашият, и тэсара. ³⁹ Жанэнтэ, сар тэ жанэл о хулай лэ черэско, андэ сави врязма авэла чёр, вов на домэкэлас бы, кай вов тэ загулел андо чер. ⁴⁰ И тумэ авэнтэ гытомэ, колэстар со Шаво Манушыкано авэла андэ кодья врязма, андэ сави тумэ на ажуярэн.

⁴¹ Пётро пхэндя:

— Рай, Ту пхэнэс кадя дума качи амэнди чи всаворэнди?

⁴² Рай пхэндя:

— Саво исин патимаско и годяко пхурэдэр бутярно андо чер, савэс о хулай тховдя пашай пэстирэ бутярнэ, кай тэ роздэл хамос лэнди пай врязма? ⁴³ Бахтало кодва бутярно, савэс о хулай, кала рисавэла, удихэла, со вов кадя терэл. ⁴⁴ Пхэнав тумэнди чячимаса, калэс бутярнэс хулай тховэла пэ всаворо пэско хабэ. ⁴⁵ А сар кодва бутярно пхэнэла андэ води: «Мэрно хулай авэла на сыго», — и авэла тэ марэ бутярнэн и бутярнян, тэ ха и тэ пэ, кай тэ матёл, ⁴⁶ тунчи авэла лэско хулай андо дес, кала вов на ажуярэл, и андэ кодья врязма, кала вов на жанэл. Вов росшынэла по епашият лэс и дэла лэсти екх шана найпатимастирэ манушэнца.

⁴⁷ Кодва бутярно, саво жанэлас, со камэл хулай, и на терэлас, сар камля хулай, нэ на сас гытомэ и на терэлас, авэла фартэ мардо. ⁴⁸ А кодва, саво на жанэлас, и терэлас кода, пала со трэбуй тэ марэн, мардо авэла цыра. Касти сас бут дино, колэстар и бут замангэна, и касти бут дэласпэ, майбут пушэлапэ.

⁴⁹ Мэ авилем тэ анав яг пэ пхув, и сар Мэ камав, соб вой икхатар тэ роспхаболпэ!
⁵⁰ Манди трэбуй тэ прожав болдимос, и сар Мэ грыжосавав, кала када терэлапэ!
⁵¹ Тумэ гындосарэн, Мэ авилем, қай тэ анав пэ пхув миро? Най, пхэнав тумэнди, мэ авилем тэ анав вражымос. ⁵² Иири андай панч мануш розжалапэ: трин англай дуй, и дуй англай трин. ⁵³ Дад розжалапэ лэ шавэса, ай шаво лэ дадэса; дэй розжалапэ ла щяса, ай и щей пэстирия даса; свэкруха розжалапэ ла боряса, ай и бори ла свэкрухаса.

Шпэра врятатири

⁵⁴ Исусо пхэндя лэ манушэнди:

— Сар тумэ дикхэн по западо тучя, андэ кодья връма пхэнэн, со авэла брышынд, и кадя терэлпэ. ⁵⁵ Кала пхурдэл тати балвал пав юго, тумэ пхэнэн: «Авэла фартэ тато», — и кади терэлпэ. ⁵⁶ Дуемуендирэ! Тумэ жанэн, сар тэ полэн шпэры по болыбэн и пэ пхув, а состар на полэн, сави икхатар авиля връма? ⁵⁷ Важ со тумэ ежэнэ на сындосарэн, андэр со о чячимос? ⁵⁸ Сар жас тирэса вражымареса кав пхурэдэр, допхэнпэ лэса пав дром. Сар када на терэса, вов тут андярэла кав сындомари, ай о сындомари отдэла тут халавдэнди, а халавдэ бэшлэрэна тут андо баруно. ⁵⁹ Пхэнав тути, со на выжаса котар, аж сар на выпотинэса всаворэ ловэ.

13

Исусо акхарэл манушэн тэ каинпэ

¹ Тунчи кав Исусо авиле варисавэ мануша и роспхэндэ Лэсти пала галилеяноря, савэн Пилато припхэндя тэ умарэн андэ кодья връма, кала онэ анэнас жэртвоя.

² Исусо пхэндя:

— Тумэ гындосарэн, со кала галилеяноря хасайле, колэстар со онэ сас майбэзэхалэ всаворэндар? ³ Най, пхэнав тумэнди! Нэ сар тумэ на каинапэ, тумэ кадя ж всаворэ хасавэна. ⁴ Ай кола дэшуюхто мануша, савэ хасайле, кала пэля пэр лэндэ Силоамоско башня? Тумэ гындосарэн, онэ сас майужылэ всаворэндар колэндар, ко жувэлас андо Иерусалимо? ⁵ Най, пхэнав тумэнди! Нэ сар тумэ на каинапэ, кадя хасавэна.

⁶ Тунчи Исусо роспхэндя лэнди дума:

— Еххэ манушэстэ андо винограднико барёлас дрэво инжыроско. Еххвар вов жыля тэ родэл пэр лэстэ плодоря и нисо на аракхля. ⁷ Тунчи вов пхэндя пэстириэсти виноградорести: «Акэ, трин бэрш мэ авав тэ родав пэ кадва инжыро плодоря и нисо на аракхав. Спхаг лэс, пэр со вов залэл пхув?» ⁸ «Хулай, — пхэндя кодва, — ашав лэс инке пэ кадва бэрш. Мэ лэс обганавава, тхава пэрэгноё, ⁹ и ко жанэл, чи вов на анэла плодоря пэ авэр бэрш? Ай сар на анэла, тунчи спхагэса лэс».

Исусо састьярэл жувлия андэ субота

¹⁰ Андэ субота Исусо састьярэлас андэ екх синагога. ¹¹ Котэ сас жувли, савятэ дэшуюхто бэрш сас духо насвалимаско. Латэ сас бангю думо, ивой нисар на тэрдёлэс ворта. ¹² Кала Исусо удикхля ла, вов выакхардя ла англэ тай пхэндя:

— Жувлий! Ту састьярэспэ пэстириэстар насвалимастар.

¹³ Вов тховдя пэр латэ васта, ивой андэ кодья връма тэрдиля ворта и ля тэ лашарэл лэ Дэвлэс. ¹⁴ Пхурэдэр синагогако холяйля, со Исусо састьярдя андэ субота, и пхэндя лэ манушэнди:

— Исин шов деса, андэ савэ трэбуй тэ терэ бути. Андэ кола деса авэн и састьярэнпэ, нэ на андэ субота.

¹⁵ Пэ када Рай пхэндя лэсти:

— Дуемуендирэ! Кажно тумэндар андэ субота чи на отпхандэл пэстириэс гурувэс тай ослос и на выандярэл лэн андай пусын и на андярэл тэ дэл пай? ¹⁶ Ай када

исин екх андай щея Авраамостирэ, савя спхангля Сатана дэшуюхто бэрша. На трэбуй ли сас тэ роспхандэ андэ субота лэпунзэ кала жувляти?

17 Кала Вов пхэндя када, всаворэнди Лэстирэ вражымаренди тердяпэ лажаво, а всаворэ мануш радонаспэ пала барэрындоря, савэ Вов терэлас.

Дума палав Тхагаримос Дэвлэско

18 Исусо пхэндя:

— Пэр со мэзимэ Тхагаримос Дэвлэско? Сар тэ роспхэнав пала лэс? **19** Вов — сар горчично ворзо, саво о мануш ля тай шутя андэ пэстирэ баря. Ворзо выбариля и ашияла барэ дрэвоса, кадя, со чириклия болыбнастирэ жувэнас пэр лэстэ.

20 Инке Вов пхэндя:

— Пэр со мэзимэ Тхагаримос Дэвлэско? **21** Вов — сар заквашено хумэр, саво и жувли ля и тховдя андэ трин толоря варо, тай всаворо хумэр вазгляпэ.

Санэ удара

22 Исусо прожалас пай фороря тай гава, сыйярэлэс лэ манушэн. Вов жалас андо Иерусалимо. **23** Варико пхэндя Лэсти:

— Рай! Качи цыра манушэн авэна фэрисардэ?

Исусо пхэндя:

24 — Терэн вся, кай тэ зажан андэ санэ удара. Пхэнав тумэнди, бут авэна тэ родэн, кай тэ зажан, тай на зажана. **25** Кала о хулай лэ черэско вщела тай затерэла и удар, тумэ авэна тэ тэрдён андрал, тэ марэн андэ удар и тэ мангэнпэ: «Хулай, отпхэрнав амэнди!» Ай Вов пхэнэла: «На жанав тумэн, катар тумэ». **26** Тунчи тумэ пхэнэна: «Амэ хасас и пасас англай Тирэ якха, ай Ту сыйярэсас пэ амарэ гасы».

27 Нэ Вов пхэнэла: «Мэ на жанав тумэн, катар тумэ, отжан Мандар, всаворэ, савэ терэн найлашэрындоря».

28 Котэ авэла ровимос и бари грыжа, кала дикхэна лэ Авраамос, Исаакос и Иаковос, и всаворэн пророкон андо Тхагаримос Дэвлэско, ай тумэ авэна вытрадэ.

29 Авэна мануша пав востоко и западо, северо и юго и бэшэнэ палай мэсали андо Тхагаримос Дэвлэско. **30** Тунчи палатунэ авэна англал, ай англатунэ авэна палал.

Исусо ровэл палав Иерусалимо

31 Тунчи кав Исусо поджыле фарисеёря и пхэндэ:

— Ужа, ашав кадва тхан, колэсти со Иродо камэл Тут тэ умарэл.

32 Исусо пхэндя:

— Жантэ и пэрэдэнтэ колэсти хрантимарести: «Адес и тэся мэ авава тэ вытрадав бэнгэн и тэ састьярав манушэн, ай по трито дес Мэ дотерава Пэскорындо». **33** Нэ адес, тэся и палтэся Мэ трэбуй тэ жав, колэсти со на терэлпэ кадя, кай пророкос тэ умарэн на андо Иерусалимо!

34 Иерусалимо! Иерусалимо! Ту умарэс лэ пророкон и марэс барэнца колэн, кас бишалэн тутэ! Скачи моловоря Мэ камлем тэ стидав тирэн бэяцэн, сар и кагни стидэл пэстирэ пуёнэн паша пэстэ, а тумэ на закамле! **35** Акан тумаро чөр ашэлпэ шушо. Пхэнав тумэнди, кала тумэ удикхэна Ман андэ авэр моло, тунчи пхэнэна: «Лашардо Кодва, Ко авэл важ алэв Рае Дэвлэско!»

14

Со домукэлпэ тэ терэ андэ субота

1 Ехвар андэ субота Исусо авиля екхэстэ андай пхурэдэр фарисеёря тэ хал марно, и онэ дикхэнас пала Лэстэ. **2** Котэ бэшэлэс англав Исусо мануш, савэстэ сас паеско насвалимос. **3** Исусо пушля кай фарисеёря и сыйяримаря Законостирэ:

— Домукэлпэ тэ састьярэл андэ субота?

4 Онэ ашэнас мулком. Исусо ляпэ кав мануш, састьярдя лэс и отмэклия. **5** Тунчи Вов пхэндя лэнди:

— Сар вариастэ тумэндар шаво или гурув пэрэла андэ хайнг, на вылэна тумэ андэ кодья ж врязма андэ субота?

6 Лэнди найсо сас тэ пхэнэн пэ када.

Дума палаи фэдэр тхана пэ ябъяв

7 Исусо додикхля, сар кола, кас акхардэ, вытидэнас майфэдэр тхана палай мэсали, тай роспхэндя екх дума:

— Кала варико акхарэла тут по ябъяв, на бэш пэ англуну тхан. Колэсти со котэ авэла мануш майфэдэр тутар, **9** и хулай, саво акхардя тут и лэс, поджала тутэ и пхэнэла: «Дэ тхан калэсти манушэсти». И тути прижалапэ лажаимаса тэ бэшэс по палатуно тхан. **10** Нэ сар тут акхардэ, жа и бэш по палатуно тхан. Тунчи о хулай поджала тутэ и пхэнэла: «Амал, пэрэбэш по майфэдэр тхан». Тунчи тути авэла бари шана англай мануша, савэ бэшэн туса палай мэсали. **11** Всаворэ, ко ваздэл пэс, авэла тэллярдо, а ко тэллярэл пэс, авэла вазгло.

12 Тунчи Исусо пхэндя манушэсти, саво акхардя Лэс:

— Кала тховэс мэсали, на акхар лэ амалэн, лэ пхралэн, манушэн тирэ родостар тай лэ барвалэн, савэ паша тутэ жувэн. Колэсти со и онэ акхарэна тут пэстэ и рисарэна тути тиро лашымос. **13** Нэ сар ту тховэс мэсали важд мануша, акхар чёрэн, попхаглэн, бангэн тай корэн. **14** Тунчи ту авэса бахтало, колэстар со онэ на отдэна тути кода, со ту дян, и тунчи тути потинэлапэ, кала жундёна чячимастирэ мануша.

Дума пала кола, савэн акхардэ по ябъяв

15 Кала екх андай кола, ко бэшэлас палай мэсали, ашундя када, вов пхэндя Исусости:

— Бахтало, ко авэла тэ хал марно андэ Тхагаримос Дэвлэско!

16 Исусо пхэндя лэсти:

— Екх мануш тердя баро свэнко и акхардя бутэн манушэн. **17** Кала авиля и врязма тэ бэшэн палай мэсали тэ хан, вов бишалдя пэстирэс бутярнэс тэ акхарэл акхардэн: «Авэнтэ, вся гытомэ». **18** Онэ екх палай аврэстэ линэ тэ мангэн патив. Екх пхэндя: «Мэ тиндэм пхув, и манди трэбуй тэ жав тай тэ дикхав ла. Мангав тут, эртисар ман». **19** Авэр пхэндя: «Мэ тиндэм дэшэн гурувэн тай жав тэ дикхав лэн, савэ онэ андэ бути. Мангав тут, эртисар ман». **20** Трито пхэндя: «Мэ лем ромня, колэсти най сар тэ авав тутэ».

21 Бутярно рисайля и роспхэндя пэстирэсти хуласти. Тунчи о хулай лэ черэско холяйля и пхэндя пэстирэсти бутярнэсти: «Жа майсыго пай барэ и цэknэ гасы форостири и ан кардэ чёрэн, попхаглэн, корэн тай бангэн». **22** «Хулай, — пхэндя бутярно, — кода, со ту припхэндян, вся тердэм, и инке исин тхан». **23** Тунчи хулай пхэндя пэстирэ бутярнэсти: «Жа пай дрома и паша грады и манг, кай тэ авэн кардэ, кай о чер мэрно тэ авэл пхэрдо манушэнца. **24** Пхэнав тумэнди, со нико колэндар, кас мэ акхаравас майанглал, на хала пай мэрни мэсали».

Исусо пхэнэл пала кода, со трэбуй, кай тэ авэл Лэстирэ сыйярнэса

25 Лэ Исусоса жанас бут мануша, и Вов обрисайля лэндэ тай пхэндя:

26 — Сар ко авэл Мандэ и на камэла Ман майфартэ пэстирэ дадэстар, датар, ромнятар, бэяцэндар, пхралэндар, пхэяндар и пэстирэ жувимастар, кодва нисар на авэла Мэрнэса сыйярнэса. **27** Кодва, ко на андрэл пэско трушул и на жал пала Мандэ, нисар на авэла Мэрнэ сыйярнэса.

28 Ко тумэндар закамэла тэ терэл башня и майанглал на бэшэла тэ пэрэбинэл, скачи када авэла тэ ашэл, хутилэла лэстэ ловэ, кай тэ стерэл ла? **29** Кала тховэла фундаменто, нэ на дотерэла, кола, савэ дикхэна када, авэна лэстар тэ асан **30** и тэ дэн дума: «Кадва мануш ля тэ терэл и на дотердя». **31** Саво тхагар жала маримаса пэ авэр тхагар, майанглал на бэшэла и на пэрэбинэла, исин лэстэ зор дэшэ барянца халавдэнца тэ утэрдэл англай дуй дэша баря халавдэ? **32** А сар най, то кала о вражымари инке дур, лэла и бишалэла пэстирэ манушэн тэ мангэн миро.

33 Кадя, ко тумэндар на отпхэндёла всаворэстар, со лэстэ исин, нисар на авэла Мэрнэ сытъянэса.

34 Лон — лашо, нэ сар о лон хасарэла пэско лондимос, сар терэса, кай тэ авэл лондо? **35** Ни андэ пхув, ни андэ пэрэгноё на поджал; и вышон лэс аври. Кастье исин кана тэ ашунэн, мэк ашунэн!

15

Дума палай хасарди бакрёры

1 Тэ пошунэн Иисусос стидёнас всаворэ стидэмарая налогонэндирэ тай авэр бэзэхалэ мануша. **2** Фарисеёнэнди тай сытъимаренди Законостирэ на чялёлас када, и онэ пхэнэнас:

— Вов прилэл бэзэхалэн манушэн тай хал лэнца.

3 Тунчи Иисусо роспхэндя лэнди кацави дума:

4 — Ко тумэндар, кастье исин шэл бакрэ, и хасардиля екх лэндар, на ашавэла инядэш иня бакрэн андэ мал и на жала тэ родэл кола, сави хасайля, жы кодла врятатэ, кала аракхэла ла? **5** А сар аракхэла ла, радомаса лэла пэ пэстирэ пхикхэ. **6** Сар авэла черэ, заакхарэла пэстирэ амалэн и ко жувэл пашэ паша лэстэ, и пхэнэла лэнди: «Радосавэн манца, мэ аракхлем бакрёра, сави сас хасарди!» **7** Пхэнав тумэнди, со по болыбэн майбут радонгэ палай екх бэзэхало мануш, саво каисавэл андэ пэстирэ бэзэха, сар важ инядэш иня жужэ водеса мануша, савэнди на трэбуй тэ каинпэ.

Дума палай хасарди драхма

8 Сар жувлятэ исин дэш драхморя, ивой екх лэндар хасарэла, на запхабарэла вой каганцо и на лэлапэ тэ притидэл чер ай мишто тэ родэл жы кала, сар аракхэла драхма? **9** А сар аракхэла драхма, акхарэла пэстирэ амалэн и ко жувэл пашэ, и пхэнэла: «Радосавэн манца: мэ аракхлем хасарди драхма!» **10** Акэ, Мэ пхэнав тумэнди, со Дэвлэстирэ ангелоря кадя радосавэн пала екх бэзэхало мануш, саво каисавэл андэ пэстирэ бэзэха!

Дума палав шаво, саво ужыля пэстирэ дадэстар

11 Иисусо дэлас дума:

— Екхэ манушэстэ сас дуй шавэ. **12** Майцэкно пхэндя пэстирэ дадэсти: «Дад, дэ манди тирэ хулаимастар котор, саво авэла мэрно». И о дад роздя хулаимос машкар шавэ. **13** Прожыля найбут деса. Майцэкно шаво стида вся, со лэстэ сас, жылятар майдур андэ авэр пхув. Котэ вов ростердя вся пэско хулаимос, колэсти со жувэлас найлашэ жувимаса. **14** Кала вов вся ростердя, андэ кодья пхув авиля баро бокхалимос, и вов ашыля чёрорэса. **15** Тунчи вов жыля тай мангляпэ пэ бути екхэ манушэстэ, саво жувэлас котэ. А кодва мануш бишалдя лэс пэ маля пэстирэ тэ пасый лэ балэн. **16** Вов сас бокхало и камэлас тэ хал кода, соса праварэнас лэ балэн, но лэсти и кода на дэнас.

17 Кала вов авиля андэр пэстэ, пхэндя: «Скачи бутярнэ мэрнэ дадэстэ чялён марнэстар, ай мэ мэрав бокхатар! **18** Жава, рисавава кав мэрно дад и пхэнава лэсти: "Дад! Мэ тердэм бэзэх англав Болыбэн и англав тутэ. **19** Мэ будэр на ашав тэ акхаравпэ тирэ шавэса, прилэ ман андэ бутярнэ тирэ"». **20** Вов вшиля и жыля кав пэско дад.

Кала вов сас инке дур, дад удикхля лэс, и тангосардя пэстирэ шавэс. Вов прастая майанглэ кав пэско шаво, обля лэс и ля тэ чюминдэл. **21** Шаво пхэндя лэсти: «Дад! Мэ тердэм бэзэх англав Болыбэн и англав тутэ. Мэ будэр на ашав тэ акхаравпэ тирэ шавэса». **22** Ай о дад пхэндя пэстирэ бутярнэнди: «Жантэ майсыго, анэн со майфэдэр йида и урявэнтэ лэс. Дэн ангрусни пэ лэско васт и пэрналэ пэ лэстирэ пэрнэ. **23** Анэн тай зашынэн отправардэс гуруворэс, тераса свэнко, аваса тэ хас и тэ радосавас! **24** Мэрно шаво сас муло и жундиля! Вов сас хасардо и аракхадиля!» И линэ тэ радосавэн.

²⁵ О пхурэдэр шаво андэ кадья връяма сас андэ мал. Кала вов поджалас кав чер, ашундя, кай андо чер дилабэн диля тай челэн. ²⁶ Вов акхардя екхэс андай бутярнэ и пушля лэс, со котэ кацаво тердяпэ. ²⁷ «Тиро пхрал рисайля, — пхэндя лэсти кодва, — и тиро дад зашында отправардэс гуруувурс, колэстар со лэско шаво рисайля жундо и састо». ²⁸ Пхурэдэр шаво холяйля и на камля тэ зажал андо чер. Тунчи дад выжыля и акхарэлас лэс. ²⁹ Нэ шаво пхэндя дадэсти: «Всаворэ кала бэрша мэ теравас бути пэр тутэ, и никала на выжавас тирэ лавэстар. Ай ту никала на дян манди бузнорэс, кай мэ тэ радосавав пэстирэ амалэнца. ³⁰ А кала кадва шаво тиро ростердя о хулаимос тиро лэ лубнянца, ту зашындан важ лэсти отправардэс гуруворэс!» ³¹ «Шаво мэрно! — пхэндя тунчи дад. — Ту всавори връяма манца, и вся, со мандэ, исин тиро. ³² Ай пала када трэбуй сас тэ радосавас, со пхрал тиро сас муло и жундиля, хасавэлас и аракхляпэ!»

16

Дума пала бутярно, саво хохавэлас

¹ Исусо пхэндя Пэстирэ сыйярнэнди:

— Екхэ барвалэ манушэстэ сас пхурэдэр бутярно, саво дикхэлас палав лэско хулаимос. Пала лэстэ роспхэндэ, со вов ростерэл о барвалимос лэх уласко. ² Хурай выакхардя лэс пэстэ тай пхэндя: «Со када мэ шунав пала тутэ? Здэ и бути, колэстар со ту будэр на авэса тэ дикхэс пала мэрно хулаимос».

³ Пхурэдэр бутярно гындосардя: «Со манди акана тэ терав? Хурай вытрадэл ман пай бути. Тэ жав тэ ганавав и пхув нинай зор мандэ, тэ мангав манди лажаво.

⁴ Мэ жанав, со манди трэбуй тэ терав кадя, соб, сар ман вытрадэна кала бутятар, тэ аракхадён кацавэ мануша, савэ прилэна ман пэстэ». ⁵ И вов ля тэ акхарэл екх пала екхэстэ пэстирэ хуластирэн ужылимарен. Екхэстэ пушля: «Скачи ту ужыло мэрнэ хуласти?» ⁶ «Шэл кхорэ оливково дзэто», — пхэндя кодва. Бутярно пхэндя лэсти: «Лэ пэско запистросаримос, бэш и майсыго пэрэпистросар пэ пандэша».

⁷ Тунчи вов пушля аврэстэ ужылимарестэ: «Ай ту скачи ужыло?» «Мия гонэ ворзо», — пхэндя кодва. Бутярно пхэндя лэсти: «Залэ пэско запистросаримос и пэрэпистросар пэ охтошэла».

⁸ Хурай лашардя пэстирэс хохавнэс пхурэдэр бутярнэс, со годяварнэс тердя. Кала люматирэ шавэ майбут полэн, сар тэ андярэн пэс аврэ манушэнца, сар шавэ Дэвлэстирэ, Саво исин Удууд. ⁹ Ай Мэ пхэнав тумэнди: терэн пэсти амалэн найччимастирэ барвалимаса, кай, кала лэс на авэла, тумэн тэ прилэн андэ чера пэ вако.

¹⁰ Ко патимаско андэ найбари бути, кодва авэла патимаско андэ бари бути. Ай ко найпатимаско андэ найбари бути, кодва авэла найпатимаско и андэ бари бути. ¹¹ И сар тумэ найпатимастирэ андо найжуужо барвалимос, ко дэла тумэнди чячюно? ¹² И сар тумэ сас найпатимастирэ, кала терэнас бути на андо пэско хулаимос, ко дэла тумэнди тумаро?

¹³ Нисаво бутярно на авэла тэ терэл бути пэ дуй хуая. Вов екхэс авэла фартэ тэ на камэл, ай аврэс тэ камэл, екхэсти авэла чячюнэса, ай пэ авэр на тховэла патив. Тумэ нисар на авэна тэ терэн бути андэ екх връяма важ о Дэл и важ о барвалимос.

¹⁴ Фарисеёря, савэ камэнас ловэ, шундэ када вся и асанаспэ Исусостар. ¹⁵ Исусо пхэндя лэнди:

— Англай мануша тумэ сикавэн пэс, кай тумэ жужэ водеса, нэ о Дэл жанэл тумарэ водя. Кода, со учес кай мануша исин выритимос англов Дэл.

Законо лэ Дэвлэско инке терэл

¹⁶ Връяма Законоско ай пророконго сас жыкай Иоано, ай икхатар роспхэнэлпэ Радосаво Лав палав Тхагаримос Дэвлэско, и всаворэ тховэн зора, соб тэ зажа андэр лэстэ. ¹⁷ Майсыго болыбэн и пхув ужана, сар екх майцэкни пистросарди андав Законо хасардёла!

18 Ко розжалпэ пэстирия ромняса и лэл авря ромня, кодва терэл лубимос, и ко лэл ромня, сави розжыляпэ пэстирэ ромэса, терэл лубимос.

Дума палав барвало мануш и чёроро Лазарё

19 Жувэлас екх барвало мануш. Вов урявэласпэ андэ майкучютни йида, и всаворо жувимос лэстэ сас сар радосаво свэнко. **20** Ай паша лэстирэ градатирэ удар пашлёлас чёроро, савэс акхарэнас Лазарё, всаворо общуто насвалимаса. **21** Вов фартэ камэлас тэ хал кода, со пэрэлас пай мэсали кав барвало. Риконэ авэнас и шыбаса жужарэнас лэстирэ дукха. **22** О чёроро муля, и ангелоря одандядрэ лэс кав Авраамо. Муля и барвало, тай гарадэ лэс. **23** Барвало сас андо адо андэ бари грыжа. Вов вазглия якха тай удикхля дур пэстар лэ Авраамос, ай паша лэстэ Лазарёс. **24** Вов акхардя: «Дад Авраамо, тангосар ман и бишал лэ Лазарёс, мэк вов тховэл пэско най андо пай и шол пэ шыб мэрни, а то мэ фартэ грыжавав андэ кадья яг». **25** Нэ Авраамо пхэндя: «Бэято, гындосар, со ту лян андо тиро жувимос лашымос, а Лазарё ля выритимос. Икхатар вов катэ радолпэ, а ту грыжоспэ. **26** Тай инкэ, машкар амэндэ ай тумэндэ — бари выганавди, и кала варико закамэла тэ пэрэжал катар тумэндэ ай тумэндар амэндэ, на пэрэжана». **27** Барвало пхэндя: «Тунчи мангав тут, дадэ, бишал Лазарёс андо чер мэрнэ дадэстэ. **28** Мандэ исин панч пхрала, мэк вов умангэл лэн, кай и онэ тэ на попэрэн кардэ, андо тхан грыжако». **29** Авраамо пхэндя: «Лэндэ исин Моисеё и пророкоря, мэк лэн ашунэн». **30** «Нат, дад Авраамо, — пхэндя барвало, — сар авэла варико андай мулэ лэндэ, тунчи онэ каисавэна». **31** Пэ када Авраамо пхэндя лэсти: «Сар лэ Моисеёс и лэ пророкон на ашунэн, тунчи, кала ко андай мулэ жундёла, онэ на патяна».

17

Исусо сытряэл палав эртиносаримос, патимос и ужылимос

1 Исусо пхэндя пэстирэ сытрянэнди:

— Всавори врязма авэла кода, со зумавэла тумэн, но грыжа колэсти, кастьар авэл о зумавимос. **2** Ко екхэс андай кала цэнэ шола кав бэзэх, авэлас бы лэсти фэдэр тэ пхандэн пэ кор бар и тэ шон лэс андэ лэн. **3** Дикхэн пала пэстэ! Сар тиро пхрал стердя бэзэх, выпхэн лэсти, ай сар каисавэл, эртиносар лэс. **4** И сар эхта моловя андо дес терэла англав тутэ бэзэх, и эхта моловя андо дес авэла тутэ и пхэнэла: «Мэ каисавав», — эртиносар лэс.

5 Апостолоря мангле Раес:

— Тер андэ амэндэ майбаро патимос!

6 Рай пхэндя:

— Сар тумэндэ исин патимос, сар горчично ворзо, тумэ пхэнэнас бы акала тютинати: «Вышындов корнёса и тховпэ андэ лэн», — товой канделас бы тумэн.

7 Пхэнаса, тумэндэ исин бутярно, саво ганавэл и пхув или пасый бакрэн. Чи пхэнэна тумэ лэсти, кала вов авэла пай бути: «Майсыго зажа, бэш тэ хас»? **8** Най, тумэ майсыго пхэнэна лэсти: «Гытосар манди тэ хас ай дикх пала мандэ, кала мэ хава и пава, а тунчи авэса тэ хас и тэ пэс ежэно». **9** Чи тумэ авэна тэ пхэнэн «наис» лэ бутярнэсти пала лэстирэрындоря? Най. **10** Кадя и тумэ, сар стирэнэ вся, со тумэнди сас припхэндо, пхэнэн: «Амэ бутярнэ, савэ нисо на ашас. Амэ качи тердям кода, со трэбуй сас тэ терас».

Исусо састярэл дэшэн насвалэн проказаса

11 Пав дром андо Иерусалимо Исусо прожалас машкар Самария и Галилея.

12 Кала Вов зажалас андэ екх гав, Лэс удикхле дэш насвалэ проказаса. Онэ тэрдиле найдур **13** и фартэ цыпинас:

— Исусо, Сытрямари! Тангосар амэн!

14 Кала Исусо лэн удикхля, Вов пхэндя:

— Жантэ ай сикавэнпэ кай рашая.

Онэ жыле и пав дром састьярдиле. **15** Екх лэндар, сар качи удикхля, кай вов састьярдо, рисайля, барэ гласоса лашарэлас Дэвлэс. **16** Вов пэля кай и пэрнэ Иисусостирэ, пхэнэлас «наис» Лэсти. И үадва мануш сас самарянино.

17 — Чи на дэш мануша сас жужардэ? — пушля Иисусо. — Кай кола иня? **18** Состар нико лэндар, сар агадва мануш андай авэр пхув, на рисайля, кай тэ лашарэл Дэвлэс?

19 И пхэндя самаряниости:

— Вши и жа. Тиро патимос фэрисардя тут.

Иисусо пхэнэл, со авэл Тхагаримос Дэвлэско

20 Екхвар фарисеёрыа пушле Иисусостар, кала авэла о Тхагаримос Дэвлэско. Вов пхэндя лэнди:

— Тхагаримос Дэвлэско на авэла кадя, со тумэ дикхэна лэс якхэнца. **21** Нико на пхэнэла: «Акэ, вов катэ» чи «Акэ, котэ». Тхагаримос Дэвлэско икхатар исин машкар тумэндэ.

22 Тунчи Вов пхэндя сыйтарнэнди:

— Авэла кацави вряза, кала тумэ закамэна тэ удикхэ екх дес андай деса Шавэс Манушыканэс и на удикхэна. **23** Тумэнди авэна тэ пхэнэн: «Акэ, Вов котэ» чи «Акэ, Вов катэ». Нэ тумэ на прастэн тэ дикхэн. **24** Колэстар со, сар молния, сави запхабол и дэл удууд по болыбэн екха ригатар кай авэр риг, кадя авэла Шаво Манушыкано андо дес Пэско. **25** Нэ майянглал Лэсти трэбуй авэла тэ пэрэандярэл бари грыжа и Лэстар отпхэнэнапэ кала мануша. **26** Сар сас андэ деса лэ Ноёстирэ, кадя авэла и андэ деса Шавэс Манушыканэс. **27** Мануша ханас, пэнас, лэнас ромнян, жанас палав ром кав үадва дес, кала Ноё зажыля андо ковчего. Тунчи жыля фартэ баро брышынд, и всаворэ хасайле.

28 Кадя сас и андэ деса Лотостири. Мануша ханас, пэнас, тинэнас, битинэнас, шонас ворзо, терэнас чера. **29** Нэ андо дес, кала Лото выжыля андав Содомо, жыле пав болыбэн ягуно брышынд и сера, тай всаворэ хасайле.

30 Кадя авэла и андэ үодва дес, кала сикадёла Шаво Манушыкано. **31** Андэ үодва дес, ко авэла упрэ по чер, а йида авэла андо чер, мэк на жал тэ лэл ла. Ай ко авэла пэ мал, мэк и вов на жал палпалэ. **32** Сэрэн палай ромни Лотостири! **33** Ко камэла тэ фэрисарэл пэско жувимос, үодва хасарэла лэс, ай ко хасарэла пэско жувимос, үодва фэрисарэла лэс. **34** Пхэнав тумэнди: андэ үодья рят дуй авэна пэ екх пато, екх авэла залино, ай авэр ашэлэлэ. **35-36** Дуй жувля авэна екхэтанэ тэ марэн ворзо, екх авэла залити, ай авэр ашэлэлэ*.

37 — Кай, Рай? — пушле онэ.

Иисусо пхэндя:

— Кай о трупо, кордэ стидёна и орлоря.

18

Дума Иисусостири палай пхивли

1 Тунчи Иисусо роспхэндя лэнди дума, со трэбуй тэ на пэрэашэн тэ мангэнпэ Дэвлэс ай тэ на грыжонпэ.

2 — Андэ екх форо сас сындомари, саво на дарагас Дэвлэстар и на лажалас манушэндар. **3** Андэ үодва форо сас екх пхивли. Вой авэлас кав сындомари, мангэлас: «Фэрисар ман мэрнэ вражымарестар». **4** Сындомари бут вряза на камэлас тэ поможысарэл лати, ай тунчи пхэндя ежэно пэсти: «Мэк мэ Дэвлэстар на дарав и манушэндар на лажав. **5** Нэ сар үодья пхивли дохаля манди пэстирэ мангимаса, терава, со вой мангэл, кайвой тэ пэрэашэл тэ дохал ман».

6 Ай о Рай пхэндя:

* **17:35-36 17.35-36** Андэ коисавэ гречески манускрипторя инке исин кацавэ лава: «Дуй мануш авэна андэ мал, екхэс манушэс залэна, ай авэр ашэлэлэ».

— Шундэ, со пхэнэл сындомари найчячимаско? ⁷ Сар о Дэл на фэрисарэла колэн, кас Вов вытидя, и ко фартэ мангэн Лэс о дес и рят? Чи ашавэла лэн о Дэл? ⁸ Пхэнав тумэнди: Вов грабисавэла пав чячимос тэ фэрисарэл лэн. Нэ кала Шаво Манушыкано авэла, аракхэла патимос пэ пхув?

Дума пала фарисеё ай палай стидэмэрё налогонэндиро

⁹ Колэнди, савэ гындонас пала пэстэ, кай онэ жужэ, и пхутярдэс дикхэнас пэ авэр мануша, Исусо роспхэндя кацави дума:

¹⁰ — Дуй мануша зажыле андо храмо тэ мангэнпэ Дэвлэс. Ех лэндар сас фарисеё, ай авэр — стидэмэрё налогонэндиро. ¹¹ Фарисеё тэрдёлас и мангэласпэ Дэвлэс кадя: «Дэвла, наис Тути, со мэ на кацаво, сар авэр мануша: прахаря, найжужэ, лубаря, и на кацаво, сар акадва стидэмэрё налогонэндиро. ¹² Мэ ритярав посто дувар андо куркю, дав дэшто котор андар вся, со затерав». ¹³ Ай стидэмэрё налогонэндиро тэрдёлас андэ риг и на ваздэлас яхса пэстирэ кав болыбэн, нэ марэлас пэс андо колин и пхэнэлас: «Дэвла, тангосар ман, бэзэхалэс манушэс!» ¹⁴ Пхэнав тумэнди, со кадва мануш жыля черэ майэртисардо, сар кодва. Кодва, ко ваздэл пэс, авэла обмэклэ, а ко обмэклэ пэс, ваздёла.

Исусо бахталисарэл бэяцэн

¹⁵ Мануша анэнас кав Исусо цэknэн бэяцэн, кай Вов тэ лэлпэ лэндэ. Сытярнэ удикхле када и камле тэ запхэнэн лэнди. ¹⁶ Исусо акхардя лэн Пэстэ ай пхэндя:

— Мэк бэяцэ авэн Мандэ, и на запхэнэн лэнди, колэсти со Тхагаримос Дэвлэско важ кацавэ, сар онэ. ¹⁷ Пхэнав тумэнди чячимаса: ко на прилэла о Тхагаримос Дэвлэско, сар бэято, кодва на зажала андэр лэстэ.

Исусо дэл дума барвалэ пхурэдэрэса

¹⁸ Ех пхурэдэр пушля Лэстар:

— Лашо Сытяримари, со тэ терав, кай манди тэ дэлпэ жувимосvakоско?

¹⁹ — Сости ту акхарэс Ман «лашо»? — пхэндя Исусо. — Нико на лашо, качи ех о Дэл. ²⁰ Ту жанэс запхенимос: на тер лубимос, на умар, на чёр, на пхэн хохавимаско лав, пативаса обжапэ дадэса и лэ даса.

²¹ — Вся када мэ терав пай тэрнэ пэстирэ бэрша, — пхэндя вов. ²² Исусо ашундя када ай пхэндя лэсти:

— Ех тути инке на хутилэл. Битин вся, со тутэ исин, и роздэ ловэ чёрорэнди, и тунчи тутэ авэла барвалимос по болыбэн. Тунчи ав и жа пала Мандэ.

²³ Кала пхурэдэр ашундя када, вов грыжосайля, колэсти со сас фартэ барвало.

²⁴ Кала Исусо удикхля, со кодва грыжосайля, Вов пхэндя:

— Сар пхарэс барвалэнди тэ зажан андо Тхагаримос Дэвлэско! ²⁵ Майлокхо лэ верблюдости тэ прожал андэ сувьяко кан, сар лэ барвалэсти тэ вжал андо Тхагаримос Дэвлэско.

²⁶ Кола, ко ашундя када, пхэндэ:

— Ко тунчи авэла фэрисардо?

²⁷ Исусо пхэндя:

— Сар кав мануш нинай зор тэ стерэл варисо, кав Дэл исин зор кода тэ стерэл.

²⁸ Тунчи Петро пхэндя:

— Акэ, амэ ашадэ вся, со амэндэ сас, и жылям пала Тутэ.

²⁹ Исусо пхэндя лэнди:

— Пхэнав тумэнди чячимаса: всаворэ, ко ашадя чер, и ла ромня, и лэ пхралэн, лэ дадэс и ла да, тай лэ бэяцэн важ о Дэвлэско Тхагаримос, ³⁰ онэ лэна майбут андэ кадья врьма, ай андэ врьма, сави авэла, — жувимосvakоско.

Исусо андо трито моло пхэнэл палай Пэско миринос

³¹ Тунчи Исусо отакхардя дэшдууен андэ риг ай пхэндя лэнди:

— Акэ, амэ зажас андо Иерусалимо. Котэ терэлапэ вся, со запистросардо пророконца пала Шаво Манушыкано. ³² Вов авэла отдино андэ васта манушэнди

авря народостар, и кола авэна тэ асанпэ Лэстар, обмукэна Лэс и шунгардэна пэр Лэстэ, ³³ авэна тэ марэн чюкнянца и умарэна. Нэ по трито дес Вов жундёла.

³⁴ Сытярнэ нисо калэстар на полинэ. Вся, со Вов пхэндя, сас важ лэнди запхандадо, и онэ на полэнас, со Вов камэлас лэнди тэ пхэнэл.

Исусо састьярэл корэс

³⁵ Кала Иисусо поджалас кав форо Иерихоно, пашав дром бэшэлэс тай мангэлэс коро мануш. ³⁶ Вов ашундя, со паша лэстэ прожан бут мануша, пушля, со када кацаво.

³⁷ — Жал Иисусо андав Назарето, — пхэндэ лэсти. ³⁸ Тунчи коро зацыписайля:
— Иисусо, Шаво Давидоско! Тангосар ман!

³⁹ Кола, ко жалас майянглал, линэ тэ пхэнэн, кай вов тэ ашэл мулком, нэ коро инке майфартэ ля тэ цыписавэл:

— Шаво Давидоско! Тангосар ман!

⁴⁰ Иисусо ашыля и припхэндя, кай калэ манушэс тэ анэн Лэстэ. Кала кодва поджыля, Иисусо пушля лэс:

⁴¹ — Со ту камэс, кай Мэ тэ терав важ тути?

— Рай, мэ камав тэ дикхав, — пхэндя коро.

⁴² Иисусо пхэндя лэсти:

— Мэй отпхэрнавэнпэ тутэ яхса! Патимос тиро састьярдя тут.

⁴³ Коро андэ кодья връяма ля тэ дикхэл. Вов жыля палав Иисусо и лашарэлас лэ Дэвлэс. Всаворэ мануша, ко дикхля када, линэ кадя ж тэ лашарэн лэ Дэвлэс.

19

Исусо и стидэмэрё налогонэндиро Закхеё

¹ Тунчи Иисусо зажыля андо форо Иерихоно и прожалас пар лэстэ. ² И акэ, ех мануш, савэс акхарэнас Закхеё, пхурэдэр стидэмэрё налогонэндиро, барвало мануш, ³ родэлэс тэ дикхэл лэ Иисусос, ко Вов кацаво, нэ на сас сар, колэстар со фартэ бут мануша сас пашав Иисусо, ай Закхеё сас цэкно ростоса. ⁴ Вов запрастая майянглэ, загульдя пэ тютина, сави барёлэс пэ кодва тхан, кай прожалас Иисусо.

⁵ Кала Иисусо поджыля кав кадва тхан, Вов подикхля упрэ и пхэндя лэсти:

— Закхеё! Згуль майсыго! Манди трэбуй адес тэ авав андо тиро чер.

⁶ Закхеё сыйго згульдя и лошаса приля Лэс андо пэско чер. ⁷ Всаворэ, ко дикхля када, холяйле и лине тэ дэн дума, со Вов зажыля кав бэзэхало мануш.

⁸ Закхеё вщилия и пхэндя Раести:

— Рай! Акэ, епаш всаворэстар, со мандэ исин, мэ роздава чёрорэнди, и кастар лем хохавимаса, отдава андэ штарвар майбут!

⁹ Иисусо пхэндя лэсти:

— Адес авиля фэрисаримос андэ кадва чер, колэсти со и вов исин шаво лэ Авраамоско. ¹⁰ Шаво Манушыкано авиля тэ аракхэл и тэ фэрисарэл колэн, ко хасавэл.

Дума палав барвало и лэстирэ бутярнэ

¹¹ Колэнди, ко ашунэлас Иисусос, Вов пхэндя ех дума. Колэстар со онэ сас пашав Иерусалимо, и онэ гындонас, со сыйго отпхэрнавэлапэ Тхагаримос Дэвлэско.

¹² Иисусо пхэндя кадя:

— Ех барвало мануш ладэлэс андэ дурутни пхув, кай тэ лэл пэсти тхагаримос и тунчи тэ рисавэл. ¹³ Вов акхардя дэшэн пэстирэн слугонэн, дя лэнди по шэл драхморя тай пхэндя: «Тэрэн арли, жы кала мэ рисавава». ¹⁴ Нэ мануша кола пхувьятар на камэнас лэс и бишалдэ пала лэстэ пхурэдэрэн манушэн, кай онэ тэ пхэнэн: «На камас, соб вов тэ авэл амарэ тхагараса».

¹⁵ Нэ вов тэрдиля тхагараса тай рисайля черэ. Вов припхэндя тэ акхарэл лэ слугонэн, касти вов дя руп, кай тэ ужанэл, ко скачи затердя. ¹⁶ Авиля англуну и пхэндя: «Хулай! Тирэ шэл драхморя андэ манди дэш шэла». ¹⁷ Хулай пхэндя

лэсти: «Мишто, лашо бутярно! Пала кода, со ту патимаско андэ кадва цэкнорындо, тути авэла баримос пэ дэш фороря». ¹⁸ Авиля авэр и пхэндя: «Хулай! Тирэ шэл драхморя андэ панчшэл». ¹⁹ Хулай пхэндя лэсти: «И ту ав пхурэдэр андэ панч фороря». ²⁰ Авиля трито и пхэндя: «Хулай! Акэ тути тирэ шэл драхморя. Мэ ритяравас лэн андо ххосноро». ²¹ Мэ даравас тутар, ту мануш, саво бут мангэл: лэс кода, со на тховэсас, и стидэс кода, со ту на шосас андэ пхув». ²² Хулай пхэндя лэсти: «Тирэ лавэнца авава тэ сындосарав тут, хохавно бутярно! Ту жанэсас, кай мэ бут мангав, лав кода, со мэ на тховавас, и стидав кода, со на шавас андэ пхув». ²³ Состар ту на дян руп мэрно андэ арли, сар мэ рисавава, тэ авэл руп будэр?» ²⁴ И вов пхэндя колэнди, ко котэ ашэлас: «Залэнтэ лэстар шэл драхморя и отдэн колэсти, кастэ дэш шэла». ²⁵ Онэ пхэндэ лэсти: «Хулай! Лэстэ ж исин дэш шэла драхморя». ²⁶ Хулай дя дума: «Пхэнав тумэнди, со всаворэнди колэнди, кастэ исин, дэлапэ инке, а кастэ нинай, залэлапэ и кода, со лэстэ исин». ²⁷ А мэрнэн вражымарен, ко на камэлас, кай мэ тэ авав лэндирэ тхагараса, анэн и умарэнтэ англав мандэ».

Исусо заладэл андо Иерусалимо

²⁸ Исусо пхэндя када тай жыля майдур кав Иерусалимо. ²⁹ И сар поджыля кай и гава, савэ акхарэнпэ Вифагия и Вифания, пашав плай, саво акхарэлпэ Оливково, бишалдя дуен сыйярнэн Пэстирэн ³⁰ и пхэндя лэнди:

— Жан андо гав, саво англай тумэндэ, ай сар зажана андэ лэстэ, аракхэна при phангле осликос, пэ саво нико никала на бэшэлэс. От phандэн лэс и анэн Мандэ. ³¹ Сар ко пушэла тумэндар: «Пэр со от phандэн лэс?» — пхэнэн лэсти кадя: «Вов трэбуй Раести».

³² Сыйярнэ, савэн Вов бишалдя, жыле и аракхле, сар Вов пхэндя лэнди. ³³ Кала онэ от phандэнас осликос, хулая пушле лэн:

— Пэр со тумэ от phандэн лэс?

³⁴ Онэ пхэндэ:

— Вов трэбуй Раести.

³⁵ Онэ андэ лэс кав Исусо, шутэ йида пэ ослико и тховдэ пэр лэстэ лэ Исусос.

³⁶ Кала Вов ладэлас, онэ шонас йида пэстири пав дром. ³⁷ А кала Вов подлагля кав тхан, кай о дром змукэлпэ пав плай Оливково, фартэ бут сыйярнэ радосавэнас и зоралэ гласоса лашарэнас лэ Дэвлэс пала диворя, савэ онэ дикхле. ³⁸ Онэ пхэнэнас:

— Лашардо Тхагар, саво жал важ алав Рае Дэвлэско! Миро по болыбэн, слава упрэ по болыбэн!

³⁹ Коисавэ фарисеёря, савэ сас машкар мануша, пхэндэ Лэсти:

— Сыйяримири, при phэн Пэстирэ сыйярнэнди тэ ашэн мулком!

⁴⁰ Нэ Вов пхэндя:

— Пхэнав тумэнди, сар онэ ашэна мулком, и бара лэна тэ цыписавэн.

Исусо ровэл палав Иерусалимо

⁴¹ Кала Исусо поджалас кав Иерусалимо, Вов удикхля о форо и заровдя. ⁴² Тунчи пхэнэнлас:

— О, сар ту адес тэ ужанэс, со анэлас бы тути миро! Нэ икхатар када сарадо тирэ якхэндар. ⁴³ Авэна кацавэ деса, кала вражымаря тирэ жана пэр тутэ маримаса, тэрдёна тай стасавэна тут всаворэ ригэндар. ⁴⁴ Онэ розмарэна тут, умарэна тирэ бэяцэн и на ашавэна бар по бар, пала кода со ту на ужанглян врязма, кала о Дэл авиа тутэ.

Исусо вытрайдэл битимарен андав храмо

⁴⁵ Тунчи Исусо зажыля андо храмо и ля тэ вытрайдэл битимарен.

⁴⁶ — Пистросардо, — пхэндя Вов лэнди, — со Мэрно чер авэла черэса, кай мангэнпэ Дэвлэс. А тумэ тердэ андар лэстэ прахарицко тхан.

47 Кажно дес Исусо сытряэлас андо храмо. Барэ рашая, сытряимаря Законостирэ и майбарэдэр машкар и мануша родэнас тэ умарэн Лэс. **48** Нэ на аракхэнас, сар када тэ терэн, колэстар со всаворэ мануша на камэнас тэ промукэн ни екх лав Лэско.

20

Исусоско баримос

1 Андэ екх дес, кала Исусо сытряэлас андо храмо и пхэнэлас Радосаво Лав, Лэстэ авиле барэ рашая, сытряимаря Законостирэ и пхурэдэра.

2 — Пхэн амэнди, савэ баримаса Ту када терэс? Ко дя тути кацаво баримос? — пушле онэ.

3 Исусо пхэндя лэнди:

— Тунчи и Мэ пушава тумэндар. Пхэнэн Манди, **4** болдимос Иоаноско сас пав болыбэн чи манушэндар?

5 Онэ линэ тэ дэн дума машкар пэстэ:

— Сар пхэнаса: «Пав упралимос», — то Вов пхэнэла: «Состар тумэ на патяйле лэсти?» **6** Сар пхэнаса: «Манушэндар», тунчи всаворэ мануша марэна амэн лэ барэнца, колэстар со онэ патян, кай Иоано сас пророко.

7 И пхэнэнас онэ Лэсти:

— На жанас, катар.

8 Исусо пхэндя лэнди:

— И Мэ на пхэнава тумэнди, савэ баримаса Мэ када терав.

Дума палай холятирэ виноградоря

9 Вов ля тэ роспхэнэл манушэнди кацави дума:

— Екх мануш ганадя винограднико, ашадя пэ врязма лэ бутярнэнди, а ежэно улагля пэ бут врязма. **10** Кала поджыля и врязма, бишалдя лэндэ пэстирэс бутярнэс, кай онэ тэ дэн лэско котор пав винограднико, нэ онэ помардэ лэн и отмэклэ шушэ вастэнца. **11** Инке бишалдя аврэс бутярнэс, нэ онэ и кадалэс помардэ, акушле и отмэклэ шушэ вастэнца. **12** И тритонэс бутярнэс бишалдя, нэ онэ и кодлэс помардэ жы кав рат и выштутэ андай винограднико.

13 Тоди пхэндя о хулай виноградникоско:

— Со манди тэ терав? Бишалава пэстирэс шавэс, савэс мэ камав. Ко жанэл, чи на лажана лэстар? **14** Кала бутярнэ удикхле лэ шавэс, пхэндэ машкар пэстэ: «Акэ лэско шаво, саво авэла хулай лэ виноградникоско. Авэн, умараса лэс, и всаворо хулаимос заласа пэсти». **15** Онэ выяндярдэ лэс андав винограднико и умардэ. Со терэла лэнца о хулай виноградникоско? **16** Вов авэла тай умарэла колэн бутярнэн, ай винограднико отдэла аврэнди.

Ко шунэлас, кала пхэндэ:

— Мэк на авэл кадя!

17 Нэ Исус подикхля пэр лэндэ и пхэндя:

— Сар тэ полэ кала лава андай Пистросаримос: «Бар, саво отшутэ кола, ко терэнас о чер, ашыля англунэ барэса, пэ саво ритярдёл всаворо чер?» **18** Кожно, ко пэрэла пэ кадва бар, розмардёла, и пэр каастэ пэрэла кадва бар, колэс ростасавэла.

19 Сытряимаря Законостирэ и барэ рашая полинэ, со кадья дума Исусо роспхэндя пала лэндэ, и камле сыго тэ лэн Лэс, нэ даранас манушэндар.

Исусо пхэнэл палай налогоря

20 Онэ линэ тэ дикхэн палав Исусо тай подбишалдэ Лэстэ хохавнэн манушэн, савэ притердэпэ, кай онэ пативалэ, тэ астарэн Лэс андэ лава и тэ отдэн Лэс андэ васта барэ раesti андав Римо. **21** Кола пушле Лэс:

— Сытряимири! Амэ жанас, кай Ту чячес пхэнэс и сътрярэс. И на дикхэс, ко англав тутэ ашэл, нэ чячимаса сътрярэс Дэвлэстирэ дромэсти. **22** Трэбуй тэ дас налогоря лэ императорости чи нат?

23 Вов поля лэнго хрантимос и пхэндя:

24 — Сикавэнтэ Манди динариё. Каско муй пэр лэстэ вымардо, и каско пэр лэстэ алав?

— Императороско, — пхэндэ онэ.

25 — Акэ и отдэн императороско императорости, а Дэвлэско — Дэвлэсти, — пхэндя Вов.

26 И кадя онэ на астардэ Лэс англай мануша пала Лэстирэ лава. Онэ дивосайле Лэстирэ лавэнди и ашыле мулком.

Пала кола, ко жундёла мулэндар

27 Кав Исусо поджыле коисавэ садукеёря. Онэ сытярэнас, кай мулэ на жундён. Тай пушле Лэстар:

28 — Сытяримари! Моисеё пистросардя, сар касть мэрэла пхрал, савэстэ ашэлапэ ромни и на сас бэяцэ, тунчи авэр пхрал трэбуй тэ лэл ла пэстиря ромняса, кай тэ авэн бэяцэ андо лэндиро рода. **29** Сас эхта пхрала. Англуюн ля пэсти ромня, нэ муля бибэяцэнго. **30** И авэр, **31** и трито лэнас ла пэстиря ромняса, и кадя всаворэ эхта пхрала муле и на ашадэ бэяцэн. **32** Тунчи муля и ромни. **33** Сар жундёна андай мулэ, кастири вой авэла ромни? Акэ, всаворэ эхта пхрала сас латирэ ромэнца!

34 Исусо пхэндя лэнди:

— Иххатар мануша лэн пэсти ромнян и выжан палав ром. **35** Ай кола, савэ авэна тэ жувэн андэ авэр люма тай жундёна андай мулэ, на авэна тэ лэн пэсти ромнян и тэ жан палав ром. **36** Онэ на мэрэна, нэ авэна, сар ангелоря. Онэ — шавэ Дэвлэстирэ, савэ жундиле. **37** Ай со мулэ жундён, андо роспхэнимос, сар пхаболас о пусаимаско кустарнико, сикадя Моисеё, кала акхардя Раес Дэвлэс «Дэл Авраамоско, Дэл Исаакоско и Дэл Иаковоско». **38** Дэл исин Дэл на мулэнго, ай жундэнго. Важ Лэсти всаворэ жундэ!

39 Коисавэ андай сытяримаря Законостирэ пхэндэ:

— Мишто Ту пхэндян, Сытяримари!

40 И будэр нико на пушэлас Лэстар.

Ко кацаво Исусо?

41 Тунчи Исусо пушля лэндар:

— Состар дэн дума, со Христосо — шаво лэ Давидоско? **42** Ай ежэно Давидо пхэнэл андо пэско лил псалморя:

Пхэндя Рай Дэл мэрнэ Раести:

«Бэш пай право риг Мандар,

43 кола врятматэ, кала шава тирэ вражымарен кай и пэрнэ Тирэ».

44 Сар Давидо акхарэл Лэс Раеса, сар жэ Вов Шаво лэсти?

Исусо пхэнэл палай дуемуендирэ мануша

45 Кала всаворэ мануша ашунэнас Лэс, Вов пхэндя Пэстирэ сытярнэнди:

46 — Фэрисавэн лэ сытяримарендар Законостирэ. Лэнди чялёр тэ урявэнпэ андэ лунго йида, онэ камэн, кай мануша лэнди тэ пхэнэн пэ форо: «Тэ авэн бахталэ», и соб тэ бэшэн пэ англунэ тхана андэ синагоги ай пэ свэнкоря. **47** Онэ залэн чера кай пхивля и бут мангэнпэ Дэвлэс, кай тэ удикхэн лэн мануша. Лэн ажуутярэл майбаро сындо.

21

Чёроры пхивли тховэл ловэ андо храмоско сартари

1 Исусо дикхэлас, сар и барвалэ шонас ловэ андо храмоско сартари. **2** Вов дикхля, сар чёроры пхивли шутя андо сартари дуй хурдэ ловэ.

3 — Пхэнав тумэнди чячимаса, — пхэндя Исусо, — со кадья чёроры пхивли шутя майбут всаворэндар. **4** Колэстар со всаворэ дэнас ловэ пэстирэ барвалимастар, нэвой пэстирэ чёrimастар дя вся, со латэ сас по жувимос.

Исусо пхэнэл пала кода, со авэла

5 Кала мануша, савэ котэ сас, дэнас дума палав храмо, сар вов стердо андай кучютнэ бара и шукар дароря, савэ анэнас Дэвлэсти, Иисусо пхэндя:

6 — Авэла връма, кала всаворэстар, со тумэ катэ дикхэн, на ашэлапэ бар по бар, вся авэла розмардо.

7 Лэстар пушле:

— Сытрямари! Кала када авэла? И сави шпэра сикавэла, со када сыго авэла?

8 Вов пхэндя:

— Дикхэн, кай нико тэ на диллярэл тумэн. Бут авэна талав Мэрно алав и авэна тэ пхэнэн: «Када Мэ» и «Връма авиля». На жан пала лэндэ. **9** Кала ашунэна палав маримос и пала кода, сар ваздэнпэ мануша екх пэ екх, на даран. Вся када трэбуй тэ авэл майанглал, нэ када инке най вся.

10 Иисусо пхэнэлас:

— Мануша екха пхувьятар авэна тэ вражысарэн манушэнца авря пхувьятар, и екх тхагаримос ваздёла пэ авэр. **11** Авэла фартэ тэ тинолпэ и пхув, пай бут тхана авэла бокх и бут насвалимос, авэна тэ терэнпэрындоря, савэ даравэна манушэн, и по болыбэн авэна барэ шпэры.

12 Нэ майанглал тумэн авэна тэ традэн, тэ залэн, тэ анэн андэ синагоги, тэ пхандавэн андо бар, и андярэна тумэн кай и тхагара и кай барэ рапа алав Мэрно. **13** Када авэла допхэнимос важ тумэнди. **14** Тховэнтэ андэ пэстирэ водя тэ на гытонпэ, со тумэнди тэ пхэнэн пала пэстэ. **15** Мэ дава тумэнди кацавэ лава и кацави годи, со никастэ андай тумарэ вражымаря на авэла, со тэ пхэнэл тумэнди, и онэ на утэрдёна англай тумэндэ. **16** Тумэн авэна тэ предэн дада и дэя, пхрала тумарэ, родо тумаро и амала тумарэ, и варикас тумэндар умарэна. **17** Всаворэ авэна тэ на камэн тумэн пала Мэрно алав. **18** Нэ ни екх бал на пэрэла пав тумаро шэрэ. **19** Тумарэ терписаримаса фэрисарэна пэстирэ водя.

20 Кала дикхэна, со бут халавдэ тэрдён всаворэ ригэндар Иерусалимостар, тунчи жанэнтэ, со авиля връма, кала вов авэла розмардо. **21** Тунчи кола, ко исин андэ Иудея, мэк нашэн андэ плая, а ко андо форо — мэк нашэн андар лэстэ, а ко исин пашав форо — мэк на зажан андэр лэстэ. **22** Када исин деса, кала Дэл пушэла пала лэндирэрындоря, мэк терэлпэ кода, со запистросардо. **23** Андэ кодья връма авэла бида жувлянди, савэ пхарэ и савэ праварэн чуючяса бэяцэн. Пэ пхув авэла бари грыжка, и пэ кала мануша скала холи. **24** Екх мэрэна мечёстар, аврэн схутилэнэ и андярэнэ андэ авэр пхувьяд. Иерусалимо авэла помардо манушэнца аврэ народостар, жы кала прожала лэндиривръма.

Сар Иисусо рисавэла пэ пхув

25 По кхам, по шон и пэ чиргая авэна шпэры. Мануша пай всавори пхув ашунэна, сар шумисарэл и ваздёл море, и авэна тэ тинонпэ даратар. **26** Мануша авэна тэ ажутярэн биды, савэ жан андэ люма, онэ даратар авэна тэ пэрэн бизоратирэ, и болыбнастирэ зора тинонапэ. **27** Тунчи мануша удикхэна лэ Шавэс Манушыканэс, Саво жал пэ облако баря зораса и славаса. **28** Кала акада вся авэла тэ терэлпэ, вщен ворта и ваздэн шэрэ пэстирэ, колэсти со авэл тумэндэ майпашэ тумаро фэрисаримос.

29 Тунчи Вов пхэндя лэнди кацави дума:

— Подикхэн пэ инжыро и пэ авэр дрэвояр. **30** Кала онэ лэн тэ розмукэнпэ, тумэ дикхэн пэр лэндэ и жанэн, со милай пашэ. **31** Кала тумэ дикхэна, со када терэлпэ, жанэн, со Дэвлэско Тхагаримос пашэ. **32** Пхэнав тумэнди чячимос: на прожала кадва родо, сар вся када терэлапэ. **33** Болыбэн и пхув прожана, нэ лава Мэрнэ на прожана.

Иисусо приакхарэл манушэн тэ авэн гытосардэ

34 Дикхэн пала пэстэ, мэк тумарэ водя на авэн залитэ лубимаса, матимаса, и грыжаса пала жувимастирэрындоря, кай о дес кадва тэ на авэл тунчи, кала тумэ

лэс на ажутярэн. ³⁵ Кодва дес авэла, сар фэли важ чирикля, кадя ж важ всаворэ мануша, савэ жувэн пай пхув. ³⁶ Авэнтэ гытомэ и всавори врёма мангэнпэ Дэвлэс, кай тумэндэ тэ авэл зор тэ унашэн всаворэстар, со сыго авэла, и тэ ашэн англав Шаво Манушыкано.

³⁷ Иисусо десэ сыйярэлас андо храмо, ай пэ рят жалас по плай Оливково. ³⁸ Всаворэ мануша, кала качи авэлас дес, авэнас андо храмо тэ ашунэн Лэс.

22

Иуда допхэнэлнэ тэ здэл Иисусос

¹ Поджалас свэнко Бизакваскатирэн марнэн, саво инке акхарэласпэ Патради.

² Барэ рашая и сыйяримаря Законостирэ родэнас, сар тэ умарэн Иисусос, нэ даранас манушэндар.

³ Тунчи Сатана вжыля андо Иуда, савэс акхарэнас Искариото, екх андай дэшүүдүй. ⁴ Вов жыля и дя дума лэ барэ рашаенца и пхурэдэрэ халавдэнца, сар тэ здэл лэнди Иисусос. ⁵ Онэ радосайле и допхэндэпэ тэ дэн лэсти ловэ. ⁶ Вов дя лав и родэлас лащи врёма, сар тэ здэл Иисусос, кала пашэ на авэла манушэн.

Сыйярнэ гытонпэ кай и Патради

⁷ Авиля дес Бизакваскатирэн марнэн, кала трэбуй сас тэ зашынэн патрадятирэс бакрорэс. ⁸ Иисусо бишалдя лэ Пэтрос тай лэ Иоанос, пхэндя лэнди:

— Жантэ, пригытон важ амэнди патрадяко хамос.

⁹ — Кай Ту камэс, соб амэ тэ гытосарас? — пушле онэ.

¹⁰ Вов пхэндя лэнди:

— Кала тумэ зажана андо форо, дикхэна манушэс, саво андярэл кхоро паеса. Жантэ пала лэстэ андо чер, андэ саво вов зажала, ¹¹ и пхэнэн лэ хуласти пав чер: «Сыйяримари пхэнэл тути: "Кай тхан андо чер, соб Манди тэ хав патрадяко хамос лэ сыйярнэнца Мэрнэнца?"» ¹² И вов сикавэла тумэнди баро, гытосардо тхан упрэ андо чер, котэ гытон.

¹³ Онэ жыле и вся удикхле кадя, сар пхэндя лэнди Иисусо, и гытосардэ патрадяко хамос.

Иисусо хал патрадяко хамос лэ сыйярнэнца

¹⁴ Кала авиля врёма Иисусо бэшля лэ апостолонэнца палай мэсали. ¹⁵ Тунчи Иисусо пхэндя лэнди:

— Сар фартэ Мэ камавас тэ хав кадва патрадяко хамос тумэнца майяглал, сар Манди авэла бари грыжа. ¹⁶ Пхэнав тумэнди, со Мэ будэр на авава тэ хав патрадяко хамос жы кала кадья Патради терэлапэ андо Тхагаримос Дэвлэско.

¹⁷ Тунчи Вов ля о тахтай молэса, наисардя и пхэндя:

— Лэнтэ и пэнтэ андар лэстэ всаворэ. ¹⁸ Пхэнав тумэнди, со Мэ будэр на авава тэ пав пимос виноградостар жы кола врёматэ, кала авэла Тхагаримос Дэвлэско.

¹⁹ Тунчи Вов ля о марно, наисардя пала лэстэ Дэвлэс, пэрэпхагля и дя лэнди. Вов пхэндя:

— Када исин тило Мэрно, саво пала тумэндэ отдэлпэ. Терэн када, кай сэрэн пала Мандэ.

²⁰ Кала онэ хале, упалэ ля о тахтай и пхэндя:

— Кадва тахтай исин нэво завето андо Мэрно рат, саво пала тумэндэ питял.

²¹ Акэ, васт колэско, ко Ман прэдэла, Манца палай мэсали. ²² Нэ Шаво Манушыкано жал, сар Лэсти трэбуй. Тай бида колэсти манушэсти, саво прэдэл Лэс.

²³ Тунчи апостолоря линэ тэ пушэн екх екхэстар, ко лэндар када терэла.

Ко майпхурэдэр?

²⁴ Тунчи онэ линэ тэ ханпэ машкар пэстэ, ко лэндар авэла пхурэдэр. ²⁵ Иисусо пхэндя лэнди:

— Тхагара аврэ пхувьяндар припхэнэн пэстирэ народонэнди, кола, савэндэ исин баримос, пхэнэн, кай онэ терэн мищимос. ²⁶ Ай тумэ на авэн кацавэ, сар

онэ. Тумэндэ мэйхэндээр авэла, сар майцэкно, и рай — сар бутярно. ²⁷ Ко майхурэдэр? Кодва, ко бэшэл палай мэсали? Ай бутярно? Чи най кодва, саво бэшэл палай мэсали? Нэ Мэ машкар тумэндэ, сар бутярно. ²⁸ Тумэ ашылепэ Манца, сар Манди сас бида. ²⁹ Сар Мэрно Дад дя Манди Тхагаримос, кадя Мэ икхатар дав лэс тумэнди, ³⁰ кай и тумэ тэ хан и тэ пэн палай Мэрни мэсали андо Тхагаримос Мэрно, и бэшэна тумэ пэ троноря, кай тэ сындосарэн дэшудуй родоря лэ Израилёстирэ.

Исусо пхэнэл, сар Пётро отпхэндёла Лэстар

³¹ — Симоно! Симоно! Акэ, Сатана мангэлас тэ зумавэл тумэн и тэ жужарэл, сар о ворзо жужарэн. ³² Нэ Мэ манглем пала тутэ Дэвлэс, кай тэ на хасарэс патимос тиро. Ай ту ежэно, кала рисавэса Мандэ, подритяр лэ пхралэн тирэн.

³³ Пётро пхэндя Лэсти:

— Рай, Туса мэ гытомэ тэ жав Туса андо баруно и по миримос!

³⁴ Нэ Иисусо пхэндя:

— Пхэнав тути, Пётро, на задилабэла адес башно, сар ту тривар пхэнэса, со на жанэс Ман.

³⁵ Тунчи Иисусо пхэндя лэнди:

— Кала Мэ бишалавас тумэн битышылако, и битрастако, и бипэрналэнго, со тумэнди на хутилэлас?

Онэ пхэндэ:

— Най, вся хутилэлас.

³⁶ — Нэ икхатар, — пхэндя Иисусо, — сар каастэ исин тышила, лэ пэса, кадя ж лэ и траста; а каастэ нинай, битин пэстири йида и тин мечё. ³⁷ Пхэнав тумэнди, со Манца трэбуй тэ стерэллэвсэ, со запистросардо: «И Вов сас забиндо сар прахари». Вся, со пала Мандэ сас пиистросардо, трэбуй тэ авэл.

³⁸ Апостолоря пхэндэ:

— Рай, акэ дикх, амэндэ дуй мечёря.

Иисус пхэндя лэнди:

— Када хутила.

Иисусо мангэл Дэвлэс по плай Оливково

³⁹ Иисусо выжыля тай, сар Лэстэ сас прилито, жыля по плай Оливково. Лэстирэ сыйтэрнэ жыле Лэса. ⁴⁰ Кала Иисусо авиля по тхан, Вов пхэндя лэнди:

— Мангэнпэ Дэвлэс, соб тэ на попэрэн андо зумавимос.

⁴¹ Тунчи Вов отжыля лэндар пэ скачи шонас о бар, тэрдиля пэ чянга и ля тэ мангэллэ Дэвлэс. ⁴² Вов пхэндя:

— Дадэ! Андэ Тири зор тэ залэс кадва тахтай Мандар. Нэ мэйхэндэ авэл на кадя, сар Мэ камав, а сар Ту камэс.

⁴³ Тунчи пав болыбэн Лэстэ авиля ангело и подритярэлас Лэс. ⁴⁴ Андэ пхари грыжа Иисусо зоралэс мангэласпэ. Лэско пото сас сар рат, саво капленца питялас пэ пхув. ⁴⁵ Кала Вов пэрэашыля тэ мангэллэ, рисайля кай сыйтэрнэ и удикхля лэн сутэнца, колэсти со онэ чиеле грыжатар.

⁴⁶ — Состар тумэ совэн? — пушля Иисусо. — Вишен и мангэнпэ, соб тэ на попэрэн андо зумавимос.

Иуда здэл Иисусос

⁴⁷ Кала Вов инке дэлас дума, сикадэлэ мануша, и англал жалас ехх андай дэшудуй, савэс акхарэнас Иуда. Вов поджыля кав Иисусо, соб тэ чюминдэл Лэс.

⁴⁸ Иисусо пхэндя лэсти:

— Иуда, ту чюминдэс и калэса предэс Шавэс Манушыканэс?

⁴⁹ Тунчи кола, ко сас лэ Иисусоса, дикхле, со икхатар авэла, и пушле:

— Рай! Ай со, сар амэ арэсаса мечёса?

⁵⁰ Ехх лэндар арэсля барэ рашаестирэс бутярнэс и отшындя лэсти право кан.

⁵¹ Нэ Иисусо пхэндя:

— На терэн, хутила!

Вов ляпэ палав кан и састьярдя бутярнэс. ⁵² Тунчи Иисусо пхэндя барэ рашаенди, пхурэдэрэ халавдэнди храмостар и пхурэдэрэнди, савэ авиле пала Лэстэ:

— Сар по прахари тумэ авиле мечёнэнца и рулянца? ⁵³ Мэ кажно дес сымас тумэнца андо храмо, и тумэ на схутилдэ Ман. Нэ икхатар тумари врёма, икхатар баримос калимаско.

Пэтро отпхэндёл лэ Иисусостар

⁵⁴ Онэ схутилдэ Лэс и андярдэ андо чер барэ рашаеско. Пэтро дурал жалас пала лэндэ. ⁵⁵ Машкар града роспхабардэ яг, и Пэтро екхэтанэ аврэ манушэнца бэшля пашай яг. ⁵⁶ Ех бутярни удикхля лэ Пэтрос, пэ удууд ягако, придицхляпэ лэстэ ай пхэндя:

— И кадва мануш сас Лэса.

⁵⁷ Нэ Пэтро отпхэндяпэ.

— Мэ на жанав Лэс, жувлиё, — пхэндя вов.

⁵⁸ Тунчи инке авэр мануш удикхля лэс и пхэндя:

— И ту ех лэндар.

— Най, мануш, — пхэндя о Пэтро.

⁵⁹ Прожыля варижай ех чясо врёма, и инке ех мануш ашыля тэ допхэнэл:

— Чячес, и кадва мануш сас Лэса. И вов кацаво жэ галилеянино.

⁶⁰ Нэ Пэтро пхэндя:

— Мануш, мэ на жанав, пала со ту пхэнэс!

И андэ кодъя ж врёма, кала вов инке дэлас дума, продилабайдя башно. ⁶¹ Рай обрисайля и подикхля по Пэтро. Тунчи Пэтро гындосардя лава Раестирэ, сар Вов пхэндя лэсти: «На задилабэла адес башно, сар ту тривар пхэнэса, со на жанэс Ман».

⁶² Пэтро выжыля котар и грыжатар заровдя.

⁶³ Мануша, савэ ритярэнас лэ Иисусос, линэ тэ аса Лэстар и тэ марэ Лэс. ⁶⁴ Онэ запхангле Лэсти якха, пушэнас Лэс:

— Пхэн пророкоско лав! Ко арэсля Тут?

⁶⁵ И пхэнэнас Лэсти авэр бут акушэмос.

Барэ рашая сындосарэн Иисусос

⁶⁶ Сар авиля дес, манушэндирэ пхурэдэра, барэ рашая и сытряимаря Законостирэ стидиле и заандярдэ Иисусос андо синедрионо.

⁶⁷ — Ту исин Христосо? Пхэн амэнди, — пушэнас онэ. Иисусо пхэндя:

— Сар Мэ пхэнава тумэнди, тумэ на патяна. ⁶⁸ И сар пушава тумэндар, тумэ на пхэнэна Манди. ⁶⁹ Акала врёматар Шаво Манушыкано авэла тэ бэшэл пав право васт Дэвлэстирэ зоратар.

⁷⁰ Онэ всаворэ линэ тэ пушэн:

— Када Ту исин Дэвлэско Шаво?

Вов пхэндя:

— Тумэ ежэнэ пхэнэн, со када Мэ.

⁷¹ Тунчи онэ пхэндэ:

— Саво инке амэнди трэбуй допхэнимос? Амэ ежэнэ ашундэ, со Вов пхэндя.

23

Пилато допушэл Иисусос

¹ Тунчи всаворэ онэ подлинэпэ и андярдэ Лэс кав Пилато. ² Котэ онэ линэ тэ ужылисарэн Лэс:

— Амэ удикхле, со Вов змарэл чячюнэ дромэстар амарэ манушэн. И запхэнэл тэ потинэн налогоря лэ императорости, и пхэнэл, со Вов — Христосо, Тхагар.

³ Пилато пушля Иисусос:

— Ту Тхагар иудеёско?

— Ту ежено кадя пхэнэс, — пхэндя Иисусо.

4 Тунчи Пилато пхэндя барэ рашаенди и манушэнди, савэ сас котэ:
— Мэ на аракхав нисаво ужылинос андэ Кадва Мануш.

5 Но онэ тэрдёнас пэ пэско, пхэнэнас:
— Вов ваздэл лэ манушэн, сар сытэрэл пай всавори Иудея, лэ Галилеятар жыкай
кадва тхан.

Иродо допушэл Исусос

6 — Кадва Мануш — галилеянино? — пушля Пилато, сар ашундя када.

7 И ужангия, со Вов андай пхув, кай сас тхагар Иродо, бишалдя Лэс кав Иродо,
саво сас андэ кола деса андо Иерусалимо. **8** Сар Иродо удикхля лэ Исусос, фартэ
радосайля, колэсти со дэлмут камля тэ дикхэл Лэс. Тай бут ашундя пала Лэстэ
и гындолас, со Исусо сикавэла важ лэсти варисави шпэра. **9** Вов пушэлас Лэстар
бут со, нэ Исусо нисо на пхэнэлас лэсти. **10** Барэ рашая и сытэримаря Законостирэ
тэрдёнас и фартэ ужылисарэнас Исусос. **11** О Иродо пэстирэ халавдэнца акушле
и обсае Лэс, урявдэ пэр Лэстэ шукар йида и рисардэ палпалэ кав Пилато. **12** Андэ
кодва дес Иродо и Пилато ашыле амала, а жы кола вряматар онэ сас вражымаря.

Пилато сындосарэл Исусос

13 Тунчи Пилато стида барэ рашаен, пхурэдэрэн раен и манушэн **14** и пхэндя
лэнди:

— Тумэ андэ манди Калэс Манушэс, и пхэнэн, кай Вов ваздэл манушэн. И акэ,
мэ допушлем Лэс англай тумэндэ, тай на аракхлем андэр Лэстэ нисаво ужылинос,
андэ со тумэ Лэс ужылисарэн. **15** Иродо кадя ж на аракхля андэр Лэстэ нисаво
ужылинос и бишалдя Лэс палпалэ амэндэ. Сар дикхэн, Вов на стердя нисо кацаво,
пала со Лэс трэбуй тэ умарэ. **16-17** Мэ припхэнава, кай тэ марэн Лэс чюкняса, и
тунчи отмукава Лэс.*

18 Нэ всаворэ линэ тэ цыписавэн:

— Залэ Лэс! Отмук амэнди Варавас!

19 Варава бэшэлас андо баруно пала умаримос и пала кода, со ваздэлас манушэн
андо форо. **20** Пилато жэ камэлас тэ отмэклэл Исусос и инке дэлас дума лэнца. **21** Нэ
онэ цыписавэнас:

— Примар, примар Лэс кав трушуул!

22 Пилато трито моло пхэндя лэнди:

— Со вырито Вов тердя? Мэ на аракхлем пала Лэстэ нисо, пала со Лэс трэбуй тэ
умарэ. Мэ припхэнава, кай тэ марэн Лэс чюкнянца, и тунчи отмэкова Лэс.

23 Нэ мануша цыпимаса домардёнас пэско, кай Исусос тэ примарэн кав трушуул.
Тунчи онэ домардэпэ пэско. **24** Пилато сындосардя тэ терэл кадя, сар онэ камэнас.

25 Вов отмэклия, сар онэ мангэнэас, колэс, ко сас андо баруно пала кода, со ваздэлас
лэ манушэн и тердя умаримос. Ай лэ Исусос отдя андэ лэндирэ васта.

Исусос андярэн тэ примарэн кав трушуул

26 Кала онэ андярэнас Лэс, линэ варисавэс Симонос Киринеятар, саво жалас пай
мал, и тховдэ пэр лэстэ трушуул, кай тэ андярэл палав Исусо. **27** Пала Лэстэ жанас
бут мануша и жувля, савэ марэнэас пэс андэ кулин и ровэнэас пала Лэстэ. **28** Исусо
обрисайля лэндэ и пхэндя:

— Щея Иерусалимостирэ, на ровэн пала Мандэ, нэ ровэн пала пэстэ и
пала пэстирэ бэяцэ. **29** Авэла кацави врьяма, кала авэна тэ пхэнэн: «Бахталэ
бийбэяцэндирэ, кола, савэ на бэяндэ бэяцэн и кола, савэ на праварэн чючяса!»

30 Тунчи мануша пхэнэна плаенди: «Пэрэн пэ амэндэ!» И холмонэнди:
«Гаравэнтэ амэн!»

31 Сар жундэ дрэвоса терэн кацаво, тунчи со авэла шукэса?

Исусос примарэн кав трушуул

* **23:16-17** 23.16-17 Андэ коисавэ гречески манускрипторя инке исин кацавэ лава: «Андэ кодъя врьама кадя
сас, со пэ свэнко вов трэбуй тэ отмэклэл екхэс манушэс андай барунаря».

³² Ихусоса андярэнас дуен прахарэн по миринос. ³³ Сар онэ авиле по тхан, саво акхарэлпэ Черэпо, котэ примардэ кав трушул Ихусос и прахарен, екхэс пай право риг, ай аврэс пай авэр риг.

³⁴ Ихусо пхэндя:

— Дадэ! Эртисар лэн, онэ на жанэн, со терэн.

Халавдэ шонас жребиё тай розлэнас машкар пэстэ йида Ихусостири.

³⁵ Ай мануша тэрдёнас и дикхэнас. Пхурэдэра асанас Лэстар и пхэнэнас:

— Фэрисарэлас аврэн! Мэк аканы фэрисарэл Ежэно Пэс, сар Вов Дэвлэско Вытидо

— Христосо!

³⁶ Халавдэ, кадя ж асанас Ихусостар. Онэ поджанас и дэнас Лэсти уксусо ³⁷ и пхэнэнас:

— Фэрисар Пэс, сар Ту Тхагар иудеёско!

³⁸ Ай упрэ англав Ихусо сас пистросардо: «Када Тхагар иудеёско».

³⁹ Екх андай примардэ кав трушул прахари дэлэс амрая Лэс и пхэнэлас:

— Со Ту, на Христосо? Фэрисар Пэс и амэн!

⁴⁰ Авэр жэ прахари улэлас лэс и пхэнэлас:

— Чи ту на дарас Дэвлэстар? Ту кадя ж сындолсардо по миринос. ⁴¹ Амэ туса пав чячимос прилас кода, со затердэ, ай Вов нисо вырито на тердя.

⁴² И вов пхэндя:

— Ихусо, гындосар пала мандэ, сар авэса андо Пэско Тхагаримос!

⁴³ И пхэндя лэсти Ихусо:

— Чячимос пхэнав тути: адес авэса Манца андо раё.

Ихусостиро миринос по трушул

⁴⁴ Сар сас врэма пашэ дэшүүдий чясоря десэстирэ, пай всавори пхув ашияля рят, и када сас жыкай трин чясоря. ⁴⁵ Кхам пэрэашыля тэ пхабол, о паринд андо храмо росшындиа поепаш. ⁴⁶ Ихусо фартэ зацыписайля:

— Дадэ, андэ Тирэ васта Мэ отдав духо Мэрно!

И сар пхэндя када, Вов отдя пэско духо. ⁴⁷ Кала пхурэдэр шэлэ халавдэнго вся када удикхля, лашардя лэ Дэвлэс и пхэндя:

— Кадва Мануш чячес сас жужо!

⁴⁸ И всаворэ мануша, савэ стидэпэ тэ подикхэн пэ умаримос, удикхле, со сас, рисавэнас паллалэ и марэнас пэс андэ кулин. ⁴⁹ Всаворэ, савэ жанэнас Ихусос, и жувля, савэ жанас пала Лэстэ андай Галилея, тэрдёнас и дикхэнас дурал пала када.

Ихусос гаравэн

⁵⁰ Котэ сас лашо и жужо англав Дэл мануш, савэс акхарэнас Иосифо. Вов сас екх андай пхурэдэра синедрионо. ⁵¹ Нэ вов на подритярэлас лэндирэ лава ирындоря. Иосифо сас андай Аримафея, форо Иудейско, и ажутярэлас Тхагаримос Дэвлэско.

⁵² Кадва мануш авиля кав Пилато и мангия о тило лэ Ихусоско. ⁵³ Вов зля тило, тховдя андэ сани материя и тховдя Лэс андо склэпо, саво сас вымардо андэ баруно плай. Котэ инке никак на гаравэнас. ⁵⁴ Када сас дес, кала гытонаспэ кай субота, и кадва дес поджалас. ⁵⁵ Палав Иосифо жанас и жувля, савэ авиле лэ Ихусоса андай Галилея. Онэ дикхле о склэпо и сар кордэ тховдэ тило Ихусоско. ⁵⁶ Сар онэ рисайле, гытосардэ мастина лашэ фаноса и духоря. Суботнё дес онэ отчиёнас пав запхэнимо.

24

Ихусо жундёл андай мулэ

¹ Ай дэнзор андо курю жувля линэ гытосардэ мастина и жыле кав склэпо. ² Онэ дикхле, со бар сас отшую лэ склэпостар. ³ Кала зажыле, онэ на аракхле тило лэ Раеско Ихусоско. ⁴ Онэ на полэнас, со тердяпэ, и акэ, сикадэпэ лэнди дуй мурша андэ йида, сави свэтоавэлас, сар молния. ⁵ Даратар жувля обмэклэ пэстирэ муя тэлэ, нэ кола пхэндэ лэнди:

— Со тумэ родэн жундэс машкар мулэ? ⁶ Лэс катэ нинай, Вов жундиля! Тумэ сэрэн, со Вов пхэнэлас тумэнди, кала сас инке андэ Галилея: ⁷ «Шавэс Манушыканэс трэбуй сас тэ отдэн андэ васта бэзэхалэ манушэнди, тэ примарэн кав трушул. Нэ по трито дес Вов жундёла».

⁸ Тунчи онэ сэрдэ Лэстирэ лава. ⁹ Онэ рисайле лэ склэпостар и роспхэндэ пала вся када дэшуекхэ апостолонэнди и аврэнди, ко сас лэнца. ¹⁰ Када сас Мария Магдалина, Иоана, дэй Иаковостири, савя кадя ж акхарэнас Мария и авэр жувля, савэ сас лэнца. Онэ роспхэндэ вся када апостолонэнди, ¹¹ нэ апостолоря на патяйле лэнди. Лэнди сикадяпэ, со када качи шүшэ лава. ¹² Ай Пэтро вшилия и прастая кав склэпо. Вов тэлия и задикхля андрэ, нэ удикхля качи материя. Вов рисайля пэстэ, дивосайля всаворэсти, со тердяпэ.

Исусо сикадёл сыйярнэнди пав дром андо Эмаусо

¹³ Андэ кодва ж дес дуй андай сыйярнэ жанас андо гав Эмаусо, саво сас варикай дэшудуй километроря лэ Иерусалимостар. ¹⁴ Онэ дэнас дума машкар пэстэ пала вся, со тердяпэ. ¹⁵ И кала онэ дэнас дума и роспушэнас екх екхэстар, Ежэно Иисусо поджыля и жыля лэнца. ¹⁶ Нэ лэндирэ якха сас затердэ, и вонэ на ужангле Лэс.

¹⁷ Иисусо пушля лэндар:

— Пала со када тумэ дэн дума машкар пэстэ, сар жан пав дром?

Онэ тэрдиле, и мую лэндэ сас грыжомэ. ¹⁸ Екх лэндар, савэс акхарэнас Клеопа, пхэндя:

— Ту, душол, авилян андо Иерусалимо и екх, саво на жанэл пала кода, со тердяпэ андэ кала деса?

¹⁹ — Пала со? — пушля Иисусо.

— Со тердяпэ Иисусоса андав Назарето, — пхэндэ онэ. — Вов сас пророкоса, зорало англав Дэл и англай всаворэ мануша андэ лава ирындоря. ²⁰ Амарэ барэ рашая и пхурэдэра сындосардэ Лэс по миримос и примардэ кав трушул. ²¹ Ай амэ ажутярасас, со Вов исин Кодва, Саво трэбуй сас тэ фэрисарэл лэ Израилёс. Нэ акэ, трито дес, сар вся када тердяпэ. ²² Нэ коисавэ андай амарэ жувля дивосардэ амэн: онэ жыле дэнзор кав склэпо ²³ и на аракхле котэ Лэско тило, рисайле и роспхэндэ амэнди, со онэ дикхле ангелон, савэ пхэндэ, кай Вов жундо. ²⁴ Тунчи коисавэ андар амарэ жыле кав склэпо и удикхле котэ вся, сар роспхэндэ жувля, но Лэс онэ на дикхле.

²⁵ Вов пхэндя лэнди:

— Савэ тумэ бигодятирэ и сар тумэ найсыго патян всаворэсти, со пхэнэнас пророкоря! ²⁶ Чи на трэбуй сас лэ Христости тэ грыжолпэ и тэ зажал андэ Пэстири слова?

²⁷ И ля лэ Моисеёстар и всаворэ пророконэндар тэ роспхэнэл лэнди, со пхэнэласпэ пала Лэстэ андэ всаворо Пистросаримос. ²⁸ Кала онэ поджыле гавэстэ, каринг онэ жанас, Иисусо сикадя, кай камэл тэ жал майдур, ²⁹ нэ онэ фартэ мангэнас Лэс:

— Ашпэ амэнца. Поджал рят, дес прожыля.

И Вов зажыля андо чер и ашыляпэ лэнца. ³⁰ Кала Иисусо бэшэлас лэнца палай мэсали, Вов ля марно, наисардя Дэвлэс, пэрэпхагля и дя лэнди. ³¹ Тунчи лэндирэ якха отпхэрнадэпэ, и онэ гатярдэ Лэс. Нэ Вов ашыля важ лэнди надикхло. ³² Онэ линэ тэ пхэнэн екх екхэсти:

— Чи на пхабонас андэ амэндэ водя, кала Вов дэлас дума амэнца пав дром и отпхэрнавэлас амэнди Пистросаримос?

³³ Андэ кодья ж вряза онэ вшилие и жыле палпалэ андо Иерусалимо. Котэ онэ аракхле дэшуекх апостолон и колэн, ко сас лэнца. ³⁴ Кола пхэндэ лэнди, со о Рай чячес жундиля и сикадиля лэ Симоности. ³⁵ Тунчи кала дуй роспхэндэ вся, со сас лэнца пав дром, сар онэ ужангле Иисусос, кала Вов пхагэлас о марно.

Исусо сикадёл сыйярнэнди

³⁶ Онэ инке дэнас дума, сар Ежэно Иисусо ашыля машкар лэндэ и пхэндя:

— Миро тумэнди!

³⁷ Онэ замуле даратар, гындонас, со дикхэн духос. ³⁸ Вов пхэндя лэнди:

— Состар тумэ даран? Состар тумэ на саастэс патян? ³⁹ Подикхэн пэ Мэрнэ васта и пэрнэ. Када ж Мэ! Лэнпэ Мандэ и роздикхэн. Кав духо нинай тило и кокаля, ай Мандэ, сар дикхэн, исин.

⁴⁰ Вов пхэндя када и сикадя лэнди Пэстирэ васта и пэрнэ. ⁴¹ Нэ онэ лошатар инке на патянас и дивосавэнас. Тунчи Иисусо пушля лэндар:

— Тумэндэ катэ исин варисо тэ хан?

⁴² Онэ подинэ Лэсти котор пэко машё. ⁴³ Вов ля и халас англай лэндэ.

⁴⁴ — Пала када Мэ пхэнавас тумэнди, кала сымас инке тумэнца, — пхэндя Вов. — Вся, со запистросардо пала Мандэ андо Законо Моисеёско, кай пророкоря и андэ псалморя трэбуй тэ терэллэ.

⁴⁵ Тунчи Вов лэнди отпхэрнадя годи, кай онэ тэ полэн Пистросаримос.

⁴⁶ — Пистросардо, со сас лэ Христости тэ грыжолпэ и по трито дес тэ жундёл андай мулэ, — пхэндя Вов. ⁴⁷ — Важ Алав Лэско всаворэнди манушэнди, майанглал Иерусалимостар, тунчи пай всаворэ пхувья, авэла роспхэндо, кай онэ тэ каисавэн и тунчи простисарэнапэ лэндирэ бэзэха. ⁴⁸ Тумэ авэна пала вся када тэ роспхэнэн. ⁴⁹ Акэ, Мэ бишалава тумэнди кода, пала со дя лав Мэрно Дад, нэ тумэ ашэнпэ андо форо Иерусалимо, жы кала прилэна зор упралимастар.

Иисусо ваздэллэ по болыбэн

⁵⁰ Тунчи Вов выандярдя лэн андав форо кай Вифания, вазгля васта и бахталисардя лэн. ⁵¹ Андэ кодъя врьма, кала Вов бахталисарэлас лэн, Вов ля тэ отжал лэндар и тэ ваздёл по болыбэн. ⁵² Сытэрнэ тэлинэ Лэсти и баря лошаса рисайле андо Иерусалимо. ⁵³ Онэ сас всавори врьма андо храмо и лашарэнас лэ Дэвлэс.

Апостолонэндирэрындоря

Пативалэ амала!

Тумэ ритярэн андэ васт лил, саво тердо андай дуй котора: «Радосаво Лав Лукастар» и «Апостолонэндирэрындоря». Онэ лэдүй сас запистросардэ ехэ манушэса Лукаса, саво сас Иисусоско сыйярно. Онэ исин котор андай Библия, Дэвлэско Лав. Ежэй Библия терди андай дуй барэ котора «Пхурано Завето» и «Нэво Завето». Андо «Пхурано Завето» роспхэнэллэ, сар ашыля пэ пхув жувимос, а кадя ж палав Израилёско народо, саво о Дэл вытидя важ Пэсти. Андо «Нэво Завето» запистросардо пала жувимос лэ Иисусоско Христоско, ай кадя ж роспхэнэллэ, сар ашыля хандири тай сарвой розжыляя пай пхув.

Ежэно лав «Евангелия» пэрэандярэллэ, сар «Радосаво Лав». Када лав пала кода, со дуй мия бэрш павпалэ андэ люма авиля Иисусо Христосо, саво акхарэллэ Фэрисаримари, пала кода со Вов жувэлас амэнца, састьярэлас и сыйярэлас манушэн, эртисарэлас лэнди бэзэха, муля пала всаворэ мануша и жундиля. А кадя ж пала кода, со Вов упалэ рисавэла андэ кадя люма. Евангелии ашыле андэ англуюн вако амаря эра и сас пистросардэ пэ греческо шыб. Штар Евангелии, савэ пистросардэ Иисусостири апостолонэнца (Матфеёса и Иоаноса) и апостолонэндирэ пашэ амалэнца (Лукаса и Маркоса), андо Нэво Завето тердён майанглал. Пала лэндэ жал лил «Апостолонэндирэрындоря». Андэ латэ роспхэнэллэ пала кода, сар Иисусостири апостолоря розандярэнас Радосаво Лав Дэвлэско, а кадя ж пала кода, сар тховэнаспэ англунэ хандирия. Кадя ж андо англуюн вако ашыле лила Иисусостири сыйярнэндирэ и лил «Откровение». Всаворэ кала лила стидэ андэ ехэ лил, саво сас акхардо «Нэво Завето», андэ саво исин бишта ехта лила.

Пэ адесутно дес лила Нэвэ Заветостири, а фэдэр Евангелии, пэрэандярдэ пэ всаворэ шыба люматирэ, савэндэ исин пистросаримос. Библия исин майпхурано лил андай манушэндирэ пистросаримос. Амэ патяс, со тумэ кадя ж пативаса прилэна кадя драго дума.

Амэ всаворэ водестар наисарас всаворэн, ко терэнас бути, кала кадва лил гытосарэнас важ публикацыя: пэрэандимаренди, редакторонэнди и бутэнди ромэнди, савэ шунэнас и бинэнас кадва лил, кала лэс гытонас. Баро наис тумэнди!

Тэ дэл о Дэл тумэнди баахт!

Пативаса тумэндэ,

Бутярнэ пай организацыя «Пэрэандимаря ла Библиятири андэ Украина».

Иисусо ваздэллэ по болыбэн

¹ Пативало Феофило, андэ мэрно англуюн лил мэ пистросардэм палай вся, со Иисусо терэлас и состэ Вов сыйярэлас, ² жыкай кодва дес, кала припхэндя Свэнтонэ Духоса вытидэнди Лэса апостолонэнди, со трэбуй тэ терэн, и сас залино по болыбэн. ³ Кала Вов пэрэандярдя и грыж, сикадяялэ лэнди жундэса и бут допхэнэллас, со када чячимос. И саранда дес сикавэласпэ лэнди и пхэнэллас палав Тхагаримос Дэвлэско. ⁴ Екхвар, кала онэ сас екхэтанэ, Вов припхэндя лэнди тэ на ашавэн Иерусалимо, нэ тэ ажутярэн кода, пала со дя лав о Дад.

— Пала када тумэ ашундэ Мандар. ⁵ Иоано болэллас паеса, ай кала прожана найбут деса, авэна болдэ Свэнтонэ Духоса.

⁶ Кола, савэ стидэлэ котэ, пушле Лэс:

— Рай, Ту со, стидэспэ тэ рисарэс андэ кадя врьяма тхагаримос Израилёско?

⁷ Вов пхэндя лэнди:

— Най тумаро рындо тэ жанэн деса и врьяма, савэ о Дад тховдя Пэстири зораса.

⁸ Нэ кала пэр тумэндэ сжала Свэнто Духо, тумэ прилэна зор и авэна Мэрнэ допхенимаря андо Иерусалимо, пай всавори Иудея, Самария и кав дурутнэ тхана пай всавори пхув.

⁹ Вов пхэндя када, и англай лэндирэ якха сас вазгло упрэ, и облако гарадя Лэс.
¹⁰ Онэ дикхэнас по болыбэн, сар Вов ваздэласпэ. И акэ, андэ кодья връма паша лэндэ авиле дуй мануша андэ парни йида. ¹¹ И пхэндэ:

— Мурша галилеяноря! Со тумэ тэрдён и дикхэн упрэ? Кадва Иисусо, Саво сас залино тумэндар по болыбэн, рисавэла кадя ж, сар тумэ дикхле Лэс, кала Вов ужалас.

Апостолоря вытидэн Матфеёс по тхан Иудаско

¹² Тунчи онэ рисайле андо Иерусалимо пав плай, саво акхарэлпэ Оливково. Вов сас найдур форостар, по дром, саво домукэлпэ тэ прожал андо суботнё дес. ¹³ И сар онэ зажыле андо чер, вазглепэ андо тхан упрэ, кай онэ жувэнас андэ кодья връма. Котэ сас Пэтро и Иоано, Иаково, Андреё, Филипо, Фома, Варфоломеё, Матфеё, Иаково, шаво Алфеёско и Симоно Зилото, тай Иуда, шаво Иаковоско. ¹⁴ Всаворэ онэ екхэтанэ мангэнаспэ Дэвлэс. Катэ сас коисавэ жувля и Мария, дэй Иисусостири, и Лэстирэ пхрала. ¹⁵ Андэ кодья връма Пэтро вшиля машкар пхрала пав патявимос и пхэндя (сас стидэ варикай шэл биш манушэн):

¹⁶ — Пхралалэ! Трэбуй сас тэ терэлпэ кода, со андэ Пистросаримос пхэндя Свэнто Духо Давидостири эштэнца палав Иуда. Вов сас пхурэдэр колэнго, савэ линэ Иисусос. ¹⁷ Вов сас амэнца и терэлас апостолонэндири бути, ¹⁸ нэ приля замакхлэ ловэ и тиндя мал. Котэ вов пэля и кадя арэсляпэ, со лэстэ пхариля о пэр, и выпэле всаворэ лэстирэ пора. ¹⁹ И када ужангле всаворэ, ко жувэлас андо Иерусалимо, и акхардэ кадья мал пэ лэндири шыб Акелдама, со исин «Ратэстири мал». ²⁰ Андэ лил Псалморя пистросардо:

«Мэк лэско чер авэла шушо,

тай тэ на жувэл котэ нико»

И

«Лэско тхан мэк залэл авэр».

²¹ Амэнди трэбуй тэ вытидас екхэс манушэс, саво сас машкар амэндэ всавори връма, пав всаворэ тхана, кай пхирэлас Рай Иисусо, ²² кола връматар, кала лэс болэлас Иоано, жыкай кодва дес, кала Вов сас залино амэндар. Сар и амэнди, лэсти трэбуй сас тэ дикхэл, со Иисусо жундиля мулэндар.

²³ Онэ вытидэ дуен: Иосифос, саво акхарэлпэ Вар-Сава, и инке акхарэлпэ Иусто, и Матфеёс; ²⁴ и манглепэ Дэвлэс тай пхэндэ:

— Ту, Рай, жанэс всаворэндирэ водя. Сикав андай кала дуй екхэс, савэс Ту вытидян ²⁵ тэ прилэл кадай бути и апостолимос, саво ашавдя Иуда, кай тэ жал кордэ, каринг лэсти сас сындосардо.

²⁶ Онэ шутэ жребиё, и вов выпэля лэ Матфеёсти, и кодва сас прилито кай дэшуекх апостолоря.

2

Свэнто Духо сжал пэ апостолоря

¹ Кала авиля свэнко Пандэшако дес*, онэ сас андэ екх тхан. ² Сыго авиля шумо пав болыбэн, сар фартэ зораля балвалятар, и пхэрдярдя всаворе чер, кай онэ сас.

³ Авиле лэнди шыба, сар яга, савэ всаворэ екх пала екх сжыле по кожно мануш.

⁴ Всаворэ пхэрдиле Свэнтонэ Духоса и линэ тэ дэн дума пэ авэр шыба, сар о Духо дэлас лэнди тэ пхэнэн. ⁵ Андо Иерусалимо сас дэвлэкунэ иудеёря андай всаворэ пхувья талай болыбэн. ⁶ И сар тердяпэ кадва шумо, стидэпэ бут мануша и на полэнас, со терэлпэ, колэсти со всаворэ ашунэнас, сар апостолоря дэнас дума пэ лэндирэ шыба. ⁷ Всаворэ фартэ дивонаспэ и дэнас дума машкар пэстэ:

— Кала, савэ дэн дума, най всаворэ галилеяноря? ⁸ Сар амэ ашунас пэстири шыб, сави амэ жанас амарэ бэяндимастар? ⁹ Машкар амэндэ исин парфяноря и мидяноря, еламиторя и ко жувэл андэ Месопотамия, Иудея и Кападокия, Понто

* ^{2:1} 2.1 Куркэндирио свэнко, иудеёнго свэнко, кала стидэ ворзо пай маля. Вов сас пэ пандэшако дес палай Патради.

и Цэкни Азия, ¹⁰ Фригия и Памфилия, Египто и пхув андэ Ливия, сави пашай Киринея, и кола, ко жувэл андо Римо, ¹¹ иудеёря и прозелиторя, критяноря и араборя. Ашунэнас, сар онэ дэн дума амаря шыбаса палай барэ рындоря Дэвлэстирэ?

¹² Всаворэ дивосавэнас и на дополэнас, пхэнэнас екх екхэсти:

— Со када терэлпэ?

¹³ Ай авэр асанас лэндар тай пхэнэнас:

— Онэ матиле гуглэ молэстар.

Дума лэ Пэтростири

¹⁴ Пётро вшиля лэ дэшүекхэнца и зоралэ гласоса пхэндя лэнди:

— Мурша иудеёря и всаворэ, ко жувэл андо Иерусалимо! Ашунэнтэ мэрнэ алава, кай тэ жанэн. ¹⁵ Онэ на матэ, сар тумэ гындон. Икхатар качи иня чясо дэнзорэско!

¹⁶ Нэ пала када пхэндя майанглал пророко Иоилё:

¹⁷ «Андэ палатунэ деса, — пхэнэл о Дэл,

— шава Духо Мэрно пэ всаворэн манушэн,
шавэ и щея тумарэ авэна тэ пхэнэн лав Дэвлэстар
и шаворэ тумарэ авэна тэ дикхэн дикхимос,
и пхурэ мурша тумарэ дикхэна сунэ Лэстар.

¹⁸ И пэ бутярнэ и бутярня Мэрнэ андэ кола деса шава Мэрно Духо,
и онэ авэна тэ пхэнэн лав Дэвлэстар.

¹⁹ Мэ сикавава доворя по болыбэн упрэ и шпэры пэ пхув тэлэ,
рат и яг, и баро тхув.

²⁰ Кхам калёла, и шон ашэла сар рат,
жы кала авэла дес Раеско, баро и лашардо.

²¹ И тунчи өвчно, ко приакхарэла алав Раеско, авэла фэрисардо.

²² Мурша Израилёстирэ! Выашунэн, со мэ пхэнава. Зораса тай дивоса и шпэраса, савэ о Дэл тердя черэз Лэстэ машкар тумэндэ, сар тумэ и жанэн, Дэвэл допхэндя тумэнди, со Мурш Исусо андав Назарето авиля Лэстар. ²³ Сар Дэл загындосарэлас и жанэлас майанглэ, тумэ умардэ Лэс. Прэдинэ андэ прахарэндирэ васта, савэ примардэ Лэс кав трушул. ²⁴ Нэ о Дэл жундярдя Лэс, росшындя грыжы миримастирэ, колэсти со миримасти на сас зор тэ уритярэл Лэс.

²⁵ Давидо пхэнэл пала Лэстэ:

«Дикхлем мэ англав пэстэ лэ Раес всавори врьяма,
Бов пай право риг паша мандэ,
кай састэс тэ тэрдював.

²⁶ Важ кода радосайля води мэрно
и лошарэл шыб мэрни;
и всаворэ мэрнэ маса авэна тэ жувэн надияса.

²⁷ Колэсти со Ту на ашавэса води мэрно андо адо
и на дэса свэнтонэсти Тирэсти тэ ашэл прахоса.

²⁸ Ту дян манди тэ ужанав дром жувимаско,
Ту пхэрдярэса ман лошаса англав Тутэ».

²⁹ Пхралалэ! Домукэн ман тэ пхэнав тумэнди ворта. Пррапапо Давидо муля и гарадо, и склэпо лэско амэндэ жыкай адесутно дес. ³⁰ Бов сас пророко и жанэлас, со о Дэл солахадя лэсти, со по троно авэла тэ бэшэл мануш пай лэско родо. ³¹ Бов майанглал пхэндя, со Христосо жундёла андай мулэ, со на авэла ашадо о води Лэско андо адо, и тило Лэско на ашэла прахоса. ³² Калэс Исусос о Дэл жундярдя андай мулэ, амэ всаворэ дикхасас када. ³³ Бов сас вазгло Дэвлэстирэ правонэ вастэса и приля лэ Дадэстар Свэнто Духо, пала Саво дя лав о Дэл, и со тумэ икхатар дикхэн и ашунэн. ³⁴ Давидо на вазгялпэ по болыбэн, нэ бов пхэнэлас кадя:

«Пхэндя Рай Дэл мэрнэ Раести:

— Бэш пай право риг Мандар,

³⁵ кола врятатэ, кала шава тирэ вражымарен кай и пэрнэ Тирэ».

36 Кадя саастэс жанэн, всаворо чер лэ Израилёско, со Калэс Иисусос, Савэс тумэ примардэ кав трушул, о Дэл стердя Раеса и Христоса.

37 Кала онэ ашундэ када, заровдэ воденца и пхэндэ Пэтрости и аврэнди апостолонэнди:

— Пхралалэ! Со амэнди тэ терас?

38 Пэтро пхэндя лэнди:

— Каисавэн и тэ болэлпэ кажно тумэндар важ алав Иисусоско Христоско, кай Дэл тэ эртисарэл тумэнди бэзэха. И тунчи тумэ прилэна даро Свэнтонэ Духос.

39 Кадва лав дино тумэнди и тумарэ бэяцэнди, колэнди, ко дур, и всаворэнди, кас акхарэла амаро Рай Дэл.

40 И бут аврэ лавэнца вов умангэлас лэн:

— Фэрисавэнпэ калэ хохавнэ родостар!

41 Кола, ко приля лэско лав, болдэлпэ, и приашыле лэндэ андэ кодва дес варижай трин мия манушэн. **42** Онэ ритярэнаспэ апостолонэндирэ сыйтириамастэ, всавори връяма екхэтанэ дэнас дума, пхагэнас марно и мангэнаспэ Дэвлэс.

Жувимос патяви мастирэн манушэн

43 Всаворэ мануша сас андэ дар англав Дэл, и апостолоря сикавэнас бут шпэры и терэнас диворя. **44** Всаворэ патикунэ сас екхэтанэ, и вся лэндэ сас гуртоско. **45** Онэ битинэнас пэско хулаимос тай барвалимос, и роздэнас всаворэнди, касти, со сас трэбуй. **46** Кажно дес онэ екхэтанэ сас андо храмо, ай пай чера пхагэнас марно, ханас хамос лошаса и отпхэрнадэ воденца, **47** лашарэнас Дэвлэс. Онэ жувэнас андо мищимос всаворэнца манушэнца, и Рай кажно дес анэлас лэндэ фэрисардэн.

3

Пэтро и Иоано састирэн бандэ

1 Пэтро и Иоано жанас кав храмо андэ трито чясо десэско. Андэ кадья връяма котэ сас мангимос. **2** Пашай удара лэ храмостири, савэ акхарэнаспэ «Шукар», бэшэлас мануш, саво сас банго всаворо пэско жувимос. Лэс кажно дес анэнас и бэшлярэнас, кай вов тэ мангэл ловэ колэндэ, ко зажал андо храмо. **3** Вов удикхля лэ Пэтрос и Иоанос, савэ зажанас андо храмо, тай мангля лэндар. **4** Пэтро и Иоано фартэ вдикхлэпэ андэр лэстэ и пхэндэ:

— Подикх пэ амэндэ.

5 Вов вдикхляпэ пэр лэндэ и гындолос, со онэ варисо дэна лэсти. **6** Нэ Пэтро пхэндя:

— Руп и сомнак нинай мандэ, а со исин мандэ, кода и дав тути: важ алав Иисусоско Христоско андав Назарето вщи и пхир!

7 Вов ля лэс палав право васт тай вазглия. Андэ кодья връяма ашыле майсасть элэстириэ чянга и пэрнэ. **8** Вов подхукля, тэрдиля тай ашыля тэ пхирэл. Тунчи зажыля лэнца андо храмо, пхирэлас и хукэлас, лашарэлас лэ Дэвлэс. **9** Всаворэ мануша дикхле лэс, сар вов пхирэл и лашарэл Дэвлэс. **10** Онэ ужангле, со када сас кодва, саво бэшэлас пашай Шукар удара храмостири кай тэ мангэл ловэ. Онэ на патянас лэ яххэнди тай дивонааспэ колэсти, со тердяпэ.

Пэтро пхэнэл лав Дэвлэско

11 Ай сар састирдо банго на отжалас лэ Пэтростар и Иоаностар, тунчи всаворэ мануша дивонааспэ колэсти тай спрастаетэ лэндэ андо тхан, саво акхарэлпэ Соломоностири тиндэ. **12** Кала Пэтро удикхля када, вов пхэндя лэ манушэнди:

— Мурша Израилёстири! Состар тумэн када дивосарэл? Состар тумэ дикхэн пэ амэндэ кадя, сар наче амэ пэстирия зораса и жужымаса тердэ када, со вов пхирэл?

13 О Дэл Авраамоско, лэ Исаакоско и Иаковоско, Дэл амарэ дадэнго, лашардя Пэстириэс Бутярнэс Иисусос, Савэс тумэ прэдинэ и Савэстар отпхэндэпэ англав Пилато, кала вов камэлас тэ отмукэл Лэс. **14** Тумэ отпхэндэпэ лэ Свэнтостар и Чячимастар и мангле тэ отмукэл тумэнди колэс, саво умарэлас манушэн. **15** Тумэ

умардэ Пхурэдэрэс лэ Жувимастирэс, нэ о Дэл жундярдя Лэс андай мулэ, и амэ дикхасас када пэстирэ якхэнца. ¹⁶ Кадва мануш, савэс тумэ жанэн и дикхэн, патайля андо алав Иисусоско, и Вов састьярдя лэс англай тумарэ якха.

¹⁷ Пхрала, мэ полав: тумэ и тумарэ пхурэдэра на жанэнас, со терэнас. ¹⁸ Нэ кадя о Дэл тердя кода, со пхэнэлас черэз всаворэн пророконэн, со лэ Христости трэбуй авэла тэ пэрэандярэл грыжа.

¹⁹ Акэ, каисавэн и рисавэн кав Дэл, кай тэ скхосэнпэ бэзэха тумарэ, ²⁰ кай авиля лэ Раестар врьяма тэ чиёл, и кай бишалдя Вов тумэнди лэ Иисусос Христос, Савэс Вов майанглал вытия тумэнди.

²¹ Болыбнасти трэбуй сас тэ прилэл Лэс кай врьяма, кала терэлапэ кода, со дэлмутня врятатар пхэнэнас Дэвлэстар всаворэ Лэстирэ свэнтонэ пророкоря.

²² Моисеё пхэндя:

«Рай, о Дэл тумаро,

тховэла тумэнди андай пхрала тумарэ
Пророкос, сар ман.

Кандэн Лэс андэ вся,
со Вов авэла тэ пхэнэл тумэнди.

²³ Всаворэ, ко на кандэла колэс Пророкос,
авэна вытрадэ андав народо».

²⁴ Самуило и всаворэ авэр пророкоря, савэ сас палав лэстэ, дэнас дума, со авэна кала деса. ²⁵ Тумэ — шавэ пророкондирэ и заветостири, саво Дэл дя тумарэ дадэнди, кала пхэндя Авраамости:

«Кодва, Саво авэла андав тиро родо,
дэла бахт всаворэнди манушэнди пай пхув».

²⁶ Дэл жундярдя андай мулэ Пэстирэс Бутярнэс, майанглал бишалдя Лэс тумэндэ тэ бахталисарэл тумэн и обрисарэл кажнонэс лэстирэ выритонэ рындондар.

4

Пэтро и Иоано англав Синедрионо

¹ Кала онэ дэнас дума кай и мануша, лэндэ поджыле рашая, пхурэдэр халавдэнго андэ храмо и садукеёря, ² савэ холявэнас пэ кода, со онэ сытярэнас манушэн, тай пхэнэнас, со черэз Иисусо жундёна мулэ. ³ Онэ линэ лэн тай пхандадэ андо баруно жыкай дэнзор, колэсти со врьяма сас кай ряят. ⁴ Бут мануша, савэ ашунэнас лав, патайле, и сас кацавэн, ко патайля, варикай панч мия.

⁵ Пэ авэр дес стидэпэ андо Иерусалимо лэндирэ майбарэ, пхурэдэра тай сытяримаря Законостири, ⁶ о Аннас, баро рашай, о Каиафа, о Иоано, и Александро, и авэр андав родо барэ рашаенго. ⁷ Онэ тховдэ лэн по машкар тай пушле:

— Савя зораса ай савэ алавэса тумэ тердэ када?

⁸ Тунчи Пэтро пхэрдиля Свэнтонэ Духоса тай пхэндя лэнди:

— Рая манушэндирэ и пхурэдэра! ⁹ Кала тумэ допушэн адес амэндар пала лашо рындо, саво сас тердо важ насвало мануш, и пала кода, сар вов састиля, ¹⁰ тунчи жанэн тумэ и всаворэ мануша Израилёстири, со вов тэрдёл англай тумэндэ састьярдо алавэса Иисусостири, Христостири эса андав Назарето, Савэс тумэ примардэ кав трушул и Савэс о Дэл жундярдя андай мулэ. ¹¹ Вов исин бар, саво отшутэ тумэ, ко терэнас о чер, ашыля англунэ барэса, пэ саво ритярдёл всаворо чер. ¹² И нико авэр на дэл о фэрисаримос, колэсти со на дино манушэнди авэр алав талай болыбэн, савэса трэбуй амэнди тэ фэрисавас.

¹³ Онэ дикхле, со о Пэтро тай Иоано, мэй и наервалэ и мануша андав народо, нэ всаекх на даранас. И кала онэ ужангле, со кола сас лэ Иисусоса, фартэ дивосайле.

¹⁴ Онэ кадя ж дикхле састьярдэс манушэс, саво тэрдёлас лэнца, тай лэнди нисо на сас тэ пхэнэн пэ кода. ¹⁵ Тунчи онэ припхэндэ апостолонэнди тэ выжан андав Синедрионо тай ашыле тэ дэн дума машкар пэстэ:

16 — Со амэнди тэ терас калэ манушэнца? Всаворэнди, ко жувэл андо Иерусалимо, ашундо, со онэ тердэ чячюно диво, и амэнди най сар тэ отпхэндювас калэстар. **17** Нэ соб тэ на розжалпэ кадья дума машкар мануша, дараваса лэн тай запхэнаса лэнди, кай тэ на дэн дума палав кадва алав никасти андай мануша.

18 Онэ акхардэ лэн, припхэндэ лэнди майбут тэ на дэн дума и тэ на съярэн палав алав Исусоско. **19** Нэ Пэтро и Иоано пхэндэ лэнди:

— Сындосарэн: чи пав чячимос авэла англав Дэл, кай тэ кандастумэн майфартэ, сар лэ Дэвлэс? **20** Амэнди най сар тэ на пхэнас кода, со дикхле и ашундэ.

21 Онэ придарадэ лэн тай отму克莱, колэсти со на аракхле, сар тэ марэн лэн, тай колэсти со всаворэ лашарэнас Дэвлэс пала кода, со тердяпэ. **22** Важ кода со колэсти манушэсти, каса тердяпэ диво састьяримаско, сас варикай саранда бэрша.

Мангимос патикунэнга

23 Кала Пэтрос тай Иоанос отму克莱, онэ авиле кай пэстирэ пхрала и роспхэндэ, со пхэнэнас лэнди барэ рашая тай пхурэдэра. **24** Онэ выашундэ и екхэтанэ вазгле о гласо кав Дэл и пхэндэ:

— Баро Дэл, Саво тердян болыбэн, пхув, море и вся, со андэ лэндэ! **25** Ту уштэнца дадэс амарэс Давидос, бутярнэс Тирэс, пхэндян Свэнтонэ Духоса:

«Состар вазглепэ мануша всаворя пхувьятар
и народоря гындосардэ шушымос?

26 Вазглепэ тхагара пхувьятире,
и пхурэдэра стидэпэ екхэтанэ
пэ Рай Дэл и по Христосо Лэско».

27 Пав чячимос стидэпэ андо кадва форо по Свэнто Бутярно Тиро Исусо, Савэс Ту помакхлян, Иродо и Понтиё Пилато аврэ народонэнца и народоса Израилёстирэса, **28** соб тэ терэ кода, со Ту майанглал гындосардян тэ тирэс Пэстирия зораса и воляса. **29** Иххатар, Рай, подикх, сар онэ амэн даравэн, и дэ Тирэ бутярнэнди бидарако тэ пхэнэн лав Тиро. **30** Процырдэ о васт Тиро тай састьяр наасвалэн и тер шпэры ай диворя алавэса Свэнтонэ Бутярнэса Тирэса Исусоса.

31 И пав мангимос лэнго ля тэ тинолпэ о тхан, кай онэ стидэпэ, и пхэрдярдэпэ всаворэ Свэнтонэ Духоса, и пхэнэнас лав Дэвлэско бидарако.

Пхрала жувэн сар екх води

32 Всаворэ патикунэ сас амала екхэ водеса и екхэ гындоса; и нико на бинэлас пэско хулаимос качи пэстирэса, нэ вся лэндэ сас гуртоско. **33** Апостолоря баря зораса допхэнэнас палав жундимос андай мулэ Раес Исусос; и баро мищимос сас пэр лэндэ всаворэндэ. **34** На сас машкар лэндэ никас, кости варисо на хутилэлас, колэсти со кола, кастэ сас пхув и чера, битинэнас лэн, и анэнас и ловэ битинимастар **35** и тховэнас кай и пэрнэ апостолонэндирэ. И кала ловэ роздэнаспэ кожнонэсти, со кости сас трэбуй. **36** Кадя тердя Иосифо, кас апостолоря акхардэ Варнава (со пэрэандярэлпэ «шаво, саво подритярэл»), левито, родоса андав Кипро. **37** Лэстэ сас пэстири пхув, вов битиндя ла тай андя ловэ и тховдя кай и пэрнэ апостолонэнди.

5

Анания тай Сапфира

1 Екх мурш, савэс акхарэнас Анания и лэстири ромни Сапфира битиндэ хулаимос. **2** Саво-то котор битинимастар вов тховдя кай пэрнэ апостолонэнди. Ай авэр котор гарадя пэсти. Лэстири ромни жанэлас пала кода. **3** Пэтро пхэндя:

— Анания! Пэр со ту дян Сатанасти тэ пхэрдярэл тиро води, кай ту пхэндян найчайчимос Свэнтонэ Духости, и гаравдян андай цэмин пхувьятири? **4** Кода, со ту битиндян, сас тиро, ай ловэ, со ту прилян, сас тирэ. Пэр со ту тховдян андо тиро води тэ тирэс кадя? Ту пхэндян найчайчимос на манушэнди, а Дэвлэсти.

5 Кала Анания ашундя кала лава, вов пэля и муля. Бари дар авиля пэ всаворэн, ко ашундэ када. **6** И тунчи тэрнэ мануша вщиле, гытосардэ тэ гаравэн, выандярдэ тай гаравдэ.

7 Ай кала прожыля трин чясоря, авиля и ромни лэстири. Вой на жанэлас, со тердяпэ. **8** Пэтро пушля латар:

— Пхэн манди, палай кацави цэмин тумэ битиндэ э пхув?

— Агэ, — пхэндя вой, — палай кацави.

9 Нэ Пэтро пхэндя лати:

— Со када тумэ допхэндэпэ тэ зумавэн Духос Раестирэс? Акэ, зажан андэ удар кола, савэ гаравдэ тирэ ромэс. Онэ и тут выандярэна.

10 Андэ кадья ж врёма вой пэля пашай пэрнэ лэстирэ тай муля. Тэрнэ мануша зажыле и аракхле ла муляса. Онэ выандярдэ тай гаравдэ ла паша лако ром. **11** И бари дар авиля пэ всавори кхандири и пэ всаворэ, ко ашундя када.

Апостолоря терэн диворя и шпэры

12 Апостолоря пэстирэ вастэнца терэнас бут шпэры и диворя машкар мануша. Всаворэ патикунэ екхэтанэ стидэнаспэ андэ Соломоностирэ тиндэ. **13** Авэр мануша даранас тэ приашэн лэндэ, ай народо лашарэлас лэн. **14** Майбут мануша авэлас кав патявимос андо Рай, и мурша и жувля. **15** Мануша выандярэнас лэ насовалэн пэ гасы и тховэнас пэ паторя тай пэ паринда, кай и лэ Пётростири тень, кала вов прожалас, тэ пэрэл пэ варикастэ андар лэндэ. **16** Андо Иерусалимо андай пашутнэ фороря зжанаспэ бут мануша. Онэ анэнас насовалэн и колэн, андэр кастэ сас найжужэ духодя, и всаворэ састьярэнаспэ.

Апостолонэн гонисарэн палав алав Иисусоско

17 Боро рашай и всаворэ, ко сас пэ лэстири риг, андав стидимос садукеёско, пхэрдярэпэ холяса пэ лэн, **18** и схутилдэ лэ Апостолонэн и запхандадэ андо фороско баруно. **19** Нэ ангело Раеско и рят отпхэрнадя удара андав бар, выандярдя лэн тай пхэндя:

20 — Жантэ, тэрдён андо храмо и пхэнэн всаворэ кала лава жувимастирэ лэ манушэнди.

21 Онэ кангле тай жыле дэнзор андо храмо и сыйярэнас.

Андэ кодья врёма барэ рашая и кола, савэ сас лэнца, авиле и стидэ Синедрионо, акхардэ всаворэн пхурэдэрэн андай шавэ Израилёстирэ и бишалдэ андо баруно бутярнэн тэ анэн лэ апостолонэн. **22** Нэ бутярнэ, сар авиле, на аракхле лэн андо баруно и рисайле тай допхэндэ:

23 — Амэ дикхле, со барунэстирэ удара мишто затердэ и пашай лэндэ тэрдён халавдэ, нэ кала отпхэрнадэ удара, андрэ никас на аракхле.

24 Кала пхурэдэр халавдэнго андо храмо и барэ рашая ашундэ кала лава, фартэ дивосайле и на жанэнас, сар тэ полэн кода, со тердяпэ. **25** Авиля варико и допхэндя лэнди:

— Акэ мурша, савэн тумэ запхандадэ андо баруно, тэрдён андо храмо и сыйярэн лэ манушэн.

26 Тунчи халавдэнго пхурэдэр жыля лэ бутярнэнца и андя лэн най зораса, колэсти со даранас лэ манушэндар, кай тэ на помарэн лэн барэнца. **27** Кала андэ лэн и тховдэ андо Синедрионо, боро рашай пушля лэн:

28 — Чи на запхэндэ амэ тумэнди тэ сыйярэн палав кадва алав? Ай тумэ пав всаворо Иерусалимо розандярдэ тумаро сыйяримос и камэн тэ ужылисарэн амэн пала миринос Калэстирэс Манушэс.

29 Пэтро и апостолоря пхэндэ пэ када:

— Трэбуй тэ кандас фэдэр Дэвлэс, сар лэ манушэс. **30** Дэл амарэ дадэндиго жундярдя андай мулэ Иисусос, Савэс тумэ тховдэ по каштуно трушул тай умардэ.

31 О Дэл вазгия Лэс правонэ вастэса и тердя Пхурэдэрэса и Фэрисаримареса, кай

тэ дэл Израилёсти каисаримос и эртисаримос лэ бэзэхэндар. ³² Допхенимаря калэсти амэ и Свэнто Духо, Савэс о Дэл дя колэнди, ко кандэл Лэс.

³³ Кола, савэ сас котэ, кала ашундэ када, росшынэнаспэ холятар и камэнас тэ умарэн лэн. ³⁴ Тунчи вшиля андо Синедрионо екх фарисеё, савэс акхарэнас Гамалиило, сытрямари Законоско, пативало англай всаворэ мануша. Вов прихэндя тэ выяндярэн апостолонэн пэ найбари врязма, ³⁵ и пхэндя манушэнди андав Синедрионо:

— Мурша Израилёстирэ! Погындон машкар пэстэ палай кала мануша, со лэнца тэ терэн. ³⁶ На фартэ дэлмут авиля Февда, саво сикавэлас пэс пала варисаво баро мануш, и лэстэ приашыле варикай штаршэл мануша. Нэ вов сас умардо, и всаворэ, ко кандэлас лэс, розжылепэ, и на ашыляпэ никас. ³⁷ Тунчи пала лэстэ сас Иуда галилеянино. Вов авиля, кала сас запистросаримос, тай андярдя пала пэстэ бутэн манушэн. Нэ вов муля, и всаворэ, ко кандэлас лэс, розжылепэ. ³⁸ И икхатар пхэнав тумэнди: ашавэн калэн манушэн и отмукэн лэн. Сар када воля и рындо манушэндирэ, то онэ росспэрэнапэ, ³⁹ ай сар Дэвлэстар, тумэ нисар на роспхагэнэ лэн. Фэрисавэн, кай тумэ тэ на ашэн вражымаренца Дэвлэсти.

Кола, савэ сас котэ, кангле лэс. ⁴⁰ Онэ акхардэ апостолонэн и прихэндэ тэ марэн лэн чюкнянца. Тунчи запхэндэ лэнди тэ пхэнэн палав алэв Исусоско тай отму克ле лэн. ⁴¹ Онэ жыле андав Синедрионо и лошавэнас, со лэнди выпэля патив тэ прилэн лажаимос палав алэв Исусоско. ⁴² Всаворэ деса андо храмо и пай чера на пэрэашэнас тэ сътрярэн и тэ пхэнэн Радосаво Лав палав Исусо Христосо.

6

Апостолоря вытидэн эхта бутярнэн

¹ Андэ кала деса, кала сътрярнэн ашыля майбут, элинисторя* линэ тэ холявэн пэ евреёра пала кода, со лэндирэ пхивлянди нисо на дэнас, кала роздэнас хамо кожно дес. ² Тунчи дэшудуй апостолоря акхардэ бутэн сътрярнэн тай пхэндэ:

— Наймишто амэнди тэ ашавас лав Дэвлэско тай тэ подас о хамос пэ мисяля. ³ Акэ со, пхрала, вытидэн машкар пэстэ эхта манушэн, пала савэ лашо дэн дума, савэ пхэрдярдэ Духоса и годяса, и тховаса лэн пэ кадья бути. ⁴ Ай амэ всавори врязма аваса тэ мангаспэ Дэвлэс и тэ терас бути лавэса.

⁵ Всаворэнди чялия кадья дума, и вытидэ Стэфанос, муршэс, саво пхэрдярдо патявимаса и Свэнтонэ Духоса, Филипос, Прохорос, Никанорос, Тимонос, Пармэнос и Николаёс, прозелитост† андай Антиохия. ⁶ Лэн тховдэ англай апостолоря, савэ мангле Дэвлэс тай тховдэ и васт пэр лэндэ.

⁷ О лав Дэвлэско барёлас, и андо Иерусалимо ашэлас майбут сътрярнэ. Кадя ж и андай рашая фартэ бут патяйле.

Стэфанос схутилэн

⁸ Ай о Стэфано, пхэрдярдо мищимаса и зораса, терэлас барэ диворя и шпэры андо народо. ⁹ Лэ Стэфаноса ашыле тэ ханпэ коисавэ андай синагога, сави проакхарди Либертинорэндири‡. Кордэ кадя ж пхирэнас мануша андай Киринея и Александрия, тай андай Киликия и Цэкни Азия. ¹⁰ Нэ лэндэ на сас, со тэ отпхэнэн ла годяти и Духости, савэса вов пхэнэлас. ¹¹ Тунчи онэ подпхэндэ коисавэн тэ пхэнэн:

— Амэ ашундэ, сар вов пхэнэлас бэзэхалэ лава пэ Моисеё и по Дэл.

¹² Онэ вазгле о народо, пхурэдэрэн и сътрямAREN Законостирэн, нахукле пэр лэстэ, хутилдэ тай андярдэ андо Синедрионо. ¹³ Котэ тховдэ хохавнэн допхенимарен, савэ пхэнэнас:

* **6:1** 6.1 Элинисторя — кадай акхарэнас евреёнэн, савэ дэнас дума на по евреёнэндири шыб. † **6:5** 6.5 Прозелито — мануш, савэс обшынде и вов приля иудаенго патявимос. ‡ **6:9** 6.9 Либертиноря — кадай дума пала кола евреёра, савэ сас залинэ андай Иудея андэ Римско пхув, кай тэ авэн бутярнэнца. Тунчи онэ сас отму克ле пэ воля, ай лэндирэ бэяцэ рисайле палпалэ андэ Иерусалимо.

— Кадва мануш на пэрэашэл тэ пхэнэл бэзэхалэ лава пэ кадва свэнто тхан и по Законо. ¹⁴ Амэ ашундэ, сар вов пхэнэлас, со Иисусо андав Назарето розмарэла кадва тхан и пэрэтерэла сыйтряимос, саво пэрэдя амэнди Моисеё.

¹⁵ Всаворэ, ко бэшэлас андо Синедрионо, дикхэнас пэр лэстэ и дикхле, со муй лэско, сар муй ангелоско.

7

СтэфANO дэл дума англав Синедрионо

¹ Тунчи баро рашай пушля Стэфанос:

— Када чячес кадя?

² Вов пхэндя:

— Пхрала и дада, выашунэнтэ! Кала амаро дад Авраамо инке на пэрэтрадя андо Харано и жувэлас андэ Месопотамия, Дэл славако авиля лэстэ ³ и пхэндя: «Ужа пай пхув тири и лэ родостар тирэстар и жа кай пхув, сави Мэ тути сикавава».

⁴ Тунчи вов жыля пай пхув халдеёндири и авиля андо Харано. Ай котар, кала муля лэско дад, о Дэл пэрэндярдя лэс андэ кадья пхув, андэ сави тумэ икхатар жувэн. ⁵ И на дя лэсти пэр латэ нисаво котор пхув, а пхэндя, со отдэла кадья пхув лэсти и лэстирэ бэяцэнди тунчи, кала вов инке сас бибэяцэнго. ⁶ И пхэндя лэсти о Дэл: «Тирэ бэяцэ авэна найчайченца андэ найпэстири пхув, и лэн терэн бутярнэнца, и онэ андярэна грыжа штаршэл бэрша. ⁷ Нэ Мэ, — пхэндя о Дэл, — авава тэ сындосарав кодва народо, кастэ онэ авэна бутярнэнца, и тунчи онэ выжана и авэна тэ тэлён Манди пэ кадва тхан». ⁸ Тунчи Вов дя лэсти завето тэ обшиныэллэ. Авраамо, кала бэяндиля Исаако, обшиндя лэс андо охто дес. Кав Исаако бэяндиля Иаково, ай кав Иаково — дэшудуй патриархоря.

⁹ Патриархоря зависятар битиндэ Иосифос андо Египто. Нэ Дэл сас лэса ¹⁰ и фэрисардя лэс всаворя грыжатар. Вов дя Иосифости годи и мищимос англав фараоно, тхагар египтонэнго. Ай кодва тердя лэс пхурэдэрэса андо Египто и андо всаворо пэско чер. ¹¹ Тунчи авиле бокхалимос и бари грыжа пэ всаворэ пхувъя Египто и Ханаано. Амарэ дада никай на аракхэнас хамос. ¹² Кала Иаково ашундя, кай андо Египто исин марно, вов бишалдя кордэ амарэ дадэн екх моло.

¹³ Ай сар онэ авиле авэр моло, Иосифо отпхэрнадяпэ пэстирэ пхралэнди, и фараоно ужангия пала Иосифоско родо. ¹⁴ Тунчи Иосифо бишалдя и акхардя пэстирэс дадэс Иаковос и всаворо пэско родо, савэс сас эхтадэш панч манушэн.

¹⁵ Иаково авиля андо Египто. Котэ муле вов и дада амарэ. ¹⁶ Лэндирэ тилоря сас пэрэндярдэ андо Шэхемо и тховдэ андо склэпо, саво тиндя Авраамо палай рупунэ кай шавэ Хаморостирэ андо Шэхемо.

¹⁷ И сар майпашэ сас врязма, кала тердяпэ кода, пала со Дэл солахалас лэ Авраамости, амарэн манушэн ашэлас майбут андо Египто, ¹⁸ жыкай кодья врязма, сар андо Египто взагляпэ авэр тхагар, саво на жанэлас Иосифос. ¹⁹ Кадва хрантимаса обжаласпэ амарэ народоса, стасавэлас дадэн амарэн, терэлас кадя, соб онэ тэ вышон пэстирэн бэяцэн, савэ найдэлмут бэяндиле, кай кола тэ мэрэн.

²⁰ Андэ кадья врязма бэяндиля Моисеё, вов сас шукар англав Дэл. Трин шон лэс праварэнас андо чер лэстирэ дадэстэ. ²¹ А сар сас шуто, лэс ля щей фараоностири и барядя лэс, сар пэстирэс шавэс. ²² Моисеё сас сыйтядо всаворя египтостирияти годяти и сас зорало андэ лава и рындоря. ²³ Сар лэсти ашыля саранда бэрш, авиля лэсти по води тэ авэр кай пэстирэ пхрала, шавэ Израилёстирэ. ²⁴ И удикхля, сар екхэсти лэндар египтянино терэлас бида. Вов тэрдиля пала лэстэ, отпотиндя вражымарести и умардя египтянинос. ²⁵ Вов гындолас, лэстирэ пхрала полэнэ, со Дэл лэстирэса вастэса дэл лэнди фэрисаримос, нэ онэ на полинэ. ²⁶ Пэ авэр дес, кала койсавэ андай лэндэ марэнаспэ, вов авиля и закамля тэ андярэл лэн кав миро, пхэндя: «Муршалэ, тумэ ж пхрала! Пэр со терэн бида екхэсти?»

²⁷ Нэ кодва, ко терэлас бида лэ пашутнэсти, отшутя лэс пэстар тай пхэндя: «Ко

тут тховдя пхурэдэрэса и сындомареса паша амэндэ? ²⁸ Чи на камэс ту и ман тэ умарэс, сар арати умардян египтянинос?» ²⁹ Кала Моисеё ашундя кала лава, вов нашля тай ашыляпэ тэ жувэл андэ пхув Мадиамо, котэ андэ лэстэ бэяндиле дуй шавэ.

³⁰ Кала прожыля саранда бэрша, андэ мал, пашав плай Синаё қав Моисеё авиля ангело андэ яг, сави пхаболас андо пусаимаско кустарнико. ³¹ Моисеё дивосайля, кала удикхля када. Вов поджыля тэ подикхэл пэ када и ашундя котар гласо лэ Раеско: ³² «Мэ Дэл тирэ дадэнго, Дэл Авраамоско, Исаакоско и Иаковоско». Моисеё тиноласпэ даратар и на ваздэлас пэстирэ якха. ³³ Рай пхэндя лэсти: «Злэ пэрналэ пай тирэ пэрнэ, колэсти со пхув, пэ сави ту тэрдэс — свэнто. ³⁴ Мэ дикхлем, сар стасавэн Мэрно народо андо Египто, и ашундэм лэско ровимос, и авилем тэ фэрисарав лэс. Ай икхатар жа, Мэ бишалав тут андо Египто».

³⁵ Калэс Моисеёс, савэстар онэ отпхэндэпэ лавэнца: «Ко тховдя тут пхурэдэрэса и сындомареса?» — Дэл бишалэл сар пхурэдэрэс и фэрисаримарес черэз ангелос, саво сикадиля лэсти андав пусаимаско кустарнико. ³⁶ Кадва выандярдя лэн тай тердя диворя и шпэры андэ пхув Египто, и андо Лоло море, и андэ мал саранда бэрш. ³⁷ Када кодва Моисеё, саво пхэндя шавэнди Израилёстирэнди: «Андай тумарэ пхрала о Дэл тховэла тумэнди пророкос, сар тховдя ман». ³⁸ Када кодва, саво стидяпэ андэ мал лэ амарэнца дадэнца и лэ ангелоса, саво дэлас дума лэса по плай Синаё. Када вов приля жундэ лава, кай тэ пэрэдэл амэнди.

³⁹ Амарэ дада на закамле тэ кандэн Моисеёс, нэ отшутэ лэс тай тходэ андо води тэ рисавэн андо Египто. ⁴⁰ Онэ пхэндэ Аароности: «Стер амэнди дэвлэн, савэ жана англай амэндэ, пала кода со амэ на жанас, со тердяпэ лэ Моисеёса, саво выандярдя амэн андай Египтостири пхув». ⁴¹ Ай андэ кола деса онэ стердэ гурувэс тай андэ жэртва идолости и лошавэнас колэсти, со стердэ пэстирэ вастэнца. ⁴² Дэл отрисайля лэндар и ашадя лэн тэ тэлён чергаенди пав болыбэн, сар пистросардо андэ лила пророкондирэ:

«Чер Израилёско! Чи зашынэнас тумэ,
чи анэнас жэртвоя всаворэ саранда бэрш андэ мал?

⁴³ Тумэ линэ пэса катуна Молохостири,
чиргай тумарэс дэвлэс Ремфанос
тай образоря, савэ тумэ стердэ, кай тэ тэлён лэнди.
Пала када Мэ пэрэандярава тумэн майдур Вавилоностар».

⁴⁴ Амарэ дадэндэ андэ мал сас Катуна Допхэнимистири. Кодва, Ко дэлас дума Моисеёса, припхэндя лэсти тэ терэл ла пав образо, саво кодва дикхля. ⁴⁵ Кала амарэ дада прилиинэ кадья Катуна, онэ и Исусо Навиёско заандярдэ ла андэ пхув народонэн, савэн Дэл вытрайдя англай лэндэ. Кадя сас кай и вряма Давидостири, ⁴⁶ саво аракхля мищимос англав Дэл и мангэлас Лэстар, кай тэ аракхэл чер важ о родо Иаковоско. ⁴⁷ Ай о чер Лэсти стердя Соломоно. ⁴⁸ Нэ Майбаро на жувэл андэ чера, савэ тердэ манушэнца. Пророко пхэнэл пала када:

⁴⁹ «Болыбэн — Мэрно троно,
и пхув — када тхан, кай Мэ тховав Пэстирэ пэрнэ!
Саво чер тумэ терэна Манди?

— пхэнэл о Рай.
— Кай тэ авэл тхан Мэ тэ чиував?

⁵⁰ Чи най Мэрно васт
вся када стердя?»

⁵¹ Тумэ — найкандуунэ мануша барунэ воденца и затердэ канэнца! Тумэ всавори вряма вэрицайвэн Свэнтонэ Духости, сар тумарэ дада, кадя и тумэ! ⁵² Кас андай пророкоря на гонисарэнэс тумарэ дада? Онэ умардэ колэн, савэ пэ англал пхэнэнас, со авэла Чячимаско, ай икхатар тумэ прединэ тай умардэ Лэс! ⁵³ Тумэ прилиинэ о Законо, саво пэрэдинэ тумэнди ангелоря, нэ на ашыле тэ жувэн, сар вов пхэнэл.

Стэфанос марэн барэнца

⁵⁴ Кала онэ ашунэнас када, холятар росшынэнас водя и стасавэнас данда.
⁵⁵ Стэфано, пхэрдярдо Свэнтонэ Духоса, вазгли якха по болыбэн тай дикхля слава Дэвлэстири и Иисусос, Саво тэрдёлс пай право риг Дэвлэстар.

⁵⁶ — Дикхэн, — пхэндя вов, — мэ дикхав отпхэрнадо болыбэн и Шавэс Манушыканэс, Саво тэрдёл пай право риг Дэвлэстар.

⁵⁷ Нэ онэ зацыпсардэ зоралэ гласоса, затердэ пэстирэ кана и екхэтанэ хукле пэр лэстэ. ⁵⁸ Онэ выандярдэ лэс палай форо и ашыле тэ шон андэр лэстэ бара. Допхэнимаря тховдэ пэстири йида кай пэрнэ тэрнэ манушэсти, савэс акхарэнас Савло. ⁵⁹ Кала онэ шонас андо Стэфано бара, вов приакхардя Иисусос:

— Рай Иисусо! Прилэ духо мэрно!

⁶⁰ Тунчи пэля пэ чянга и фартэ зацыпсайля:

— Рай, мэк на авэл пэр лэндэ кадва бэзэх.

Вов пхэндя кала лава и муля.

8

Гонисарэн патикунэн

¹ Савло подритярэлс кода, со умардэ Стэфанос.

Кола врятатар ашыле тэ гонисарэн иерусалимско кхандири, и всаворэ роспрастаепэ пай Иудея и Самария. Качи апостолоря ашылепэ андо Иерусалимо.

² Дэвлэкунэ мурша гаравдэ Стэфанос тай фартэ ровэнас пала лэстэ. ³ Ай Савло розмарэлс пэ котора и кхандири. Вов захукэлс андэ чера, выцырдэлс муршэн тай жувлян тай шолас андо баруно.

Филипо пхэнэл Радосаво Лав андэ Самария

⁴ Ай кола, савэ сас росшутэ, роспхэнэнас Радосаво Лав, каринг онэ тэ на жан.

⁵ Филипо авиля андэ екх Самариятиро форо и ашыля тэ роспхэнэл котэ палав Христосо. ⁶ Бут мануша мишто ашунэнас кода, со вов пхэнэлс. Онэ всаворэ сар екх ашунэнас лэс и дикхэнас шпэры, савэ вов терэлс. ⁷ Колэсти со бутэндар манушэндар выжанас найжужэ духоря барэ цыпимаса, ай бут, савэ на пхирэнас пэрнэнца, и бангэ састьярнаспэ. ⁸ И андо кодва форо сас бари лош.

⁹ Андо кодва форо сас мануш, савэс акхарэнас Симоно. Вов майанглал драбатярэлс и калэса дивосарэлс манушэн андэ Самария. Вов выдэлс пэс палав варисаво баро мануш. ¹⁰ Всаворэ мануша, и чёрорэ, и барвалэ, ашунэнас лэс дивоса и пхэнэнас:

— Када исин барии зор Дэвлэстири.

¹¹ И мишто ашунэнас лэс колэсти, со вов бут врьма дивосарэлс манушэн пэстирэ драбатиrimаса. ¹² Нэ кала онэ патяйле лэ Филипости, саво роспхэнэлс палав Тхагаримос Дэвлэско и алав Иисусоско Христоско, бут мурша и жувля болдэпэ. ¹³ Симоно кадя ж патяйля и приля болдимос. Вов всавори врьма пхирэлс палав Филипо, диволаспэ шпэрэнди и барэ чюдонэнди.

¹⁴ Кала апостолоря андо Иерусалимо ашундэ пала кода, со андэ Самария прилинэ лав Дэвлэско, онэ бишалдэ лэндэ Пэтрос и Иоанос. ¹⁵ Онэ авиле и манглепэ Дэвлэс, кай кола, савэ обрисайле кав Дэл, тэ прилэн Свэнтонэс Духос, ¹⁶ колэсти со инке ни пэр кастэ лэндар Духо на сжалас, онэ качи сас болдэ андо алав Раеско Иисусоско. ¹⁷ Тунчи Пэтро и Иоано тховдэ пэр лэндэ и васта, и онэ прилинэ Свэнтонэ Духос. ¹⁸ Кала Симоно дикхля, со Духо дэлпэ, кала апостолоря тховэн и васта, вов процырдя лэнди ловэ ¹⁹ тай пхэндя:

— Дэнтэ и манди кацави зор, кай кодва, пэр кастэ мэ тхава и васта, тэ лэл Свэнтонэ Духос.

²⁰ Нэ Пэтро пхэндя:

— Мэк тиро руп хасавэла екхэтанэ туса, сар ту гындос, со тинэса даро Дэвлэско палай ловэ. ²¹ Тутэ нинай кацаво право тэ терэс кадва рындо, колэсти кай о води тиро найчячюно англав Дэл. ²² Каисав андо кадва бэзэх и манг Раес, кай Вов тэ

эртисарэл тути, со ту гындосас андо тиро води. ²³ Мэ дикхав, со ту пхэрдярдо кэрконя зависяса и спхангло лэпунзэнца, саво исин найчячимос.

²⁴ Симоно пхэндя:

— Мангэн пала мандэ Раес, кай манца тэ на терэлпэ нисо, со тумэ пхэндэ.

²⁵ Кала апостолоря пэрэашыле тэ допхэнэн и тэ роспхэнэн котэ лав Раеско, онэ жыле палпалэ андо Иерусалимо, ай пав дром роспхэнэнас Радосаво Лав андэ бут самаряниностирэ гава.

Евнухо андай Эфиопия прилэл Радосаво Лав

²⁶ Ангело Раеско пхэндя Филипости:

— Жа по юго, по дром, саво андрэл пай мал андав Иерусалимо андэ Газа.

²⁷ Филипо вшиля и жыля. Андэ кодья ж врьма котэ сас эфиопско евнухо, рай Кандакияко, ла тхагарняко эфиопонэнго, саво дикхэлас палай всавори сартари. Вов авэлас тэ тэлёт Дэвлэсти андо Иерусалимо ²⁸ и иххатар рисавэлас черэ. Вов бэшэлас андэ пэско урдон и бинэлас лил лэ пророкоско Исаяско. ²⁹ Духо пхэндя Филипости:

— Поджа кай кадва урдон и жа паша лэстэ.

³⁰ Филипо поджыля кай урдон и ашундя, со котэ бинэлпэ лил пророкоско Исаяско:

— Ту полэс кода, пала со бинэс? — пушля Филипо.

³¹ — Сар манди тэ полав, кала манди нико на подпхэнэла? — пхэндя евнухо и акхардя Филипос тэ зажал и тэ бэшэл лэса андо урдон.

³² Ай бинэлас вов кадва тхан Пистросаримаско:

«Сар бакро, Вов сас андрэдэ по зашынимос,
и сар бакроро ашэл мулком англай кола, савэ стрижын лэс,
кадя ж и Вов на отпхэрнавэлас Пэстирэ ушта.

³³ Вов сас лажавардо, и Лэсти на динэ чячюно сындо.

Ко роспхэнэла пала Лэско родо?

Ай лэско жувимос залэлпэ пхувьятар».

³⁴ Евнухо мангля Филипостар:

— Пхэн манди, пала кастэ катэ пхэнэл пророко, пала пэстэ чи пала кастэ аврэстэ?

³⁵ Тунчи Филипо ля тэ роспхэнэл акалэ тханэстар Пистросаримастар и пхэндя лэсти Радосаво Лав палав Исусо. ³⁶⁻³⁷ Онэ майдур традэнэс и подтрайдиле кав паи.

— Дикх, акэ паи, — пхэндя о евнухо. — Со манди на дэл тэ прилав болдимос?*

³⁸ Вов тэрдярдя о урдон, лэдуй онэ, Филипо и евнухо, зажыле андо паи, и Филипо болдя лэс. ³⁹ Ай кала онэ выжыле андав паи, Духо Раеско андрядя Филипос, и евнухо майбут лэс на дикхля. И лошаса лагля майдур пэстирэ дромэса. ⁴⁰ Ай Филипо попэля андо форо Ашдодо. Вов роспхэнэлас Радосаво Лав пай всаворэ фороря, сар на авиля андэ Кесария.

9

Савло обрисарэлпэ кав Дэл

¹ Савло сас холяко пэ Раестирэ сыйярнэн и фартэ камэлас тэ умарэл лэн. Вов авиля кав баро рашай ² и мангля лэстар лила, пистросардэ кай синагоги Дамаскостирэ, соб, сар вов аракхэла варикас, ко приритярдёл Исусостириэс сыйяримости, саво акхарэлпэ Дром, тунчи лэстэ сас зор тэ спхандэл лэн и тэ андрэл андо Иерусалимо.

³ Кала вов подладэлас кав Дамаско, лэсти, катар на ляпэ запхабиля андай всаворэ рига удуд пай болыбэн. ⁴ Вов пэля пэ пхув и ашундя гласо:

— Савло! Савло! Сости ту гонисарэс Ман?

* ^{8:36-37} 8.36-37 Андэ коисавэ гречески манускрипторя инке исин кацавэ лава: «Филипо пхэндя: "Сар патяс всаворэ водеса, то болдэпэ". Евнухо пхэндя: "Мэ патяв, со Исусо Христосо — када Шаво Дэвлэско"».

5 — Ко Ту, Рай? — пушля Савло.

— Мэ Иисусо, Савэс ту гонисарэс. **6** Вщи и жа андо форо. Котэ тути пхэнэна, со трэбуй тэ терэрс.

7 Мануша, савэ традэнас екхэтанэ лэ Савлоса, ашыле сар муторя: онэ ашундэ гласо, нэ никас на дикхле. **8** Савло взгляпэ пай пхув, нэ кала вов отпхэрнадя яхха, нисо на дикхэлас. Лэс линэ палай васт тай андярдэ андо Дамаско. **9** Трин дес вов сас коро и нисо на халас и на пэлас.

10 Андо Дамаско жувэлэс сыйярно, савэс акхарэнас Анания. Рай пхэндя лэсти андо дикхимос:

— Анания!

— Акэ мэ, Рай, — пхэндя кодва. **11** Рай пхэндя лэсти:

— Жа пэ гаса, сави акхарэлпэ «Ворта», андо чер Иудаско и пуш котэ Савлос, саво акхарэлпэ Тарсянино. Вов икхатар мангэлпэ Дэвлэс. **12** Вов дикхля андо дикхимос манушэс пав алав Анания, саво авиля и тховдя пэр лэстэ и васт, кай вов тэ дикхэл.

13 Анания пхэндя:

— Рай, мэ ашундэм бутэндар пала кадва мануш, сар вов тердя бут бида Тирэнди свэнтонэнди андо Иерусалимо. **14** И катэ лэстэ исин баримос барэ рашаендар, кай тэ спхандэл всаворэн, ко приакхарэл Тиро алав.

15 Нэ Рай пхэндя лэсти:

— Жа, колэстар со вов исин Мэрно мануш. Мэ вытидэм лэс, кай вов тэ андярэл Мэрно алав народонэнди, лэндирэ тхагарэнди и шавэнди Израилёстирэ. **16** Мэ сикавава лэсти кода, скачи лэсти трэбуй авэла тэ пэрэжувэл грыжа пала Мэрно алав.

17 Анания жыля и авиля андо чер, тховдя по Савло и васт тай пхэндя:

— Пхрал Савло, Рай Иисусо, Саво авиля тутэ по тиро дром кардэ, бишалдя ман тутэ, кай ту упалэ тэ дикхэс и тэ авэс пхэрдярдо Свэнтонэ Духоса. **18** Андэ кодъя ж врьяма сар чешуя спэлэя пай яхха кав Савло, и вов ашыля тэ дикхэл. Савло вшиля и приля болдимос.

19 Тунчи вов халя, и лэстэ рисайля зор.

Савло пхэнэл лав Дэвлэско андо Дамаско

И сас вов скачи деса лэ сыйярнэнца андо Дамаско **20** и андэ кодъя ж врьяма ашыля тэ роспхэнэл андэ синагоги пала кода, со Иисусо — Шаво Дэвлэско. **21** Всаворэ, ко лэс ашунэлас, дивонаспэ и пхэнэнас:

— Чи на вов гонисарэлэс андо Иерусалимо колэн, ко акхарэл кадва алав? Чи на авиля вов кардэ, кай тэ спхандэл и тэ андярэл лэн кай барэ рашая?

22 Нэ Савло инке майбаря зораса роспхэнэлас и терэлас кадя, со иудеёря андо Дамаско на жанэнас, со тэ пхэнэн, кала вов допхэнэлас, со Иисусо исин Христосо.

23 Кала прожыле бут деса, иудеёря допхэндэпэ тэ умарэн лэ Савлос. **24** Нэ Савло ужангия, со онэ гындон тэ умарэн лэс. Кола, савэ камэнас тэ терэн када, рят и дес ажутярэнас пашай удара форостириэ. **25** Нэ лэстире сыйярнэ рятяса змукле лэс андэ бари траста дуряса пай форостири стинка.

Савло андо Иерусалимо

26 Савло авиля андо Иерусалимо и камэлас тэ авэл лэ сыйярнэндэ, нэ всаворэ даранас лэстар и на патянас, со вов кадя ж сыйярно. **27** Нэ Варнава ля лэс и андя кай апостолоря и роспхэндя лэнди пала кода, сар Савло пав дром дикхля лэ Раес, и сар Вов дэллас дума лэса, сар андо Дамаско бидарако вов роспхэнэлас важ алав Иисусоско. **28** Савло терэлас лэнца екхрындо андо Иерусалимо и бидарако роспхэнэлас важ алав Раеско. **29** Вов дэллас дума и спорисавэлас лэ элинистонэнца, ай кола камле тэ умарэн лэс. **30** Кала пхрала ужангле пала када, онэ одандярдэ Савлос андэ Кесария, ай котар бишалдэ андо Тарсо.

31 Андэ кодъя врьяма кхандири пай всавори Иудея, Галилея и Самария сас андо мири, састьярэлэс тай барёлас, пхирэлэс андо дар англав Рай, и Свэнто Духо подритярэлэс ла.

Пэтро састьярэл Энэёс

³² Пэтро обжалас всаворэн, и закамля тэ авэл кай свэнти мануша, савэ жувэнас андэ Лида. ³³ Котэ сас екх мануш, савэс акхарэнас Энэё, вов сас насвало пэрнэнца и на вщелас пав пато охто бэрша. ³⁴ Пэтро пхэндя лэсти:

— Энэё! Исусо Христосо састьярэл тут. Вщи и стидэ пэско пато.

Андэ кодья ж врэма Энэё вщиля. ³⁵ Кала всаворэ, ко жувэлас андэ Лида и Шароно дикхле лэс састьярдэса, онэ обрисайле кав Рай.

Пэтро жундярэл андай мулэ лэ Тавита

³⁶ Андэ Яфа сас екх сыйярни, савя акхарэнас Тавита, со пэрэндярэлпэ, сар «серна». Вой терэлас бут лашымос и поможысарэлас чёрорэнди. ³⁷ И акэ, андэ кадья врэма вой занасвайля и муля. Ла обхаладэ и тховдэ упрэ андо чер. ³⁸ Ай сар и Лида сас найдур лэ Яфатар, сыйярнэ бишалдэ котэ дуен манушэн, бо ашундэ, со Пэтро котэ. Онэ мангле лэс:

— Ав сыго амэндэ!

³⁹ Пэтро жыля лэнца и кала авиля, лэс проандярдэ упрэ андо чер. Паша лэстэ стидэпэ всаворэ пхивля. Онэ ровэнас и сикавэнас лэсти и йида, сави сувэлас Серна, кала сас жунди. ⁴⁰ Пэтро выбишалдя всаворэн котар, тэрдиля пэ чянга и манглягэ Дэвлэс. Тунчи обрисайля кав трупо и пхэндя:

— Тавита, вщи!

Вой отпхэрнадя и якха, удикхля Пэтрос и бэшля. ⁴¹ Вов ля ла палав васт и поможысардя тэ вщел. Тунчи вов акхардя свэнтонэн манушэн и пхивлян и отдяла Тавита жундяся. ⁴² Пала када ашыля ашундо пай всавори Яфа, и бут мануша патайле андо Рай.

⁴³ Пэтро сас андэ Яфа инке бут деса и жувэлас кай Симоно морцэндило.

10

Корнилий дикхэл дикхимос

¹ Андэ Кесария сас мануш, савэс бушонас Корнилий, вов сас шэлэнго андав полко, саво акхарэлпэ Италийско. ² Корнилий, сар и всаворо лэско йири, сас пативало мануш и даралас Дэвлэстар, бут поможысарэлас чёрорэнди и всавори врэма мангэласпэ Дэвлэс. ³ Екхвар, варикай андэ трин чясоря десэско, вов дикхля дикхимос. Вов чячес дикхля Дэвлэстирэс ангелос, саво авиля лэстэ и пхэндя:

— Корнилий!

⁴ Вов подикхля пэр лэстэ дараса и пхэндя:

— Со, рай?

Ангело пхэндя:

— О Дэл сэрэсардя пала тутэ, колэсти со тиро мангимос и тирэрындоря важ чёрорэн вазглепэ Лэстэ. ⁵ Бишал манушэн андэ Яфа, кай онэ тэ акхарэн Симонос, савэс бушон Пэтро, ⁶ вов ашылятэ кав морцэндило Симоно андо чер пашай море.

⁷ Кала ангело, саво дэлас дума лэса, ужыля, Корнилий акхардя дуен пэстирэн бутярнэн и пативалэс халавдэс, саво терэлас лэстиро припхэнимос. ⁸ Вов пэрэпхэндя лэнди вся, со тердялэ, тай бишалдя андэ Яфа.

Пэтро дикхэл дикхимос

⁹ Пэ авэр дес, варикай андэ епаши дес, кала и бишалдэ инке сас андо дром и поджанас кай форо, о Пэтро зажыля пэ упраи по чер тэ мангэлпэ Дэвлэс. ¹⁰ И акэ вов бокхайля и фартэ закамля тэ хал. Кала гытонас тэ хас, лэ Пэтrostи сас дикхимос. ¹¹ Вов дикхля отпхэрнадо болыбэн и варисо мэзимэ по бугло паринд, саво змукэласпэ пэ пхув и подритярдёласпэ штарэ ригэндар. ¹² Андэ кадва паринд сас бут всаворо штарэпэрнэнго ското, сапа тай чириклия. ¹³ Тунчи гласо пхэндя лэсти:

— Пэтро, вщи, зашын и ха.

14 — Ни пала со, Рай! — пхэндя Пэтро. — Мэ никала на хавас нисо магрисардо и найжуужо.

15 Тунчи гласо пхэндя лэсти авэр моло:

— На акхар магрисардэса кода, со Дэл жужардя.

16 Кадя сас трин молоря, ай тунчи паринд сас вазгло пэ болыбэн.

17 Пэтро на полэлас, со кадва за дикхимос вов дикхля, и андэ кодья ж врьама мурша, савэн бишалдя Корнилиё, росpushле, кай о чер Симоноско, поджыле кав чер и линэ тэ ажутярэн пашай удара. **18** Онэ ашыле тэ пушэн, чи катэ ашыляпэ о Симоно, савэс бушон Пэтро. **19** Пэтро инкэ гындолос палав кадва дикхимос, Духо пхэндя лэсти:

— Тут родэн трин мануша. **20** Вщи и змуклэ тэлэ. Жа лэнца и ни пала со на пуш, колэсти со када Мэ бишалдэм лэн.

21 Тунчи Пэтро зму克莱 тэлэ и пхэндя колэнди манушэнди:

— Мэ кодва мануш, савэс тумэ родэн. Пав саво рындо тумэ авиле?

22 Онэ пхэндэ:

— Пхурэдэр шэлэн халавдэн Корнилиё, мануш чячимаско, саво дарал Дэвлэстар, касти отдэн патив всаворэ мануша иудеёндирэ, приля свэнтонэстар ангелостар припхэнимо тэ акхарэл тут андо пэско чер, кай тэ ашунэл вся, со ту лэсти пхэнэса.

23 Тунчи Пэтро акхардя лэн андо чер и приля лэн будестар. Ай пэ авэр дес Пэтро жыля лэнца, и лэса жыле коисавэ пхрала андай Яфа.

Пэтро андо чер кав Корнилиё

24 Пэ авэр дес онэ авиле андэ Кесария. Корнилиё ажутярэлас лэн. Вов акхардя пээтирэ родос и пашутнэн амалэн. **25** Кала Пэтро авиля, Корнилиё поджыля лэстэ, пэля кай лэстирэ пэрнэ и тэлия. **26** Нэ Пэтро вазглы лэс и пхэндя:

— Вщи, мэ кадя ж исин мануш.

27 Пэтро дэлас дума лэ Корнилиёса и зажыля андо чер, кай стидэпэ бут мануша.

28 Вов пхэндя лэнди:

— Тумэ жанэн, со иудеёсти нащи тэ дэл дума манушэса андав авэр нароодо и тэ зажал лэстэ андо чер. Нэ о Дэл сикадя манди, кай мэ ни екхэ манушэс тэ на акхарав магрисардэса ай найжуужэса. **29** Колэсти, кала пала мандэ авиле и акхардэ, мэ жылем лэнца и на пушавас ни пала со. Аканы мэ пушав тумэндар, сости тумэ бишалдэ пала мандэ?

30 Корнилиё пхэндя:

— Штар дес палпалэ андэ кадья ж врьама, андо трито чясо мэ мангаваспэ Дэвлэс пэстэ черэ, сар сыго англай мандэ тэрдиля мануш андэ йида, сави свэнтояспэ.

31 «Корнилиё, — пхэндя вов, — тиро мангимос ашундо, ай рындоря важ чёрорэн сэрэсардя о Дэл. **32** Бишал манушэн андэ Яфа палав Симоно, савэс акхарэн Пэтро, вов ашыляпэ черэ кав Симоно морцэндиро пашай море». **33** Мэ сыго бишалдэм пала тутэ, и мишто кай ту авилян. Ихатар амэ всаворэ катэ англав Дэл и камас тэ выашунас кода, со Рай пхэндя тути.

34 Пэтро ашыля тэ пхэнэл:

— Аканы мэ полав, со о Дэл чячимаса на дикхэл по муй, **35** и машкар всаворэн манушэн, савэ жувэн андэ люма, Лэсти чялёр кодва, ко дарал Лэстар и терэл пав чячимос! **36** Вов бишалдя шавэнди Израилёстирэ Радосаво Лав пала кода, со амэндэ авэл миро лэ Дэвлэса черэз Исусо Христосо, Саво исин Рай всаворэ манушэнго. **37** Тумэ жанэн пала кода, со терэласпэ пай всавори Иудея, ла Галилеятар, пала кода Иоано акхарэлас манушэн тэ болэнпэ. **38** О Дэл помакхя Свэнтонэ Духоса и зораса Исусос андав Назарето. Вов пхирэлас, терэлас лашэ рындоря и састьярэлас всаворэн, ко сас андэ васт кав Бэнг, колэсти со Лэса сас о Дэл.

39 Амэ допхэнимаря всаворэсти, со Исусо терэлас андэ пхув иудеёндир и андо Иерусалимо. Лэс умардэ, примардэ кав трушул. **40** Нэ о Дэл по трито дес жундярдя Исусос андай мулэ и дя Лэсти тэ сикадёллэ лэ манушэнди — **41** най всаворэнди манушэнди, нэ амэнди, допхэнимаренди, савэн о Дэл вытидя майангал. Ай амэ

хасас и пасас Лэса тунчи, кала Вов жундиля андай мулэ. ⁴² Вов припхэндя амэнди тэ роспхэнас манушэнди и тэ допхэнас пала кода, со Иисусо исин вытидо Дэвлэса Сындомари жундэнго и мулэнго. ⁴³ Пала Лэстэ допхэнэн всаворэ пророкоря, со кожнонэсти, ко патяла андэр Лэстэ, эртисарэнапэ бэзэха чөрэз алав Иисусоско Христоско.

⁴⁴ Пэтро инке дэлас дума, кала пэ всаворэн, ко ашунэнас лэс, сжыля Свэнто Духо. ⁴⁵ Патикунэ андай обшиныдэ, савэ авиле лэ Пэтроса, дивосайле, со даро Свэнтонэ Духоско сас дино кадя ж манушэнди аврэ народонэндар. ⁴⁶ Колэсти со онэ ашунэнас, сар кола дэнаас дума пэ найжанглэ шыба и лашарэнас лэ Дэвлэс. Тунчи Пэтро пхэндя:

⁴⁷ — Ко запхэнэла тэ болдэнпэ андо пай колэнди, савэ прилинэ Свэнтонэ Духос, сар и амэ?

⁴⁸ Пэтро пхэндя, кай онэ тэ прилэн болдимос важ алав Иисусоско Христоско. Тунчи хулая мангле лэ Пэтрос кай тэ ашэлпэ лэнца пэ качи деса.

11

Пэтро роспхэнэл лэ пхралэнди пала пэско дикхимос

¹ Апостолоря и пхрала андэ Иудея ашундэ, со авэр народоря прилинэ лав Дэвлэско. ² Колэсти, кала о Пэтро авиля андо Иерусалимо, патикунэ андай обшиныдэ иудеёря ашыле тэ пхэнэн лэсти, со лэнди када на чялёл.

³ — Ту пхирдян кай найобшиныдэ и хасас лэнца, — пхэнэнас онэ.

⁴ Тунчи Пэтро ашыля екх пала аврэстэ тэ роспхэнэн лэнди, сар вся тердяпэ.

⁵ — Мэ сымас андо форо Яфа и мангавас Дэвлэс, — пхэндя вов, — и андэ кодья врязма манди сас дикхимос: варисо, сар баро паринд, саво подритярдёласпэ штарэ ригэндар, змукаласпэ пав болыбэн ворта кордэ, кай мэ сас. ⁶ Мэ задикхлем кордэ и дикхлем штарэпэрнэнго черутнэско и вэшэско ското, сапэн и чириклен. ⁷ Тунчи мэ ашундэм гласо, саво пхэнэлас манди: «Пэтро, вщи, зашын и ха». ⁸ Ай мэ пхэндэм: «Нисар нащи, Рай! Мэ никала на хавас нисо магрисардо и найжуужо».

⁹ Гласо пав болыбэн пхэндя манди дуйто моло: «На акхар магрисардэса кода, со Дэл жужардя». ¹⁰ Кадя сас трин молоря, и тунчи када вся сас вазгло упалэ пэ болыбэн. ¹¹ Андэ кодья ж врязма пашав чер, кай мэ сымас, тэрдиле трин мануша, бишалдэ манди андай Кесария. ¹² Духо пхэндя манди тэ жав лэнца и ни пала со тэ на пушав. Акэ, кала шов пхрала жыле манца, и амэ авиле андо чер колэстэ, ко ман акхардя. ¹³ Вов роспхэндя амэнди пала кода, сар вов дикхля пашай пэстэ ангелос, саво тэрдёлас и пхэнэлас лэсти: «Бишал манушэн андэ Яфа палав Симоно, савэс бушон Пэтро, ¹⁴ и вов пхэнэла тути лава, сар ту и всаворо тиро йири авэна фэрисардэ». ¹⁵ Кала мэ ашылем тэ дав дума, пэр лэндэ сжыля Свэнто Духо кадя ж, сар Вов сжыля майлангал пэ амэндэ. ¹⁶ Тунчи манди авиле по гындо лава Раестирэ: «Иоано болэлас андо пай, ай тумэ авэна болдэ Свэнтонэ Духоса».

¹⁷ Колэсти, сар о Дэл дя лэнди кодва ж даро, со и амэнди, савэ патяйле андо Рай Иисусо Христосо, ай ко мэ кацаво, кай тэ на домукав лэ Дэвлэс?

¹⁸ Кала онэ када выашундэ, онэ вся полинэ и лашардэ лэ Дэвлэс тай пхэндэ:

— Душол, о Дэл дя тэ каисавэн и аврэ народонэнди, кай и онэ тэ прилэн жувимос!

Кхандири андэ Антиохия

¹⁹ Ай кола, савэн рострадэ, кала гонинас палав Стэфено, дожыле кай Финикия, Кипро и Антиохия и роспхэнэнас лав Дэвлэско качи иудеёнди. ²⁰ Коисавэ лэндар сас андай Кипро и Киринея. Онэ авиле андэ Антиохия и роспхэнэнас Радосаво Лав палав Рай Иисусо кадя ж и лэ элинистонэнди. ²¹ Васт лэ Раеско сас лэнца, и фартэ бут патяйле и обрисайле кав Рай.

²² Лав пала када дожыля кай кхандири андо Иерусалимо. Котар бишалдэ андэ Антиохия Варнавас. ²³ Кала Варнава авиля и дикхля мищимос Дэвлэско, вов

радосайля и мангэлас всаворэн тэ ашэнпэ андэ пэстирэ водя чячюнэ англав Рай. ²⁴ Варнава сас лашо мануш, пхэрдярдо Свэнтонэ Духоса и патявимаса. И бут мануша ашыле тэ патян андо Рай. ²⁵ Тунчи Варнава жыля андо Тарсо, кай тэ аракхэл котэ лэ Савлос. ²⁶ Вов аракхля лэс тай андя андэ Антиохия. Всаворо бэрш онэ ашэнаспэ андэ антиохийско кхандири и сыйярэнас бутэ манушэн. Андэ Антиохия майанглал лэ сыйярэн линэ тэ акхарэн христианоря.

²⁷ Андэ кадья врьама андав Иерусалимо андэ Антиохия авиле коисавэ пророкоря. ²⁸ Ехх лэндар, савэс акхарэнас Агаво, вшилия и пхэндя лэ Духостар, со пай всавори пхув авэла баро бокхалимос, со и тердиля андэ врьама, кала сас императоро Клавдиё. ²⁹ Колэсти сыйярэн закамле тэ подритярэн ловэнца лэ пхралэн, савэ жувэнас андэ Иудея, кастэ скачи выжалас. ³⁰ Онэ кадя и стердэ, тай бишалдэ лэ Варнавас и Савлос тэ андярэн ловэ, савэ онэ стидэ, и тэ отдэн пхурэдэрэнди.

12

Петро андо баруно

¹ Андэ кадья ж врьама тхагар Иродо схутилдя коисавэн манушэн андай кхандири, кай тэ терэл лэнди бида. ² Вов припхэндя тэ умарэн мечёса Иаковос, пхралэс Иоаностиирэс. ³ И кала вов дикхля, со иудеёнди када чялия, вов запхандадя лэ Пётрос андо баруно. Када сас андэ свэнкостиирэ деса Бизакваскатирэ марнэн. ⁴ Пётрос запхандадэ андо баруно и тховдэ штар пэ штар халавдэн, тэ дикхэн пала лэстэ. Иродо камля тэ выандярэл лэс кай и мануша, кала прожала и Патради. ⁵ Пётро сас андо баруно, ай кхандири пхабардэс мангэласпэ пала лэстэ Дэвлэс.

⁶ Ряяса, англай кода, кала Иродо камля тэ выандярэл лэс по сындо, Пётро совэлас машкар дуй халавдэ, спхангло дуе лэпунзэнца, ай инке халавдэ тэрдёнас и дикхэнас пашай удара барунэстиирэ. ⁷ И акэ, авиля ангело Раеско, и баро удуд свэнтояспэ по тхан, кай сас о Пётро. Ангело арэсля пай риг Пётrostири и вазгял лэс сунэстар.

— Вши майсыго! — пхэндя вов, и лэпунзэ пэле пай васта Пётrostиирэ.

⁸ Ангело пхэндя:

— Об phандюв күщикаса и уряв пэрналэ.

Пётро тердя кадя.

— Уряв пэстири йида и жа пала мандэ, — пхэндя ангело.

⁹ Пётро выжыля палав ангело андав баруно тай на поля, со вся, со терэл ангело, терэлпэ чячес. Лэсти сикадиляпэ, со вов дикхэл дикхимос. ¹⁰ Онэ прожыле екхэн халавдэн, тунчи машкар аврэн и поджыле кай саструнэ удара, савэ андярэн андо форо. Удара ежэнэ отпхэрнадэлэ англай лэндэ, и онэ выжыле. Онэ прожыле екх гаса, и акэ ангело ужыля. ¹¹ Кала о Пётро авиля андэр пэстэ, вов пхэндя:

— Аканы мэ чячимаса жанав, со Рай бишалдя Пэстирэс ангелос и заля ман андай васта Иродостиирэ и фэрисардя бидатар, сави камэнас тэ терэн манди иудеёско народо.

¹² Кала Пётро поля, со тердяпэ, вов жыля андо чер, кай жувэлас Мария и дэй Иоаностири, савэс инке акхарэнас Марко. Котэ стидэпэ тэ мангэнпэ Дэвлэс бут мануша. ¹³ Пётро помардя андэ удара, и бутярни, савя акхарэнас Роза, жыля кай тэ отпхэрнавэл. ¹⁴ Вой ужангия лэ Пётрос пав гласо, и лошатар забистардя тэ отпхэрнавэл удара. Вой прастая палпалэ, кай тэ пхэнэл, со Пётро тэрдэл пашай удара.

¹⁵ — Ту на андэ пэстири годи, — пхэндэ лати.

Нэвой инке и инке пхэнэлас лэнди.

— Када лэско ангело, — пхэндэ онэ.

16 Пётро майдур марэлас андэ удара, и кала онэ отпхэрнадэ удара и удикхле лэс, фартэ дивосайле. **17** Пётро вастэса сикадя кай тэ ашэн мулком и роспхэндя, сар о Рай выандярдя лэс андав баруно.

— Роспхэнэнтэ пала када Иаковости и аврэнди пхралэнди, — пхэндя вов и жыля котар андо авэр тхан.

18 Дэнзор халавдэ ашыле тэ прастэн кордэ-кардэ, бо нико на жанэлас, со тердяпэ лэ Пётроса. **19** Иродо родэлас лэ Пётрос, нэ сар на аракхле лэс, вов допушля халавдэн и припхэндя тэ умарэн лэн. Тунчи Иродо лагля Иудеятар андэ Кесария и сас котэ сави-то врёма.

Иродоско миринос

20 Иродо сас холяко пэ мануша андав Тиро и Сидено. Кола допхэндэпэ машкар пэстэ и авиле кав Иродо. Онэ умангле Бластос, саво сас пхурэдэр андэ тхагарастири града, кай вов подритярэл лэн, тай мангле кав тхагар о миро, колэсти со лэндири пхув лэлас о хамос андай тхагарастири пхув. **21** Андэ вытидо дес Иродо урявдя тхагарастири йида, бэшля пэ троно и пхэнэлас лэнди лав.

22 Мануша ашыле тэ цыписавэн:

— Када гласо дэвлэско, ай на манушэско!

23 Нэ андэ кодья ж врёма ангело Раеско умардя Иродос, колэсти со вов на дя слава лэ Дэвлэсти. Лэс схале чermэ, и вов муля.

24 Ай лав Дэвлэско розжаласпэ майдур и майдур. **25** Варнава и Савло тердэ пэскорындо андо Иерусалимо и рисайле. Онэ линэ пэса Иоанос, савэс инке акхарэнас Марко.

13

Варнава и Савло лэн тэ терэн бути

1 Андэ кхандири андэ Антиохия сас пророкоря и сытряимаря: Варнава, Симеоно, саво акхарэнас Нигеро, Луцыё андай Киринея, Манаило, саво выбариля екхэтанэ лэ тетрархоса Иродоса, и Савло. **2** Екхвар, кала онэ тэлёнас лэ Раести и сас андо посто, Свэнто Духо пхэндя:

— Отдэнтэ Манди Варнавас и Савлос по рындо, пэ саво Мэ лэн вытидэм.

3 Ай кала прожыле о посто и мангимос, онэ тховдэ пэ лэндэ и васт тай отму克莱 лэн.

Варнава и Савло по Кипро

4 Кала дуй пхрала, бишалдэ Свэнтонэ Духоса, жыле андэ Селевкия, ай котар плывисардэ по Кипро. **5** Онэ авиле андо Саламино и котэ пхэнэнас лав Дэвлэско андэ иудеёндирэ синагоги. Иоано кадя ж сас лэнца и поможысарэлас лэнди. **6** Онэ прожыле всаворо острово и авиле андо Пафосо. Котэ онэ дикхле екхэс иудеёс, савэс акхарэнас Вар-Иисусо, саво сас чяклуно и хохавно пророко. **7** Вов сас паша римско проконсуло Сергиё Павло, манушэс баря годяса. Проконсуло акхардя Варнавас и Савлос тай камля тэ ашунэл лав Дэвлэско. **8** Нэ кадва Элимо (лэско алав пэрэндярэлпэ «чяклуно») терэлас вся, кай тэ отритярэл проконсулос лэ патявимастар. **9** Тунчи Савло, вов жэ Павло, пхэрдиля Свэнтонэ Духоса, подицхля ворта по Элимо **10** тай пхэндя:

— Шаво Бэнгэско, вражымари всаворэ чячимасти, пхэрдярдо хохавимаса и найжужымаса. Кала ж ту пэрэашэса тэ римосарэс вортателэ дрома Раестири? **11** О васт Раеско обрисардо пэр тутэ, ту коравэса и сави-то врёма на авэса тэ дикхэс кхамэско удууд.

И андэ кодья ж врёма авиле пэ якха Элимостэ калимос и рят, и вов ашыля тэ пхирэл кордэ-кардэ тай тэ родэл варикас, ко андярэла лэс палав васт. **12** Кала о проконсуло дикхля, со тердяпэ, вов дивосайля Раестири сытряимасти и патяйля.

Бути важ о Рай андэ писидийско Антиохия

13 Павло и всаворэ, ко сас лэса, плывисардэ андав Пафосо и авиле андэ Пергия, сави сас андэ Памфилия. Котэ о Иоано ашадя лэн и рисайля андо Иерусалимо.

14 Андай Пергия онэ жыле майдур, андэ писидийско Антиохия. Андэ субота онэ авиле андэ синагога и бэшле. **15** Тунчи, кала пробиндэ андав Законо и Пророконэн, пхурэдэра синагогако бишалдэ, кай тэ пхэнэн лэнди:

— Пхралалэ, сар исин тумэндэ лав, кай тэ подритярэн манушэн, пхэнэн.

16 Павло вшиля, вазглия о васт и пхэндя:

— Мурша Израилёстирэ и всаворэ, ко дарал Дэвлэстар, ашунэнтэ ман! **17** О Дэл амаро народоско, Израилёско вытидя амарэн дадэн. Вов вазглия лэн, кала онэ сас андо Египтостири пхув, и выандядя лэн котар зоралэ вастэса. **18** Саранда бэрша о Дэл додикхэлас пала лэндэ андэ мал. **19** Вов вымардя андо Ханаано эхта народонэн и отдя лэндирэ пхувья амарэ дадэнди.

20 Кадя прожыля варикай штар шэла пандэша бэрша. Тунчи вов дэлас лэнди сындомарен жыкай пророко Самуило. **21** Ай тунчи народо мангли пэсти тхагарас, и Дэл дя лэнди Саулос, шавэс Кишостирэс, андав родо Вениаминоско. Сауло сас тхагараса саранда бэрша. **22** Тунчи о Дэл зля лэ Саулос пав тхагаримос и тховдя Давидос. И пхэнэлас пала лэстэ: «Мэ аракхлем Давидос, шавэс Иесеёстирэс. Вов Манди кав води, и вов терэла вся, со Мэ камав». **23** Сар о Дэл и солахадя, Вов дя лэ Израилёсти андав родо Давидоско Фэрисаримарес Исусос. **24** Жыкай врязма, кала авиля Исусо, Иоано акхарэлас всаворо народо Израилёско тэ каисавэн тай тэ болэнпэ. **25** Кала Иоано пэрэашэлас тэ терэл пэстири бути, вов пхэндя: «Пала кастэ тумэ ман прилэн? Мэ на Вов. Нэ палал мандэ жал Кодва, Савэстэ мэ на ашав тэ роспхандав Лэсти пэрналэ».

26 Пхралалэ, бэяцэ Авраамостириэ родостар и кола, савэ даран Дэвлэстар! Кадва лав фэрисаримаско сас бишалдо амэнди! **27** Кола, ко жувэлас андо Иерусалимо, и лэндирэ пхурэдэра на ужанgle Лэс. Онэ сындосардэ Лэс и калэса тердэ кода, со пхэнэнас лава пророкондирэ, савэ бинэнпэ кажно суботнё дес. **28** Онэ на аракхле андэ Лэстэ нисави ужылимос, пала со Лэс тэ умарэн, нэ всаекх вымангле Пилатостар, кай Лэс тэ умарэн. **29** Кала онэ тердэ кода, со пала Лэстэ сас пистросардо, онэ злинэ Лэс пав трушул и тховдэ андо склэпо. **30** Нэ о Дэл жундядя Лэс андай мулэ. **31** И бут деса кола, савэ авиле Лэса Галилеятар андо Иерусалимо, дикхле Лэс. Ай икхатар онэ допхэнэн када англай мануша.

32 Кадя ж и амэ икхатар роспхэнас тумэнди Радосаво Лав: кода, пала со о Дэл дя лав амарэнди дадэнди, **33** Вов тердя важ амэнди, лэндирэ бэяцэ, кала жундядя Исусос андай мулэ. Сар андо дуйто псалмо пистросардо:

«Ту Шаво Мэрно, адес Мэ бэяндэм Тут».

34 Ай пала кода, со о Дэл жундядя Лэс андай мулэ, кадя со Лэско тило никала на дикхэла прахо, Вов пхэндя кадя:

«Мэ дава тумэнди свэнто бахталимос Давидоско,
саво на парувэлапэ».

35 И андэ авэр тхан Вов пхэндя:

«Ту на дэса Свэнтонэсти Тирэсти тэ дикхэл прахо».

36 Давидо андэ пэстири врязма терэлас бути пай воля лэ Дэвлэстири, нэ вов муля, и лэс гарадэ лэстирэ дадэнца, и тило лэско ашыля прахоса. **37** Нэ Кодва, Кас о Дэл жундядя андай мулэ, на ашыля прахоса.

38 Пхрала, колэсти мэ камав, кай тумэ тэ жанэн, со черэз Исусос тумэнди роспхэнэлпэ эртисаримос лэ бэзэхэндар. Андо Законо Моисеёско на сас зор тэ терэл тумэн жүжэнца, **39** нэ всаворо, ко патяла андо Исусо, авэла жужо. **40** Дикхэн, кай тумэнца тэ на терэлпэ кода, пала со пхэнэнас пророкоря:

41 «Подикхэн кола, ко асанпэ,
дивосавэна и хасавэна!

Мэ терава андэ тумарэ деса кацаво,

андэр со бы тумэ никала на патянас,
сар тумэнди тэ роспхэнэн пала када».

42 Кала Павло и Варнава выжанас андай синагога, лэн мангле тэ дэн дума пала када андэ авэр субота. **43** Мануша розжылепэ, нэ бут иудеёря и прозелиторя, савэ

тэлёнас лэ Дэвлэсти, жыле палав Павло и Варнава, савэ умангэнас лэн, соб онэ тэ ашэнпэ андо мищимос лэ Дэвлэско.

⁴⁴ Андэ авэр субота стидиля всаворо форо, кай тэ ашунэн лав Раеско. ⁴⁵ Кала иудеёря дикхле скачи манушэн, онэ фартэ холяйле и линэ тэ акушэн Павлос. ⁴⁶ Нэ Павло и Варнава пхэндэ лэнди бидарако:

— Лав Дэвлэско трэбуй сас майанглал тэ роспхэнэлпэ тумэнди. Нэ сар тумэ на прилэн лэс и на бинэн, со тумэ пативалэ, кай тэ прилэн вакоско жувимос, амэ акана жас кай найиудеёря. ⁴⁷ Кадя припхэндя амэнди о Рай:
«Мэ тердэм тут удудэса важ народоря,

соб ту тэ андярэс фэрисаримос жыкай майдурутни пхув».

⁴⁸ Кала найиудеёря ашундэ када, онэ радонаспэ и лашарэнас лэ Раес пала Лэско лав, и всаворэ кола, савэ сас вытидэ важ вакоско жувимос, патяйле.

⁴⁹ Лав Раеско розжыляпэ пай всавори кодья пхув.

⁵⁰ Нэ иудеёря подмардэ жувлян андай пативалэ йиря и пхурэдэрэн андав форо и кола линэ тэ гонин Павлос и Варнавас и вытрадэ лэн андав лэнго тхан. ⁵¹ Тунчи онэ обмардэ о прахо пай пэстирэ пэрнэ и жыле андэ Икониё. ⁵² Сыттарнэ ж пхэрдёнас лошаса и Свэнтонэ Духоса.

14

Андэ Икониё

¹ Андэ Икониё Павло и Варнава зажыле андэ иудеёндири синагога и пхэнэнас кадя, со патяйле фартэ бут иудеёря и грекоря. ² Ай иудеёря, савэ отпхэндэпэ тэ патян лэнди, вазгле пэ пхрала найиудеёнэн и тховдэ андэ лэндирэ водя вражымос. ³ Нэ Павло и Варнава сас котэ бут врязма. Онэ бидарако пхэнэнас палав Рай, Саво допхэнэлас лав палав Пэско мищимос и дэлас лэнди зор тэ терэн диворя и шпэры. ⁴ Кола, ко жувэлас андо кадва форо, розжылепэ машкар пэстэ, ех подритярэнас иудеёнэн, ай авэр — апостолонэн. ⁵ Нэ кала найиудеёря тай иудеёря екхэтанэ пэстирэ пхурэдэрэнца камле тэ лажаварэн и тэ марэн лэн барэнца, ⁶ онэ ужангле пала када и нашле андэ фороря Лицониятире, Листра тай Дэрвия и паша лэндирэ пхувья. ⁷ Котэ онэ майдур роспхэнэнас Радосаво Лав.

Андэ Листра

⁸ Андэ Листра жувэлас мануш, насвало пэрнэнца; вов сас бангэса пэстирэ бэяндимастар и никала на пхирэлас. Вов бэшэлас ⁹ и ашунэлас, со пхэнэлас Павло. Павло подикхля пэр лэстэ и удикхля, со колэстэ исин патявимос, кай тэ састьярэлпэ.

¹⁰ — Вщи пэ пэстирэ пэрнэ! — гласно пхэндя Павло.

Кодва вшилия и ашылия тэ пхирэл. ¹¹ Мануша дикхле, со тердя Павло, и линэ тэ цыписавэн пэ ликаониятири шыб:

— Амэндэ авиле дэвла андо манушыкано образо.

¹² Онэ акхардэ Варнавас Зевсоса, ай лэ Павлос Гермесоса, колэсти со вов андярэлас и дума, сар пхурэдэр. ¹³ Англав форо сас храмо Зевсоско, и лэско рашай андя кай форостири эхира гурувэн и вэнкоря. Вов камэлас екхэтанэ лэ манушэнца тэ анэл лэнди жэртва. ¹⁴ Кала апостолоря Варнава и Павло ашундэ пала када, онэ росшындэ пэстиири йида, впрастае кай мануша тай линэ тэ цыпин:

¹⁵ — Мануша, со тумэ терэн? Амэ кацавэ ж мануша, сар и тумэ, андэ тумэнди Радосаво Лав, и камас, кай тумэ тэ ашавэн шушэн идолонэн и тэ обрисавэн кав жундо Дэл, Саво тердя болыбэн, пхув и море тай вся, со андэр лэндэ. ¹⁶ Андэ дэлмутни врязма Вов домукля народонэнди тэ пхирэн пэстирэ дромэнца, ¹⁷ нэ на пэрэашэлас тэ пхэнэл пала Пэстэ, терэлас лашымос, дэлас брышинд болыбнастар тай плодоря андэ пэстиири врязма, дэлас хамос и пхэрдярэлас лошаса тумарэ водя.

¹⁸ Калэ лавэнца апостолоря барэ пхаримаса тердярдэ манушэн, соб онэ тэ на анэн лэнди жэртва.

19 Нэ иудеёря, савэ авиле андай Антиохия и Икониё, пэрэцырдэ манушэн пэ пэстири риг. Онэ лэ Павлос мардэ барэнца и выцырдэ палав форо, колэсти со гындонас, со вов муло. **20** Нэ кала сыйярнэ стидэпэ паша лэстэ, Павло вшиля и жыля палпалэ андо форо. Ай пэ авэр дес вов и Варнава жыле котар андэ Дэрвия.

Апостолоря рисавэн андэ сирийско Антиохия

21 Андэ кадва форо онэ роспхэнэнас Радосаво Лав кадя, со бут мануша ашыле Раестирэ сыйярнэнца. Тунчи онэ рисайле андэ Листва, Икониё и Антиохия. **22** Онэ подритярэнас лавэнца сыйярнэн и мангэнэн, кай онэ тэ ашэнпэ састэ андо патявимос. Онэ пхэнэнас:

— Амэнди трэбуй тэ пэрэандярас бут грыж, англай колэ, кала амэ аваса андо Тхагаримос Дэвлэско.

23 Андэ всаворэ кхандиря Павло и Варнава тховдэ пхурэдэрэн, манглепэ постоса тай пэрэдинэ лэн Раести, андо Саво онэ патяйле. **24** Тунчи онэ прожыле Писидия тай авиле андэ Памфилия. **25** Онэ пхэнэнас лав Дэвлэско андэ Пергия тай авиле андэ Аталия. **26** Ай андай Аталия апостолоря плывисардэ палпалэ андэ Антиохия. Котар онэ, пав мищимос Дэвлэско, сас отдинэ по рындо, саво онэ и стердэ. **27** Кала онэ авиле, стидэ кхандири тай роспхэндэ палай вся, со о Дэл тердя черэз лэндэ, и сар Вов отпхэрнадя удар важ патявимос найиудеёнди. **28** Котэ апостолоря бут връяма сас екхэтанэ лэ сыйярнэнца.

15

Пхурэдэрэнго кхандирятирэ стидэнпэ андо Иерусалимо

1 Андай Иудея андэ Антиохия авиле мануша, савэ сыйярэнас лэ пхралэн:

— Сар тумэ на авэна обшындэ пав запхэнимос Моисеёско, тумэ на фэрисарэнапэ.

2 Чөрэз када онэ бут молоря ханаспэ лэ Павлоса и Варнаваса. Тунчи пхрала прилинэ, со лэ Павлости, Варнавасти тай аврэнди трэбуй тэ жан андо Иерусалимо, кай тэ дэн дума пала када лэ апостолонэнца и пхурэдэрэнца. **3** Кола, кас бишалдя кхандири, прожанас Финикия тай Самария и роспхэнэнас котэ, сар патяйле авэр народоря. Кадай дума анэлас бари лош всаворэнди пхралэнди.

4 Кала онэ авиле андо Иерусалимо, лэн прилинэ кхандири, апостолоря и пхурэдэра. Онэ роспхэндэ, со о Дэл тердя черэз лэндэ. **5** Нэ патикунэ андай фарисеёско стидимос пхэнэнас, со найиудеён трэбуй тэ обшынэн и тэ припхэнэн лэнди, кай онэ тэ жувэн пав Законо Моисеёско.

6 Апостолоря тай пхурэдэра стидэпэ, соб тэ роздикхэн кадва рындо. **7** Онэ бут връяма дэнас дума пала када, ай тунчи Петро вшиля и пхэндя:

— Пхралалэ, сар тумэ жанэн, прожыля бут връяма колэ десэстар, кала о Дэл вытидя ман тэ роспхэнав Радосаво Лав найиудеёнди, соб и онэ тэ патян. **8** О Дэл жанэл водя манушэндирэ, и Вов дя допхэнимос колэсти, со прилэл найиудеён, кала дя лэнди даро Свэнтонэ Духос кадя ж, сар и амэнди. **9** Вов жужардя лэндирэ водя черэз патявимос, ай икхатар англав Лэстэ амэ кацавэ ж, сар и онэ. **10** Тунчи пэр со тумэ холярэн лэ Дэвлэс колэса, со тховэн пэ сыйярнэндирэ кора гамо, саво на сас зор тэ андярэн най амарэ дадэнди, най амэнди? **11** Нэ амэ патяс, со амэн фэрисарэл мищимос лэ Раеско Исусоско кадя ж, сар и лэн.

12 Тунчи всаворэ ашыле мулком тай ашундэ, со роспхэнэнас Варнава и Павло палай шпэры и диворя, савэ о Дэл тердя черэз лэндэ машкар найиудеёра. **13** Кала онэ пэрэашыле тэ дэн дума, Иаково пхэндя:

— Пхралалэ, выашунэнтэ ман. **14** Симоно роспхэндя амэнди пала кода, сар о Дэл англuno моло камля тэ стидэл важ Гээско алав нароо андай найиудеёндирэн.

15 Када подритярэн пророкондирэ лава, савэ пхэнэн:

16 «Тунчи Мэ рисавава

тай инке екх моло тховава катуна Давидостири,
сави пэля.

Мэ терава упалэ кода, со роспхагло,
и ваздава ла,
17 кай авэр мануша
тай всаворэ народоря,
савэ сас акхардэ Мэрнэ алавэса,
ашыле тэ родэн лэ Раес.

Кадя пхэнэл Рай, Саво терэл када.

18 Када жангло дэлмутня врятатар».

19 Колэсти мэ бинав, со амэнди на трэбуй тэ тховас нисаво пхаримос важ найиудеёря, савэ обрисавэн кав Дэл. **20** Нэ тэ пистросарас лэнди лил, кай тэ на магрисавэн идолонэнца, тэ ритярэнпэ майдур лубимастар, тэ на хан мас скотостар, саво сас тасадо, и тэ на пэн о рат.* **21** Колэсти со Законо Моисеёско дэлмутня врятатар бинэллэ кажно субота андэ синагоги андо кажно форо.

22 Тунчи апостолоря и пхурэдэра екхэтанэ всаворя кхандиряса линэ тэ вытидэн машкар пэстэ коискачи манушэн и тэ бишалэн лэн лэ Павлоса и Варнаваса андэ Антиохия. Онэ вытидэ Иудас, савэс инке акхарэнас Вар-Сава, и Силас. Кала мурша сас пхурэдэра машкар пхрала. **23** Онэ пистросардэ кацаво лил:

«Пхрала апостолоря тай пхурэдэра —

пхралэнди андай найиудеёря, савэ жувэн андэ Антиохия, Сирия тай Киликия.
Тэ авэн бахталэ!

24 Амэ ашундэ, со коисавэ мануша, савэ авиле амэндар, пхэндэ тумэнди кацавэ лава, андай савэ тумэнди ашыля наймишто по води. Нэ амэ на бишаласас лэн. **25** Колэсти амэ всаворэ екхэтанэ закамле тэ вытидас машкар амэндэ скачи манушэн тай тэ бишалас лэн тумэндэ екхэтанэ амарэ пативалэ пхралэнца Павлоса и Варнаваса, **26** савэ отдэн пэско жувимос пала алав амарэ Раеско Исусоско Христоско. **27** Амэ бишалас тумэндэ кадя ж лэ Иудас и Силас, соб онэ алавэнца тэ допхэнэн кода, со амэ пистросардэ. **28** Свэнто Духо и амэ на камас тэ тховас пэр тумэндэ нисаво пхаримос, сар качи акэ со: **29** тэ на хан хамос, саво анэнаспэ андэ жэртва идолонэнди, и мас скотостар, саво сас тасадо, тэ на пэн о рат и на терэн лубимос.† Сар авэна кадя тэ терэн, тумэнди мишто авэла.

Тэ авэн састэ!»

30 Бишалдэ пхрала жыле тай авиле андэ Антиохия, стидэ котэ и кхандири тай пэрэдинэ о лил **31** Кала мануша пробиндэ о лил, лошавэнас лавэнди, савэ подритярдэ лэн. **32** О Иуда тай Сила, савэ сас пророкоря, пэстирэ лавэнца подритярдэ и састярдэ о патявимос лэ пхралэнго. **33-34** Онэ сас котэ сави-то врятьа, и пхрала отмукле лэн мироса палпалэ кав апостолоря.‡ **35** Павло лэ Варнаваса ашылепэ андо Антиохия, кай онэ бутэ аврэнца пхралэнца сытрянаас и роспхэненас лав Раеско.

Павло лэ Варнаваса розжаннэ

36 Прожыля сави-то врятьа и Павло пхэндя лэ Варнавасти:

— Авэн жаса кай и пхрала пай всаворэ фороря, кай амэ роспхэненас лав Раеско, и дикхаса, сар лэндэ жанрындоря.

37 Варнава камэлас тэ лэл пэса Иоанос, савэс акхарэнас Марко, **38** нэ Павло на закамля тэ лэл пэса колэс, ко ашадя лэн андэ Памфилия тай на терэлас лэнца бути. **39** Павло и Варнава похалепэ машкар пэстэ и кажно жыля андэ пэстири риг. Варнава ля лэ Маркос и плывисардя андо Кипро. **40** Ай Павло вытидя пэсти Силас. Пхрала отдинэ лэс по мищимос Раеско, и вов жыля андо дром. **41** Вов прожалас чөрэз Сирия тай Киликия и подритярэлас лавэса и кхандиря.

* **15:20** 15.20 Андэ коисавэ гречески манускрипторя инке исин кацавэ лава: «Тай, кай на терас аврэнди кода, со на камас пэсти». † **15:29** 15.29 Андэ коисавэ гречески манускрипторя инке исин кацавэ лава: «И тэ на терэн аврэнди кода, со на камэн пэсти». ‡ **15:33-34** 15.33-34 Андэ коисавэ гречески манускрипторя инке исин кацавэ лава: «Нэ Сила закамля тэ ашэллэ, ай Иуда рисайля андо Иерусалимо».

16

Тимофеёй жал лэ Павлоса и Силаса

¹ Тунчи Павло авиля андэ Дэрвия и Листра. Котэ жувэлас сытярно, савэс акхарэнас Тимофеёй. Лэстири дэй сас иудейка и патялас андо Рай, ай дад сас греко. ² Палав Тимофеёй сас лащи дума лэ пхралэндэ андай форо Листра тай Икониёй. ³ Павло закамля тэ лэл лэс пэса андо дром. Тай важ иудеёря, савэ жувэнэас котэ, обшында лэс, важ кода со всаворэ жанэнэас, со дад Тимофеёско сас греко. ⁴ Онэ пхирэнэас андав екх форо андо авэр, пхэнэнэас всаворэнди патикунэнди тэ терэн кода, со прилинэ апостолоря тай пхурэдэра андо Иерусалимо. ⁵ Андэ кхандиря патикунэ ашэнэас майсастэ андэ патявимос, и кажно дес лэн ашэнэас майбут.

Павло дикхэл андо дикхимос манушэс андай Македония

⁶ Онэ прожанас черэз Фригия тай Галатийско пхув, нэ Свэнто Духо на домукля лэн тэ роспхэнэн лав андэ Цыкни Азия. ⁷ Кала онэ поджыле кай Мисия, стидэпэ тэ жан андэ Вифиния, нэ Духо Иисусоско на домукля лэн. ⁸ Тунчи онэ прожыле Мисия и авиле андэ Троасо. ⁹ Ай рятяса лэ Павлости сикадиля дикхимос: лэстэ авиля мануш андай Македония, вов тэрдёлас и мангэлас Павлос:

— Ав андэ Македония и поможысар амэнди!

¹⁰ Тунчи пала кадва дикхимос амэ полям, со о Дэл акхарэл амэн тэ пхэнэас Радосаво Лав, и сыго гытосардямпэ тэ жас андэ Македония.

Лидия отпхэрнавэл пэско води важ о Рай

¹¹ Андав Троасо амэ плывисардям ворта андэ Самофракия, ай котар пэ авэр дес андо Неаполи. ¹² Андав Неаполи амэ жылям андэ Филипоря, римостири колония и майпхурано форо пай кодья риг Македониятири. Котэ амэ сас коискачи деса. ¹³ Тунчи андэ суботнё дес амэ выжылям палай форостири эудара кай и лэн. Амэ гындосардэ, со котэ сас тхан важ мангимос. Амэ бэшле и линэ тэ дас дума лэ жувлянца, савэ котэ стидэпэ. ¹⁴ Котэ машкар лэндэ сас екх жувли, сави тэлёлас лэ Дэвлэсти. Ла акхарэнэас Лидия, вой сас андав форо Фиатира. Вой битинэлас кучютни сынё-лоли материя. Вой ашунэлас Павлос и о Рай отпхэрнадя лако води тэ прилэл, со пхэнэлас о Павло. ¹⁵ Тунчи вой и кола, савэ жувэнэас андо лако чер, прилинэ болдимос, и вой акхардя амэн пэстэ черэ.

— Кала тумэ бинэн ман, сар патявимастири англав Рай, тунчи авэн и пожувэн мандэ черэ, — мангэлас вой амэн и уманглия.

Андэ Филипоря Павлос и Силас пхандавэн андо баруно

¹⁶ Екхвар, кала амэ жасас кав тхан, кай мангэнэаспэ Дэвлэс, пав дром амэн дикхля бутярни, андэ сави сас драбатирамаско духо. Драбатирамаса вой анэлас барэ ловэ пэстирэнди хулаенди. ¹⁷ Вой жалас палав Павлос и пала амэндэ и цыписавэлас:

— Кала мануша — бутярнэ Майбарэ Дэвлэстирэ! Онэ роспхэнэн тумэнди, сар тэ фэрисарэнпэ!

¹⁸ Вой када терэлас кажно дес, и кала лэ Павлости вся када надохяя, вов обрисайля и пхэндя лэ духости:

— Важ алав Иисусоско Христоско мэ припхэнав тути: выжна андар латэ!

Андэ кодья ж врязма о духо выжыля латар. ¹⁹ Кала латирэ хулая полинэ, со лэндэ хасайля надия тэ затерэн ловэ, онэ хутилдэ лэ Павлос и Силас и цырдэ по форо кай рапа. ²⁰ Онэ андэ лэн кай форостири рапа и пхэндэ:

— Кала мануша — иудеёря, и онэ ваздэн манушэн андо амаро форо. ²¹ Онэ роспхэнэн кода, со амэнди, римлянёнэнди, нащи ни тэ прилас, ни тэ терас.

²² Бут мануша кадя ж ваздинэпэ по Павлос и Сила, и рапа припхэндэ тэ злэн пай лэндэ йида и тэ марэн лэн рулянца. ²³ Лэн фартэ мардэ тай пхандадэ андо баруно, ай лэ халавдэсти барунэстар припхэндэ мишто тэ дикхэл пала лэндэ.

²⁴ Кала халавдо приля кадва припхэнис, вов запхандадя лэн андрал андо баруно и спханггя лэнди пэрнэ каштунэ лэпунзэнца.

²⁵ Варикий андэ епашрят Павло и Сила мангэнаспэ Дэвлэс и дилянца лашарэнас лэ Дэвлэс, ай авэр барунаря ашунэнас лэн. ²⁶ И акэ, пхув ля фартэ тэ тинолпэ, кадя со фундаменто барунэско ашияля тэ пхирэл риг ригатар. Всаворэ удара отпхэрнадэпэ, и всаворэ барунарэндэ спэле лэпунзэ пай пэрнэ. ²⁷ Кала халавдо барунэстар, саво дикхэлас пала лэндэ, просутяпэ тай удикхля, со всаворэ удара барунэстирэ отпхэрнадэ, вов ля мечё и камля тэ мулярэл пэс. Вов гындолос, со всаворэ барунаря нашле. ²⁸ Нэ Павло фартэ зацыписайля:

— На тер пэсти бида! Амэ всаворэ андо баруно!

²⁹ Халавдо манггя удууд, запрастая андо баруно и даратар пэля кай пэрнэ Павлостири и Силастири. ³⁰ Вов выяндярдя лэн андав баруно и пушля:

— Мэрнэ рапа, со манди тэ терав, соб тэ фэрисавав?

³¹ — Патя андо Рай Иисусо, — пхэндэ апостолоря. — Фэрисарэсапэ ту, и всаворэ, ко жувэл андо тиро чер.

³² Тунчи онэ пхэндэ лав Раеско лэсти и колэнди, ко жувэлас андо лэско чер.

³³ Андэ кодья ж врэма рятыса о халавдо барунэско халадя лэнди помардэ тхана и сыго сас болдо, вов и всаворэ, ко жувэнас андо лэско чер. ³⁴ Тунчи вов андя лэ Павлос и Силас пэстэ черэ и тховдя важ лэнди мэсли. Всаворэ колэнца, ко жувэнас андо лэско чер, вов лошавэлас колэсти, со патяйля андо Дэл.

³⁵ Кала авиля дес, форостири рапа бишалдэ пэстирэ бутярнэн припхэнисаса:

— Отмукэн калэн манушэн.

³⁶ Халавдо барунэстар пхэндя лэ Павлости:

— Рая припхэндэ тэ отмукав тумэн! Жан лэ мироса!

³⁷ Нэ Павло пхэндя:

— Амэн бисындооско мардэ англай мануша и на дикхле пэ кода, со амэ римляноря, ай тунчи шутэ амэн андо баруно. Ай икхатар онэ камэн тэ мукэн амэн, кай нико тэ на жанэл? Нат! Мэк онэ ежэнэ авэн и выяндярэн амэн катар.

³⁸ Тунчи бутярнэ роспхэндэ пала када лэ раенди, ай онэ здарайле, кала ашундэ, со Павло и Сила римляноря. ³⁹ Онэ авиле и мангле, кай лэн тэ эртисарэн. Тунчи выяндярэ лэн андав баруно тай мангле, кай кола тэ ужан андав форо. ⁴⁰ Кала Павло и Сила выжыле андав баруно, онэ жыле андо чер Лидиятэ. Котэ онэ дикхлепэ лэ пхралэнца и подритярдэ лэн лавэнца. Тунчи онэ жыле.

17

Бути андэ Фесалоника

¹ Кала онэ прожыле Амфиполи тай Аполония, авиле андэ Фесалоника, кай сас иудеёско синагога. ² Павло, сар вов и терэлас всавори врэма, жыля кордэ и трин суботы сикавэлас лэнди андав Пистросаримос, ³ роспхэнэлас и допхэнэлас, со Христости трэбуй сас тэ грыжолпэ тай тэ жундёл андай мулэ.

— Иисусо, пала Саво мэ тумэнди пхэнав, исин Христосо, — пхэнэлас Павло.

⁴ Лэнди патяйле коискачи иудеёря, кадя ж бут грекоря, савэ тэлёнэас лэ Дэвлэсти и бут жанглэ жувля. Ай всаворэ онэ жыле палав Павло и Сила. ⁵ Авэр иудеёря холяйле пала када, онэ аракхле пэ тарго найлашэн манушэн, линэ лэн пэса, стидэ бут манушэн и вазгле всаворо форо. Онэ прастае кав чер Иасоноско, кай тэ родэн котэ Павлос и Силас тай тэ выяндярэн лэн манушэндэ. ⁶ Нэ кала на аракхле лэн котэ, онэ поцырдэ Иасонос и аврэн пхралэн кай форостири пхурэдэра.

— Кала мануша ваздэн лэ манушэн пай всавори люма, ай икхатар авиле и кардэ, — цыписавэнас онэ, ⁷ — ай Иасоно приля лэн андо пэско чер. Онэ отжан лэ императоростири упхэнимастар и пхэнэн, со исин авэр тхагар, Савэс акхарэн Иисусо.

⁸ Народо и форостири пхурэдэра ашундэ када тай здарайле. ⁹ Онэ линэ лав и ловэ пав Иасоно и аврэн, ко сас лэса тай отмуkle лэн.

Бути андэ Верия

10 Тунчи, сар качи авиля и рят, пхрала отбишалдэ лэ Павлос и Силас андэ Верия. Кала онэ авиле кордэ, жыле андэ иудеёндири синагога. **11** Верийцоря сас майотпхэрнадэ воденца, сар и фесалоникийцоря. Онэ всаворя зораса прилиинэ кода, со пхэнэлас Павло, и кажно дес розлэнас Пистросаримос, кай тэ полэн, када чячимос чи нат. **12** Бут лэндар патяйле, кадя ж патяйле пативалэ гречянки и бут грекоря. **13** Нэ кала иудеёря андэ Фесалоника ужангле пала кода, со Павло роспхэнэл лав Дэвлэско андэ Верия, онэ авиле кордэ и ашыле тэ ваздэн и тэ холярэн лэ манушэн. **14** Тунчи и пхрала бишалдэ лэ Павлос кай море, ай о Сила и Тимофеё ашылепэ андо форо. **15** Кола, ко проандярэлас лэ Павлос, авиле лэса андэ Афиноря, ай тунчи жыле палпалэ, колэсти со Павло дя лэнди запхэнимос, соб о Сила и Тимофеё майсыго тэ авэн лэстэ.

Бути лэ Павлостири андэ Афиноря

16 Кала Павло ажутярэлас лэн андэ Афиноря, вов дикхля, со кадя бут идолоря андэ кадва форо и калэстар лэсти сас наймишто по води. **17** Вов дэлас дума андэ синагога лэ иудеёнца и колэнца, савэ тэлёнас лэ Дэвлэсти, ай кадя ж кажно дес пэ тарго колэнца, ко авэлас кордэ. **18** Лэса дэнас дума коисавэ философия — эпикурейцоря и стоикоря. Ехэ пушэнас:

— Со кадва шыбало камэл тэ пхэнэл?

Ай авэр пхэнэнас:

— Вов пхэнэл амэнди пала авэр дэвла, — колэсти со Павло роспхэнэлас Радосаво Лав палав Иисусо и Жундимос. **19** Онэ андэ Павлос андо Ареопаго* и мангле:

— Роспхэн амэнди, со када за нэво сыйтрямос, саво ту дэс дума? **20** Ту роспхэнэс пала варисо, со амэ на полас, и амэнди камэлпэ тэ жанас, со када кацаво исин.

21 Афиняноря и мануша авэр пхувьятар, савэ жувэнас котэ, майфэдэр камэнас тэ дэн дума чи тэ ашунэн варисо нэво.

22 Тунчи Павло вшиля помашкар Ареопаго тай пхэндя:

— Афиняноря! Мэ дикхав, со тумэ майбут всаворэндар тэлён лэ дэвлэнди. **23** Мэ аракхлем ехэ жэртвенико, пэ саво сас пистросардо: «НАЙЖАНГЛЭ ДЭВЛЭСТИ». Мэ роспхэнав тумэнди пала Калэс Дэвлэс, Савэс тумэ на жанэн, ай всаекх тэлён Лэсти. **24** О Дэл, Саво тердя всавори люма и вся, со пэр латэ, исин Рай болыбнааско и пхувьяко. Вов на жувэл андэ храморя, савэ тердэ вастэнца мануша. **25** Лэ Дэвлэсти на трэбуй, соб и мануша тэ терэн бути Лэсти пэстирэ вастэнца, сар наче Лэсти варисо на хутилэл. Вов Ежэно дэл всаворэнди манушэнди жувимос, зор и вся авэр.

26 Ехэ манушэстар Вов тердя всаворэ манушэн, соб онэ тэ жувэн пай всавори пхув, и пхэндя кай и кала онэ авэна тэ жувэн. **27** Вов тердя када, соб мануша тэ родэн тай тэ аракхэн Дэвлэс, нэ Вов чячес исин найдур кожнонэс амэндар. **28** Акэ, андэр Лэстэ амэ жувас, пхирас тай исин андэ люма, сар пхэнэн коисавэ тумарэ поэторя: «Ай амэ исин Лэско родо». **29** Ай кала амэ родо Дэвлэско, амэнди на трэбуй тэ гындосарас, со о Дэл мэзимэ пэ кода, со тердо сомнакастар, рупэстар чи барэстар вастэнца тай годяса манушэндиряса. **30** Майанглал мануша на жанэнас Дэвлэс и Вов запхандэлас пэ када якха, нэ икхатар Вов припхэнэл всаворэнди пай всавори пхув тэ каисавэн. **31** Вов тховдя дес, кала Вов авэла тэ сындосарэл всавори люма пав чячимос, тай вытидя Манушэс, Саво и авэла сындомари. Вов допхэндя када всаворэнди, кала жундярдя Лэс андай мулэ!

32 Кала онэ ашундэ палай кода, со жундёна и мулэ, коисавэ лэндар ашыле тэ асан, ай авэр пхэндэ:

— Пала када амэ поашунаса тут андэ авэр врьяма.

* **17:19** 17:19 Плай Аресоско, кадя акхарэласпэ плай андэ Афиноря, пэ саво стидэнаспэ барэ мануша форостар и роздикхэнас рындоря, сар тэ сыйтэрэн, тэ тэлён лэ Дэвлэсти и сар тэ жувэн пав чячимос.

33 Тунчи Павло жылятар котар. **34** Коискачи манушэн екхпатив патяйле тай жыле лэ Павлоса. Машкар лэндэ сас Дионисиё, мануш андав Ареопаго, инке жувли, савя акхарэнас Дамарь, и авэр.

18

Бути андо Коринфо

1 Тунчи о Павло жылятар андай Афиноря и авиля андо Коринфо. **2** Котэ вов дикхля иудеёс, савэс акхарэнас Акила, андав Понто. Вов найдэлмут авиля андай Италия пэстирия ромняса Прискиласа, колэсти со императоро Клавдиё припхэндя всаворэнди иудеёнди тэ ужан андав Римо. О Павло авиля тэ дикхэл лэн. **3** Ай лэндэ сас екх бути лэ Павлоса: онэ терэнас катуны, и колэсти Павло ашыляпэ лэндэ, кай тэ жувэл и терэл бути лэнца. **4** Кажно субота вов дэлас дума андэ синагога лэ иудеёнца тай лэ греконэнца, кай тэ анэл лэн кав патявимос.

5 Ай кала андай Македония авиле Сила тай Тимофеё, о Павло отдя всавори пэстири врязма кай тэ пхэнэл о лав, допхэнэлас иудеёнди пала кода, со Иисусо исин Христосо. **6** Нэ кала онэ линэ тэ протисавэн и тэ акушэн лэс, вов обмардя о прахо пай пэстири йида тай пхэндя:

— Кала тумэ хасавэна, када тумаро ужылимос! Мэ жужко, и акана жав кай найиудеёря.

7 Тунчи Павло выжыля андай синагога и жыля андо чер, саво сас пашэ. Котэ жувэлас Титиё Иусто, мануш, саво тэлёлас лэ Дэвлэсти.

8 Ай пхурэдэр синагогако Криспо и всаворэ, ко жувэнас андо лэско чер, патяйле андо Рай. И бут андай коринфяния, савэ ашунэнас лэ Павлос, патяйле и сас болдэ андо паи.

9 Екхвар рятыса о Рай пхэндя лэ Павлости андо суно:

— На дара! Роспхэн майбут и на ашмулком. **10** Мэ туса, и нико на терэла тути вырито. Андэ кадва форо исин бут Мэрнэн манушэн.

11 О Павло прожудя котэ екх епашэса бэрш тай сыйярэлас лэн Дэвлэстирэ лавэсти.

12 Ай андэ кодья врязма, кала о Галионо сас прокционуло андэ Ахаия, иудеёря стидэпэ, нахукле по Павло тай андэ лэс по сындо. **13** Онэ ашыле тэ ужылисарэн лэс:

— Кадва мануш сыйярэл лэ манушэн тэ тэлён лэ Дэвлэсти най кадя, сар сыйярэл амаро Законо.

14 Павло инке нисо на пхэндя, сар о Галионо обрисайля кай иудеёря:

— Иудеёря, сар тумэ б ужылисарэнас лэс андэ кода, со вов тердя варисаво найчайчимос чи сави-то бида, тунчи мэ выашунавас бы тумэндар. **15** Нэ сар катэ тумэ споринпэ палав сыйяримос тай алава андав тумаро Законо, тунчи розлэн када ежэнэ. Мэ на камав тэ авав сындумареса андэ кала рындоря.

16 И вов вытрайдя лэн андав сындо. **17** Тунчи всаворэ схутилдэ пхурэдэрэс синагогако Сосфэнос тай ашыле тэ марэн лэс англав сындумарёско тхан, нэ Галионо на закамля нисо тэ терэл.

Павло рисавэл андэ Антиохия

18 Ай о Павло сас инке бут деса лэ пхралэнца. Тунчи вов простисайля лэнца и екхэтанэ лэ Прискиласа и Акиласа плывисардя андэ Сирия. Павло варикала дя лав Дэвлэсти и майанглал, сар тэ плывисарэл, вов обшиндя пэстирэ бал андэ Кенхрэя.

19 Онэ авиле андо Эфесо. Котэ о Павло ашадя Прискилас и Акилас, ай ежено жыля андэ синагога и дэлас дума лэ иудеёнца. **20** Онэ мангле лэс тэ ашэлпэ лэнца пэ сави-то врязма, нэ вов отпхэндя.

21 — Мэ рисавава, сар авэла пэ када Дэвлэстири воля, — пхэндя Павло, ай тунчи простисайля лэнца тай плывисардя андав Эфесо.

22 Вов вшилия пав кораблё андэ Кесария, авиля андо Иерусалимо, дикхляпэ лэ кхандиряса и жыля андэ Антиохия. **23** Павло пожудя сави-то врязма андэ Антиохия,

ай тунчи вов жыля черэз Галатия и Фригия и пав дром подритярэлас лавэса всаворэ сытэрнэн.

Апостоли бути андо Эфесо

24 Тунчи андо Эфесо авиля иудеё, савэс акхарэнас Аполосо. Вов выбариля андэ Александрия и сас ервало мануш, саво мишто жанэлас Пистросаримос.

25 Вов сас сытэрдо Раестирэ Дромэсти и фартэ пхабардэс дэлас дума и пав чячимос сытэрэлэл палав Исусо, ай ежэно качи жанэлас болдимос Иоаноско.

26 Аполосо ашыля бидараоко тэ роспхэнэл андэ синагога, ай кала Прискила и Акила ашунэнас лэс, онэ акхардэ лэс пэстэ и маймишто роспхэндэ лэсти палав Дром Дэвлэско. **27** Тунчи Аполосо камля тэ жал андэ Ахаяя. Пхрала подритярдэ лэс тай пистросардэ лил сытэрнэнди, кай мангле лэн тэ прилэн Аполосос. И кала вов авиля кордэ, бут поможысардя колэнди, ко патяйля пав Дэвлэско мищимос. **28** Пэ якха всаворэндар Аполосо зоралэс допхэнэлэс лэ иудеёнди андав Пистросаримос, со Исусо исин Христосо.

19

Бути лэ Павлостири андо Эфесо

1 Андэ кодья врёма, кала Аполосо сас андо Коринфо, Павло прожыля пав плаендири пхувья и авиля андо Эфесо. Котэ вов аракхля коискачи сытэрнэн.

2 — Тумэ прилини Свэнтонэ Духос, кала патяйле? — пушля вов.

— Амэ и на ашундэ палав кода, со исин Свэнто Духо, — пхэндэ онэ.

3 Тунчи Павло пушля:

— Сар тумэ болдэпэ?

— Кадя сар болэлэс Иоано, — пхэндэ онэ.

4 Ай Павло пхэндя:

— Иоано болэлэс, кала мануша каисавэнас. Нэ вов акхарэлэс лэ манушэн тэ патян андо Кодва, Саво трэбуй сас тэ авэл пала лэстэ, андо Исусо.

5 Кала онэ ашундэ пала када, онэ прилини болдимос важ алэв Раеско Исусоско.

6 Павло тховдя пэр лэндэ васта, и пэр лэндэ сжыля Свэнто Духо. Тунчи онэ ашыле тэ дэн дума аврэ шыбэнца и тэ пхэнэн лав Дэвлэстар. **7** Всаворэн лэн сас варикай дэшудуй мануша.

8 Павло трин шон бидараоко дэлас дума андэ синагога и допхэнэлэс котэ палав Дэвлэско Тхагаримос. **9** Нэ коисавэ лэндэр ех патив холявэнас и отпхэнэнас спэ тэ патя, англай всаворэ пхэнэнас найлашэ лава по Исусоско Дром. Тунчи Павло ашадя лэн. Вов вытида пэсти сытэрнэн и кожно дес дэлас дума лэнца андэ сытэрди Тираностири. **10** Кадя прожыле дуй бэрша, и всаворэ иудеёря тай грекоря, савэ жувэнас андэ Цыкни Азия, ашундэ лав Раеско.

11 Ай о Дэл терэлэс Павлостири вастэнца барэ диворя. **12** Насвалэнди дэнас тэ лэнпэ кай ххоснорэ тай бутярни йида, савэндэ лэлэспэ о Павло, и лэндэ прожалас насвалимос, тай холятирэ духоря выжанас андар лэндэ. **13** Ай коисавэ иудеёря, савэ пхирэнас пай дрома и вытградэнас духонэн, ашыле кадя ж тэ приакхарэн алэв Раеско Исусоско пэ мануша, андэ савэндэ сас холятирэ духоря. Онэ пхэнэнас:

— Припхэнав тумэнди алэвэса Исусостириэса, пала Саво роспхэнэл Павло.

14 Када терэнас и эхта шавэн лэ Скэвастириэн, саво сас иудеёнго баро рашай. **15** Нэ холяко духо пхэндя:

— Исусос мэ жанав, и пала Павло мэ ашунавас, ай тумэ ко кацавэ?

16 И мануш, андо саво сас холяко духо, хукля пэр лэндэ кацавя зораса, со помардя лэн всаворэн, и онэ нашле андав кадва чер нангэ и помардэ. **17** Кала иудеёря и грекоря, савэ жувэнас андо Эфесо, ужангле пала када, пэр лэндэ авиля бари дар, и онэ линэ тэ тховэн майбари патив кав алэв Раеско Исусоско.

18 Ай бут мануша, савэ патяйле, авэнас и англай всаворэ отпхэрнавэнэс пэстириэрындоря. **19** И бут кола, ко драбатярэлэс, анэнэс пэстириэ драбатиримастириэ лила тай пхабарэнас англай всаворэ пэ яг. Ай кала пэрэбиндэ, скочи ловэ ашэн кала

лила, выжыля варикай пандэша мии драхморя. ²⁰ Кадя алав Раеско розжаласпэ пай тхана и терэласпэ майзорало.

Бида андо Эфесо

²¹ Кала вся када прожыля, Павло приля андо Духо тэ жал андо Иерусалимо черэз Македония и Ахаяя.

— Кала мэ поавава андо Иерусалимо, тунчи манди трэбуй тэ жав кадя ж андо Римо, — пхэнэлас вов.

²² Павло бишалдя андэ Македония дуен пэстирэн бутярнэн, лэ Тимофеёс и Эрастос, ай ежэно ашыляпэ пэ сави-то время андэ Цыкни Азия.

²³ Андэ кодья время вазглепэ и мануша по Дром Раеско. ²⁴ Ех мануш, савэс акхарэнас Димитриё, терэлас андав руп цыкнэ храморя Артэмидако и дэлас тэ затэрэн ловэ аврэнди бутярнэнди. ²⁵ Вов акхардя всаворэн бутярнэн кацавя бутятар и пхэндя:

— Тумэ жанэн, со кадай бути дэл амэнди барвалэс тэ жувас. ²⁶ Ай тумэ дикхэн и ашунэн, со кадва Павло пэрэцырдя пэ пэстири риг бутэ манушэн на качи катэ андо Эфесо, нэ пай всавори Цыкни Азия. Вов пхэнэл, со дэвла, савэ стердэ вастэнца, на дэвла. ²⁷ Мэ дарав, со на качи амари бути хасарэла лашо алав, нэ кадя ж и храмо баря дэвляко Артэмидако ашэлапэ нисоса. И ежэи дэвли, савяти тэлён всавори Цыкни Азия и всавори люма, хасарэла пэско баримос!

²⁸ Сар ашундэ када, онэ андай холи линэ тэ цыписавэн:

— Бари Артэмиды Эфесостири!

²⁹ Всаворо форо вазглэпэ. Всаворэ екхэтанэ онэ хутилдэ македонянонэн лэ Гаёс тай Аристархос, со пхирэлас лэ Павлоса, и поцырдэ лэн андо театро. ³⁰ Павло камля тэ выжал кай и мануша, нэ сытэрнэ на домукле лэс. ³¹ И коисавэ Азиятирэ барвалэ рая, амала Павлостири, бишалдэ лэстэ манушэн, кай тэ мангэн, соб вов тэ на авэл андо театро.

³² Мануша андо стидимос прастанас риг ригатэ, ех цыписавэнас ех, ай авэр цыписавэнас авэр. Майбут мануша на полэнас,ости онэ кордэ авиле. ³³ Сар пхэндэ иудеёры, мануша выцырдэ пэ англал Александрос. Вов сикадя вастэса, кай тэ ашэн мулком, а ашыля тэ дэл думэл манушэндэ. ³⁴ Нэ кала онэ ужангле, со вов иудеё, линэ тэ цыписавэн екхэ гласоса:

— Бари Артэмиды Эфесостири!

И кадя цыписавэнас варикай дүй чясоря.

³⁵ Тунчи фороско пистросаримари успокоисардя о народо и пхэндя:

— Эфесяноря, чи на жанэл варико, со форо Эфесо фэрисарэл храмо баря Артэмидако тай лако образо, саво пэля пав болыбэн? ³⁶ Када чячимос, саво на трэбуй тэ допхэнэс. Колэсти тумэнди трэбуй тэ успокоинпэ и тэ на терэн бигодяко. ³⁷ Тумэ андэ кардэ калэн манушэн, онэ на обчёрдэ храмо и на пхэндэ вырито лав пэ амари дэвли. ³⁸ Ай сар Димитриё и авэр рупунаря камэн варикас тэ ужылисарэн, пэ када амэндэ исин сындоря и проконсулоря. Кордэ мэк онэ и жан пэстирэ рындонца. ³⁹ Ай сар тумэндэ инке исин варисаво рындо, вов авэла продикхло андо стидимос пав законо. ⁴⁰ Мэ дарав, со пала кода, со тумэ адес вазглепэ, амэн терэна ужылэнца, колэстар со нинай черэз со тэ стидэн кацаво стидимос. Амэнди на авэла, со тэ пхэнэн.

Тай кацавэ лавэнца вов розмукуя о стидимос.

20

Павло жал андэ Македония тай Грецыя

¹ Кала всаворэ мануша пэрэашыле тэ цыписавэн, Павло акхардя сытэрнэн, подритярдя лавэса, простисайля лэнца и жыля андэ Македония. ² Вов прожалас черэз кадья пхув тай бутэнца лавэнца подритярэлас патикунэн. Кала Павло авиля андэ Грецыя. ³ Вов прожыля котэ трин шон. Ай кала вов камэлас тэ плывисарэл андэ Сирия, вов ужангля, со иудеёры гытосардэпэ тэ умарэн лэс. Тунчи вов приля

тэ рисавэл черээ Македония. ⁴ Лэса жанас Сопатро, шаво Пироско андай Верия, фесалоникийцоря Аристархо тай Секундо, Гаё андай Дэрвия и Тимофеё, ай кадя ж Тихико и Трофимо андай Цыкни Азия. ⁵ Онэ жыле майанглэ и ажутярэнас амэн андэ Троасо. ⁶ Кала прожыля свэнко Биквасно марнэско, амэ плывисардэ андай Филипоря тай черээ панч деса авиле лэндэ андэ Троасо. Котэ амэ сас эхта деса.

Павло жундярэл андай мулэ Эвтихос

⁷ Андо англуну дес куркэско амэ стидиле екхэтанэ тэ пхагас о марно. Павло дэлас дума лэнца, и сар вов камэлас пэ авэр дес тэ жал андо дром, лэстири дума зацырдяпэ жыкай епашрят. ⁸ Упрэ андо чер, кай амэ стидэпэ, пхабонас бут каганцоря. ⁹ Ай пэ фэлястра бэшэлэс тэрно мануш, савэс акхарэнас Эвтихо. И кадя сар о Павло лунго дэлас дума, о Эвтихо састэс засутя и пэля тэлэ пав трито этажо. Ай кала лэс вазгле, вов сас муло. ¹⁰ Павло зму克ляпэ, пашлия упранл пэр лэстэ и обля лэс.

— На даран, — пхэндя вов, — вов жундо!

¹¹ Тунчи Павло жыля упрэ, пхагля о марно тай халя. Вов дэдумэлэс жыкай дэнзор, ай тунчи жыля андо дром. ¹² Ай лэ шаворэс одандярдэ черэ жундэса, и всаворэ лошавэнас калэсти.

Дром андай Троасо андо Милето

¹³ Павло припхэндя амэнди тэ бэшас по кораблё и тэ плывисарас андо Асо. Ежэно вов камэлас тэ жал дромэса пай пхув. Андо Асо амэнди трэбуй сас тэ дикхаспэ и тэ лас лэ Павлос по кораблё. ¹⁴ Кала Павло авиля андо Асо, амэ линэ лэс по кораблё и плывисардэ андэ Митилена. ¹⁵ Пэ авэр дес амэ выжыле котар андэ риг островос Хиосос. Кала прожыля инке дес, амэ плывисардэ кав острово Самосо, ай инке черэз дес авиле андо форо Милето. ¹⁶ О Павло закамля тэ обжал о Эфесо ригаса, кай тэ на заритярдёл андэ Цыкни Азия, колэсти со вов грабияс и камэлас, сар выжала, тэ авэл андо Иерусалимо кав Пандэшако дес.

Павло дэл дума кхандирятире пхурэдэрэнца андо Эфесо

¹⁷ Андав Милето Павло бишалдя манушэн андо Эфесо, кай тэ мангэн пхурэдэрэн кхандирятирен тэ авэн лэстэ. ¹⁸ Ай кала кола авиле, вов пхэндя лэнди:

— Тумэ жанэн, сар мэ жувавас тумэндэ всавори врьяма пай англуну дес, кала мэ авилем андэ Цыкни Азия. ¹⁹ Мэ теравас бути важ о Рай бипхутимаско и ясвэнца и пэрэндряравас грыжы, савэ терэнас манди иудеёря. ²⁰ Мэ на умукалас нисо колэстар, соб тумэнди тэ авэл мишто, роспхэнавас и сыйяравас тумэн англай мануша пэ гасы и пай чера. ²¹ Мэ приакхаравас лэ иудеёнэн и греконэн, со лэнди трэбуй тэ каисавэн тай тэ обрисавэн кав Дэл и тэ патян андо амаро Рай Иисусо. ²² Нэ икхатар о Духо припхэнэл манди, кай мэ тэ жав андо Иерусалимо, и мэ на жанав, со котэ манца авэла. ²³ Мэ жанав, кай андо кожно форо Свэнто Духо допхэнэл манди пала кода, со ман ажутярэн лэпунзэ и грыжа. ²⁴ Важ мандэ мэрно жувимос нисо на ашэл, качи камав тэ дожав пэско дром и тэ дотерав бути, сави манди дя Рай Иисусо, — тай допхэнав Радосаво Лав палав мищимос Дэвлэско.

²⁵ Ай икхатар мэ жанав, со тумэ всаворэ, каса мэ сымас и касти роспхэнавас палав Тхагаримос, никала ман майбут на дикхэна. ²⁶ Важкода мэ пхэнав адес: мэ на авава ужыло, ни андэр кастиро хасаримос, ²⁷ колэсти со мэ нисо на промуклем и роспхэндэм тумэнди пала всавори Дэвлэстири воля. ²⁸ Дикхэн пала пэстэ и палав всаворо стадо, андо саво Свэнто Духо тховдя тумэн дикхимаренца, кай тумэ тэ пасын кхандири Дэвлэстири, пала сави Вов путиндя Пэстирэ ратэса. ²⁹ Мэ жанав, со кала мэ ужава, тумэндэ авэна холятирэ рува, савэ на тангосарэна о стадо. ³⁰ Тай машкар тумэндэ авэна мануша, савэ ашэна тэ пэрэболдэн о чячимос, соб тэ уандярэн лэ сыйярнэн пала пэстэ. ³¹ Колэсти дикхэн мишто! Сэрэн кода, со мэ трин бэрша ясвэнца, дес и рят сыйяравас годяти кожонэс тумэндар.

³² Ай икхатар мэ отдав тумэн лэ Дэвлэсти и Лэстирэ мищимастире лавэсти, савэстэ исин зор тэ терэл састэса тумаро патявимос и дэла тумэнди барвалимос

машкар Лэско свэнто народо. ³³ Мэ никастар на лавас ни руп, ни сомнак, ни йида. ³⁴ Ай тумэ ежэнэ жанэн, со мэ акалэ пэстирэ вастэнца затеравас по жувимос пэсти и колэнди, савэ сас манца. ³⁵ Андэр вся мэ сикававас тумэнди, со кадя трэбуй тэ терас бути, тэ поможысарас чёрорэнди и тэ сэрас лава Раестирэ Иисусостири: «Майбахтало исин кодва, ко дэл, сар кодва, ко лэл».

³⁶ Кала Павло пхэндя када, вов тэрдиля пэ чянга всаворэнца и манглия Дэвлэс. ³⁷ Всаворэ фартэ ровэнас тай облэнас лэ Павлос и чюминдэнас лэс. ³⁸ Онэ фартэ грыжонааспэ палай кода, со майбут никала лэс на дикхэна. Тунчи онэ проандярдэ лэ Павлос кав кораблё.

21

Павло ладэл андо Иерусалимо

¹ Кала амэ простирайле лэнца, тунчи выжыле андо море и плывисардэ ворта по острово Косо. Пэ авэр дес амэ авиле по острово Родосо, ай котар — андэ форо Патара. ² Котэ амэ аракхле кораблё, саво плывисарэлас андэ Финикия, бэшле пэр лэстэ и жыле майдур. ³ Амэ прожыле о Кипро, ашадэ лэс пай лево риг тай жыле пэ Сирия. Ай котэ авиле кав бэрэго андо Тиро, колэсти со котэ амарэсти кораблёсти трэбуй сас тэ ашавэл грузо. ⁴ Андо Тиро амэ аракхле сыйярнэн и сас лэндэ эхта деса. Онэ Духоса пхэнэнас лэ Павлости, кай тэ на жал андо Иерусалимо. ⁵ Ай кала авиля врьяма, амэ жыле майдур. Всаворэ сыйярнэ, лэндирэ ромня и бэяцэ проандярэнас амэн андав форо, тай по бэрэго амэ тэрдиля пэ чянга и манглепэ Дэвлэс. ⁶ Амэ простирайле лэнца и бэшле по кораблё, ай онэ рисайле черэ.

⁷ Амэ плывисардэ майдур и андав Тиро авиле андэ Птолемаисо. Котэ дикхлепэ лэ пхралэнца тай проандярдэ лэнца екх дес. ⁸ Ай пэ авэр дес амэ жыле андо дром и авиле андэ Кесария и ашылелэ андо чер кав Филипо-благовестнико, вов сас екх андай эхта диаконоря* Дэвлэстирэ. ⁹ Лэстэ сас штар щея. Онэ на сас пала ромэстэ тай пхэнэнас лав Дэвлэстар. ¹⁰ Тунчи, кала амэ сас котэ бут деса, андай Иудея авиля пророко, савэс акхарэнас Агаво. ¹¹ Вов поджыля амэндэ, ля Павлостири кущик, спханглия пэстирэ васта тай пхэндя:

— Свэнто Духо пхэнэл: «Акадя иудеёря андо Иерусалимо спхандэна и отдэна андэ васта найиудеёнди колэс, кастири исин кадъя кущик».

¹² Кала амэ и кола, ко жувэлас котэ, ашундэ када, ашыле тэ мангас лэ Павлос тэ на жал андо Иерусалимо. ¹³ Нэ Павло пэ када пхэндя:

— Пэр со тумэ ровэн и росшынэн манди о води? Мэ гытосардо най качи тэ авав спхангло, нэ и тэ мэрэв андо Иерусалимо важ алэв Раеско Иисусоско.

¹⁴ Кала амэндэ на выжыля тэ парувас лэско гындо, ашыле мулком тай пхэндэ:
— Мэй авэла воля лэ Раестири.

¹⁵ Кала прожыля коискачи деса амэ стидэпэ и жыле андо Иерусалимо.

¹⁶ Амэнца жыле коисавэ сыйярнэ андай Кесария. Онэ андэ амэн андо чер Мнасоноско андав Кипро, саво сас дэлмутно сыйярно, амэ ашылелэ лэстэ.

Иаково дэл думэл лэ Павлоса

¹⁷ Кала амэ авиле андо Иерусалимо, пхрала лошаса прилинэ амэн. ¹⁸ Пэ авэр дес Павло екхэтанэ амэнца жыля кав Иаково. Котэ сас всаворэ пхурэдэра. ¹⁹ Павло дя лэнди о васт и роспхэндя пала вся кода, со о Дэл тердя машкар найиудеёря черэз лэстери бути. ²⁰ Онэ выашундэ лэстай лашардэ лэ Дэвлэс. Тунчи онэ пхэндэ Павлости:

— Пхрала, ту дикхэс, скачи мии иудеёрэн патяйле, и всаворэ онэ фартэ ритярэнпэ палав Законо. ²¹ Ай пала тутэ онэ ашундэ, со ту сыйярэс иудеёнэн, савэ жувэн машкар найиудеёря, тэ отжан лэ Моисеёстирэ Законостар и пхэнэс, тэ на обшинын пэстирэ шавэн тай тэ на жувэн кадя, сар амэндэ прилито. ²² Со ж тэ терас? Онэ екхпатив ужанэна, кай ту авилян. ²³ Колэсти стер када, со амэ

* **21:8** 21.8 Дикхэн Апостолонэндирэ рындоря 6.5.

пхэнаса. Машкар амэндэ исин штар мануша, савэ солахадэ англав Дэл. ²⁴ Ай ту лэ лэн, прожа лэнца жужаримаско обрядо и потин пала лэндэ, кай онэ тэ обшынэн и бал по шэро. Ай тунчи всаворэ дикхэна, со кода, со пала тутэ пхэнэн, начячимос, и со ту жувэс пав Законо. ²⁵ Ай со трэбуй тэ терэн лэ патикунэнди найиудеёнди, амэ пистросардэ, сар лэнди тэ жувэн: нащи тэ хан хамос, саво анэн андэ жэртва идолонэнди, тэ на пэн рат и тэ на хан мас пай тасадо ското, тай тэ на терэн лубимос.

²⁶ Тунчи пэ авэр дес о Павло ля пэса калэн манушэн и прожыля екхэтанэ лэнца жужаримаско обрядо. Тунчи вов зажыля андо храмо и пхэндя, кала жужаримос прожала и кала пала кажно лэндар анэна жэртва.

Павлос хутилэн андо храмо

²⁷ Кала прожыле эхта дес, коисавэ иудеёря андай Цыкни Азия удикхле лэ Павлос андо храмо, вазгле пэр лэстэ всаворэн манушэн тай хутилдэ лэс. ²⁸ Онэ цыписавэнас:

— Мурша Израилёстирэ! Поможысарэн! Акэ мануш, саво андэ всаворэ тхана сыйярэл вырито всаворэн манушэн пала амаро народо, амаро Законо и храмо. Ай икхатар вов андя андо храмо греконэн, соса и магрисардя кадва свэнто тхан.

²⁹ Жы калэстэ онэ дикхле андо форо лэ Павлос екхэтанэ лэ эфесяниноса Трофимоса и гындосардэ, со Павло андя лэс андо храмо.

³⁰ Андо всаворо форо вазглепэ и стидэпэ и мануша. Ай лэ Павлос схутилдэ, выцырдэ андав храмо и удара лэ храмостирэ сыго запхандадэ. ³¹ Онэ камэнас тэ умарэн лэ Павлос, нэ дума пала када, со всаворо Иерусалимо вазглапэ, дожыля кав миенго римсконэс полкос. ³² Вов сыго ля халавдэн и коискачи шэлэнгонэн тай прастая кордэ, кай стидэпэ мануша. Кала иудеёря удикхле пхурэдэрэс мия халавдэн и лэстирэ халавдэн, онэ пэрэашыле тэ марэн лэ Павлос. ³³ Ай пхурэдэр мия халавдэн поджыля, ля лэ Павлос и припхэндя тэ спхандэн лэс дуе лэпунзэнца. И пушэлас кай мануша, ко вов кацаво и со вов тердя. ³⁴ Нэ сар мануша цыписавэнас кажно пэско и лэстэ на выжыля тэ ужанэл чячимос, вов припхэндя тэ одандярэн лэ Павлос андо халавдэнго чер. ³⁵ Кала онэ сас пэ лестница, бут мануша стасавэнас пай рига кадя, со халавдэнди прижыляпэ тэ андярэн лэ Павлос пэ васт. ³⁶ Пала лэндэ жанас бут мануша и цыписавэнас:

— Миринос лэсти!

Павло пхэнэл лав лэ манушэнди

³⁷ Ай кала поджыле кав халавдэнго чер, Павло пхэндя миенгости:

— Чи домукэллэ манди тэ пхэнав тути варисо?

— Ту жанэс греконэндири шыб? — пушля пхурэдэр мия халавдэн. ³⁸ — Тунчи ту на кодва египтянино, саво коискачи вряза палпалэ вазглия лэ манушэн и уандярдя андэ мал штар мии пракхарен?

³⁹ Ай о Павло пхэндя:

— Мэ иудеё андав Тарсо, саво андэ Киликия, мануш барэ форостар. Мангав тут, дэ манди тэ пхэнав лав үй мануша.

⁴⁰ И кала о пхурэдэр домукля лэс тэ дэл дума, о Павло вшиля пэ лестница и сикадя вастэса, кай тэ ашэн мулком и мануша. Ай кала онэ ашыле мулком, вов задя дума пай евреёнэндири шыб.

22

¹ — Пхрала и дада! Дэн манди тэ пхэнав лав пала пэстэ.

² Кала онэ ашундэ, со вов дэл дума пай евреёнэндири шыб, тунчи всаворэ инке майфартэ заашыле мулком. Вов пхэндя:

³ — Мэ иудеё, саво бэяндилем андо Тарсо андэ Киликия, нэ выбарилем андэ кадва форо. Мэ сымас мишто сыйярдо Законости амарэ дадэнго кав Гамалиило. Мэ всаворэ водеса прэдино лэ Дэвлэсти, сар и кажно тумэндар адес. ⁴ Мэ гонисаравас и маравас жыкай миринос колэн, ко жалас Раестирэ Дромэса,

астаравас лэ муршэн и лэ жувлян тай шавас лэн андо баруно. ⁵ Допхенимаря калэсти, со пхэнав, — баро рашай и стидимос пхурэдэрэнго. Мэ прилем лэндар лила кай пхрала андо Дамаско и жылем кордэ, соб тэ лав колэн, ко жалас пав Дром и тэ анав лэн андо Иерусалимо, кай тэ помарэн.

⁶ Пав дром, кала мэ поджавас кав Дамаско, варикай андо епашдес, кала мэ на ажуяравас, мэ ашылемпэ андрал баро удууд болыбнастар, пэ саво нащи сас тэ дикхав. ⁷ Мэ пэлем пэ пхув и ашундэм гласо, саво пхэнэлас манди: «Савло! Савло! Сости ту гонисарэс Ман?» ⁸ Мэ пушлем: «Ко Ту, Рай?» Вов пхэндя: «Мэ Иисус андав Назарето, Савэс ту гонисарэс». ⁹ Кола, ко сас манца, дикхле удууд, нэ гласо, саво мэ ашундэм, онэ на ашундэ. ¹⁰ Мэ пушлем: «Рае, со манди тэ терав?» Ай о Рай пхэндя манди: «Вщи и жа андо Дамаско. Котэ тути пхэнэна вся, со тути трэбуй авэла тэ терэс». ¹¹ Удууд, саво мэ дикхавас сас кацаво зорало, со мэ корайлем. Колэсти кола, савэ сас манца, андэ ман палав васт андо Дамаско.

¹² Котэ мандэ авиля дэвлэкуно мануш, савэс акхарэнас Анания. Вов тэрэлас вся, со пхэнэлас Законо, тай всаворэ иудеёя, савэ жувэнас котэ, пативаса обжанаспэ лэса. ¹³ Вов тэрилия паша мандэ тай пхэндя: «Пхрал Савло, мэк отпхэрнавэнпэ тирэ яхка!» И андэ кодья ж врязма мэ ашылем тэ дикхав и дикхлем калэс манушэс. ¹⁴ Вов пхэндя манди: «Дэл амарэ дадэнго вытия тут, кай ту тэ ужанэс Лэстири воля, тэ удикхэс Чячимастирэс и тэ ашунэс гласо андай Лэстирэ ушта. ¹⁵ Ту авэса тэ пхэнэс всаворэнди манушэнди пала вся, со ту дикхлян и ашундян. ¹⁶ Ай икхатар, со ту цырдэс врязма! Вщи, акхар Лэско алав, прилэ болдимос тай схалав пэстирэ бэзэхэ».

¹⁷ Тунчи мэ рисайлем андо Иерусалимо, и кала мэ мангаваспэ Дэвлэс андо храмо, манди сикадяпэ дикхимос. ¹⁸ Мэ дикхлем Раес, Саво пхэндя манди: «Майсыго выжга андав Иерусалимо, колэсти со катэ на прилэна тиро допхенимо пала Мандэ». ¹⁹ Ай мэ пхэндэм: «Рай, кала мануша жанэн, со мэ пхиравас андай екх синагога андэ авэр синагога, соб тэ лав и тэ марав колэн, ко патял андэр Тутэ. ²⁰ И кала питялас о рат пав Стэфано, саво сас Тиро допхеними, мэ тэрдювавас котэ, подритяравас колэн, ко умарэлас лэс, и дикхавас палай лэндири йида». ²¹ Тунчи Вов пхэндя манди: «Жа, Мэ бишалав тут дур кай найиудеёя».

Павло англов пхурэдэр мия халавдэн

²² Жыкай кала лава мануша ашунэнас Павлос, нэ катэ ашыле тэ цыписавэн:

— Тэ скхосэ лэс пхувьятар! Лэсти на трэбуй тэ жувэл!

²³ Онэ цыписавэнас, сшынэнас пэр пэстэ йида и шонас упрэ пош. ²⁴ Пхурэдэр мия халавдэн припхэндя тэ уандярэн лэ Павлос андо халавдэнго чер. Вов припхэндя тэ марэн лэс чюкнянца тай тэ допушэн, пала со и мануша ваздэнпэ пэр лэстэ. ²⁵ Нэ кала лэ Павлос припхангле күщикэнца, соб тэ марэн, вов пхэндя шэлэнгости, саво тэрдёлас паша лэстэ:

— Чи домукэлпэ тумэнди тэ марэн чюкнянца римостирэс манушэс, тай инке бисындоско?

²⁶ Кала шэлэнго када ашундя, вов жыля и допхэндя пхурэдэрэсти мия халавдэн.

— Со ту терэс? Када римоско мануш, — пхэндя вов.

²⁷ Пхурэдэр выжыля кав Павло тай пушля:

— Ту римоско мануш?

— Агэ, — пхэндя Павло.

²⁸ Тунчи пхурэдэр пхэндя:

— Манди трэбуй сас тэ потинав бут ловэ, соб тэ авав римоско мануш.

— Ай мэ бэяндилем римоско манушэса, — пхэндя Павло.

²⁹ Кола, савэ камле лэс тэ допушэн, сыго отжыле лэстар. Пхурэдэр пэрэдараилья, кала ужангля, со вов спхангля лэпунзэнца римостирэс манушэс.

30 Ай пэ авэр дес пхурэдэр мия халавдэн камэлас чячес тэ ужанэл, андэр со иудеёя ужылисарэнас Павлос, роспхангля и лэпунзэ тай припхэндя, соб тэ стидён барэ рашая тай всаворо Синедрионо. Тунчи вов андярдя Павлос и тховдя англай лэндэ.

23

1 Павло мишто вдикхляпэ пэ Синедрионо и пхэндя:

— Пхралалэ, жыкай адесутно дес мэ жувавас жужаса пативаса англав Дэл.

2 Катэ о баро рашай Анания припхэндя колэнди, ко тэрдёлас пашэ лэ Павлоса, тэ арэсэл лэс пай ушта. **3** Тунчи Павло пхэндя:

— О Дэл арэсэла тут, дуемуенго мануш! Ту бэшэс катэ, соб тэ сындосарэс ман пав Законо ай ежэно отжас лэ Законостар, и припхэнэс тэ марэн ман!

4 Кола, савэ тэрдёнас пашав Павло, пхэндэ лэсти:

— Ту со, акушэс лэ барэ рашаес лэ Дэвлэс?

5 Ай Павло пхэндя:

— Пхралалэ, мэ на жанглем, со вов баро рашай. О Пистросаримос пхэнэл: «На пхэн выrito палав пхурэдэр тирэ народостар».

6 Павло жанэлас, со андо Синедрионо екх сас садукеёя, ай авэр — фарисеёя. Колэсти вов зоралэ гласоса пхэндя:

— Пхрала, мэ фарисеё, шаво фарисеёстиро! Ай ман сындосарэн палай надия, со мулэ жундёна.

7 Кала вов када пхэндя, фарисеёя тай садукеёя ашыле тэ споринпэ, и стидимос розжыляпэ андэ дума. **8** Колэсти со садукеёя пхэнэн, со и мулэ на жундён и нинай ни ангелонэн, ни духонэн. Ай фарисеёя патян, со исин и кода и авэр. **9** Вазгляпэ баро цыпимос, коисавэ сыйтаримаря Законостириэ андай фарисеёя холяса пхэндэ:

— Амэ на дикхас андэ өдөр мануш нисо выrito. Со, кала лэсти пхэнэлас духо чи ангело?

10 Онэ линэ тэ споринпэ кадя, со пхурэдэр мия халавдэн дарайля, соб лэ Павлос тэ на росшынэн пэ котора, и припхэндя халавдэнди зораса тэ выхутилэн лэс лэндар и тэ уандярэн андэ халавдэнго чер.

11 Пэ авэр рят кав Павло авиля о Рай и пхэндя:

— Ав састэса! Сар ту допхэнэсас пала Мандэ андо Иерусалимо, кадя ж ту трэбуй тэ допхэнэс и андо Римо.

Иудеёя гындон тэ умарэн лэ Павлос

12 Ай дэнзор коисавэ иудеёя стидэпэ и солахадэ нисо тэ на хан и тэ на пэн жыкай, кала умарэна лэ Павлос. **13** Кадя допхэндэпэ тэ терэн варикай саранда манушэн. **14** Онэ жыле кай барэ рашая и пхурэдэра тай пхэндэ:

— Амэ солахадям нисо тэ на лас андо муй, жыкай на умараса лэ Павлос. **15** Ай икхатар тумэ и Синедрионо мангэн пхурэдэрэс мия халавдэн тэ анэн лэс тумэндэ важ кода, соб майпашэ тэ роздикхэн лэско рындо. Ай амэ аваса гытомэ и умараса лэс инке жыкай, кала вов дожала кардэ.

16 Палай кадай чёрэхани дума ужангия лэ Павлоско пхэятиро шаво. Вов жыля андо халавдэнго чер и роспхэндя када лэ Павлости. **17** Тунчи Павло подакхардя екхэс андай шэлэнго и пхэндя лэсти:

— Одандярэн акалэс шаворэс кав пхурэдэр мия халавдэн, лэстэ исин варисо тэ пхэнэл.

18 Пхурэдэр шэлэн халавдэн одандярдя лэ шаворэс кав пхурэдэр мия халавдэн и пхэндя:

— Павло, саво бэшэл затердо, акхардя ман и мангия тэ анав калэс шаворэс тутэ. Лэстэ исин варисо тэ пхэнэл туты.

19 Пхурэдэр мия халавдэн ля лэ шаворэс палав васт, одандярдя андэ риг тай пушля:

— Со ту манди камэс тэ роспхэнэс?

20 Шаворо пхэндя:

— Иудеёря допхэндэл тэ мангэн тут, соб ту тэ анэс тэся лэ Павлос по Синедрионо, сар бы важ кода, соб майфэдэр вся тэ ужанэн. ²¹ Нэ ту калэсти на патя, колэсти со лэс поджуутярэн майбут, сар саранда манушэн. Онэ солахадэ тэ на хан и тэ на пэн, жыкай на умарэна лэс. И онэ тэрдён гытосардэ и ажутярэн, со ту стерэса кадя, сар онэ мангле.

²² Тунчи пхурэдэр мия халавдэн отму克ля шаворэс тай пхэндя лэсти:

— Никасти на роспхэн пала кода, со ту манди пхэндян.

Павлос андярэн андэ Кесария

²³ Тунчи пхурэдэр мия халавдэн выакхардя дуй пхурэдэрэн шэлэн халавдэн и припхэндя:

— Гытосарэн дуйшэл халавдэн, эхтадэш, савэ бэшэн пэ граста, и дуйшэл, савэ андярэн копьюоря, кай тэ жас андэ Кесария андэ иня чясоря ратятерэ. ²⁴ Гытосарэн лэ Павлости грастэс, кай бибидако тэ доладэл вов кав баро рай Фэликсо.

²⁵ И вов пиистросардя кацаво лил:

²⁶ «Клавдиёстар Лисиёстар,

Пативалэсти барэ раести Фэликсости:

Тэ авэс бахтало!

²⁷ Иудеёря схутилдэ калэс манушэс и стидэнаспэ тэ умарэн лэс. Нэ мэ ужанглем, со вов римоско мануш, авилем халавдэнца и фэрисардэм лэс. ²⁸ Мэ камлем тэ ужанав, андэр со онэ лэс ужылисарэн, тай андэм лэс андэ лэнго Синедрионо. ²⁹ Мэ аракхлем, со онэ ужылисарэн лэс пала лэнго Законо, нэ пэ лэстэ нинай нисаво ужылимос, пала сави трэбуйтэ умарэн читэ запхандавэн андэ лэпунзэ. ³⁰ Нэ кала манди пхэндэ, со лэс камэн тэ умарэн, тай мэ сыго одандярдэм лэс тутэ и припхэндэм колэнди, ко ужылисарэл лэс, тэ допхэнэн пэстирэ лава англав тутэ».

³¹ Тунчи халавдэ тердэ кода, со лэнди припхэндэ, линэ Павлос тай рятяса андярдэ андэ Антипатрисо. ³² Ай пэ авэр дес халавдэ пэ граста андярдэ лэс майдур, а авэр халавдэ рисайле андо халавдэнго чер. ³³ Кала кола, савэ ладэнас пэ граста, авиле андэ Кесария, отдинэ о лил барэ раести тай пэрэдинэ лэсти Павлос.

³⁴ Баро рай пробиндя лил тай пушля Павлостар, андай сави вов пхув. Кала вов ужанггия, со Павло андай Киликия, ³⁵ пхэндя:

— Мэ выашунава тут кала авэна кола, ко ужылисарэл тут, — и припхэндя соб лэ Павлос тэ запхандавэн андо баро чер Иродоско.

24

Иудеёря ужылисарэн лэ Павлос

¹ Кала прожыле панч деса, баро рашай Анания, коисавэ пхурэдэра, тай мануш саво жанэл законо Тертуло авиле андэ Кесария, соб тэ ужылисарэл англов баро рай лэ Павлос. ²⁻³ Ай сар заандярдэ лэ Павлос, о Тертуло ашияя тэ ужылисарэл лэс.

— Пативало Фэликсо! Ту и тирэ годятирэ парувима важ амаро народо андярэн амэнди састо миро. Амэ пэ всаворэ тхана и андэ всавори врьяма прилас када и наисарас тут. ⁴ Кай тэ на залав тири врьама, мэ мангав тут пав пэско мищимос выашун мэрно налунгнуно лав. ⁵ Амэ аракхас, со кадва мануш — сар найлащи дукх. Вов ваздэл лэ иудеёнэн пай всавори люма и исин пхурэдэр пай назаретоско стидимос. ⁶⁻⁷ Вов кадя ж камэлас тэ магрисарэл о храмо. Колэсти амэ схутилдэ лэс*. ⁸ Кала ту допушэса лэс, ту ежэно ужанэса пала вся, андэр со амэ ужылисарас лэс.

⁹ Иудеёря кадя ж ужылисаренас лэ Павлос и пхэненас, со када вся чячимос.

Павло пхэнэл лав пала пэстэ

* ^{24:6-7} 24.6-7 Андэ коисавэ гречески манускрипторя инке исин кацавэ лава: «и камле тэ сындосарас пай амаро Законо. Нэ пхурэдэр мия халавдэн Лисиё зораса залия лэс амэндар тай припхэндя колэнди, ко лэс ужылисарэлас».

10 Баро рай сикадя лэ Павлости, кай вов тэ дэл дума, и кодва ашыля тэ пхэнэл:

— Мэ жанав, со ту бут бэрша сындос кадва народо, и колэсти лошаса пхэнава лав пала пэстэ. **11** Тути напхарэс авэла тэ ужанэс кода, со на майбут, сар дэшудуй деса палпалэ мэ авилем тэ тэллював Дэвлэсти андо Иерусалимо. **12** Кола, савэ ман ужылисарэн, на дикхле, кай мэ тэ спорисавав варикаса андо храмо и тэ ваздав лэ манушэн андэ синагоги тай андэ саво-то тхан фороско. **13** Онэ на допхэнэна кода, андэр со икхатар ман ужылисарэн. **14** Мэ прижандював тути, со жав пав Дром Раеско, саво онэ акхарэн хохавно сыйяримос. Мэ тэллював Дэвлэсти амарэ дадэнго, патяв всаворэсти, со пистросардо андо Законо тай андэ пророкондирэ лила. **15** Мандэ кацави ж надия по Дэл, сар и колэндэ манушэндэ, — надия, со чячимастирэ и найчячимастирэ жундёна мулэндар. **16** Важ кода мэ терав вся, кай тэ жував жужаса пативаса англав Дэл и англай мануша.

17 Мэ на сымас катэ коискачи бэрша, ай тунчи авилем андо Иерусалимо, кай тэ пэрэдав мэрнэ народости ловэ, савэ стидэ важ чёрорэ, и тэ анав жэртва. **18** Ай ман дикхле андо храмо, кала мэ теравас жужаримаско обрядо. Катэ на сас нисаво цыпсаримаско стидимос, и нико на ваздэласпэ. **19** Жыкай кала авиле коискачи иудеёря андай Цыкни Азия. Лэнди и трэбуй сас ман тэ ужылисарэн, сар исин андэр со. **20** Мэк мануша, савэ катэ исин, пхэнэн, саво найчячимос онэ аракхле андэ кода, со мэ теравас, кала ман допушэлас Синедрионо. **21** Мэ домукав, со ужыло андо кода, со, кала тэрдювавас котэ, цыпсайлел:

— Ман сындосарэн пала кода, со мэ патяв, со жундёна мулэ!

22 Тунчи Фэликсо, саво майфэдэр жанэлас пала Дром, пхэндя:

— Мэ пхэнава пэско лав палав кадва рындо, кала авэла пхурэдэр мия халавдэн Лисиё.

23 Вов припхэндя пхурэдэрэсти шэлэн халавдэн тэ дикхэл палав Павло, нэ тэ дэл лэсти найбут воля и тэ домукэл лэстирэ амалэн тэ подритярэн лэ Павлос.

24 Кала прожыле коискачи деса, о Фэликсо авиля пэстирия ромняса, сави сас иудейка, ла акхарэнас Друзила. Вов бишалдя палав Павло, кай тэ поашунэн палав лэско патявимос андо Иисусо Христосо. **25** Павло дэлас дума палав жужымаско жувимос, со трэбуй тэ ритярэл пэс андэ васта и палав сындо, саво авэла. Фэликсо пэрэдараилья тай пхэндя:

— Хутилэла пэ адес! Жатар! Сар трэбуй авэла, мэ тут акхарава.

26 Вов кадя ажутярэлас, со Павло дэла лэсти ловэ, колэсти бут молоря припхэнэлас тэ анэн лэс и дэлас дума лэса.

27 Прожыля дуй бэрш, по Фэликсоско тхан тэрдиля Порцыё Фэсто. Ай о Фэликсо камля тэ терэл мишто иудеёнди и ашадя лэ Павлос андо баруно.

25

Павло домарэлпэ кай тэ авэл сындо императороско

1 Фэсто сас андэ кадай пхув трин деса, ай тунчи отлагля андай Кесария андо Иерусалимо. **2** Котэ барэ рашая тай майанглунэ андай иудеёря подинэ лэсти ужылимос по Павло. **3** Онэ фартэ умангэнас лэ Фэстос, кай вов терэл лэнди мишто тай тэ пэрэандярэл лэ Павлос андо Иерусалимо. Ай ежэнэ камэнас тэ нахукэн пэ лэс пав дром и тэ умарэн. **4** Фэсто пхэндя:

— О Павло бэшэл запхандадо андэ Кесария. Мэ кадя ж сыго авава котэ. **5** Мэк тумарэ майбарэ пхурэдэра жан манца и сикавэн, андэр со вов ужыло, сар вов тердя варисо вырито.

6 Фэсто сас лэнца пашай охто чи дэш деса, тунчи рисайля андэ Кесария. Пэ авэр дес бэшля по сындомарёско тхан тай припхэндя тэ анэн лэ Павлос. **7** Ай кала лэ Павлос андэ, иудеёря, савэ авиле андав Иерусалимо, линэ тэ ужылисарэн лэс андэ бут найлашэ рындоря, нэ лэндэ на выжыля варисо тэ допхэнэн. **8** Павло ашыля тэ допхэнэл пэско чячимос и пхэндя:

— Мэ на тердэм бэзэх ни англав иудеёско Законо, ни англав храмо, ни англав императоро.

⁹ Фэсто камля тэ терэл мишто лэ иудеёнди, колэсти пушля лэ Павлос:

— Ту камэс тэ жас андо Иерусалимо, кай мэ котэ тут тэ сындоцарав?

¹⁰ Павло пхэндя:

— Мэ тэрдював англав сындо императороско, и лэсти трэбуй ман тэ сындоцарэл. Мэ на тердэм иудеёнди нисави бида, сар ту и ежэно мишто жанэс. ¹¹ Сар терав найччимос и ман трэбуй тэ умарэн, мэ гытосардо тэ мэрэв. Нэ сар иудеёра ужылисарэн ман йивья, тунчи никасти нащи тэ выдэн ман лэнди. Мэк ман сындоцарэл императоро!

¹² Тунчи Фэсто пэрэдя дума пэстирэ подпхэнирэмаренца и пхэндя:

— Сар ту мангэс лэ императороско сындо, тунчи кав императоро и авэса.

Павло англав тхагар Агрипа

¹³ Кала прожыле коискачи деса, кав Фэсто андэ Кесария авиле тхагар Агрипа и Берника, кай тэ дикхэндэлээ лэс. ¹⁴ Онэ сас котэ бут деса, и Фэсто роспхэндя лэ тхагарости палаврындо лэ Павлоско:

— Катэ исин мануш, савэс Фэликсо ашадя андо баруно. ¹⁵ Кала мэ сымас андо Иерусалимо, иудеёндирэ барэ рашая и пхурэдэра ужылисарэнас лэс тай мангэнас тэ прижанэл лэс ужылэс. ¹⁶ Ай мэ пхэндэм лэнди, со римлянонэндэ на прилито тэ выдэн лэ манушэс, жыкала вов на дикхэлэлээ лэ ужылимаренца и на пхэнэла лав пала пэстэ. ¹⁷ Онэ авиле манца кардэ, и пэ авэр дес мэ бэшлем по сынодомарёско тхан и припхэндэм, кай тэ анэн калэс манушэс. ¹⁸ Лэстирэ ужылисаримаря тэрдиле англав лэстэ, нэ на сикадэ нисо, со мэ бинавас бы выритонэрындоса.

¹⁹ Када сас спорно дума палав лэнго патявимос и палав саво-то Исусо, Саво муля, нэ Павло састэс пхэнэлас, со Вов жундо. ²⁰ Мэ на жанавас, сар тэ розлав кадварындо, и пушлем лэстар, чи камэл вов тэ жал андо Иерусалимо и котэ тэ авэла сындоцардо. ²¹ Нэ Павло мангля, кай лэскорындо тэ роздикхэл майбаро, колэстар мэ припхэндэм тэ ритярэн лэс запхандадэса, жыкала мэ бишалава лэс кав майбаро императоро.

²² Агрипа пхэндя лэ Фэстости:

— Мэ кадя ж камав тэ поашунав калэс манушэс.

— Тэся ашунэса лэс, — пхэндя Фэсто.

²³ Пэ авэр дес о Агрипа тай Берника барэ пхутимаса зажыле андо баро зало. Лэнца авиле пхурэдэра мия халавдэн и жанглэ форостириэ мануша. Фэсто припхэндя тэ заандярдэн лэ Павлос. ²⁴ Тунчи Фэсто пхэндя:

— Тхагар Агрипа и всаворэ, ко исин пэ кадва тхан! Тумэ икхатар дикхэнанглай пэстэ манушэс, пэ саво бут иудеёра жалисавэнас манди, сар андо Иерусалимо кадя ж и катэ. Онэ цыписавэн, со лэсти нащи тэ жувэл. ²⁵ Сар мэ аракхлем, вов нисо на тердя, пала со лэс трэбуй тэ умарэл. Нэ сар вов мангля, кай лэс тэ сындоцарэл майбаро императоро, мэ камав тэ бишалав лэс андо Римо. ²⁶ Нэ манди нинай, со тэ пистросарав пала лэстэ раести, и колэсти мэ выандярдэм лэс тумэндэ тай майанглал, тутэ, тхагар Агрипа, кай ту лэс тэ допушэс. Тунчи мэ авава тэ жанав, со манди тэ пистросарав. ²⁷ Мэ гындосарав, со када ногодярванэс, кай варико тэ бишалэл барунарес и тэ на сикавэл, андэр со лэс ужылисарэн.

26

Павло пхэнэн лав пала пэстэ

¹ Тунчи Агрипа пхэндя Павлости:

— Тути домукэллээ тэ пхэнэс лав пала пэстэ.

Павло взагля пэско васт тай ля тэ дэл дума:

² — Тхагар Агрипа! Мэ бахтало тэ допхэнав адес тути пэско чяччимос англай всаворэ иудеёра, савэ ужылисарэн ман. ³ Ту фартэ мишто жанэс пала вся, со

прилите машкар иудеёря и пала со онэ ханпэ. Колэсти мангав тут, терпиримаса выашун ман.

⁴ Всаворэ иудеёря жанэн, сар мэ тэрнимастар жувавас машкар мэрно народо андо Иерусалимо. ⁵ Онэ дэлмут жанэн ман, и сар закамэна, допхэнэна, со мэ сымас фарисеё и жувавас пав майсастро сыйтрямос андэ амаро патявимос. ⁶ Ай адес мэ тэрдював англав сындо пала пэстири надия пэ лав, саво дя о Дэл амарэнди дадэнди. ⁷ Дэшудуй родоря амарэ народостирэ дес и рят всавораса зораса терэн бути важо Дэл тай ажутярэн, кала терэлапэ кадва лав. Пала надия пэ када, тхагар, ман ужылисарэн иудеёря. ⁸ Тумэ бинэн, со пхарэс тэ патян андо кода, со о Дэл жундярэл мулэн?

⁹ И мэ кадя ж гындосаравас, со манди трэбуй тэтирав вся, со андэ мэрно зор, пэ холи алавэсти Иисусостирэс андав Назарето. ¹⁰ Када мэ и теравас андо Иерусалимо. Мэ прилем зор лэ барэ рашаендар и пхандававас андо баруно бутэн свэнтонэ манушэн, ай кала лэн сындосарэнас по миримос, мэ отдавас пала када пэско гласо. ¹¹ Мэ бут молоря маравас лэн андэ всаворэ синагоги, кай онэ тэ отпхэндён пэстирэ патявимастар. Мэ сымас кацаво холяко пэр лэндэ, со гонисаравас лэн андэ авэр фороря.

¹² Екхвар мэ ладавас андо Дамаско припхэнимаса и зораса лэ барэ рашаендар. ¹³ Пав дром кордэ, тхагар, мэ удикхлем удуд болыбнастар, саво свэнтояспэ майфартэ, сар о кхам. Мэ и ко жалас манца ашылепэ андрал калэс удудэстар. ¹⁴ Амэ всаворэ пэле пэ пхув, ай мэ ашундэм гласо, саво дэлас дума манца пай евреёнэндири шыб: «Савло! Савло! Сости ту гонисарэс Ман? Пхарэс тути тэ жас пэр Мандэ*». ¹⁵ Тунчи мэ пушлем: «Ко Ту, Рай?» «Мэ Иисусо, Савэс ту гонисарэс, — пхэндя Рай. — ¹⁶ Вщи и тэрдюв. Мэ авилем, кай тэтирав тут Мэрнэ бутярнэса, кай ту тэроспхэнэс пала кода, со дикхлян, со Мэ тути сикавава. ¹⁷ Мэ фэрисарава тут тирэ народостар и найиудеёндар, савэндэ Мэ тут бишалав. ¹⁸ Кай ту отпхэрнадян лэнди якха и обрисардян лэ калимастар кав удуд, тай рисардян лэн андав Сатанаско васт кав Дэл, соб лэндирэ бэзэха тэ авэн эртисардэ и онэ тэ авэн машкар кола, кас Мэ свэнтосардэм патявимаса андер Мандэ».

¹⁹ Тхагар Агрипа, манди нащи сас тэ на кандав болыбнаско дикхимос. ²⁰ Майанглал мэ ашылем тэроспхэнав колэнди, ко сас андо Дамаско, тунчи колэнди, ко жувэнэс андо Иерусалимо и андэ Иудея. Ай тунчи ашылем тэпхэнав найиудеёнди, кай онэ тэкаисавэн аглаг Дэл тай тэ сикавэнрындонэнца, со онэ чячимаса каисайле. ²¹ Пала када иудеёря схутилдэ ман андо храмо и камле тэ умарэн. ²² Нэ о Дэл жыкай адесутно дес поможысарэл манди, и акэ мэ тэрдював катэ и допхэнав цэknэнди тай барэнди. Мэ пхэнав качи кода, со пхэнэнэс пророкоря и Моисеё. ²³ Мэ пхэнав, со лэ Христости трэбуй сас тэ пэрэндярэл грыжа, англунэсти тэ жундёл андай мулэ тай тэроспхэнэл амарэ народости, тай найиудеёнди пала удуд».

²⁴ Кала вов кадя дэлас дума, Фэсто цыписайля.

— Ту на андэ пэстири годи, Павло! Баро ервалимос заандярдя тут годятар!

²⁵ Павло пхэндя:

— Пативало Фэсто, мэ на дилийлем, ай кода, со мэ пхэнав исин чячимос и годявимос. ²⁶ Тхагар, англав саво мэ отпхэрнадо дав дума, када вся жанэл. Мэ патяв, со вся када, на сас гаравдо лэстар, кадя сар сас тердо на андо гаравдо тхан.

²⁷ Тхагар Агрипа, ту патяс пророконди? Мэ жанав, со патяс!

²⁸ — Ту кадя сыго камэс тэтерэс ман христианиноса? — пхэндя Агрипа лэ Павлости.

²⁹ Павло пхэндя:

— Скачи када врьма тэ на авэл, сыго ай лунго, мэ мангав Дэвлэс, кай качи найекх ту, нэ и всаворэ, ко ашунэл ман адес, тэ ашэн, сар мэ, качи билэпунзэ.

* ^{26:14} 26.14 Пэ греконэндири шыб «тути пхарэс тэ марэл пэрнэнца пэр остро рули». Када рули, савяса пасынаас о ското.

³⁰ Тунчи тхагар вшиля, и лэса вшиле баро рай, Берника и всаворэ, ко сас лэнца.
³¹ Онэ выжыле тай пхэнэнас екх екхэсти:

— Кадва мануш на тердя нисо, кай лэс тэ умарэн чи тэ запхандавэн андэ лэпунзэ.

³² — Мэ отмуклем бы лэс, нэ вов мангия сындо кав императоро, — пхэндя Агрипа Фэстости.

27

Павлоско дром андо Римо

¹ Кала сас прилито, со амэ плывисараса андэ Италия, тунчи лэ Павлос и аврэн коисавэн барунарэн, пэрэдинэ шэлэнгэсти, савэс акхарэнас Юлиё, андав майбарэско императороско полко. ² Амэ бэшле по кораблё андав порто Адрамитино, савэсти трэбуй сас тэ плывисарэл андэ порторя Цыкня Азиятире, тай плывисардэ андо дром. Амэнца сас македонянино Аристархо андай Фесалоника.

³ Пэ авэр дес амэ плывисардэ кав Сидоно. О Юлиё мишто обжаласпэ лэ Павлоса и отмукля лэс, кай вов тэ жал и тэ дикхэлпэ пэстирэ амалэнца, кай онэ тэ поможысарэн лэсти. ⁴ Балвал пхурдэлас пэр амэндэ и амэ упалэ плывисардэ андо море и прожыле о Кипро пай бибалвалятири риг. ⁵ Амэ плывисарасас пай море пашай бэрэгоря Киликияко тай Памфилияко и авиле андо Ликияко форо Мира. ⁶ Котэ шэлэнго аракхля кораблё андай Александрия, саво плывисарэлас андэ Италия, и тховдя амэн пэр лэстэ. ⁷ Коискачи деса амэ поцыра плывисарасас англэ. Сас фартэ пхарэс, нэ амэ екхпатив авиле андо Книдо. Ай сар балвал на дэлас амэнди тэ жас англэ, амэ обжыле мысо Салмона и плывисардэ пав Крито бибалвалятия ригатар. ⁸ Амэ барэ пхаримаса плывисарас пашав бэрэго и авиле по тхан, саво акхарэлпэ Лашэ Бухторя, найдур лэ форостар Ласея.

⁹ Амэ хасардэ бут врязма, кай тэ плывисарас майдур сас хасаримаса важ жувимос, колэсти со прожыля постоско дес*. Тунчи Павло пхэндя лэнди:

¹⁰ — Мэ дикхав, со дром авэла пхаро и выжала, со амэ хасараса, на качи грузо и кораблё, нэ и амаро жувимос.

¹¹ Нэ о шэлэнго на кангия лэ Павлос, ай кангия, со пхэндэ лэсти капитано и кораблэско хулай. ¹² Кадья бухта на поджалас, кай котэ тэ пэрэвингярэн, и майбут мануша камле тэ плывисарэ майдур, кай сар-то тэ доплывисарэн кай Финиксо и котэ тэ пэрэвингярэн. О Финиксо, када бухта по Крито, сави отпхэрнади пэ юго-западо тай северо-западо.

Бари балвал пэ море

¹³ Пхурдя локхи южно балвал, лэнди сикадиля, со прилинэ кода, со трэбуй. Тунчи морякоря подлинэ о якорё и плывисардэ пашав Критоско бэрэго. ¹⁴ Нэ сыго пай островостири ригатар нахукля фартэ бари северо-восточно балвал, сави акхарэлпэ Эвракилоно. ¹⁵ Балвал подхутилдя о кораблё. Амэндэ на выжалас тэ жас англав балвал. Амэ здинэпэ и балвал андярдя амэн. ¹⁶ Амэ подплывисардэ кав цэктээ острою Кавда, саво сас пэ бибалвалятири риг. Котэ амэ барэ пхаримаса фэрисардэ о чёвно, ¹⁷ кала взагле лэс по кораблё. Тунчи матросоря процырдэ дуря талав кораблё и об phxanggle лэс. Онэ даранас, со кораблё бэшэла по тишай андо Сирто, колэсти онэ обмукле парусо и балвал андярдя амэн майдур. ¹⁸ Бары балвал кадя фартэ шолас о кораблё, со пэ авэр дес амэ ашыле тэ вышас грузо андав кораблё. ¹⁹ Ай по трито дес амэ пэстирэ вастэнца вышутэ андо море кораблэско хулаимос. ²⁰ Бут деса на душолас ни о хам, ни чиргая, ай бары балвал пхурдэлас инке майфартэ. Амэ хасардэ всавори надия пэ фэрисаримос. ²¹ Мануша бут врязма нисо на ханас. Тунчи Павло вшиля машкар лэндэ и пхэндя:

* ^{27:9} 27.9 Иудеёнго свэнко Йом Киппур; лэс свэнторэнас андэ палатунэ сентябрёстирэ деса.

— Муршалэ! Тумэнди трэбуй сас тэ кандэн ман и тэ на плывисарэн лэ Критостар, тунчи тумэндэ на авэлас грыжа и нисо б на хасавэлас. ²² Нэ икхатар мангав: ваздэнпэ духодса, нико тумэндар на хасавэла, качи розмардёлапэ о кораблё. ²³ Кола рятия мандэ авиля ангело Дэвлэстар, Савеско мэ исин и Савэсти тэлював. ²⁴ Вов пхэндя манди: «Павло, на дара. Тути трэбуй авэла тэ тэрдэс англав императоро, тай о Дэл, пай Пэско мищимос, дя тути всаворэн, ко плывисарэл туса». ²⁵ Муршалэ! Ваздэнпэ духодса! Мэ патяв Дэвлэсти и жанав, со вся авэла кадя, сар Вов манди пхэндя. ²⁶ О кораблё авэла вышто пэ варисаво острово.

Кораблёско хасаримос

²⁷ Пэ дэшуштарири рят, кала амэн инке андярэлас пав Адриатическо море, андэ епашият матросоря поле, со подладэн кай пхув. ²⁸ Онэ ужангле, пробиндэ скачи сас кав дно и ужангле, со сас варикай трянда шов метроря, ай кала прожыля найбут връяма онэ упалэ побиндэ и аракхле, со кав дно сас бишта эхта метроря. ²⁹ Матросоря даранас, кай тэ на арэсэл амэн андэ бара, и зму克莱 пав палатуно тхан по кораблё штар якоря и мангэнас, кай майсыго тэ авэл дес. ³⁰ Онэ камле тэ нашэн пав кораблё тай линэ тэ змэкэн чёвно по пай, притерэнаспэ, со камэн тэ змукэн пав кораблёско нак якорё. ³¹ Нэ о Павло пхэндя пхурэдэрэсти шэлэн халавдэн и халавдэнди:

— Сар кала мануша на ашэнапэ по кораблё, тунчи тумэ на фэрисавэнапэ.

³² Тунчи халавдэ пэрэшиндэ дуря, савэ ритярэнас чёвно, и вов пэля андо море.

³³ Ай англав дэнзор Павло мангля манушэн, кай онэ тэ хан.

— Акэ адес дэшуштар дес тумэ ажутярэн дараса и нисо инке на хале, — пхэндя вов. ³⁴ — Ай колэсти мэ тумэн мангав тэ хан, и када поможысарэла тумэнди тэ фэрисавэн. Ни кастэ тумэндар на пэрэла бал пав шэро.

³⁵ Кала вов када пхэндя, ля о марно, англай всаворэндэ наисардя пала лэстэ лэ Дэвлэс, пхагля лэс и ля тэ хал. ³⁶ Манушэн када подритярдя, и онэ всаворэ линэ тэ хан. ³⁷ Всаворэн манушэн, савэ сас по кораблё, сас дуйшэл эхтадэшушов. ³⁸ Кала и мануша чялиле, онэ линэ тэ вышон андав кораблё андэ море о див, кай вов тэ авэл майлокхо.

³⁹ Дэнзор онэ на ужангле пхув, сави сикадиляпэ, нэ удикхле бухта и тишаеско бэрэго, каринг онэ камэнас тэ доплывисарэн пэ кораблё. ⁴⁰ Тунчи матросоря обшииндэ дуря лэ якоренца и ашадэ лэн андэ море, онэ россхангле рулё, подлинэ цэкно парусо и линэ тэ плывисарэн кав бэрэго. ⁴¹ Нэ кораблё нахукля по тишей тай ашыля. Кораблёско нак попэля андо тишей и ашыля, сар ганавдо, ай волноря розмарэнас палатуно тхан по кораблё. ⁴² Тунчи и халавдэ камле тэ умарэн всаворэн барунарэн, кай лэндар нико тэ на уплывисарэл и тэ на нашэл. ⁴³ Нэ шэлэнго камля тэ фэрисарэл лэ Павлос и на домэклэ лэн. Вов припхэндя колэнди, ко жанэнас тэ плывисарэн, тэ хукэн андо пай майанглал и тэ плывисарэн кав бэрэго. ⁴⁴ Ай всаворэнди аврэнди манушэнди трэбуй сас тэ фэрисарэнпэ пэ кашта и пэ вся, со ашыляпэ лэ кораблёстар. Кадя онэ всаворэ мишто доплывисардэ кав бэрэго.

28

Пэ Мальта

¹ Кала амэ фэрисардэпэ, тунчи ужангле, со кодва острово акхарэлпэ Мальта.

² Мануша, савэ жувэнас котэ, фартэ мишто прилини амэн. Онэ россхабардэ яг, акхардэ амэн пэстэ, колэсти со сас шудро и жалас брышинд. ³ Кала Павло стиля обэрэмко кашта тай ашыля тэ шол андэ яг, лэсти по васт хутилдя дандэнца сап, саво фэрисарэласпэ лэ ягатар и выгульдя андай кашта. ⁴ Ай кала мануша, савэ жувэнас котэ, удикхле, со кай васт лэ Павлоско припханглэпэ сап, онэ линэ тэ пхэнэн екх экхэсти:

— Душол кадва мануш варикас умардя: вов фэрисардяпэ андав море, нэ чячимос на ашавэл лэс жундэса.

5 Нэ Павло сшутя сапэс пав васт андэ яг, и сап на тердя лэсти нисави бида. **6** Мануша ажутярэнас, со вов шувлёла, пэрэла и мэрэла. Онэ бут връяма ажутярэнас, нэ кала дикхле, со лэса нисо на терэлпэ, линэ тэ гындон пай авэр, со вов варисаво дэл.

7 Найдур сас пхувьяд, савэ сас лэ пхурэдэрэстирэ пав острово, савэс акхарэнас Публиё. Вов лошаса приля амэн пэстэ, и амэ трин дес самас лэстэ. **8** Кав Публиё сас насвало дад. Вов пашлёлас пэ пато, сас фартэ пхабардо и лэстэ сас дизентирия. Павло зажыля лэстэ, мангялэ Дэвлэс, тховдя пэр лэстэ васта и састьярдя лэс. **9** Тунчи всаворэ насвалэ пав острово линэ тэ авэн лэстэ и тэ састьярэнпэ. **10** Онэ баря пативаса обжылепэ амэнца, ай кала амэнди трэбуй сас тэ плывисарас, онэ динэ амэнди вся, со амэнди трэбуй сас андо дром.

Андо Римо

11 Тунчи кала прожыля трин шон, амэ выжыле андо море по кораблё андай Александрия, саво винтэрэлас по острово. Кадва кораблё проакхардо Дуй Пхрала*. **12** Амэ авилям андэ Сиракуза и сас котэ трин дес. **13** Котар амэ плывисардэ андо море и авиле андэ форо Ригиё. Пэ авэр дес пхурдэлас балвал пав юго, ай пэ дуйто дес амэ авиле андэ Путеолоря. **14** Котэ амэ аракхле пхралэн, онэ мангле амэн тэ авас лэнца эхта деса. Тай акэ амэ авилям андо Римо.

15 Пхрала андо Римо ашундэ пала кода, со амэ авиле, и выжыле, кай тэ дикхэнпэ амэнца пэ Апиёско форо, и андо форо Трин Гостиницоря. Кала Павло удикхля лэн, вов наисардя лэ Дэвлэс тай взагляпэ духоса. **16** Амэ авиле андо Римо, лэ Павлости динэ тэ жувэл ежэнэсти, нэ паша лэстэ жувэлас халавдо, саво дикхэлас пала лэстэ.

Бути важ о Рай андо Римо

17 Кала прожыле трин деса, Павло акхардя майанглунэн андай иудеёря. Кала онэ стидэпэ, вов пхэндя лэнди:

— Пхралалэ! Ман схутилдэ андо Иерусалимо и отдинэ лэ римлянёнэнди, нэ мэ на тердэм нисо вырито англав амаро народо и отпхэндювавас колэстар, со прилито амарэ дадэнца. **18** Римляноря розлинэ мэрно рындо и камле ман тэ отмукэн, колэсти со пала мандэ нинай нисаво ужылимос, пала саво ман трэбуй тэ умарэн. **19** Нэ сар иудеёря на камэнас тэ прилэн када, манди трэбуй сас тэ мангав сындо кав императоро, и тердэм мэ када най кай тэ ужылисарав пэско народо. **20** Колэсти мэ акхардэм тумэн адес, соб тэ дикхавпэ и тэ подав дума тумэнца. Колэсти со кала лэпунзэ пэ мандэ палай надия лэ Израилёстири.

21 Кола, савэ ашунэнас лэ Павлос, пхэндэ:

— Амэнди нико на пистросардя андай Иудея пала тутэ нисавэ лила, и нико андай пхрала на пхэндя пала тутэ нисо вэрыто. **22** Нэ амэ камас тутар тэ ашунас, сар ту ежено гындос, амэ жанас качи кода, со мануша пай всаворэ тхана вырито пхэнэн пала кадва сыйтимос.

23 Онэ допхэндэпэ лэ Павлоса, и андо екх вытидо дес бут мануша авиле андо чер, кай вов жувэлас. Павло пав дэнзор жыкай рят пхэнэлас лэнди пала Дэвлэстиро Тхагаримос и допхэнэлас лэнди палав Исусо лавэнца андав Законо Моисеёско и пророкоря. **24** Коисавэ патяйле лэстирэ лавэнди, ай коисавэ на патяйле. **25** Онэ линэ тэ ханпэ машкар пэстэ, и сар онэ ашыле тэ ужан, Павло пхэндя кацавэ лава:

— Свэнто Духо чячимос пхэндя тумарэ дадэнди черэз пророко Исая:

26 «Жа кав кадва народо и пхэн:

“Тумэ авэна тэ ашунэн, нэ на полэн,
авэна тэ дикхэн, нэ на удикхэна.

27 Води калэ народоско ашыля, сар бар,

* **28:11** 28.11 Пэ греконэндири шыб «Диоскуры». Кадя акхарэнас дуй пхралэн-близнятонэн Касторос и Полуксос, пэ савэ гындонас, со онэ шавэ Зевсоско. Сар патянас мануша андэ кадья връяма, калэ пхрала фэрисавэнас колэн, ко плывисарэнас пай моря.

онэ пхарэс ашунэн канэнца
и якха пэстирэ затердэ,
соб тэ на дикхэн якхэнца,
соб тэ на ашунэн канэнца
и тэ на полэн водеса
кай тэ обрисавэн,
соб Мэ тэ састьярав лэн"».

28-29 Акэ жанэнтэ, со фэрисаримос Дэвлэстиро бишалдо найиудеёнди: онэ и ашунэна кадва лав![†]

30 Павло жувэлас андо Римо инке дуй бэрш андо чер, саво вов намисардя, и прилэлас всаворэн, ко авэлас лэстэ. **31** Вов бидарако роспхэнэлас палав Тхагаримос Дэвлэско, сыйярэллас палав Рай Иисусо Христосо, и лэс нико на тэрдярэлас.

[†] **28:28-29** 28.28-29 Андэ коисавэ гречески манускрипторя инке исин кацавэ лава: «Кала вов пхэндя акала лава, иудеёра розжылепэ и фартэ ханаспэ машкар пэстэ».